








10508

2011-12-16



ŒUVRES
DE PLUTARQUE.

TOME SEPTIEME.

VIES DES HOMMÉS ILLUSTRÉS
contenues dans le septième Volume.

ALEXANDRE LE GRAND. }
JULÉS CÉSAR. } comparés*.

AGIS ET CLÉOMÈNE. . . }
TIBERIUS ET CAIUS. . . } comparés.

515779
562

LES VIES
DES
HOMMES ILLUSTRÉS
DE PLUTARQUE,

*Traduites du Grec par JACQUES AMYOT,
Grand-Aumônier de France ;*

Avec des Notes & des Observations de M. VAUVILLIERS,
Lecteur du Roi, Professeur de Langue grecque au Collège
Royal, de l'Académie Royale des Inscriptions & Belles-
Lettres.

TOME SEPTIÈME.



A PARIS,

Chez JEAN-BAPTISTE CUSSAC, Libraire,
rue & carrefour S. Benoît, vis-à-vis la rue Taranne.

M. DCC. LXXXVI.

AVEC APPROBATION, ET PRIVILÈGE DU ROI.

1. The first part of the paper is devoted to a discussion of the general principles of the theory of the structure of the atom. It is shown that the structure of the atom is determined by the laws of quantum mechanics, and that the laws of quantum mechanics are determined by the laws of the theory of relativity.

2. The second part of the paper is devoted to a discussion of the general principles of the theory of the structure of the molecule. It is shown that the structure of the molecule is determined by the laws of quantum mechanics, and that the laws of quantum mechanics are determined by the laws of the theory of relativity.

3. The third part of the paper is devoted to a discussion of the general principles of the theory of the structure of the crystal. It is shown that the structure of the crystal is determined by the laws of quantum mechanics, and that the laws of quantum mechanics are determined by the laws of the theory of relativity.

4. The fourth part of the paper is devoted to a discussion of the general principles of the theory of the structure of the solid. It is shown that the structure of the solid is determined by the laws of quantum mechanics, and that the laws of quantum mechanics are determined by the laws of the theory of relativity.

5. The fifth part of the paper is devoted to a discussion of the general principles of the theory of the structure of the liquid. It is shown that the structure of the liquid is determined by the laws of quantum mechanics, and that the laws of quantum mechanics are determined by the laws of the theory of relativity.

6. The sixth part of the paper is devoted to a discussion of the general principles of the theory of the structure of the gas. It is shown that the structure of the gas is determined by the laws of quantum mechanics, and that the laws of quantum mechanics are determined by the laws of the theory of relativity.

7. The seventh part of the paper is devoted to a discussion of the general principles of the theory of the structure of the plasma. It is shown that the structure of the plasma is determined by the laws of quantum mechanics, and that the laws of quantum mechanics are determined by the laws of the theory of relativity.

8. The eighth part of the paper is devoted to a discussion of the general principles of the theory of the structure of the vacuum. It is shown that the structure of the vacuum is determined by the laws of quantum mechanics, and that the laws of quantum mechanics are determined by the laws of the theory of relativity.

9. The ninth part of the paper is devoted to a discussion of the general principles of the theory of the structure of the universe. It is shown that the structure of the universe is determined by the laws of quantum mechanics, and that the laws of quantum mechanics are determined by the laws of the theory of relativity.

10. The tenth part of the paper is devoted to a discussion of the general principles of the theory of the structure of the world. It is shown that the structure of the world is determined by the laws of quantum mechanics, and that the laws of quantum mechanics are determined by the laws of the theory of relativity.

*EXPLICATION des deux Figures
contenues dans ce septieme Volume.*

LA premiere estampe représente l'appartement d'Alexandre. Le jeune Monarque paroît assis sur son trône, la tête couverte de son casque ; plusieurs soldats amènent devant lui Timoclée enchaînée. L'air de pudeur qui caractérise sa figure , convient parfaitement au costume dans lequel elle a été arrêtée par des vainqueurs brutaux. Alexandre admire sa vertu , & la renvoie libre avec ses enfans & tous ceux qui lui appartenoient. *Vie d'Alexandre le grand*, p. 54. Voyez les vertueux faits des Femmes, Tome XVI, p. 212.

ON voit dans la seconde les tours & les remparts d'Alexandrie, dont on reconnoît le port à des anneaux destinés à amarrer des vaisseaux. César paroît au-devant d'un portique , accompagné de quelques-uns de ses officiers & de ses

*

vj

foldats. Théodote à genoux lui présente la tête de Pompée, César se détourne avec horreur ; mais il ne punit pas l'assassin. *Vie de César*, p. 278.

SOMMAIRE

S O M M A I R E

DE LA VIE D'ALEXANDRE LE GRAND.

PLUTARQUE se propose de choisir dans les vies d'*Alexandre* & de *César* les traits les plus propres à faire juger leur esprit & leur cœur. II. Diverses traditions sur la naissance d'*Alexandre*. V. *Alexandre* vient au monde le jour que le temple de *Diane* d'*Éphèse* est brûlé. VI. Constitution physique d'*Alexandre*. VII. Qualités morales qu'il montre dans son enfance. VIII. De ceux qui étoient chargés de son éducation. IX. *Alexandre* dompte le cheval appelé *Bucéphale*. X. *Philippe* engage *Aristote* à se charger de l'institution de son fils. XI. Quelles sciences *Alexandre* apprit d'*Aristote*. XII. Son estime particulière pour l'*Iliade* d'*Homère*. XIII. Premiers exploits d'*Alexandre*. XIV. Il se brouille avec *Philippe*. XV. *Démaratus* engage *Philippe* à se raccommoder avec son fils. XVI. *Philippe* l'empêche d'épouser la fille de *Pexodorus*, prince de *Carie*. XVII. *Pausanias* assassine *Philippe*. XVIII. Conduite d'*Alexandre* en montant sur le trône. XIX. Il saccage la ville de *Thèbes*.

Tome VII.

A

XX. *Générosité de Timoclée.* XXI. *Alexandre se repent de la manière cruelle dont il avoit traité les Thébains.* XXII. *Entrevue d'Alexandre & de Diogène.* XXIII. *Présages qui précèdent l'expédition d'Alexandre contre l'Asie.* XXIV. *État des forces d'Alexandre à son départ.* XXV. *Il va à Ilion sacrifier à Diane & aux héros Grecs morts au siège de Troie.* XXVI. *Il entreprend de passer le Granique à la vue de l'armée de Darius qui l'attendoit sur la rive opposée.* XXVII. *Clitus lui sauve la vie.* XXVIII. *Alexandre remporte la victoire.* XXIX. *Heureuses suites de cette victoire.* XXX. *Alexandre subjugué la Cilicie, la Phénicie, la Pamphylie.* XXXI. *Il coupe le nœud Gordien.* XXXII. *Songe de Darius.* XXXIII. *Alexandre tombe malade.* XXXIV. *Confiance d'Alexandre dans son médecin Philippe. Il est guéri.* XXXV. *Conversation de Darius avec Amyntas.* XXXVI. *Bataille d'Iffus.* XXXVII. *Bon mot d'Alexandre à la vue du luxe de Darius.* XXXVIII. *Conduite d'Alexandre envers la mère, la femme & les filles de Darius.* XXXIX. *Contenance d'Alexandre.* XL. *Sa sobriété.* XLI. *Sa manière journalière de vivre.* XLII. *Il aimoit à se vanter & à s'entendre*

S O M M A I R E.

1

flatter. XLIII. Dépense de sa table. XLIV. Il envoie saisir les richesses que les Perses avoient déposées à Damas. XLV. Il assiége la ville de Tyr. XLVI. Pendant le siège il va faire la guerre aux Arabes. XLVII. Il prend Tyr. XLVIII. Il prend la ville de Gaza. XLIX. Il met l'Iliade d'Homère dans un coffre magnifique. L. Il bâtit Alexandrie. LI. Il va consulter l'oracle de Jupiter Hammon. LII. Réponse de l'oracle. LIII. Ce qu'Alexandre pensoit lui-même de sa filiation divine. LIV. Fêtes & jeux qu'Alexandre fait célébrer. LV. Il refuse les propositions d'alliance de Darius. LVI. Récit que l'eunuque Tiréus fait à Darius de la manière dont Alexandre avoit traité les princesses captives. LVII. Combat de deux valets de l'armée d'Alexandre, sous le nom d'Alexandre & de Darius. LVIII. La dernière bataille se donna auprès de Gausamèle, & non pas d'Arbèles. LIX. Alexandre rejette le conseil qu'on lui donne de combattre la nuit. LX. Long & paisible sommeil d'Alexandre avant la bataille. LXI. Sa réponse à la demande que Parménion lui fait d'envoyer un renfort pour défendre le bagage. LXII. Il range ses troupes en bataille. LXIII. Victoire com-

plette d'Alexandre. LXIV. Il fait rebâtir la ville de Platées. LXV. Du gouffre de Naphthe auprès d'Ecbatane. LXVII. Alexandre s'empare de Suze. LXVIII. Il se rend maître de la Perse. LXIX. Le palais de Xerxès brûlé à l'instigation de Thaïs. LXX. Libéralités d'Alexandre. LXXII. Il reprend ses officiers de leur luxe excessif. LXXIII. Amitié affectueuse d'Alexandre, cordialité qu'il témoigne à ses amis. LXXV. Il poursuit Darius avec une grande célérité. LXXVI. Mort de Darius. LXXVII. Bucéphale perdu & retrouvé. LXXVIII. Alexandre bat les Scythes. LXXIX. De la fable des Amazones. LXXX. Il engage par une harangue ses troupes à poursuivre la conquête de l'Asie. LXXXI. Il épouse Roxane. LXXXII. Appaise une querelle d'Hephaestion & de Cratère. LXXXIII. Philotas se rend suspect à Alexandre. LXXXIV. Il recèle la conjuration formée par Limnus (Dymnus) contre Alexandre. LXXXV. Mort de Philotas & de Parménion. LXXXVI. Meurtre de Clitus. LXXXIX. Douleur d'Alexandre. XC. Anaxarque le console. XCI. Altercation entre Anaxarque & Callisthène. XCII. Indiscrétion de Callisthène qui le rend odieux aux Macédoniens, & à Alexandre. XCIII. Les

S O M M A I R E. 3

courtisans d'Alexandre l'irritent contre Callisthène.
 XCIV. *Mort de Callisthène & de Démaratus.*
 XCV. *Alexandre prêt à partir pour l'Inde, fait brûler tout le butin & le bagage inutile.* XCVI.
Divers présages du succès de son expédition. XCVII.
Il prend la roche de Sifiméthrès. XCVIII. *Comment il reçoit les ambassadeurs des villes du pays.* XCIX.
Entrevue d'Alexandre & de Taxile. C. *Perfide cruauté d'Alexandre envers une troupe de braves Indiens.*
 CI. *Il passe l'Hydaspe pour aller attaquer Porus.*
 CII. *Il remporte la victoire.* CIII. *Comment il traite Porus.* CIV. *Les Macédoniens refusent d'entrer plus avant dans l'Inde.* CV. *Monumens qu'Alexandre laisse de son expédition.* CVI. *Il prend la ville des Malliens.* CVII. *Il fait des présens aux sages du pays appelés Gymnosophistes.*
 CVIII. *Il envoie Onesicritus vers les Brachmanes.*
 CIX. *Il va voir l'Océan.* CX. *Pompe bachique d'Alexandre.* CXI. *Soulevemens & désordres dans l'empire d'Alexandre.* CXII. *Il fait mourir celui qui avoit violé le tombeau de Cyrus.* CXIII. *Mort du Brachmane Calanus.* CXIV. *Alexandre épouse Statira.* CXV. *Il renvoie les Macédoniens devenus inutiles à la guerre avec de grands présens.* CXVI.

Mort & sépulture d'Hépheſtion. CXVII. Présages qui avertiſſent Alexandre de ne point entrer à Baby-lone. Il y entre, CXVIII. Nouveaux présages de malheur. CXIX. Alexandre devient triſte & déſiant. CXX. Superſtition d'Alexandre. CXXI. Il tombe malade. CXXII. Il meurt. CXXIII. S'il eſt vrai qu'il eût été empoisonné. CXXIV. Roxane fait mourir Statira.

Depuis la première année de la 106^e olympiade, juſqu'à la première année de la 114^e, avant J. C.

324.

LES VIES
DES
HOMMES ILLUSTRÉS
GRECS ET ROMAINS,
COMPARÉES L'UNE AVEC L'AUTRE
PAR PLUTARQUE DE CHÆRONNÉE.

ALEXANDRE LE GRAND.

AYANT proposé d'escire en ce livre les vies du roy Alexandre le grand, & de Julius Cæsar qui desfeit Pompeius, pour le nombre infiny des choses qui se presentent devant moy, je n'useray d'autre prologue, que de prier les lecteurs qu'ilz ne me reprenent point, si je n'expose pas le tout amplement & par le menu, ains sommairement en abbregeant beaucoup de choses, mesmement en leurs principaux actes & faicts plus memorables: car il fault qu'ilz se souvienent, que je n'ay pas pris à escire des histoires, ains des vies seulement: & les plus haults & les

8 ALEXANDRE LE GRAND.

plus glorieux exploits ne sont pas tousjours ceulx, qui monstrent mieulx le vice ou la vertu de l'homme : ains bien souvent une legere chose, une parole ou un jeu, mettent plus clairement en evidence le naturel des personnes, que ne font pas des desfaittes où il fera demouré dix mille hommes morts, ne les grosses batailles, ny les prises des villes par siege ne par assault. Tout ainsi donques comme les peintres qui portrayent au vif, recherchent les semblances seulement ou principalement en la face & aux traicts du visage, esquelz se voit comme une image empreinte des meurs & du naturel des hommes, sans guerres se soucier des autres parties du corps : aussi nous doit on conceder que nous allions principalement recherchant les signes de l'ame, & par iceulx formans un portraict au naturel de la vie & des meurs d'un chacun, en laissant aux historiens à escrire les guerres, les batailles & autres telles grandeurs.

II. C'est donques chose tenue pour toute asseurée, que Alexandre le grand du costé de son pere estoit descendu de la race de Hercules par Caranus, & du costé de sa mere, qu'il estoit extrait du sang des Æacides par Neoptolemus. Et dit on que le roy Philippus son pere estant jeune garson devint amoureux de sa mere Olymphas, qui estoit aussi encore petite fille orphe-

fine de pere & de mere, en l'isle de Samothrace, là où ilz furent tous deux ensemble receuz en la confrairie de la religion du lieu, & que depuis il la demanda en mariage à son frere Arymbas, qui la luy donna : mais la nuit de devant celle qu'ilz furent enfermez ensemble dedans leur chambre nuptiale, l'espousée songea que la foudre luy estoit tumbée dedans le ventre, & que du coup il s'estoit allumé un grand feu, lequel vint à se dissoudre en plusieurs flammes qui s'espandirent par tout : & Philippus son mary songea aussi depuis qu'il seelloit le ventre de sa femme, & que l'engraveure du seel dont il le seelloit, estoit la figure d'un lion. Si interpreterent les autres devins, que ce songe l'admonestoit qu'il devoit soigneusement avoir l'œil sur sa femme : mais un Aristander Telmessien^{*} respondit, que c'estoit à dire que sa femme estoit enceinte : « Pource, dit il, que lon ne seelle » point un vase où il n'y a rien dedans, & » qu'elle estoit grosse d'un filz qui auroit cueur » de lion ». On dit aussi que quelquefois ainsi comme elle dormoit en son liçt, on apperceut un grand serpent estendu tout au long d'elle, qui fut cause principale, à ce que lon presume, de refroidir l'amour que luy portoit, & les

^{*} Telmessien; car Telmesse est une ville de Lycie, où l'art des Aruspices étoit très-florissant.

caresses que luy faisoit son mary, de maniere qu'il n'alloit plus si souvent, comme il avoit accoustumé au paravant, coucher avec elle, fust ou pource qu'il eust peur qu'elle ne luy feist quelques charmes & quelques sorcelleries, ou qu'il se reputast indigne d'avoir sa compagnie, ayant opinion qu'elle fust aimée & jouie de quelque dieu.

III. On le racompte encore en une autre sorte : c'est que les femmes de ce quartier là de toute ancieneté sont ordinairement esprises de l'esprit d'Orpheus & de la fureur divine de Bacchus, dont on les surnomme Clodones & Mimallones comme qui diroit furieuses & belliqueuses, & font plusieurs choses semblables aux femmes Edoniennes & Thraciennes, qui habitent au long de la montagne de Æmus : tellement qu'il semble que ce mot de Trescevin ¹, qui en langage Grec signifie curieusement & superstitieusement vacquer aux ceremonies du service des dieux, ait esté derivé d'elles : & que Olympias aimant telles inspirations & telles fureurs divines, en les exerçant plus barbaresquement & plus effroyablement que les autres, attiroit après elle en leurs danses de grands serpens privez, lesquels se glissant souvent par entre les lierres,

¹ *Τρῆσκειν*, imiter les Thraces, & de-là exercer leur culte superstitieux.

dont les femmes sont couvertes en telles ceremonies, & hors des vans sacrez qu'elles y portent, & s'entortillans à l'entour des javelines qu'elles tiennent en leurs mains, & des chapeaux qu'elles ont sur leurs testes, espouventoyent les hommes.

IV. Ce neantmoins depuis que Philippus eut veu ceste vision, il envoya Chæron Megalopolitain à l'oracle d'Apollo en Delphes, pour enquerir que ce pouvoit estre, & ce qu'il devoit faire : où il luy fut respondu, qu'il sacrifiait à Jupiter Hammon, & qu'il le reverast sur tous les autres dieux, mais qu'il perdit l'un de ses yeux, celui qu'il avoit mis à la fente de l'huis de sa chambre, lors qu'il veit ce dieu en forme de serpent couché auprès de sa femme. Et Olympias ainsi comme escrit Eratosthenes, disant à dieu à son filz, lors qu'il se partit pour aller à la conquête de l'Asie, après luy avoir revelé à luy seul en secret, de qui, & comment elle l'avoit conçu, le pria & admonesta de prendre courage digne de celui qui l'avoit engendré. Les autres au contraire, disent qu'elle detesta ce compte là, en disant, « Alexandre ne cessera » il point de me rendre suspecte à la deesse Juno, » en la faisant jalouse de moy » ?

V. Tant y a, comment qu'il en soit, que Alexandre naquît le sixieme jour de juin, que

12 ALEXANDRE LE GRAND.

les Macedoniens appellent Lous² : auquel jour propre fut brulé le temple de Diane en la ville d'Ephese, comme tesmoigne Hegesias Magnesien, qui en fait une exclamation & une rencontre si froide, qu'elle eust peu estre suffisante pour esteindre l'embrasement de ce temple. Car « Il ne se fault pas (dit il) esmerveiller com- » ment Diane laissa lors brusler son temple, pour- » ce qu'elle estoit assez empeschée à entendre, » comme sagefemme, à l'enfantement & à la » naissance d'Alexandre » : mais il est bien vray que tous les prebstres, devins & prophetes qui lors estoient en Ephese, estimans que cest embrasement du temple estoit certain presage de quelque autre grand inconvenient, s'en coururent comme forcenez par la ville, batans leurs visages, en criant, que ce jour là il estoit né quelque grand malheur & quelque grande peste pour l'Asie. Et un peu après que Philippus eut pris la ville de Potidæ, il luy vint trois grandes nouvelles toutes à un coup : l'une, que Parmenion avoit desfait les Esclavons en une grosse bataille : l'autre qu'il avoit gagné le prix de la course de cheval seul, non attelé avec d'autres, ès jeux Olympiques : & la troisieme, que sa femme luy avoit fait un filz, qui estoit Alexandre : dequoy estant de luy mesme bien joyeux,

² Voyez les Observations.

les devins luy augmentèrent encore sa joye, en luy promettant que ce filz qui estoit ainsi né, avec trois victoires toutes ensemble, seroit à l'advenir invincible.

VI. Or quant à la forme de toute sa personne, les images faites de la main de Lysippus sont celles qui la representent le mieulx au naturel. Aussi ne voulut il point qu'autre imager le taillast que luy : car plusieurs de ses successeurs & de ses amis le contrefeirent bien depuis, mais cest ouvrier là, sur tous les autres, a parfaitement bien observé & représenté sa façon de porter le col un bien peu penchant sur le costé gauche, & aussi la douceur de son regard & de ses yeux. Mais quand Apelle le peignit tenant la foudre en sa main, il ne representa pas sa naïfve couleur, ains le feit plus brun & plus obscur qu'il n'estoit au visage : car il estoit naturellement blanc, & la blancheur de son teint mēlée d'une rougeur, qui apparoissoit principalement en sa face & en son estomac. Er me souvient d'avoir leu ès commentaires d'Aristoxenus, que sa charneure sentoît bon, & qu'il avoit l'aleine très douce, & issoit de route sa personne une odeur fort souëfve, tellement que les habillemens qui touchoyent à sa chair en estoient comme tous parfumez, dont la cause possible estoit la temperature & com-

14 ALEXANDRE LE GRAND.

plexion de son corps fort chaulde & tenant du feu, pource que la doulce senteur s'engendre par le moyen de la chaleur qui cuit & digere l'humidité, ainsi comme Theophrastus estime : dont vient que les plus seiches regions, & parties de la terre les plus bruslées de la chaleur du soleil, sont celles qui portent le plus & de meilleures espiceries, à cause que le soleil enleve l'humidité superflue des corps, comme matiere propre de putrefaction : & semble que ceste chaleur naturelle rendoit Alexandre subject à boire, & courageux aussi.

VII. Au demourant, dès qu'il estoit encore enfant, on cogneut evidemment qu'il seroit continent quant aux femmes : car estant impetueux & vehement en toutes autres choses, il estoit difficile à emouvoir aux plaisirs du corps, & en prenoit fort sobrement : mais au contraire sa convoitise d'honneur estoit accompagnée d'une fermeté de courage & une magnanimité plus constante que son aage ne portoit : car il n'appetoit pas toute sorte de gloire, ny procedente de toutes choses indifferemment, comme faisoit son pere, lequel aimoit à monstrier son eloquence, comme eust fait un rhétoricien, & engravoit en ses monnoyes, les victoires qu'il avoit gagnées ès courses de chevaux & chariots aux jeux Olympiques : ains comme quelques uns

luy demandassent un jour s'il se voudroit point presenter à la feste des jeux Olympiques, pour essayer d'y gagner le prix de la course, pource qu'il estoit fort dispos, & léger du pied à merveilles : « Ouy bien, » respondit il, si c'estoyent » roys qui y contrussent » : combien que à parler universellement, il haïst toute forte de ces combatans là en jeux de prix : car ayant par plusieurs fois fait des festes où il proposoit des prix aux joueurs de tragedies & de comedies, aux chantres, musiciens, joueurs de flustes & de cythres, & jusques aux poëtes, & où semblablement il faisoit faire des chasses diverses de tout genre de bestes, & des combats à coups de baston, jamais il ne prit plaisir à faire combattre à l'escrime des poings, ny à l'autre escrime ¹ où les combatans s'aident de tout ce qu'ilz peuvent. Il recueillit une fois des ambassadeurs du roy ² de Perse, pendant que son pere estoit allé en quelque voyage hors de son royaume, & se rendant privé avec eulx, les gaigna tellement par la courtoisie dont il leur usa, & la bonne chere qu'il leur feit, & par ce qu'il ne leur demandoit rien de puerile ny de petit, ains les interrogeoit des distances qu'il y avoit

¹ Le Pancratiûm : nous avons expliqué ailleurs en quoi consistoit cette espèce de combat.

² Ochus.

d'un lieu à autre , & de la maniere comment on alloit sur les champs ès haultes provinces de l'Asie , & du roy mesme de Perse , comme il se deportoit envers ses ennemis , & quelles forces & puissance il avoit , qu'ilz en demourerent grandement satisfaits & plus encore esmerveillez : de maniere qu'ilz n'estimerent plus l'eloquence & la vivacité d'esprit de Philippus ; dont on faisoit tant de compte , à comparaisson de l'instinct à toutes haultes entreprises , & des grands faits que promettoit le naturel de son filz. Au moyen dequoy toutes les fois qu'il venoit nouvelles que son pere avoit pris aucune ville de renom , ou gagné quelque grosse bataille , il n'estoit point fort joyeux de l'entendre , ains disoit à ses egaulx en aage : « Mon pere prendra tout , enfans , & ne me laissera rien de beau » ny de magnifique à faire & à conquerir avec vous ». Car n'aimant point la volupté , ny l'argent , ains la vertu & la gloire , il estimoit que tant plus son pere luy laisseroit de grandes & glorieuses conquestes , tant moins il luy demoureroit de bien à faire par luy mesme : & pourtant voyant que l'estat de son pere & son empire alloit croissant tous les jours de plus en plus , il cuidoit que tout ce qu'il y avoit de beau à faire au monde se deust entierement consumer en luy , & aimoit mieulx recueillir de luy une seigneurie ,

ALEXANDRE LE GRAND. 17

seigneurie, où il y eust occasions de grosses guerres, de grandes batailles, & force matiere de se faire honneur, que non pas de grands tresors, des delices, ny de grands moyens de vivre à son plaisir.

VIII. Or y avoit il autour de luy, comme lon peult penser, plusieurs personnes ordonnées pour le dresser & bien nourrir, comme gouverneurs, chambellans, maistres & precepteurs : mais Leonidas estoit celuy qui avoit la superintendence par dessus tous les autres, homme austere de sa nature, & parent de la royne Olympias : mais quant à luy il haïssoit ce nom de maistre, ou precepteur, combien que ce soit une belle & honorable charge, à raison dequoy les autres l'appelloient le gouverneur & conducteur d'Alexandre, à cause de la dignité de sa personne, & de ce qu'il estoit parent du prince : mais celuy qui tenoit le lieu, & qui avoit le tiltre de maistre, estoit un Lyfimachus natif du pais d'Acarnanie, lequel n'avoit rien de bon ny de gentil en foy : mais pource qu'il se¹ nommoit Phœnix, & Alexandre Achilles, & Philippus Peleus, il tenoit le second lieu après le gouverneur.

IX. Au reste comme Philonicus Theffalien eust

¹ Il se donnoit le nom de Phœnix, à Alexandre celui d'Achille, &c.

18 ALEXANDRE LE GRAND.

amiené au roy Philippus le cheval Bucephal pour le luy vendre , en demandant treze talents ² , ilz descendirent en une belle carriere pour l'essayer & le picquer. Il fut trouvé si rebours & si farouche , que les escuyers disoyent que lon n'en pourroit jamais tirer service , à cause qu'il ne vouloit pas souffrir que l'on montast dessus luy , ny seulement endurer la voix & la parole de pas un des gentilsz hommes , qui fussent autour de Philippus , ains se dressoit à l'encontre d'eulx tous , de façon que Philippus s'en despita , & commanda que lon le remmenast comme beste vicieuse , sauvage & du tout inutile : & l'eust on fait , si n'eust esté que Alexandre , qui estoit present , dit « O dieux ! Quel cheval ilz » rebutent pour ne sçavoir à faute d'adresse & » de hardiesse s'en servir ». Philippus ayant ouy ces paroles , pour la premiere fois ne feit pas semblant de rien : mais comme il les allaist repetant plusieurs fois entre ses dents autour de luy , monstrant d'estre bien marry dequoy lon renvoyoit le cheval , il luy dit à la fin : « Tu » reprens ceux qui ont plus d'aage & d'experience que toy , comme si tu y entendois quelque chose plus que eulx , & que tu sceusses » mieulx comment il fault mener un cheval à

² Sept mille huit cents escus. Amyot. 60,684 livres de notre monnoie.

« la raison qu'ilz ne font ». Alexandre luy respondir : « A tout le moins manieroye-je mieulx » cestuy cy , qu'ilz n'ont fait eulx ». « Mais aussi , » repliqua Philippus , si tu n'en peux venir à » bout , non plus qu'eulx , quelle amende veux » tu payer pour ta temerité » ? « Je suis content , » respondit Alexandre , de perdre autant comme » vault le cheval ». Chascun se prit à rire de ceste response , & fut entre eulx deux la gageure accordée d'une certaine somme d'argent. Et adonc Alexandre s'en courant vers le cheval , le prit par la bride , & le retourna la teste vers le soleil , s'estant apperceu , comme je croy , que le cheval se tourmentoit , à cause qu'il voyoit son ombre , laquelle rumboit & se remuoit devant luy à mesure qu'il se mouvoir : puis en le caressant un peu de la voix & de la main , tant qu'il le veit ronflant & soufflant de courroux , laissa à la fin tout doucement tumber son manteau à terre , & se soublevant dextrement d'un sault leger monta dessus sans aucun danger , & luy tenant un peu la bride roide sans le battre ny harasser , le remeir gentiment : puis quand il veit qu'il eut jetté tout son feu de despit , & qu'il ne demandoir plus qu'à courir , alors il luy donna carriere à toute bride , en le pressant encore avec une voix plus aspre que son ordinaire & un talonnement de pieds. Philippus du

20 ALEXANDRE LE GRAND.

commencement le regarda faire avec une grande destresse de crainte qu'il ne se feist mal, sans mot dire toutefois : mais quand il le veit addroitement retourner le cheval au bout de la carriere, tout fier de l'aïse d'avoir bien fait, alors tous les autres assistans s'en escrierent par admiration : mais au pere les larmes, à ce que lon dit, en vindrent aux yeux de joye qu'il en eut ; & quand il fut descendu de cheval, luy dit en luy baïsant la teste : « O mon filz, il te fault » chercher un royaume qui soit digne de toy : » car la Macedoine ne te sçauroit tenir ».

X. Et considerant que sa nature estoit difficile à manier, pource qu'il s'opiniastroït à ne vouloir point estre forcé de rien, mais que par remonstrance on le conduisoit facilement à la raison, luy mesme tascha tousjouts à luy persuader par raison, ce qu'il luy vouloit faire faire, plus tost que de luy commander : & ne se fiant pas trop de l'institution & nourriture de son filz aux maistres de musique & des lettres humaines, qu'il avoit mis autour de luy pour l'enseigner, ains estimant que c'estoit charge de plus grande portée que la leur, & qui avoit besoin, comme dit Sophocles,

De plusieurs mords & de plusieurs timons :

il envoya querir Aristote, le plus renommé &

ALEXANDRE LE GRAND. 21

le plus sçavant philosophe de son temps , en luy payant un très honorable salaire pour l'escolage de son filz : car ayant par avant deserté & destruit la ville de Stagira ¹, dont il estoit natif ; il la rebastit depuis en faveur de luy , & y remeit les habitans qui s'en estoient fouis, ou qui avoyent esté reduits en servitude, & leur ordonna pour leur demourance , & pour le séjour de leurs études , la maison de plaifance qui est auprès de la ville de Mieza ² là où lon monstre encore des sieges de pierre que Aristote y fait faire , & des allées couvertes d'arbres pour se promener à l'ombre.

XI. Si me semble que Alexandre n'apprit pas de luy les sciences morales & politiques seulement, ains ouit aussi les autres plus secretes , plus difficiles & plus graves doctrines, que les disciples d'Aristote appelloient proprement acroamatiques ou epoptiques, comme qui diroit speculatives, qu'il faut avoir ouyes du maistre pour les entendre, ou recluses arriere de la cognoissance du vulgaire , lesquelles sciences, ilz ne publioient point ny ne les communiquoyent point à la commune : tellement que Alexandre mesme

¹ Sur la côte de la mer Egée , entre Amphipolis & Acanthe , dans la partie de la Macédoine , appelée Chalcidique.

² On ne fait pas sa position ; Berkelius , dans ses savantes notes sur Etienne , croit qu'il faut la placer près de Stagire.

12 ALEXANDRE LE GRAND.

estant ja passé en Asie, & entendant comme Aristote en avoit mis hors & publié quelques livres, luy en escrivit une lettre, par laquelle il l'en tenfa assez librement pour l'honneur de la philosophie, & estoit la teneur de la missive telle : Alexandre à Aristote salut. « Tu n'as » pas bien fait d'avoir publié tes livres des sciences » ces spéculatives, pourautant que nous ne aurons » rien par dessus les autres, si ce que tu nous » as enseigné en secret, vient à estre publié & » communiqué à tous, & je veux bien que tu » faches que j'aimeroye mieulx surmonter les » autres en intelligence des choses haultes & » très bonnes, que non pas en puissance. A » dieu ». A quoy Aristote, pour appaiser cest ambitieux mescontentement, luy respond, que ces livres là n'estoyent ny publiez¹, ny à publier : car, à dire la verité, en tout le traitté, qu'il appelle metaphysique, comme qui diroit, science suyvant la naturelle, il n'y a aucune evidente instruction & expression, qui puisse estre utile, ny pour apprendre à par soy, ny pour enseigner à autrui, de maniere qu'il est escrit pour ceux qui sont desja sçavans, & qui ont esté instruits dès le commencement. Et me semble aussi que

¹ C'est à dire : Ils sont publiez, & si ne le sont pas. *Amyot.* Autant valoit-il mettre cette traduction dans le texte qu'en note ; car c'est le sens exact du grec.

ALEXANDRE LE GRAND. 23

ce fut Aristote , plus que nul autre , qui luy
 fit prendre plaisir & affection à l'art de mede-
 cine : car il n'en aima pas seulement l'intelli-
 gence & la theorique , ains en exercea aussi la
 pratique , en secourant ses amis quand ilz de-
 mouroient malades : & composa quelques re-
 ceptes de medicamens , & quelques reglemens
 de vivre , ainsi comme lon peut cognoistre par ses
 lettres missives : pource que de sa nature il estoit
 homme studieux , & aimoit à lire.

XII. Il voulut aussi avoir l'Illiade d'Homere
 de la correction d'Aristote , que lon appelle la
 correcte ¹ , comme ayant passé sous la verge ,
 & la mettoit tousjours avec son poignard des-
 sous le chevet de son liét , l'estimant & la nom-
 mant nourriture ou entretien de la vertu mili-
 taire , ainsi comme Onesicrates ² a escrit. Et
 quand il fut es haultes provinces de l'Asie , ne
 pouvant recouvrer promptement d'autres livres ,
 il escrivit à Harpalus qu'il luy en envoyast. Il

¹ *Ex rō rēstos.* Aucuns veulent que ce passage s'entende du riche
 coffret , qui fut trouvé entre les bagues du roy Darius , dedans
 lequel Alexandre voulut que lon gardast les livres d'Homere. *Amyot.*
 Voyez les Observations.

² Onesicrates , son vrai nom est Onesicrite. Il accompagna Alexan-
 dre dans son expédition de Perse , & écrivit son histoire ; il étoit
 pilote de son vaisseau. Alexandre l'envoya dans l'Inde vers les
 philosophes appellés Brachmanes. Son histoire a été accusée par
 les anciens de beaucoup d'infidélités ; Plutarque en parle dans la
 suite de la Vie d'Alexandre.

24 ALEXANDRE LE GRAND.

luy envoya les histoires de Philistus, avec plusieurs tragedies de Euripides, de Sophocles & d'Æschylus, & quelques hymnes de Telestus & de Philoxenus ¹. Si aima & honora du commencement Aristote, non moins que son propre pere, comme il disoit luy mesme, pource que de l'un il avoit receu le vivre, & de l'autre le bien vivre : mais depuis il l'eut un peu suspect, non jusques à luy en faire aucun desplaisir, ains seulement jusques à ne luy faire pas tant ny de si amiables & si affectueuses caresses, comme il avoit appris au paravant, ce que lon presuma estre signe de quelque alienation de voulunté : toutefois pour cela ne luy sortit point de l'ame le desir & l'amour de la philosophie, qu'il avoit dès son enfance empraint en son cueur, & qui y estoit creu avec son aage quant & luy, ainsi que tesmoignerent depuis l'honneur qu'il feit au philosophe Anaxarchus, & les cinquante talents ² qu'il envoya à Xenocrates, & Dandamis & Calanus ³, desquelz il feit si grand compte.

¹ Tous deux florissoient dans la quatre-vingt-quinzieme olympiade.

² Trente mille escus. Amyot. 233,437 livres de notre monnoie.

³ Tous deux étoient des philosophes Indiens, vers qui Onesicrite avoit été envoyé, & qui vinrent ensuite trouver Alexandre dans la Perse, où Calanus termina sa vie en se brûlant volontairement à la vue des Perles & des Macédoniens. Voyez Strabon, L. XV, p. 1042 & suiv. Celui que Plutarque nomme ici Dandamis est appelé Mandanis dans Strabon, *ibid.* & Plutarque dans cette Vie d'Alexandre sur la fin.

ALEXANDRE LE GRAND. 15

XIII. Au reste, estant Philippus allé faire la guerre à ceulx de la ville de Byzance, & luy en l'aage de seize ans demouré en Macedoine son lieutenant & garde de son seau, il dompra & subjugua les Medariens¹ qui s'estoyent rebellez : & ayant pris leur ville d'assaut en dechassa les barbares habitans, & y en logea d'autres meslez de plusieurs nations, surnommant la ville Alexandropolis, c'est à dire, la ville d'Alexandre. Il se trouva aussi avec son pere en la bataille de Chæronée contre les Grecs, là où l'on dit que ce fut luy qui donna le premier dedans la bande, que l'on appelloit sacrée, des Thebains : & jusques à mon temps encore monstroient on un vieil chesne, que ceulx du païs appelloient communement le chesne d'Alexandre, pourautant que son pavillon y estoit lors tendu dessous : & non gueres loing de là est le charnier, auquel furent enterrez les corps des Macedoniens qui moururent en la bataille.

XIV. Pour lesquelles choses son pere comme

¹ Il existoit dans la Thrace, auprès de la Macédoine, aux pieds du mont Pangée, une province appelée la Mædie par tous les anciens. Les habitans s'appelloient Mædes, du nom d'un prince Illyrien nommé Mæde, selon Appien. Ce peuple étoit accoutumé à infester la Macédoine, sur-tout lorsque quelque expédition en faisoit sortir les rois. Si quelqu'un les a jamais appelé Médariens, c'est ce que Plutarque savoit apparemment, ou ses copistes. Mais cette connoissance ne nous est pas parvenue.

26 ALEXANDRE LE GRAND.

lon peult estimer, l'aimoit uniquement, & estoit bien aise d'ouir que les Macedoniens appelloient Alexandre leur roy, & Philippus leur capitaine : mais les troubles, qui depuis advindrent en sa maison, à cause de ses nouvelles nopces & nouvelles amours, engendrerent de grands differens & de lourdes querelles entre eulx, pource que la maladie de la dissension & jalousie des femmes penetra jusques à departir les cueurs des roys mesmes, de quoy fut principalement cause l'aigre nature d'Olympias, laquelle estant femme jalouse, cholere & vindicative de nature, alloit irritant Alexandre, & augmentant les mescontentemens qu'il avoit de son pere : toutefois la plus apparente occasion fut celle que luy donna Attalus aux nopces de Cleopatra, que Philippus espousa fille, estant devenu hors.d'aage & de saison amoureux d'elle. Car Attalus, qui estoit oncle de la nouvelle mariée, s'enyvra au festin des nopces, & estant yvre admonesta les autres seigneurs Macedoniens qui estoient aussi au festin, qu'ilz priaissent aux dieux que de Philippus & de Cleopatra il leur peust naistre un hoir legitime, pour succeder au royaume de Macedoine : dequoy Alexandre se sentant picqué, luy jetta une couppe à la teste, en luy disant, « Et moy, » traistre que tu es, te semble il doncques que » je sois bastard » ? Ce que voyant Philippus,

. ALEXANDRE LE GRAND. 27

se leva soudain de la table l'espée traitte en la main : mais de bonne fortune pour tous deux, estant troublé de cholere & de vin , il tumba en terre : & adonc Alexandre se mocquant de luy, « Voilà, dit il, celuy, qui se preparoit pour » passer d'Europe en Asie, en voulant seulement » passer d'un liêt à un autre, il s'est laissé tumber tout de son long ». Depuis ce grand scandale, il prit sa mere Olympias, & la reïmenant en son païs d'Epire, s'en alla ce pendant tenir en Esclavonnie.

XV. Mais en ces entrefaittes Demaratus Corinthien estant hoste de Philippus, & ayant une privaulté fort franche avec luy, le vint voir, & après les premieres caresses de la salutation, comme Philippus luy demandaît comment estoient les Grecs d'accord ensemble : « Vrayement, luy respondit il, sire, il te siet bien » de te soucier & enquerir de la concorde des » Grecs, veu que tu as emply ta propre maison » de si grandes querelles & de tant de dissensions ». Ceste parole poignit Philippus au vif, & luy feit recognoistre sa faulte, de maniere qu'il feit revenir Alexandre par l'entremise de cestuy Demaratus, qu'il y envoya pour luy persuader qu'il retournaît.

XVI. Et comme Pexodorus prince de la Carie desirant par le moyen d'alliance de mariage entrer

28 ALEXANDRE LE GRAND.

en ligue offensive & défensive avec Philippus, presentast sa fille aînée en mariage à Aridæus filz de Philippus, & eust envoyé en Macedoine Aristocritus son ambassadeur, pour traiter & manier cest affaire : les familiers d'Alexandre & sa mere commencerent de rechef à luy faire de nouveaux rapports, & à luy mettre en teste nouvelles suspicions, que Philippus vouloit à son prejudice avancer par ce gros mariage Aridæus, & le laisser son successeur au royaume : dont Alexandre se trouvant ennuyé, envoya un nommé Theffalus joueur de tragedies devers Pexodorus en la Carie, pour luy remontrer qu'il devoit laisser là Aridæus qui estoit bastart, & n'avoir pas le sens entier ny rassis, & chercher plus tost l'alliance d'Alexandre. Pexodorus fut bien plus content d'avoir Alexandre pour son gendre, que non pas Aridæus : mais Philippus en estant adverty, s'en alla luy-mesme en la chambre d'Alexandre, menant quant & luy l'un de ses familiers Philotas filz de Parmenion, & le tenfa fort asprement, en luy remontrant qu'il auroit bien le cueur lasche & indigne de l'estat qu'il luy laisseroit à son trespas, s'il se contentoit d'espouser la fille d'un Carien, qui estoit serf & vassal d'un roy barbare : & quant & quant escrivit aux Corinthiens, qu'ilz luy envoyassent Theffalus pieds & poings liez, & bannit de la Mace-

doine Harpalus , Nearchus , Phrygius & Ptolomæus , les mignons de son filz , lesquelz Alexandre rappella depuis , & les teint tous en grand lieu de faveur auprès de luy.

XVII. Quelque temps après Pausanias ayant esté villainement oultragé en son corps du sceu & par le commandement d'Attalus & de Cleopatra , & n'en ayant peu obtenir reparation ny justice de Philippus , tourna son ire contre luy , & le tua luy mefme par despit : duquel meurtre la coulpe pour la plus part fut bien donnée à Olympias , laquelle , ainfi que lon dit , incita & poulsa ce jeune homme bouillant de courroux à ce faire : mais auffi y en eut il quelque fufpicion , qui toucha à Alexandre : car on dit que comme Pausanias luy parlaft de fon affaire après l'injure receüe , & s'en plaignift à luy , il luy allegua ces vers qui font en la tragedie de la Medée du poëte Euripides , là où elle dit en courroux qu'elle fe vengera

Du marié & de la mariée ,

Et qui luy a pour femme appariée.

Toutefois depuis il feit diligemment chercher & punir feverement tous les complices de la conjuration , & ne fut pas content de ce que fa mere Olympias avoit cruellement traité Cleopatra.

XVIII. Si vint à succeder à la couronne de Macedoine en l'aage de vingt ans¹, & trouva son royaume exposé à grandes envies, espié de dangereux ennemis, & de tous costez environné de griefs perilz, à cause que les nations barbares, voisines de la Macedoine, ne pouvoient supporter le joug de la servitude estrangere, ains regrettoient leurs roys naturelz. Et Philippus ayant conquis la Grece par force d'armes, n'avoit pas eu du temps assez pour la bien dompter, & entierelement accoustumer au joug, ains y ayant seulement un peu remué les gouvemens, avoit laissé les choses en grand trouble & en grand branle, pour n'estre pas de longue main accoustumée de servir : parquoy ceulx du conseil de Macedoine redoubtans la mauvaistié du temps, estoient d'avis que Alexandre abandonnast totalement les affaires de la Grece, & qu'il ne s'aheurast point autrement à les vouloir avoir par force : & au demourant qu'il taschast à regagner tout doucement les barbares qui s'estoyent rebellez, & remedier sagement par douceur au soublevement de ces nouvelletez. Mais luy tout au contraire, se delibera de maintenir & asseurer ses affaires par hardiesse & magnanimité, ayant opinion, que si on le sentoist fleschir à ce commencement, tant peu que ce fust, tout le monde luy

¹ Avant J. C. 336.

ALEXANDRE LE GRAND. 31

courroit sus , & se soubleveroit à l'encontre de luy.

XIX. Si amortit incontinent les mouvemens des barbares , en courant soudain avec son armée jusques à la riviere du Danube, là où il des-
 feit en une grosse bataille Syrmus le roy des Triballiens : & ayant nouvelles d'un autre costé, comme les Thebains s'estoyent rebellez , & que les Atheniens s'entendoyent avec eulx , pour leur monstrier & faire sentir qu'il estoit homme, il
 feit incontinent marcher son armée vers le des-
 troit des Thermopyles , disant qu'il vouloit faire voir à l'orateur Demosthenes , qui l'appelloit en ses harengues , enfant , pendant qu'il estoit en
 Esclavonnie & au país des Triballiens, qu'il estoit devenu adolescent en passant par la Thessalie, & qu'il le trouveroit homme fait devant les mu-
 railles d'Athenes. Arrivé qu'il fut devant The-
 bes , il voulut donner moyens à ceux de la ville de se repentir , & leur demanda seulement Phœ-
 nix & Prothytes, auteurs de la rebellion. Et au demourant feit proclamer à son de trompe, qu'il donnoit pardon & seureté à tous ceulx qui se retourneroyent devers luy : mais les Thebains à l'opposite luy demanderent Philotas & Anti-
 pater, deux de ses principaux serviteurs, & fei-
 rent crier publiquement que ceulx qui vou-
 droient defendre la liberté de la Grece , se joi-

32 ALEXANDRE LE GRAND.

gnissent avec eulx : à l'occasion dequoy il lâcha adonc la bride aux Macedoniens pour leur faire la guerre à toute oultrance. Si combattirent les Thebains de courage & d'affection plus grande que n'estoit leur puissance, attendu que leurs ennemis estoient plusieurs contre un : mais quand la garnison des Macedoniens, qui estoient dedans le chasteau de la Cadmée, sortant sur eulx, les vint encore charger par derriere, alors estans envelopez de toutes parts, ilz furent presque tous tuez sur le champ, la ville prise, destruite & rasée rez pied rez terre¹. Ce qu'il feist faire en intention d'espouventer principalement les autres peuples Grecs par l'exemple de ceste grande desolation des Thebains, à fin qu'il n'y en eust plus pas un qui ozaist lever la teste contre luy : & toutefois encore voulut il donner quelque couleur honeste à ceste execution de vengeance, disant qu'il vouloit satisfaire aux plaintes & doleances de ses alliez & confederes, pource qu'à la verité les Phociens & les Plateiens chargeoyent & accusoyent devant luy les Thebains de grands oultrages : au moyen dequoy exceptant les presbtres & gens de religion, & tous ceux qui estoient amis particuliers, ou hostes de seigneurs Macedoniens, tous

¹ La deuxieme année de la cent onzieme olympiade, avant J. C.
335.

ALEXANDRE LE GRAND. 33

les descendans & parens du poëte Pindarus, & tous ceux qui avoyent contredit à ceulx qui suadoient la rebellion, il feit vendre comme esclaves tout le demourant des habitans de Thebes, qui se trouverent jusques au nombre de trente mille, sans ceux qui estoient morts en la bataille, qui passoient six mille.

XX. Mais entre les miseres & calamitez de ceste pauvre ville de Thebes, il y eut quelques soudars Thraciens, lesquelz ayans razé la maison de Timoclea, dame de bien & d'honneur, issue de noble race, departirent ses biens entre eux : & leur capitaine l'ayant prise à force & violée, luy demanda si elle avoit point caché d'or ou d'argent en quelque part. La dame luy respondit que ouy, & le menant tout seul en un jardin, luy monstra un puis dedans lequel elle disoit, que voyant la ville prise, elle avoit jetté toutes ses bagues & tout ce qu'elle avoit de plus beau & de plus riche meuble. Le barbare Thracien se baissa pour regarder dedans le puis, & elle qui estoit derriere, le poulsa dedans, & puis jetta dessus force pierres, tant qu'elle l'assomma. Les soudards quand ilz le sceurent, la fafirent incontinent, & la menerent liée & garrottée devant le roy Alexandre : lequel, à voir son visage, sa contenance & sa marche, premierement jugea bien que c'estoit quelque

14 ALEXANDRE LE GRAND.

dame d'honneur & de grand lieu, tant elle marchoit asseurement & constamment après ceulx qui la menoyent, sans se monstrier estonnée ny effroyée de chose quelconque : puis quand Alexandre luy demanda qui elle estoit, elle luy respondit qu'elle estoit sœur de Theagenes, celuy qui avoit donné la bataille au roy Philippus devant la ville de Chæronnée, où il estoit mort pour la defense de la liberté des Grecs en estat de capitaine general. Alexandre s'esmerveillant de ceste response genereuse, & aussi de l'acte qu'elle avoit fait, commanda que lon la laissast aller libre avec ses enfans là où elle voudroit, & fait appointment avec les Atheniens, quoy qu'ilz monstrassent evidens signes d'estre fort desplaisans de la fortune des Thebains.

XXI. Car estant lors escheute la feste des mysteres, ilz la laisserent pour le dueil qu'ilz en portoyent, & à ceux qui s'en fouyrent en leur ville, feirent toute l'humanité qu'il leur fut possible : mais fust, ou pource que son courroux estoit desja assouvy, suyvant en cela le naturel des lions, ou pource qu'il voulust après un exemple de très cruelle vengeance, en monstrier un autre de singuliere clemence, non seulement il absout les Atheniens de tout crime, ains leur conseilla & les admonesta davantage qu'ilz eussent l'œil aux affaires, & qu'ilz entendissent à

...the ... of ...


...

conseilla & les admonesta davantage qu'ilz eussent l'œil aux affaires, & qu'ilz entendissent à



Alexandre renvoie Timoclee libre avec tous les siens.

Tom. VII, P. 34.



eux , pource que leur ville estoit pour donner un jour la loy à toute la Grece , si d'aventure il venoit à mourir. Lon dit bien que certainement il se repentit par plusieurs fois depuis , d'avoir ainsi miserablement exterminé les Thebains , & fut le regret qu'il en eut cause , que depuis il se monstra plus humain envers beaucoup d'autres : & sans point de doute il eut opinion que le meurtre de Clytus qu'il occit à la table , & le refus que luy feirent les Macedoniens de passer outre à la conquête du demourant des Indes , qui fut comme une imperfection de son entreprise & diminution de sa gloire , luy advindrent par le courroux & la rancune de Bacchus qui s'en voulut venger de luy : & n'y eut onques puis Thebain de ceux qui peurent eschapper la fureur de sa victoire , qui eut affaire à luy , ou le requist d'aucun chose , qui n'impetrast tout ce qu'il demandoit. Voilà comment la ville de Thebes fut traitée.

XXII. Au demourant les Grecs ayans tenu une assemblée generale des estats de la Grece dedans le destroit du Peloponese , où ilz resoururent qu'ilz feroient la guerre aux Perses avec Alexandre , il y fut eleu capitaine general de la Grece : & là comme plusieurs , tant philosophes , que gens d'affaires , l'allassent visiter , pour s'esjouir avec luy de son election , il cuida bien que

36 ALEXANDRE LE GRAND.

Diogenes le Sinopien ¹, qui se tenoit ordinairement à Corinthe, le deust aller voir aussi : mais quand il veit qu'il ne faisoit compte de luy, ains se tenoit à son aise au faulbourg, qui s'appelle Cranium, il s'en alla luy mesme devers luy, & le trouva couché tout de son long au soleil : toutefois quand il veit tant de gens venir devers luy, il se leva un petit en son seant, & regarda Alexandre au visage. Alexandre le salua & le caressa de paroles, & puis luy demanda, s'il avoit point affaire de quelque chose. « Ouy, respondit il, c'est que tu t'ostes un petit » de devant mon soleil ». Alexandre prit si grand plaisir à ceste responce, & eut en telle admiration la haultesse & grandeur de courage de cest homme, de voir le peu de compte qu'il avoit fait de luy, qu'au partir de là, comme ses familiers se risent ensemble & se moquassent de luy, il leur dit, « Vous en direz ce que vous » voudrez, mais certainement si je n'estois Alexandre, je voudroye estre Diogenes ».

XXIII. Et voulant enquerir l'oracle d'Apollo touchant son voyage de l'Asie, il s'en alla en la ville de Delphes : mais il se rencontra de fortune, qu'il y arriva es jours, que lon appelle malencontreux, es quelz lon n'avoit point acoustumé de demander rien à Apollo : ce neant-

¹ C'est le Cynique.

moins il envoya premièrement devers la prophétisse, qui prononceoit les oracles, la prier de venir : & comme elle en feist refus, alleguant la coustume, qui luy defendoit d'y aller, luy mesme y alla en personne, & la tira par force au temple. Elle adonc voyant qu'elle ne pouvoit resister à son affection, luy dit, « Tu es invincible, à ce que je voy, mon filz ». Ce qu'Alexandre ayant entendu, dit, qu'il ne demandoit point d'autre oracle, & qu'il avoit celuy qu'il desiroit d'elle. Depuis quand il fut sur le point de partir pour aller à son voyage, il eut plusieurs signes & presages divinement envoyez : & entre autres, une image du poëte Orpheus faite de bois de ciprez, en la ville de Lebethres¹, environ ces jours-là rendit grande quantité de sueur : & comme plusieurs redoubtassent ce pronostique là, le devin Aristander au contraire l'interpréta, qu'il en falloit bien espérer : car c'est signe, dit il, « Que Alexandre fera des » conquestes & des prouesses d'armes dignes » d'estre chantées & renommées par tout le » monde, lesquelles feront souvent venir la sueur

¹ C'est apparemment Libethra dans la Thessalie, près de laquelle étoit le tombeau d'Orphée. Il y avoit aussi une fontaine du même nom, d'où on trouve les Muses surnommées Libethrides, quoique Pausanias semble dériver cette épithète de la montagne & de la fontaine de Béotie, qui portoit le même nom.

38 ALEXANDRE LE GRAND.

» au front des poëtes & des musiciens , pour la
» peine qu'ils auront à les descrire & les chanter ».

XXIV. Quant au nombre des combatans , qu'il mena avec luy , ceulx qui en mettent le moins , disent trente mille hommes de pied , & cinq mille de cheval , & ceulx qui en mettent le plus , l'escrivent trente & quatre mille de pied , & quatre de cheval. Et pour les soudoyer & entretenir , Aristobulus escrit qu'il n'avoit pas plus de soixante & dix talents¹ : & Dufis ne met de provision de vivres , que pour trente jours seulement : & Onesicritus dit davantage , qu'il devoit plus de deux cents talents². Toutefois , encore qu'il entraist en ceste guerre avec si peu de moyen pour la soustenir , si ne voulust il jamais monter sur sa navire , que premièrement il ne se fust informé de l'estat de tous ses amis , pour entendre les moyens qu'ilz avoyent de le suyvre , & qu'il n'eust distribué à l'un des terres , à l'autre un village , & à l'autre le revenu de quelque bourgade , ou de quelque port , tellement qu'en ces dons là , il employa & consuma presque tout le domaine des roys de Macedoine. Parquoy Perdicas luy demanda , « Mais pour toy , Sire , que retiens tu » ? Et il luy respondit promptement , l'esperance. « Nous

¹ Quarante deux mille escus. *Amyot.* 32⁵, 812 l. de notre monnoie.

² Cent vingt mille escus. *Amyot.* 333, 750 liv. de notre monnoie.

« y voulons donques, repliqua Perdicas, avoir
 « part aussi, puis que nous allons quant & toy » :
 & ainsi refusa le revenu que le roy luy avoit
 assigné pour sa pension : ce. que quelques uns
 des autres feirent aussi comme luy : mais ceulx
 qui en voulurent recevoir, ou qui en demande-
 rent, il leur en donna fort liberalement, &
 despendit en cela la plus part du domaine or-
 dinaire de son royaume.

XXV. En telle affection & telle delibera-
 tion donques passa il le destroit de l'Hellespont,
 & allant jusques en la ville d'Ilium, y sacrifia
 à Diane¹, & y espendit des effusions funerales aux
 demi-dieux, c'est à dire, aux princes qui mouru-
 rent en la guerre de Troye, dont les corps y
 estoyent enseveliz, principalement à Achilles,
 la sepulture duquel il oignit d'huile, & courut
 nud tout à l'entour avec ses mignons, selon la
 coustume ancienne des funerailles, puis la couvrit
 toute de chapeaux & de festons de fleurs, disant
 qu'il estoit bien heureux d'avoir eu en sa vie un
 loyal amy, & après sa mort un excellent herault
 pour dignement chanter ses louanges. Et ainsi
 qu'il alloit çà & là par la ville, visitant les choses
 notables qui y estoyent, quelqu'un luy demanda
 s'il vouloit point voir la lyre de Paris : auquel
 il respondit, « Je n'ay pas grande envie de voir

¹ Rec : à Minerve & aux héros.

» celle là , mais je verroye volontiers celle d'A-
 » chilles, sur laquelle il jouoit & chantoit les
 » hauts faicts & prouesses des hommes vertueux
 » du temps passé ».

XXVI. Ce pendant les capitaines & lieutenans du roy de Perse , Darius , ayans mis une grosse puissance ensemble , l'attendoient au passage de la riviere du Granique ¹. Si estoit necessaire de combattre là , comme à la barriere de l'Asie , pour en gagner l'entrée : mais la plus part des capitaines de son conseil craignoient la profondeur de ceste riviere , & la haulteur de l'autre rive qui estoit roide & droite , & si ne la pouvoit on gagner ny y monter sans combattre : & y en avoit qui disoient , qu'il falloit prendre garde à l'observance ancienne des mois , pource que les roys de Macedoine n'avoient jamais accoustumé de mettre leur armée aux champs le mois de juing ² : à quoy Alexandre leur respondit qu'il y remedieroit bien , commandant que lon l'appellast le second may. Davantage Parmenion estoit d'avis que pour le premier jour il ne falloit rien hazarder , à cause qu'il estoit desja tard , à quoy il luy respondit que l'Hellepont rougiroit de honte , si luy crai-

¹ Qui coule au travers de la Phrygie & de la Mysie mineures , & se jette dans la Propontide.

² Voyez les Observations sur le chap. V.

gnoit de passer une riviere, veu qu'il venoit de passer un bras de mer : & en disant cela il entra luy mesme dedans la riviere avec treze compagnies de gens de cheval, & marcha la teste baissée à l'encontre d'une infinité de traicts, que les ennemis luy tirerent montant contremont l'autre rive, qui estoit couppée & droite, &, qui pis est, toute couverte d'armes, de chevaux & d'ennemis qui l'attendoient en bataille rangée, poulfant les siens à travers le fil de l'eau, qui estoit profonde, & qui couroit si roide, qu'elle les emmenoit presque aval, tellement que lon estimoit qu'il y eust plus de fureur en sa conduite, que de bon sens ny de conseil. Ce nonobstant il s'obstina à vouloir passer à toute force, & fit tant qu'à la fin il gaigna l'autre rive à grande peine & grande difficulté : mesmement pource que la terre y glissoit à cause de la fange qu'il y avoit. Passé qu'il fut, il fallut aussi tost combattre pêle mesle d'homme à homme, pource que les ennemis chargerent incontinent les premiers passez, avant qu'ilz eussent loisir de se renger en bataille, & leur coururent sus avec grands cris, tenans leurs chevaux bien joincts & serrez l'un contre l'autre, & combattirent à coups de javelines premierement, & puis à coups d'espée, après que les javelines furent brisées.

XXVII. Si se ruerent plusieurs ensemble tout

42 ALEXANDRE LE GRAND.

à un coup sur luy , pource qu'il estoit facile à remarquer & cognoistre entre tous les autres à son escu , & à la cueuë qui pendoit de son armer , à l'entour de laquelle y avoit de costé & d'autre un pennache grand & blanc à merveilles. Si fut attainct d'un coup de javelot au default de la cuirace , mais le coup ne percea point : & comme Roefaces & Spithridates deux des principaux capitaines Persiens s'adressassent ensemble à luy , il se destourna de l'un , & picquant droit à Roefaces , qui estoit bien armé d'une bonne cuirace , luy donna si grand coup de javeline qu'elle se rompit en sa main , & meit aussi tost la main à l'espée : mais ainsi comme ilz estoient accoupléz ensemble , Spithridates s'approchant de luy en flanc , se souleva sur son cheval , & luy ramena de toute sa puissance un si grand coup de hache barbaresque , qu'il couppa la creste de l'armer , avec un des costez du pennache , & y feit une telle faulcée , que le trenchant de la hache pénétra jusques aux cheveux : & ainsi comme il en vouloit encore donner un autre , le grand¹ Clytus le prevint , qui luy passa une parthisane de part en part à travers le corps , & à l'instant mesme rumba aussi Roefaces mort en terre d'un coup d'espée que luy donna Alexandre.

¹ Grec : Clitus surnommé le Noir , comme on lit dans Arrien & dans Diodore ; car il y en a eu un autre surnommé le Blanc.

XXVIII. Or pendant que la gendarmerie combattoit en tel effort, le bataillon des gens de pied Macedoniens, passa la riviere, & commencerent les deux batailles à marcher l'une contre l'autre : mais celle des Perſes ne ſouſteint point courageuſement ny longuement, ains ſe tourna incontinent en fuite, exceptez les Grecs qui eſtoient à la ſoude du roy de Perſe, leſquelz ſe retirerent enſemble deſſus une motte, & demanderent que lon les priſt à mercy : mais Alexandre donnant le premier dedans, plus par cholere que de ſain jugement, y perdit ſon cheval qui luy fut tué ſoubs luy d'un coup d'eſpée à travers les flancs. Ce n'eſtoit pas Bucephal, ains un autre : mais tous ceulx qui furent en celle journée tuez ou blevez des ſiens, le furent en ceſt endroit là : pource qu'il s'opiniaſtra à combattre obſtineement contre hommes agguerriz & deſeſperez. Lon dit qu'en ceſte premiere bataille il mourut du coſté des barbares vingt mille hommes de pied, & deux mille cinq cents de cheval : du coſté d'Alexandre, Ariſtobulus eſcrit qu'il y en eut de morts trente & quatre en tout, dont les douze eſtoient gens de pied, à tous leſquelz Alexandre voulut, pour honorer leur memoire, que lon dreſſaſt des images de bronze faites de la main de Lyſippus : & voulant faire part de ceſte victoire aux Grecs, il envoya aux Athe-

44 ALEXANDRE LE GRAND.

niens particulièrement trois cents boucliers de ceux qui furent gaignez en la bataille, & généralement sur toutes les autres despoilles, & sur tout le butin feit mettre ceste très honorable inscription : « Alexandre filz de Philippus , » & les Grecs , exceptez les Lacedæmoniens , » ont conquis ce butin sur les Barbares habitans » en Asie ». Quant à la vaisselle d'or ou d'argent, draps de pourpre , & autres telz meubles délicieux à la Persiene, il les envoya presque tous à sa mere , aumoins bien peu s'en fallut.

XXIX. Ceste premiere rencontre apporta soudainement un si grand changement des affaires en faveur d'Alexandre , que la cité mesme de Sardis siege capital de l'empire des Barbares , aumoins en toutes les provinces basses & voisines de la mer , se rendit incontinent à luy , & les autres aussi , exceptées celle de Halicarnasse & celle de Milet , qui luy resisterent : mais il les prit à force. Et ayant semblablement conquis tout ce qui estoit à l'entour , il se trouva puis après en doubte de ce qu'il avoit à faire au reste : car souvent il luy prenoit envie d'aller tout chauldement trouver Darius en quelque part qu'il fust , pour mettre tout au hazard d'une bataille , & souvent aussi luy sembloit plus expédient de s'exerciter premierement en la conquête de ses pais bas , & se fortifier & equipper de

l'argent & des richesses qu'il y trouveroit, pour puis après marcher en meilleur equipage contre luy.

XXX. Mais il y a au païs de la Lydie près la ville des Xanthiens une fontaine, laquelle se desborda lors d'elle mesme, & en regorgeant par dessus ses rives jeta hors du fond une petite lame de cuyvre, sur laquelle y avoit des caracteres engravés de lettres anciennes, lesquelles disoyent que l'empire des Perses devoit estre ruiné par les Grecs : ce qui luy ayant encore accru le cueur davantage, il se hastia de nettoyer toute la coste de la mer jusques en la Cilicie & en la Phœnicie. Mais la facilité, avec laquelle il courut au long de la coste de Pamphilie, a donné occasion & matiere à plusieurs historiens d'amplifier les choses à merveilles, jusques à dire que ce fut un exprès miracle de faveur divine, que ceste playe de mer se soubmeit ainsi gracieusement à luy, veu qu'elle a autrement tousjours accoustumé de tourmenter & travailler fort asprement ceste coste là, tellement que bien peu souvent elle cache & couvre des poinctes de roc, qui sont toutes de reng assez drues le long du rivage, au dessous des haults rochers droits & coupez de la montagne. Et semble que Menander mesme en une siene comédie resmoigne ceste miraculeuse felicité, quand il dit en se jouant :

Cecy me sent son grand heur d'Alexandre ,
 Car si quelqu'un je cherche , il se vient rendre
 Incontinent devant moy de luy mesme :
 Si par la mer , qui maint homme fait blesme ,
 Il me convient aucun lieu traverser ,
 Je puis ainsi que sur terre y passer.

Toutefois Alexandre mesme en ses epistres , sans autrement en faire si grand miracle , escrit simplement qu'il avoit passé par mer le pas que lon appelloit vulgairement l'eschelle ¹ , & que pour le passer , il s'estoit embarqué en la ville de Phaseline , au moyen dequoy il y séjourna plusieurs jours , durans lesquels y ayant veu sur la place une image de Theodectes (car il estoit Phaselitain) il y alla un soir après soupper mener une danse , & jeta dessus force bouquets & chapeaux de fleurs , honorant de bonne grace , en faisant semblant de se joner , la memoire du defunct , pour la conversation qu'il avoit eüe avec luy vivant , à cause d'Aristote & de l'estude de la philosophie.

XXXI. Cela fait , il subjuga aussi les Pisidiens ² qui luy cuiderent resister , & conquist aussi toute la Phrygie , là où en la ville de Gordius , que lon dit avoir esté anciennement le séjour ordinaire du roy Midas , il veit le chariot duquel

¹ Voyez les Observations.

² Près de la Pamphilie.

on parle tant , lié d'une liaison d'escorce de cormier , & luy en compta lon un propos , que les habitans du pais tenoyent pour prophetie veritable , que celuy qui pourroit deslier ceste liaison , estoit predestiné pour estre un jour roy de toute la terre. Si dit le commun que Alexandre ne pouvant deslier ceste liaison , pource que lon n'en voyoit point les bouts tant ilz estoient entrelacez par plusieurs tours & retours les uns dedans les autres , desguainna son espée & couppa le nœud par la moitié , de sorte que lon veit alors plusieurs bouts de la liaison : mais Aristobulus escrit qu'il le denoua fort aiseement , ayant premierement osté la cheville qui tient le joug attaché au timon , & en tirant après le joug dehors.

XXXII. Au partit de là il alla subjuguier les Paphlagoniens & les Cappadociens , & entendit le trespas de Memnon , qui estoit celuy de tous les capitaines de marine que Darius eust à son service , que lon attendoit qui deust donner plus d'affaire & plus d'empeschement à Alexandre : au moyen dequoy estant asseuré de sa mort , cela le confirma de tant plus en la resolution qu'il avoit prise de mener son armée ès haultes provinces de l'Asie. Aussi luy venoit desja le roy Darius au devant , ayant fait son amas à Suse , se confiant en la grande multitude de ses

48 ALEXANDRE LE GRAND.

combatans , dont il avoit mis six cents mille en un camp , & aussi en un songe que ses devins luy avoyent exposé , plus à son gré pour luy complaire , qu'à la verité. Car il luy fut advis une nuit en dormant qu'il voyoit toute l'armée des Macedoniens en feu , & que Alexandre le servoit estant vestu de la mesme robbe que luy portoit lors qu'il estoit asgande ¹ du feu roy , & qu'estant entré dedans le temple de Belus , il estoit soudainement disparu & evanouy. Par lequel songe il appert evidemment que les dieux luy donnoyent à entendre , que les faicts des Macedoniens seroyent très renommez & très glorieux , & que Alexandre conquerroit toute l'Asie , ne plus ne moins qu'avoit fait Darius , qui de asgande estoit devenu roy : mais que bien tost il finiroit aussi sa vie en grande gloire. Encore prit il plus de confiance , quand il veit que Alexandre sejourna quelque temps en la Cilicie ; cuidant que ce fust pour crainte qu'il eust de luy : mais ce fut pour une maladie , laquelle aucuns disent luy estre advenue de travail , les autres pour s'estre baigné en la riviere de Cydnus , qui estoit froide comme glace : de quoy que ce fust ; il n'y eut pas un des autres medecins qui ozaist entreprendre de le secourir , estimans que le mal estoit incurable & plus puissant que tous

¹ Voyez les Observations.

les remedes que lon luy pourroit bailler , & craignans que les Macedoniens ne s'en prissent à eulx , & ne les calumniaissent , s'ilz failloyent à le guarir. Mais Philippus Acarnanien considerant qu'il se portoit très mal , & se confiant en l'amitié que son maistre luy monstroït , pensa que ce seroit trop laschement fait à luy , si le voyant en tel danger de sa vie , il ne se hazardoit jusques à esprouver tous les derniers & plus extremes remedes de son art , à quelque peril que ce fust de sa propre personne : au moyen dequoy il entreprit de luy donner medecine , & luy persuada de la prendre & boire hardiment , si bien tost il vouloit estre sain & dispos pour aller à la guerre. Sur ces entrefaites Parmenion luy escrivit une lettre du camp , par laquelle il l'advertissoit qu'il se donnast bien garde de ce Philippus , pource qu'il avoit esté prattiqué & gagné par Darius , soubz promesse de grands biens , qu'il luy devoit donner avec sa fille en mariage , pour loyer de faire mourir son maistre.

XXXIV. Alexandre ayant leu ceste missive , la meit dessoubs son chevet , sans la monstrier à personne de ses plus familiers : & quand l'heure de prendre la medecine fut venue , Philippus entra dedans la chambre avec les autres privez amis du roy , portant en sa main le gobelet ou estoit la medecine. Alexandre adonc luy donna

30 ALEXANDRE LE GRAND.

la lettre , & prit au mesme instant le gobelet de la medecine franchement , sans monstrier qu'il eust doubte ny souspeçon de rien. Si fut chose esmerveillable, & qu'il faisoit fort bon voir, que l'un d'un costé lisant la lettre , & l'autre beuvant le breuvage en mesme temps , & de considerer comme ilz jetterent tous deux ensemble les yeux l'un sur l'autre , mais non pas avec une mesme chere , ains Alexandre avec un visage riant & ouvert , tesmoignant la confiance qu'il avoit en son medecin Philippus , & l'amitié qu'il luy portoit : & l'autre avec contenance d'homme qui se passionnoit & se tourmentoit pour ceste faulse calumnie que lon luy avoit mise sus : car tantost il tendoit les mains vers le ciel , appellant & invoquant les dieux à tesmoings de son innocence , & tantost il s'approchoit du liét & prioit Alexandre d'avoir bon courage & de faire asseurement ce qu'il luy diroit. Car la medecine commenceant à estre maistresse chassa & enfondra , par maniere de dire , jusques au fond du corps la vigueur & force naturelle , de maniere qu'il perdit la parole , & luy vint une grande foiblesse & pasmoison telle , qu'il n'avoit presque plus de pouls ny d'apparence de sentiment : toutefois cela passé il fut en peu de jours remis sus par Philippus. Et après s'estre un petit renforcé , il se monstra aux Macedoniens : car

ALEXANDRE LE GRAND. 51

jamais ilz ne voulurent avoir patience , quelque chose qu'on leur sceust dire ne promettre de sa convalescence , jusques à ce qu'ilz l'eurent veu.

XXXV. Or y avoit il au camp de Darius un banny de Macedoine nommé Amyntas , lequel cognoissoit bien le naturel d'Alexandre , & voyant Darius en vouldunté de l'aller trouver jusques dedans les destroits & vallées des montagnes , le pria de l'attendre plus tost au lieu où il estoit en pais plat & ouvert de tous costez , attendu qu'il avoit à combattre avec grande multitude de combatans contre bien peu d'ennemis , & que c'estoit son avantage de le trouver en large campagne. Darius luy respondit , qu'il n'avoit que peur qu'il s'enfouist avant qu'il le peust atteindre ou rencontrer , & que par ce moyen il luy eschapast des mains. Amyntas luy repliqua , « Quant » à cela , sire , je te prie n'en ayes point de peur : » car je t'assure sur ma vie , qu'il te viendra » trouver , & que de ceste heure il s'y en vient » tout droit ».

XXXVI. Toutefois les remonstrances de cestuy Amyntas ne peurent divertir Darius qu'il ne feist marcher son camp vers la Cilicie. Et au mesme temps Alexandre aussi dressa son chemin devers la Syrie pour l'aller rencontrer : mais il advint une nuit qu'ilz se faillirent l'un l'autre , & le jour venu retournerent tous deux en arriere ,

52 ALEXANDRE LE GRAND.

Alexandre estant bien joyeux de ceste adventure, & se hastant pour tencontrer son ennemy dedans les destroits, & Darius taschant à regagner le logis, dont il estoit party, & tirer son armée hors des destroits, commenceant desja à s'appercevoir de la faulte qu'il avoit faite, de s'estre jetté en lieux ferrez d'un costé de la montagne, & de l'autre costé de la mer & de la riviere de Pindarus^{*} qui court par le milieu, de sorte qu'il falloit que son armée s'escartast & se divisast en plusieurs troupes, & en païs rabboteux & malaisé pour gens de cheval, duquel au contraire l'assiette en estoit la plus propre du monde pour ses ennemis, qui estoient bonnes gens de pied & en petit nombre. Mais si la fortune donna à Alexandre le champ à propos pour combattre à son avantage, luy sceut encore mieulx ordonner sa bataille pour gagner la victoire : car quoy qu'il fust en nombre de combatans beaucoup plus foible & moindre que son ennemy, si se sceut il bien donner de garde qu'il ne peust estre environné, par ce qu'il avança la poincte droite de sa bataille beaucoup plus que la gauche, & se trouvant en celle poincte combattant ès premiers rens, il meit en rouverte les Barbares qui se rencontrèrent en teste au devant de luy : mais il y fut blecé d'un coup d'espée qu'il receut en la cuisse.

^{*} Son vrai nom est Pinarus.

ALEXANDRE LE GRAND. 55

Chares ¹ escrit que ce fut Darius mesme qui le luy donna , & qu'ilz se rencontrerent jusques à combatre teste à teste l'un contre l'autre à coups de main. Toutefois Alexandre luy mesme escrivant de ceste bataille à Antipater , dit bien qu'il y fut blecé en la cuisse d'un coup d'espée , & qu'il n'en estoit point ensuyvy autrement d'inconvenient , mais il ne met point qui fut celuy qui le blecea.

XXXVII. Ayant donques gagné une très glorieuse victoire , comme celle où il estoit mort plus de cent & dix mille de ses ennemis , il ne peut neantmoins prendre Darius , pource qu'il gagna le devant à fourir d'environ un quart de lieuë seulement : mais bien prit il le chariot de bataille , sur lequel il combattoit , & son arc aussi , puis s'en retourna de la chasse , & trouva les Macedoniens qui pilloyent & saccageoyent tout le reste du camp des Barbares , où il y avoit une richesse infinie (combien qu'ilz eussent laissé la plus part de leur bagage en la ville de Damas ² , pour venir plus delivres à la bataille) mais ilz luy avoyent reservé pour sa personne le logis du

¹ De Mitylene , historien que Plutarque cite plusieurs fois dans la Vie d'Alexandre , & qui paroît avoir été contemporain de ce Prince.

² L'une des villes les plus célèbres de l'Asie , dans la partie de la Syrie appellée Coelé Syrie , près du Mont - Liban.

54 ALEXANDRE LE GRAND.

roy Darius , qui estoit plein d'un grand nombre d'officiers , de riches meubles , & de grande quantité d'or & d'argent. Parquoy si tost qu'il fut arrivé , après avoir osté ses armes , il entra dedans le baing , en disant , « Allons nous en » laver & nettoyer la sueur de la bataille dedans » le baing de Darius mesme ». Et là un de ses mignons luy replica , « Mais bien d'Alexandre : » car les biens des vaincus appartiennent de droit » aux vaincueurs , & doyvent estre nommez » d'eulx ». Et quand il veit , entrant dedans l'estuve , les bassins , baignoueres , les buyes , les phioles & bouettes aux parfums routes d'or fin , ouvré & labouré exquisement , toute la chambre parfumée d'une odeur si souëfve qu'elle sembloit un paradis : puis au partir du baing qu'il entra dedans sa tente , la voyant si haulte , si spacieuse , le liët , la table & l'apprest du soupper , le tout si bien & si magnifiquement en poinët , que c'estoit chose digne d'admiration , il se tourna devers ses familiers , & leur dit : « C'estoit estre » roy cecy , à vostre advis , n'estoit pas » ?

XXXVIII. Mais ainsi comme il se vouloit mettre à table pour soupper , on luy vint dire que lon luy amenoit la mere & la femme de Darius prisonnieres entre les autres dames , & deux de ses filles non encore mariées , lesquelles ayans veu son chariot & son arc , s'estoyent prises

à crier & à se battre desespereement, pensans qu'il fust mort : Alexandre demoura assez long temps sans rien respondre à cela , sentant plus de pitié de leur mauvaise fortune , que de joye de la siene bonne : puis envoya à l'heure même Leonatus devers elles , pour leur faire entendre que Darius n'estoit point mort , & qu'il ne falloit point qu'elles eussent peur d'Alexandre , pource qu'il ne faisoit la guerre à Darius que pour regner seulement : & qu'au regard d'elles , elles auroient de luy tout ce qu'elles avoyent de Darius , pendant qu'il estoit regnant , & avoit son empire en son entier. Si ce propos sembla doux à ces dames prisonnieres , les effects suivirent après , qu'elles trouverent de non moindre humanité : car premierement il leur permit d'inhumier tous ceulx qu'elles voulurent des seigneurs Persiens morts en la bataille , & de prendre au pillage tous les draps , joyaux & ornemens qu'elles voudroyent pour honorer leurs funerailles , & si ne leur diminua chose quelconque de tout l'honneur , ny du nombre des officiers & serviteurs , ny de tout l'estat qu'elles avoyent au paravant , ains leur feit payer encore plus grandes pensions qu'elles ne souloyent avoir : mais la plus honorable , la plus belle & la plus royale grace qu'il feit à ces princeesses prisonnieres , qui avoyent tousjours vescu en grande honesteté

56 ALEXANDRE LE GRAND.

& grande pudicité , fut qu'elles n'ouyrent ny n'entendirent onques chose qui leur deust donner crainte , ou seulement souspeçon de rien qui fut au prejudice de leur honneur : ains eurent leur privé secret , sans que personne hantast parmy elles ny les veist , non comme en un camp d'ennemis , ains tout ne plus ne moins que si elles eussent esté en quelque saint monastere de religieuses estroittement reformées & gardées : combien que la femme de Darius , à ce que lon escrit , fust une très belle princesse , comme Darius aussi estoit un très beau & grand prince , & que les filles ressemblassent à leurs pere & mere.

XXXIX. Mais Alexandre estimant , à mon advis , estre chose plus royale , se vaincre soy mesme , que surmonter ses ennemis , ne les toucha ny elles , ny autres fille ou femme , avant que les espouser , exceptée Barsene ¹ , laquelle estant demourée veufve par le trespas de Memnon , fut prise auprès de Damas. Elle estoit sçavante ès lettres grecques , doulce & de bonne grace , fille d'Artabazus qui estoit né d'une fille de roy. Alexandre la cogneut à la suscitation de Parmenion , ainsi que l'escrit Aristobulus , qui le sollicita de prendre son plaisir d'une si belle & si noble dame. Mais au demourant en re-

¹ Barsene.

gardant les autres dames Persiennes qui estoient prisonnières, belles & grandes à merveilles, il disoit en se jouant, que les dames de Perse faisoient mal aux yeux à qui les contemploit : mais montrant à l'opposite de leurs belles faces la beaulté de sa continence & chasteté, il passoit par devant sans s'y affectonner, non plus que si c'eussent esté des images de pierre sans ame. Auquel propos Philoxenus, qu'il avoit laissé son lieutenant es provinces basses & maritimes, luy escrivit une fois qu'un Theodorus marchand Tarentin avoit deux jeunes enfans à vendre de beaulté singuliere, & qu'il luy mandaist, s'il luy plaisoit qu'il les luy acheptast. Il fut si marry de cela, qu'il se prit à crier tout hault par plusieurs fois. « Mes amis, quelle villannie a jamais ap-
 » perceuë Philoxenus en moy, pour laquelle il
 » ait deu s'estudier, pendant qu'il ne fait rien là,
 » à me procurer de telz reproches » ? Et luy feit rescrire sur le champ avec force injures, qu'il renvoyast ce marchand Tarentin à la malheure, & sa marchandise quant & luy. Aussi reprit il bien aigrement un jeune homme nommé Agnon, qui luy avoit escrit qu'il vouloit acheter un jeune garson, que lon appelloit Crobylus, qui avoit le bruit dedans la ville de Corinthe à raison de sa beaulté, en intention de le luy mener. Et une autre fois ayant esté advêrty, que Damon

38 ALEXANDRE LE GRAND.

& Timotheus Macedoniens estans sous la charge de Parmenion , avoyent violé les femmes de quelques soudards estrangers qui estoient à sa foulde , il escrivit à Parmenion qu'il en eust à faire information , & que s'il trouvoit qu'ilz les eussent de faict violées , qu'il les feist mourir tous deux comme bestes sauvages nées à la ruine des hommes. Et escrit en celle lettre de soy mesme ces propres paroles : « Quant à moy, tant s'en » fault que j'aye veu ny pensé de voir la femme » de Darius , que je ne veulx pas seulement » souffrir que lon tienne propos de sa beaulté » devant moy ». Il avoit accoustumé de dire, qu'il se recognoissoit mortel principalement à deux choses, à dormir & à engendrer : comme ayant opinion que le travail & le plaisir de la volupté que lon prent avec les femmes procedent d'une mesme imbecillité & foiblesse de nature.

XL. Aussi estoit il fort sobre de sa bouche quant au manger , comme il monstra par plusieurs autres preuves , & mesmement par ce qu'il dit à la princesse Ada , laquelle il advoua * pour sa mere , & la feit royne de la Carie : car comme elle , pensant luy faire plaisir , luy envoyast tous les jours force viandes exquisés , & force ouvrages de four , & confitures , & oultre tout

* Il adopta en quelque sorte en lui donna ce nom par respect.

cela encore , des cuisiniers & des pasticiers qu'elle tenoit pour excellents en leur mestier : il luy manda, « Qu'il n'en avoit que faire, pour ce » que son gouverneur Leonidas luy en avoit » baillé de meilleurs , c'est à sçavoir , pour le » dîner se lever avant jour & marcher la nuit, » & pour le soupper, le peu manger au dîner : » & ce mesme gouverneur, disoit il, alloit souvent ouvrir & visiter les coffres où lon estuyoit » les matterats de mon liét & mes habillemens, » pour voir si ma mere y auroit rien fourré de » friandise & de superfluité ». Et si estoit moins subject au vin qu'il ne sembloit : mais ce qui le faisoit estimer tel, estoit le long temps qu'il demouroit à table, plus à deviser qu'à boire : car à chasquefois qu'il beuvoit il mettoit tous-jours en avant quelque long propos, encore estoit ce quand il se trouvoit de grand loisir : car en temps d'affaires, il n'y avoit, ny festin, ny banquet, ny jeu, ny nopces, ny autre passetemps qui l'arrestast, comme ont fait plusieurs autres capitaines. Ce que lon peult facilement cognoistre par la briefveté de sa vie, & par la grandeur & multitude des haults faicts qu'il feit en si peu de temps qu'il vescu.

XLI. Quand il estoit de loisir, le matin, après estre levé, la premiere chose qu'il faisoit il sacrifioit aux dieux, & puis se mettoit in-

60 ALEXANDRE LE GRAND.

continent à table pour dîner : & au reste passoit tout le long du jour son temps ou à chasser ; ou à composer quelque chose , ou à pacifier quelque querelle entre les gens de guerre , ou à lire. Et s'il marchoit par les champs , qu'il ne fust point trop pressé d'aller , il s'exercitoit en allant par país à tirer de l'arc , ou à monter sur un chariot , ou à en descendre , ainsi comme il couroit. Bien souvent , par maniere de jeu , il chassoit aux regnards , ou s'esbatoit à prendre des oiseaux , ainsi comme lon peut voir par les memoires de ses papiers journaux ¹ : puis , quand il estoit arrivé au logis , il entroit au baing , là où il se faisoit frotter & huiler. Cela fait , il demandoit aux panetiers & escuyers trenchans si tout estoit prest en cuisine , & commenceoit à soupper bien tard , de maniere qu'il estoit toujours nuit avant qu'il se meist à table , là où il prenoit merveilleusement grand soing , & avoit diligemment l'œil , à ce que rien n'y fust distribué inegalement , ne plus à l'un qu'à l'autre de ceulx qui mangeoyent quant & luy , & tenoit

¹ L'histoire de sa vie , écrite en forme de journal par Eumène de Candie , & Diodore d'Erythrée. Je m'étonne que le savant Vossius dans ses Historiens grecs mette en question , si ces deux personnages ont fleuri à cette époque ; car Eumène est le capitaine d'Alexandre , devenu si fameux après lui , & dont Plutarque a écrit la Vie.

longuement table , pource qu'il aimoit à parler & à deviser , comme nous avons dit.

XLII. Si estoit bien sa compagnie & sa conversation au demourant la plus agreable & la plus plaisante , que de roy ne prince qui fut onques : car il n'avoit faulte de grace quelconque , excepté que lors il estoit un peu fascheux pour ses vanteries , & tenoit en cela trop du soudard vanteur , qu'il aimoit à racompter ses vaillances : car oultre ce que de luy-mesme il se laissoit facilement aller à ceste vanité de braverie , encore se souffroit il mener par le nez , en maniere de parler , aux flatteurs. Ce qui estoit bien souvent cause de la ruine des gens de bien qui se trouvoyent autour de luy , lesquelz ne vouloyent ny le louer en sa presence à l'envy des flatteurs, ny n'ozoyent aussi dire moins qu'eulx des mesmes louanges qu'ilz luy donnoyent, pource qu'en l'un y avoit de la honte , & en l'autre du danger.

XLIII. Après soupper s'estant de rechef lavé il s'endormoit bien souvent jusques à midy , & quelquefois tout le long du jour ensuyvant. Quant à luy il n'estoit aucunement curieux de viandes exquisés , de sorte que quand on luy envoyoit des païs voisins de la mer quelques fruits singuliers , ou des plus rares poissons , il les envoyoit çà & là à ses amis , sans en retenir bien sou-

62 ALEXANDRE LE GRAND.

vent rien pour soy : toutefois sa table estoit toujours magnifiquement servie, & en augmenta toujours la despenſe ordinaire à meſure que ſes proſperitez & conquêtes allerent en avant, juſques à ce qu'elle monta à la ſomme de mille eſcus¹ par jour. Auſſi s'arreſta elle là, & fut prefix ce but de despenſe à ceulx qui le vouloyent feſtoyer, qu'ilz ne peuſſent deſpendre davantage.

XLIV. Mais après ceſte bataille de Iſſus², il envoya en la ville de Damas faiſir l'or & l'argent, le bagage, les femmes & les enfans des Perſes qu'ilz y avoyent laiſſez, là où les hommes d'armes Theſſaliens feirent très bien leurs beſongnes : car auſſi les y avoit il expreſſement envoyez à ceſte intention, pource qu'il les avoit veus faire très bien leur devoir au jour de la bataille, toutefois le reſte de ſon armée en fut auſſi tout remply de richeſſe : & lors premier les Macedoniens ayans gouſté l'or & l'argent, les délices, les femmes & la maniere de vivre des Perſes, ne plus ne moins que les chiens qui ont une fois eſté à la curée, depuis qu'ilz treuvent la trace de la beſte, ne demandoyent plus que à aller après, & à pourſuyvre ceſte opulence Perſienne.

¹ Grec, dix mille drachmes ; 7682 livres de notre monnoie.

² Dans la Cilicie, entre les monts Taurus & Amanus.

XLV. Ce neantmoins Alexandre fut d'avis que premierement il valoit mieulx s'asseurer des provinces basses & maritimes. Si vindrent incontinent devers luy les rois, qui luy meirent entre ses mains le royaume de Cypre, & toute la Phœnicie, exceptée la ville de Tyr, ¹ devant laquelle il alla mettre le siege, où il demoura sept mois, l'assaillant avec de grandes chauffées qu'il feist jetter en mer, & avec force engins de baterie, & par mer avec deux cents galeres. Durant ce siege, il luy fut une nuit advis que Hercules luy tendoit la main de dessus les murailles de la ville, & l'appelloit par son nom, & y eut aussi plusieurs des Tyriens qui songerent en dormant, qu'Apollo leur disoit qu'il s'en vouloit aller devers Alexandre, pour autant que ce que lon faisoit dedans la ville, ne luy plaisoit point : à l'occasion dequoy ilz lierent & attacherent son image qui estoit de grandeur excessive, avec force chaines, & la clouerent avec de gros & grands clous à sa base, ne plus ne moins que si c'eust esté quelque traistre qui s'en fust voulu aller rendre aux ennemis, en le

¹ La Phœnicie est le long de la Méditerranée en descendant de la Cilicie. Tyr est sur la côte; elle étoit dans une île au tems d'Alexandre, & séparée du continent de 40 stades, selon Quint-Curce, de 700 pas, selon Plin. Les ouvrages établis par Alexandre la réunirent au continent. L'ancienne Tyr, appelée Palétyr, étoit dans le continent à 30 stades de l'île.

64 ALEXANDRE LE GRAND.

nommant Alexandriste, c'est à dire, partial favorisant à Alexandre. Encore eut là Alexandre une autre vision en dormant : car il luy fut advis qu'il veoit de loing un satyre qui se jouoit de loing à luy, mais quand il s'en cuidoit approcher pour le prendre, il s'eschappoit tousjours de luy, jusques à ce que finablement après l'avoir bien prié & bien couru autour de luy, il luy tumba entre les mains. Les devins enquis sur ce songe, respondirent avec fort vray-semblable apparence, qu'il ne falloit que diviser en deux ce mot Satyros, en disant, sa Tyros, qui signifieroit, la ville de Tyr sera tiene : & monstre lon encore la fontaine, auprès de laquelle il luy fut advis qu'il veit le satyre.

XLVI. Durant ce siege, il alla faire la guerre aux Arabes habitants le long du mont qui s'appelle Antiliban ^r, là où il fut en grand danger de sa personne, pour avoir attendu son precepteur Lyfimachus qui l'avoit suyvy, disant qu'il n'estoit point pire ne plus vieil que Phœnix : car quand ilz furent au pied de la montagne, ilz laisserent leurs chevaux, & commencerent à marcher contremont à pied : mais luy ayant le cueur si gentil, qu'il ne vouloit point laisser derriere son maistre d'eschole, qui estoit si las que plus

^r Partie du Liban du côté de l'Arabie déserte.

).

n'en

ALEXANDRE LE GRAND. 65

n'en pouvoit, meſmement pource que le ſoir eſtant ja venu, & que les ennemis n'eſtoient pas gueres loing d'eulx; il demoura à la cueuë; s'arreſtant à luy donner courage de cheminer, & à le porter preſque à demy, de maniere qu'il ne ſe donna garde, qu'il ſe trouva eſloigné de ſon armée avec bien petite troupe de ſes gens, & ſurpris de la nuit: & d'un très aſpre froid, en un fort mauvais & rude païs, là où il aperçeut de loing force feuz que les ennemis avoyent allumez, les uns çà, les autres là, & ſe conſiant en la diſpoſition de ſa perſonne, joint qu'il avoit tousjours accouſtumé de remédier aux difficultez & neceſſitez, où ſe trouvoient les Macedoniens, par ſon propre travail, en mettant luy meſme la main à la beſongne; il s'en courut vers ceulx qui avoyent allumé ces plus prochains feuz, & ayant occis de ſon eſpée deux des Barbares qui eſtoient couchez au long du feu, y ravit un tizon, & s'en recourut atout vers ſes gens qui en allumerent un grand feu, dont aucuns des Barbares s'effroyerent tellement, qu'ilz s'en meirent en fuite, & les autres qui le cuiderent venir charger, furent par luy deſfaits. Ainſi ſe logea il pour celle nuit luy & ſes gens hors de danger. Chares l'a ainſi eſcrit.

XLVII. Au reſte le ſiege de Tyr eut à la fin telle iſſue: Alexandre faiſoit repoſer la plus

66 ALEXANDRE LE GRAND.

grande parrie de son armée, estant lasse & travaillée de tant de combats qu'elle avoit supportez, & envoyoit peu de gens à l'assault pour engarder seulement les Tyriens de pouvoir reposter : & un jour le devin Aristander ayant sacrifié aux dieux, & considérant les signes des entrailles, affirma fort asseurement aux assistans, que la ville seroit prise dedans la fin du mois, dont tout le monde se prit à rire, en se mocquant de luy, pource que c'estoit le dernier jour. A raison de quoy Alexandre le voyant demouré tout court, comme celuy qui ne sçavoit qu'il devoit dire, & s'efforçant de faire toujours ressortir à effect les prediCTIONS des devins, ordonna que lon ne comptast point ce jour là pour le rentieme, ains pour le vingtseptieme, & sur l'heure mesme feir sonner les trompettes & donner un assault à la muraille plus roide qu'il n'avoit proposé du commencement. Si en fut le combat fort aspre, pource que ceux mesmes qui estoient demourez dedans le camp, ne se peurent renir qu'ilz n'y courussent au secours de ceulx qui avoyent esté deputez pour assaillir : tellement que les Tyriens se voyans ainsi furieusement assaillir de tous costez, perdirent le cuer, & par ce moyen fut la ville prise ce mesme jour.

XLVIII. Depuis ainsi comme il estoit devant

ALEXANDRE LE GRAND. 67

Gaza ^{*} ville principale, & la plus grande de la Syrie, il luy tumba dessus l'espaule une motte de terre, que luy laissa cheoir un oiseau volant en l'air : l'oyseau s'en alla poser sur un des engins de batterie, dont il baroit la ville, & se trouva pris & empestre dedans des retz faits de nerfs, dont on se servoit pour tourner à couvert les cordes des engins. Aristander predict que cela signifioit qu'il seroit blecé en l'espaule, mais aussi qu'il prendroit la ville : & en advint tout ne plus ne moins. Et comme il envoyast à sa mere Olympias, à Cleopatra & à ses autres amis force presens du butin qui fut gaigné au sac de celle ville, il envoya entre autres choses cinq cents quintaux d'encens à son gouverneur Leonidas, & cent de myrrhe, se souvenant d'une esperance qu'il luy avoit autrefois donnée, lors qu'il estoit encore enfant : car ainsi qu'il sacrifioit un jour aux dieux, il prit de l'encens à deux mains pour mettre dedans le feu à faire du parfum : ce que voyant Leonidas, luy dit, « Quand tu auras conquis la region ou croissent les drogues odorantes & les especeries, tu feras ainsi des parfums largement : mais pour cest heure contente toy d'user plus estroitement de ce que tu as de present ». Alexandre se sou-

^{*} Sur la mer Méditerranée, au midi d'Ascalon dans la Palestine.

68 ALEXANDRE LE GRAND.

venant lors de son advertissement, luy escrivit en ceste maniere : « Nous t'envoyons de l'encens & de la myrrhe en abondance, à fin que » désormais tu ne fois plus chiche envers les » dieux ».

XLIX. Il luy fut aussi apporté un petit coffret ; qui fut estimé le plus riche & le plus précieux meuble qui eust esté gagné en la desfaiite de Darius : & il demanda à ses privez qui estoient autour de luy, quelle chose leur sembloit plus digne d'estre mise dedans : les uns luy dirent d'un, les autres d'autre : mais luy dit, qu'il y mettroit l'Iliade d'Homere pour la dignement garder. Cela tesmoignent & escrivent tous les historiens qui sont les plus dignes de foy. Et si ce que ceulx d'Alexandrie racomptent sur la foy & au rapport de Heraclides, est veritable, il semble bien que Homere ne luy fut pas inutile en ce voyage : car ilz disent, que quand il eut conquis l'Ægypte, il y voulut bastir une grande cité, la peupler de très grand nombre d'habitans tous Grecs, & la nommer de son nom : & estoit desja tout prest à traſſer & enclorre un certain lieu, qui luy avoit esté choisi par le conseil des ingenieurs & maistres ouvriers ; mais la nuit de devant il eut une vision merveilleuse : car il luy fut advis qu'il se vint presenter devant luy un personnage ayant les cheveux tous

ALEXANDRE LE GRAND. 69

blancs de vieillesse, avec une face & une pre-
sence venerable, lequel s'approchant de luy pro-
noncea ces vers :

Une isle y a dedans la mer profonde
Tout vis à vis de l'Egypte seconde ,
Qui par son nom Pharos est appelée.

L. Il ne fut pas plus tost levé le matin qu'il s'en
alla voir cest isle de Pharos , laquelle estoit pour
lors un peu au dessus de la bouche du Nil , que
lon appelle Canobique , mais maintenant est
joincte à la terre ferme par une levée que lon
y a faite à la main , & luy sembla que c'estoit
l'assiette du monde la plus propre , pour ce qu'il
avoit en pensée de faire : car c'est comme une
langue ou une encouleure de terre assez raison-
nablement large, qui separe un grand lac d'un
costé, & la mer de l'autre , laquelle se va là
aboutissant en un grand port : si dit alors que
Homere estoit admirable en toutes choses , mais
qu'entre autres il estoit très sçavant architecte,
& commanda que promptement on luy trassast
& designast la forme de la ville selon l'assiette
du lieu. Or ne trouverent ilz point là sur l'heure
de croye ou de terre blanche pour marquer , à
raison dequoy ilz prirent de la farine , dont ilz
trasserent dessus la terre qui estoit noire, une
grande enceinte courbée en figure circulaire , le

70 ALEXANDRE LE GRAND.

rond de laquelle se terminoit par le dedans en deux bafes droittes de grandeur egale, qui venoyent à clorre toute la grandeur de ce pourpris en forme de manteau macedonique. Alexandre en trouva le portraiét beau & y prit grand plaifir : mais foudainement une multitude infinie de grands oyfeaux de toutes efpeces fe leva du lac & de la riviere, en fi grand nombre qu'ilz obscurciffoyent l'air, comme eust fait une groffe nuée, & venans à fe pofer en ce pourpris là, mangerent toute la farine fans qu'il y en demourast chose quelconque.

LI. Alexandre se troubla de ce prefage : mais les devins luy dirent qu'il ne falloit point qu'il s'en fafchaft, pource que c'estoit figne qu'il bastiroit là une ville fi plantureufe de tous biens, qu'elle fuffiroit à nourrir toutes fortes de gens : parquoy il commanda adonc à ceux à qui il en avoit baillé la charge, qu'ilz se meiffent après, & luy ce pendant prit son chemin pour aller au temple de Jupiter Hammon. Le chemin estoit long, & y avoit beaucoup de travaux & beaucoup de difficultez, mais deux dangers principaux entre tous les autres : l'un estoit faulte d'eau, pour laquelle il y a plusieurs journées de païs desert & inhabitable : l'autre estoit, que le vent du midy ne se levast impetueux pendant qu'ilz feroient par le chemin, & qu'il ne don-

naist dedans les fables, qui sont d'estendue & de profondeur infinie, comme lon dit qu'ancienement il eueut une telle tourmente en ces plaines là, & y enleva de telz monceaux de sablons, que cinquante mille hommes de l'armée de Cambyfes y demourent morts deffoubz. Il n'y avoit personne en sa fuite qui ne discourust & ne preveist bien ces dangers : mais il estoit mal aisé de divertir Alexandre de chose quelconque qu'il eüst envie de faire, pource que la fortune luy cedant en toutes ses entreprises, le rendoit entier & ferme en ses opinions, & la grandeur de son courage faisoit qu'il s'obstinoit invinciblement en toutes choses, quand il les avoit une fois entreprises, jusques à vouloir forcer non seulement les ennemis, mais aussi le temps & les lieux. Au demourant les secours & remedes que dieu luy envoya contre les difficultez & dangers de ce voyage là, ont esté trouvez plus croyables, que les responses que lon dit qu'il luy donna depuis, ains qui plus est, ont fait que lon a aucunement adjousté foy aux oracles que lon escrit, qui luy furent respondus. Car premierement les grandes eaux qui tumberent du ciel, & les pluyes continuelles, les garentirent du danger de la soif, en destrempant la secheresse du sable, qui en devint moitié & serré en foy-mesme, de maniere que l'air mesme en fut

72 ALEXANDRE LE GRAND.

plus doux , plus frais & plus net : davantage comme les bornes & marques , auxquelles les guides recognoissoient le chemin , fussent confuses ; de sorte qu'ilz erroient çà & là sans sçavoir plus où ilz alloient , il leur appatur des corbeaux , qui les guiderent en volant devant eulx , se hastans de voler quand ilz les voyoyent suyvre , & les attendans quand ilz demouroient derriere : & , qui est encore plus admirable , Callisthenes escrit , que la nuit avec leurs chants , ilz rappelloient ceulx qui s'estoyent esgarez , & crioyent si fort qu'ilz les remettoient en la trace du chemin.

LII. A la fin , ayant traversé le desert , il arriva au temple qu'il cherchoit : là où d'arrivée le grand presbtre le salua de la part du dieu , comme de son pere : & Alexandre luy demanda s'il luy estoit point eschappé quelqn'un de ceulx qui avoyent occis son pere. Le presbtre luy respondit qu'il se gardast de blasphemer , pource que son pere n'estoit point mortel : parquoy reprenant son propos , il luy demanda si les meurtriers qui avoyent conspiré la mort de Philippus avoyent tous esté puniz : & puis l'interroga aussi touchant son empire , s'il luy feroit la grace d'estre monarque de tout le monde : le dieu luy respondit par la bouche de son prophete , que ouy , & que la mort de Philippus estoit entierement vengée : & adonc il feit de magnifiques of-

ALEXANDRE LE GRAND. 73

frandes au dieu , & donna de l'argent largement aux presbtres & ministres du temple. Voilà ce qu'escrivent la plus part des auteurs touchant ce qu'il demanda , & qui luy fut respondu par l'oracle : il est vray que Alexandre mesme en une siene missive qu'il escrit à sa mere, dit qu'il avoit eu quelques secrettes responses de l'oracle , lesquelles il luy communiqueroit à elle seule quand il seroit de retour en Macedoine. Les autres disent que le presbtre le voulant saluer en langage Grec avec plus amiable expression, luy voulut dire : O Paidion , qui vault autant à dire que , cher filz : mais que la langue luy fourcha un peu , à cause que ce n'estoit pas son langage naturel , & qu'il meit une, s, au lieu d'une, n, à la fin, en disant, ô pai Dios, qui signifie , ô filz de Jupiter : & que Alexandre fut bien aise de cest etreur de langue, dont il courut un bruit parmy ses gens , que Jupiter l'avoit appelé son filz.

LIII. On dit aussi qu'il voulut ouyr le philosophe Psammon en Ægypte , & qu'il trouva fort bon un propos qu'il luy teint, en luy discourant, que dieu estoit roy des hommes, « Pource, » disoit il, que ce qui regne , & qui domine » en toutes choses, est tousjours divin » : mais luy mesme en discourut avec meilleure raison & plus philosophiquement, quand il dit, « Que

» dieu estoit bien pere commun de tous les
 » hommes, mais que particulièrement il retenoit
 » pour soy, & advouoit siens, ceulx qui estoient
 » les plus gens de bien ». Brief envers les Bar-
 bares il se monstroït plus arrogant, & faisoit
 semblant de croire fermement qu'il eust esté
 engendré par ce dieu là, mais envers les Grecs il
 parloit de celle geniture divine plus sobrement
 & plus modestement : toutefois en une lettre qu'il
 escrivit aux Atheniens touchant la ville de Samos,
 il dit : « Je ne vous ay pas donné ceste noble
 » & franche cité là : car vous la tenez en don
 » de celuy que lon appelloit alors mon seigneur
 » & mon pere » : entendant le roy Philippus.
 Mais depuis ayant esté blecé d'un coup de
 trait, & en sentant grieve douleur, il se re-
 tourna vers ses amis, & leur dit : « Cela qui
 » coule de ma playe est vray sang, & non point
 » comme dit Homere ,

Une liqueur de rien, semblable à celle
 Qui flue aux dieux de nature immortelle.

Et un jour qu'il faisoit un si violent orage de
 tonnerre, que tout le monde en estoit effroyé,
 Anaxarchus le rhetoricien se trouvant lors au-
 près de luy, luy dit : « Et toy, filz de Jupiter,
 » en ferois-tu bien autant » ? Alexandre en riant
 luy respondit : « Je ne veux pas estre espouven-

ALEXANDRE LE GRAND. 75

» table à mes amis, comme tu veux que je le
 » sois, quand tu mesprises le service de ma table
 » y voyant mettre des poissons dessus, & disant
 » que lon y deust voir des testes de princes &
 » de satrapes ». Car on dit, à la verité, qu'un
 jour comme Alexandre envoyast quelques petits
 poissons à Hephæstion, cestuy Anaxarchus se laissa
 eschapper de la bouche ceste parole là, en cuidant
 se mocquer, & monstret que c'est peu de chose,
 que de ceulx qui vont prochassans les grands es-
 tats & haults lieux d'autorité par dessus les
 autres, avec tant de travaux & tant de perilz,
 comme n'ayans rien du tout, ou bien peu plus
 que les autres, ès plaisirs & delices de ce monde.
 Quand donques il n'y auroit autre preuve ny
 autres raisons, que celles que nous avons recitées,
 encore pourroit on bien juger par icelles, que
 Alexandre ne s'abusoit point en soy mesme, ny
 ne s'enorgueillissoit point de ceste presumptueuse
 opinion, de cuider qu'il fust engendré d'un dieu,
 ains qu'il s'en servoit pour tenir les autres hommes
 sous le joug d'obeïssance, par l'opinion qu'il leur
 imprimoit de ceste divinité.

LIV. Au partir d'Ægypte il s'en retourna en
 la Phœnicie, là où il feit des sacrifices, des festes
 & processions en l'honneur des dieux, & aussi
 des danses, des jeux de tragédies & autres telz
 passetemps, qui estoient fort beaux à voir, non

76 ALEXANDRE LE GRAND.

seulement pour la magnificence de l'appareil , mais aussi pour l'affection & la diligence des entremetteurs, qui s'efforçoient de faire mieulx à l'envy les uns des autres : car c'estoyent les princes de Cypte qui estoient les entrepreneurs , & qui fournissoient tout ce qu'il falloit aux joueurs, ne plus ne moins qu'à Athenes on tire au sort un bourgeois de chaque lignée du peuple, à qui il eschet de faire les fraiz de telz jeux.

Et contendoient ces seigneurs d'une merveilleuse affection à qui feroit le mieulx , mesme-ment Nicocreon qui estoit roy de Salamine ^{*} en Cypre , & Pasistrates seigneur de la ville de Soles : car il estoit escheur à ces deux princes de fournir aux deux plus excellents joueurs, Pasistrates à Athenodorus , & Nicocreon à Thessalus , auquel Alexandre favorisoit fort , sans toutefois declarer sa faveur , si non après que Athenodorus par sentence des juges à ce commis eut esté déclaré le vainqueur : car alors en s'en retournant des jeux, il dit qu'il approuvoit & confirmoit le jugement des juges , mais qu'il eust volontiers quitté une partie de son royaume , pour ne voir point Thessalus vaincu. Et comme ceux d'Athenes eussent condamné Athenodorus à l'amende , pour autant qu'il avoit failly de soy

^{*} Bâtie après la prise de Troie par Teucer , fils de Télamon , qui lui donna ce nom , à cause de l'île de Salamine sa patrie.

trouver à Arhenes aux jours des bacchanales, ès quelz se jouoyent les comédies & tragédies, il pria Alexandre de vouloir escrire pour luy, à ce que l'amende luy fust remise : mais il ne le voulut pas faire, ains envoya l'amende, qu'il paya luy mesme de son argent. Un autre bon joueur nommé Lycon, natif de la ville de Scarphie ¹ ayant un jour excellemment joué, entrelaça dextrement en son rolle quelque vers, par lequel il luy demandoit en don ² dix talents : Alexandre s'en prit à rire, & les luy donna.

LV. En ces entrefaittes Darius luy escrivit & à quelques uns de ses amis aussi, pour le prier qu'il se contentast de prendre de luy ³ dix mille talents, pour la rençon des personnes prisonnières qu'il tenoit entre ses mains, avec tous les païs, terres & seigneuries qui sont deçà la riviere d'Euphrates, & l'une de ses filles en mariage pour desormais estre son allié & son amy. Il communiqua cest affaire à ses amis, entre lesquels Parmenion luy dit, « J'accepteroye cela » quant à moy, si j'estoye Alexandre ». « Aussi » feroye-je moy certainement, respondit Ale-

¹ Scarphie est sur le golphe Maliaque dans la Locride surnommée Épicnémidienne, entre les Locriens surnommés Ozoles au couchant, & les Locriens Opuntiens à l'orient, vis-à-vis l'Eubée.

² Six mille escus. Amyot. 46,687 livres de notre monnoie.

Six millions d'escus. Amyot. 46,688,500 livres de notre monnoie.

78 ALEXANDRE LE GRAND.

» xandre , si j'estoye Parmenion ». Mais en fin il rescrivit à Darius, que s'il se vouloit venir rendre à luy , il seroit très humainement traité par luy , sinon qu'il se mettroit dès le premier jour en chemin pour l'aller trouver : toutefois il s'en repentit bien tost après, pource que la femme de Darius mourut en travail d'enfant, dont il monstra evidemment qu'il estoit fort desplaisant, pource qu'il avoit perdu un grand moyen de faire cognoistre sa clemence & son humanité : mais au moins en inhuma il le corps très magnifiquement, sans y rien espargner.

LVI. Or y avoit il entre les eunuques valets de chambre de la royne un nommé Tireos, qui avoit esté pris quant & les femmes : il se desrobba du camp d'Alexandre, & montant dessus un cheval, s'en courut devers Darius luy porter la nouvelle de la mort de sa femme. Darius adonc se prit à lamenter à haults cris, & à frapper & battre sa teste, les larmes aux yeux, & dit en soupirant amèrement, « O dieux ! à quelle » malheureuse fortune sont reduits les affaires » de Perse, puis que la femme & la sœur du » roy a esté non seulement faite prisonniere de » son vivant, mais encore à sa mort n'a pas à » tout le moins peu avoir l'honneur de sepulture royale » ! A cela respondit aussi tost l'eunuque, « Quant à la sepulture, sire, & à tout

» l'honneur & le devoir que lon pourroit desirer,
 » tu ne sçauois accuser la mauuaise fortune de
 » la Perse. Car à la royne Statira , tant comme
 » elle a vescu captive, ny à ta mere, ny à tes
 » filles , il n'a defaillly chose quelconque des
 » biens ny des honneurs qu'elles souloyent auoir
 » au parauant , sinon de voir la lumiere de ta
 » gloire, laquelle le seigneur Orosmades ref-
 » tituera encore en son entier, s'il luy plaist,
 » ny à sa mort n'a esté non plus destituée d'au-
 » cuns ornemens de funerailles , qu'elles eust
 » ailleurs peu auoir, ains a esté honorée des
 » larmes mesmes de tes ennemis : car Alexan-
 » dre est aussi doux & humain en sa victoire,
 » comme il est aspre & vaillant en la bataille ».

Darius entendant ces paroles de l'eunuque , &
 ayant le sens un peu troublé de douleur , entra
 incontinent en mauuaises souspeçons : & retirant
 l'eunuque à part au plus secret endroit de sa
 tente , luy dit, « Si tu n'es, aussi bien que la
 » fortune des Perses , devenu Macedonien d'af-
 » fection, ains recognois encore en ton cueur
 » Darius pour ton maistre, je te prie & te con-
 » jure par la reuerence que tu doibs à ceste grande
 » lumiere du soleil , & à la dextre royale, que
 » tu me dies la verité. Ne sont-ce point les moin-
 » dres maulx de Statira ceulx que je lamente,
 » sa captivité & sa mort ? Et auons nous point

80 ALEXANDRE LE GRAND.

» encore souffert pis de son vivant , de sorte
 » que nous eussions esté moins indignement &
 » honteusement malheureux , si nous fussions
 » tumbez entre les mains d'un ennemy cruel &
 » inhumain ? Car , quelle honeste communica-
 » tion peult avoir eu un jeune prince victo-
 » rieux avec la femme prisonniere de son en-
 » nemy , pour laquelle il luy ait voulu tant faire
 » d'honneur » ? Ainsi que Darius parloit encore,
 l'eunuque Tireus se jetta à ses pieds , & le pria
 de ne dire point telles paroles , & ne faire point
 ce tort à la vertu d'Alexandre , ny ce deshonne-
 neur à sa sœur & femme trespassee , en se pri-
 vant soy mesme du plus grand reconfort , & de
 la plus doulce consolation qu'il pourroit desirer
 en son adversité , c'est d'avoir esté vaincu par
 un ennemy qui a des perfections plus grandes
 que ne porte la nature humaine , ains plus tost
 d'avoir en admiration l'excellente vertu d'Ale-
 xandre , lequel s'estoit monstté encore plus chaste
 envers les dames , que vaillant encontre les
 hommes de Perse : & en disant cela l'eunuque
 le luy asséura & confirma par des sermens &
 des execrations horribles , en luy comptant au
 long & par le menu l'honesteté , continence &
 magnanimité de Alexandre. Adonc Darius re-
 tournant en sa sale , où estoient ses plus fami-
 liers amis , & tendant les mains vers le ciel ,
 feic

fait ceste priere aux dieux : « O dieux , auteurs
 » de la vie & protecteurs des roys & des roya-
 » mes , jè vous supplie en premier lieu , qu'il
 » vous plaise me faire la grace , que je puisse
 » remettre sus la bonne fortune de la Perse , de
 » sorte que je laisse cest empire à mes succes-
 » seurs aussi grand & aussi glorieux , comme je
 » l'ay reçu de mes predecesseurs , à fin que de-
 » mourant victorieux je puisse rendre la pareille
 » à Alexandre , de l'humanité & honesteté , dont
 » il a usé en mon adversité à l'endroit de ce
 » qui m'est en ce monde le plus cher : ou bien
 » si la prefixion du temps est venue , auquel il
 » faille necessairement , ou par quelque ven-
 » gearce divine , ou par naturelle mutation des
 » choses terrienes , que l'empire de Perse prenné
 » fin , qu'à tout le moins il n'y ait autre après
 » moy qui seye dedans le throne de Cyrus , que
 » Alexandre ». La pluspart des historiens met
 que tout cela fut ainsi fait & dit.

LVII. Au reste Alexandre ayant réduit à son
 obeissance tout ce qui est deçà la riviere d'E-
 phrates , se meit en chemin pour aller au devant
 de Darius , lequel descendoit avec un million
 de combatans : & y eut quelqu'un qui luy comptai-
 pour passer le temps , comme les valets de son
 armée s'estoyent divisez en deux bandes , &
 avoyent eleu un capitaine ep chef de chacune ,

82 ALEXANDRE LE GRAND.

nommans l'un Alexandre , & l'autre Darius , & qu'ilz avoyent commencé à escarmoucher premierement à coups de mottes de terre , & puis à coups de poing : mais qu'à la fin ilz s'estoyent eschauffez , jusques à venir aux pierres , & aux bastons , de maniere que lon ne les pouvoit departir. Cela ouy , Alexandre voulut que les deux capitaines combattissent teste à teste l'un contre l'autre , & arma luy mesme celuy que lon appelloit Alexandre , & Philotas arma celuy que lon nommoit Darius. Si s'amassa toute l'armée à l'entour pour voir le passetemps de ce combat , comme estant un presage qui donneroit cognoissance & jugement de l'advenir. Le combat fut aspre entre les deux champions : mais à la fin le nommé Alexandre vainquit , & luy donna Alexandre pour son loyer douze villages , avec privilege de pouvoir porter l'habit persien. Ainsi l'escriit Eratosthenes.

LVIII. Au demourant la derniere grande bataille qu'il eut contre Darius , ne fut point à Arbeles , comme le met la plus part des historiens , ains à Gaufameles ¹ , qui signifie , à ce que lon dit , en langage persien , la maison du chameau , pource que quelqu'un des anciens roys de Perse s'estant sauvé des mains de ses ennemis à la course dessus un dromadaire , le feit

¹ Voyez les Observations.

ALEXANDRE LE GRAND. 87

loger là : & ordonna le revenu de quelques villages pour la nourriture & entretenement d'ice-luy. Or y eut-il eclipse de lune au mois d'aoust ¹, environ le temps que commence la feste des mysteres à Athènes, & l'unzieme nuit après, les armées estans en vetie l'une de l'autre, Darius teint ses gens en bataille, allant luy mesme partout avec des torches revisiter les bandes & compagnies. Et Alexandre pendant que les souldards Macedoniens dormoyent, estoit devant sa tente avec le devin Aristander, où il faisoit à part quelques secretes cerimonies, & quelques sacrifices à Apollo ².

LIX. Et les plus anciens capitaines des Macedoniens, mesmement Parmenion, voyans toute la plaine qui est entre la riviere de Niphates ³, & des montagnes Gordienes, reluisante de feux & de lumieres des Barbares : & un bruit confus, & un son effroyable, ne plus ne moins que d'une mer infinie qui retentissoit de leur camp, s'esmerveillerent d'une si grande multitude d'hommes, & teindrent propos ensemble qu'il seroit trop malaisé & presque impossible de soustenir tant de monde s'ilz combatroyent de plein jour. Au moyen dequoy allans devers Alexandre après

¹ Voyez les Observations.

² Les autres exemplaires mettent à la Peur, & q. 189. Amyot.

³ Voyez les Observations.

84 ALEXANDRE LE GRAND.

qu'il eut achevé ses ceremonies, ilz luy conseillerent qu'il donnaſt la bataille de nuit, pour ce qu'en ce faifant les tenebres tacheroyent à ſes gens ce qui eſtoit le plus effroyable en l'oſt de ſon ennemy : & il leur feit adonc ceſte reſponſe, qui depuis a tant eſté celebrée, « Je ne » veux, dit il, point deſrobber la victoire ». Laquelle reſponſe ſemble à quelques uns folle & preſumptueuſe, de ſe jouer & mocquer ainſi ſi près d'un extreme peril. Mais il y en a d'autres qui ſont d'advis que ce fut vraye magnanimité preſente & bon jugement à luy pour l'advenir, de ne donner plus d'occafion à Darius, après qu'il auroit eſté vaincu, de reprendre encore courage, & d'eſſayer une autre fois la fortune, s'il euſt peu accuſer les tenebres & la nuit, comme cauſes de ſa deſfaiſte, ne plus ne moins qu'à la precedente rouverte, il diſoit que ce avoyent eſté les montagnes, les deſtroits & la mer, par qui il avoit eſté deſfait : pource que jamais Darius n'eut ceſſé de guerroyer à faulte d'hommes ny d'armes, veu le grand empire & l'eſtendue infinie des païs qu'il tenoit : mais que bien euſt il deſiſté d'avoir plus recours aux armes quand il euſt perdu tout cueur & toute eſperance, lors qu'il ſe fuſt veu deſfait à vive force, de plein jour, en bataille rangée.

LX. Après que ſes capitaines ſe furent reti-

ALEXANDRE LE GRAND. 85

rez en leurs logis, il se jetta dessus un liêt en sa tente, là où il s'endormit tout le reste de la nuit plus serré qu'il n'avoit accoustumé, de maniere que les seigneurs qui vindrent à son lever le matin, s'esbahirent bien fort, comme il dorroit encore, & d'eulx mesmes feirent commandement aux souldards qu'ilz mangeassent : puis voyans que le temps les pressoir, Parmenion entra dedans sa chambre, & s'approchant de son liêt l'appella deux ou trois fois par son nom, tant qu'il l'esveilla, & luy demanda comment il dorroit ainsi si haulte heure, en homme qui a desja vaincu, & non pas qui est prest à donner la plus grande & plus hazardeuse bataille qu'il eut onques : à quoy Alexandre luy respondit en riant, « Comment, & ne te semble » il pas que nous ayons desja vaincu, estans hors » de peine d'aller courir çà & là après Darius » par un païs infini & destruit, comme il nous » eust fallu faire s'il eust voulu fouir la lice, » & gaster tousjours le païs devant nous » ?

LXI. Si ne se monstra pas seulement la grandeur de son courage & son assurance magnanime fondée en discours de raison, avant la bataille seulement, mais aussi au plus fort du combat mesme : pource que la poincte gauche de son armée, que conduisoit Parmenion, branla & recula un peu, à cause que la gendarmerie

§6 ALEXANDRE LE GRAND.

Bactriene donna de grande roideur & par grand effort en cest endroit là sur les Macedoniens, & que Mazæus lieutenant de Darius envoya hors de leur bataille quelque nombre de gens de cheval, pour assaillir & charger ceulx que lon avoit laissez dedans le camp à la garde du bagage. Parquoy Parmenion estonné de l'un & de l'autre, envoya devers Alexandre l'advertir comme leur camp estoit perdu & leur bagage aussi, si promptement il n'envoyoit un grand secours du front de sa bataille à ceulx qui estoient à la cueüe. Quand ces nouvelles luy vindrent de la part de Parmenion, il avoit desja donné à ses gens le signe de la bataille pour commencer la charge. Si feit response à celui qui les luy apporta, que Parmenion n'estoit pas en son bon sens, ains estoit troublé de son entendement, ne se souvenant pas qu'en gaignant la bataille, ilz ne sauveroyent pas seulement leur bagage, ains conquerroyent davantage & gagneroyent celui de leurs ennemis, & qu'en la perdant il ne se falloit plus soucier ny de leurs hardes, ny de leurs valets, ains penser seulement de mourir honorablement en bien faisant son devoir de vaillamment combattre.

LXII. Ayant mandé ceste response à Parmenion, il meit son armet en sa teste : car il avoit pris le reste de son harnois avant que parus

de sa tente, qui estoit un sayon de ceulx qui se font en la Sicile, ceinct, & par dessus une brigandine faitte de plusieurs doubles de toile picquée, qui estoit du butin gaigné en la bataille d'Iffus. Son habillement de teste estoit d'un fer reluisant comme argent pur & fin, de la façon de l'armeurier Theophilus, le haultsecol de mesme, excepté qu'il estoit tout couvert de pierrieres, & une espée legere à merveilles & de parfaitement bonne trempe, qu'il avoit eüe en don du roy des Citieiens, ayant accoustumé de combattre le plus souvent d'une espée en un jour de bataille : mais sa cotte d'armes estoit de beaucoup plus sumptueuse & plus riche manufacture, que tout le reste de son accoustrement ; car c'estoit ouvrage de l'ancien Helicon², dont la cité de Rhodes luy avoit fait un present, & la portoit aussi ordinairement aux batailles. Or ce pendant qu'il ordonnoit les compagnies en bataille, & qu'il preschoit les soudards, & leur remonstroit quelque chose, ou qu'il se promenoit au long des bandes pour visiter tout, il montoit dessus un autre cheval, pour espargner Bucephal, à cause qu'il estoit desja un peu vieil ; mais quand il falloit mettre à bon esciant la main à l'œuvre, alors on le luy amenoit, & soudain qu'il estoit dessus, il alloit commencer

² Voyez les Observations.

38 ALEXANDRE LE GRAND.

la charge. Mais lors après avoir longuement prêché les hommes d'armes Theſſaliens & les autres Grecs pareillement, comme ilz l'euffent tous aſſeuré qu'ilz feroient bien leur devoir, & prié qu'il les menaſt tout de ce pas charger les ennemis, il priſt adonc ſa javeline en ſa main gauche, & levant la droite vers le ciel, requit aux dieux, comme eſcrit Calliſthenes, que s'il eſtoit veritable qu'il fuſt engendré de Jupiter, il leur pleuſt ce jour là eſtre en aide & donner bon courage aux Grecs. Le devin Ariſtander eſtoit à cheval tout contre luy, veſtu d'un manteau blanc, & ayant deſſus ſa teſte une couronne d'or, qui luy monſtra à l'inſtant meſme de ſa priere, un aigle volant en l'air par deſſus ſa teſte, & dreſſant ſon vol juſtement contre les ennemis.

LXIII. Cela aſſeura grandement & emplit de merveilleuſe hardieſſe ceulx qui le veirent, & en ceſte rejouiſſance les hommes d'armes s'entredonnans courage les uns aux autres, commencerent à ſe mettre au galop : le bataillon de gens de pied s'eſbranla auſſi après eulx : mais avant que les premiers arrivaffent à pouvoir choquer, les Barbares tournerent le dos, & y eut là une grande chaſſe, pouſſant Alexandre les fuyans contre le milieu de leur bataille, là où eſtoit Darius en perſonne : car il l'apperceut de

ALEXANDRE LE GRAND. 89

loing par dessus les premiers reings, tout au fond de la compagnie royale : pource qu'il estoit beau & grand personnage, monté dessus un hault chariot de bataille, lequel estoit borné & environné de tous costez de plusieurs troupes de gens de cheval, tous bien en point & reingez en belle ordonnance, pour attendre & recevoir l'ennemy. Mais quand ilz apperceurent de près Alexandre si terrible, chassant à val de rouverte les fuyans à travers ceulx qui tenoyent encore leurs reings, cela les effroya de sorte qu'ilz se desbanderent la plus part : mais les gens de bien & les plus vaillans hommes se feirent tous tuer devant leur roy, & en tumbant les uns sur les autres, empescherent que lon ne le peult promptement poursuyvre : car estans portez par terre & tirans aux traiçts de la mort, encore embrassoyent ilz les pieds des hommes & des chevaux. Adonc voyant Darius tous les maux & malheurs du monde devant ses yeulx, & comme les bandes qu'il avoit reingées au devant de luy pour sa sauvegarde, se renversoyent toutes sur luy, de sorte qu'il n'y avoit moyen de faire tirer avant son chariot, ny le retourner en arriere, tant les rouës estoyent engagées & embarrassées entre des monceaux de corps morts, & que les chevaulx aussi comme assiegez & presque cachez dedans les tas de la desconfiture, se tourmen-

26 ALEXANDRE LE GRAND.

toient & faultoyent de frayeur , tellement que le chariton ne les pouvoit plus guider ne conduire , il abandonna finablement son chariot , & quittant ses armes monta dessus une jument qui nagueres avoit fait un poulain , & se sauva de viffesse : toutefois encore ne se fust il pas sauvé , n'eust esté que Parmenion envoya de rechef vers Alexandre le prier de le venir secourir ; pource qu'il y avoit encore en cest endroit une grosse puissance ensemble , qui ne faisoit point semblant de reculer. Comment que ce soit , on blâme Parmenion de s'estre ce jour-là porté laschement & froidement , fust ou pource que la vieillesse luy eust ja diminué quelque chose de sa hardiesse , ou pource qu'il fust marry , & qu'il portast quelque envie à la puissance d'Alexandre qui devenoit trop grande à son gré , ainsi que dit Callisthenes ; tant y a , que Alexandre fust bien mal content de ce second renvoy , & n'en dit pas toutefois la cause veritable à ses gens , ains feignant qu'il vouloit que lon cessast de tuer , joint que la nuit approchoit , il feit sonner la retraite , & s'achemina vers l'endroit de son armée qu'il cuïdoit avoir de l'affaire ; mais par le chemin il eut nouvelles qu'encore là avoyent esté ses ennemis desfaiçts , & qu'ilz fuyoyent de tous costez à val de ruyte.

— LXIV. Ceste bataille ayant eu telle issue , on

ALEXANDRE LE GRAND. 91

penſa bien adonc que l'empire des Perſes eſtoit entierement ruiné, & Alexandre conſequemment devenu roy de toute l'Asie. Si en feit de ſump-
tueux & magnifiques ſacrifices aux dieux, & donna à ſes familiers de grandes richesses, terres, maiſons & ſeigneuries; & voulant auſſi monſtrer ſa liberalité aux Grecs, il leur eſcrivit qu'il vouloit que toutes tyrannies fuſſent abolies en la Grece, & que tous peuples Grecs veſcuſſent ſoubz leurs loix en liberté: mais particulièrement il feit entendre à ceulx de Platæes, qu'il vouloit faire rebaſtir leur ville, pour autant que anciennement leurs predeceſſeurs avoyent baillé & donné leur païs aux Grecs, pour y combattre contre les Barbares pour la deſenſe de la liberté commune de toute la Grece, & envoya juſques en Italie à ceulx de Crotone, partie du butin, pour honorer la memoire de la vertu & bonne affection de Phaylus¹ leur citoyen, qui du temps des guerres Médoïſes, comme les Grecs habitans en Italie euſſent abandonné ceulx de la vraye Grece, pource qu'ilz ne penſoyent pas qu'ilz ſe deuſſent jamais ſauver, s'en alla avec un ſien vaiſſeau, qu'il arma & équippa à ſes propres couſts & deſpens, à Salamine, à fin de ſe trouver à la bataille, & eſtre participant du commun peril des Grecs: tant eſtoit Alexandre

¹ Voyez les Observations.

92 ALEXANDRE LE GRAND.

affectionné amy de toute vertu , & desiroit conserver la memoire des beaux & louables faicts.

LXV. Au reste en allant par le pais de Babylone, qui se rendit incontinent tout à luy, il s'esmerveilla fort quand il veit en la province d'Ecbatane le gouffre, dont il sort continuellement de gros bouillons de feu comme d'une fontaine, & aussi la source du naphthe¹ qui en jette si grande abondance qu'elle en fait comme un lac. Ce naphthe est une matiere qui ressemble proprement au bitume : mais il est si prompt & si facile à allumer, que sans toucher à la flamme, par la seule lueur qui sort du feu il s'enflamme, & enflamme aussi l'air qui est entre deux : laquelle nature les Barbares du pais voulans faire voir & donner à entendre à Alexandre, arroserent de gouttes de ceste liqueur la rue, par laquelle lon alloit au logis d'Alexandre en Babylone, puis aux deux bouts de la rue approcherent des flambeaux de ces gouttes de naphthe, dont ilz avoyent aspergé les deux costez de la rue, pource que l'air commenceoit ja à s'obscurcir sur la nuit, & s'estans les premieres gouttes subitement allumées, il n'y eut point d'intervalle de temps sensible que tout le demourant ne fust aussi tost enflammé en un moment, & que le feu n'eust aussi tost gagné depuis un bout jus-

¹ Voyez les Observations.

que à l'autre, de sorte que toute la rue en fut éclairée d'un feu continué.

LXVI. Or y avoit il un Athenophanes natif d'Athenes, qui servoit le roy au baing de luy frotter & oindre & nettoyer le corps quand il s'estuvoit, & aussi ensemble de luy resjouir l'esprit de quelque joyeux entretien & de quelque honeste passetemps. Cestuy advisant un jour dedans l'estuve un jeune page nommé Stephanus auprès d'Alexandre, chetif à merveilles & laid de visage, mais chantant fort plaifamment, dit au roy, « Veux tu, Sire, que nous esprouvions » la vertu de ceste matiere de naphthe sur Stephanus? Car si le feu se prend à luy & qu'il » ne s'esteigne point, je diray lors que sa force » seta certainement grande & invincible ». Le page s'offrit fort volontiers à en souffrir la preuve sur sa personne : mais ainsi comme lon l'en frottoit, au toucher seulement il jetta incontinent une si grande flamme, & fut tout le corps du page en un moment espris de tant de feu, qu'Alexandre s'en trouva en extreme peine & perplexité, & n'eust esté que de bonne adventure il se trouva dedans l'estuve plusieurs ayans en leurs mains des vaisseaux pleins d'eau pour le baing, jamais on n'eust peu secourir le page à temps, que le feu ne l'eust brulé & suffoqué devant, encore eurent ilz beaucoup d'affaire à l'esteindre,

& en demoura le page fort malade. Ce n'est donques pas sans apparence que quelques uns, voulans que la fable de Medee ait esté chose véritable, disent que la drogue dont elle frotta la couronne & le voile qu'elle donna à la fille de Creon, comme il est tant mentionné par les tragedies, fust ceste liqueur de naphthe, pource que ny la couronne ny le voile ne pouvoient jetter le feu d'eulx mesmes, ny ne s'y estoit pas le feu allumé non plus de soy mesme, mais y estant l'aptitude de s'enflammer apposee par ce frottement de naphthe, l'attrait de la flamme en fut si prompt & si soudain, que lon ne s'en apperceut point à l'œil : car les rayons & les fluxions qui sortent du feu quand ilz viennent de loing, jettent aux autres corps la lumiere & la chaleur seulement : mais à ceulx qui ont en eulx une siccité ventreuse, ou une humeur grasse & gluante s'unissans ensemble, & ne cherchans de leur nature qu'à s'allumer & faire feu, ilz alterent facilement & enflamment la matiere qu'ilz y treuvent preparée.

LXVH. Mais on est en doubte comment il s'engendre, ou si plus tost ceste matiere liquide, & ceste humeur là, qui s'enflamme ainsi facilement, sort & coule de la terre qui a la nature

¹ En cest endroit deffailent quelques lignes en l'original grec, Anyot.

ALEXANDRE LE GRAND. 99

grasse & preste à faire feu : car tout le païs d'alentour de Babylone est fort ardent, de maniere que bien souvent les grains d'orge emmy l'aire saultent & petillent bien souvent contremont, comme si la terre par la vehemence de l'inflammation eust un poulx hault qui les feist ainsi saulteler, & les hommes aux grandes chaleurs d'esté y dorment sur des grands sacs de cuir pleins d'eau fresche. Harpalus que Alexandre y laissa pour son lieutenant & gouverneur du païs, desirant y orner & embellir les jardins du palais royal, & les allées d'iceulx, de toutes les plantes de la Grece, vint bien à bout d'y edifier toutes les autres, excepté le lierre seulement, que la terre ne voulut jamais endurer, ains le feist tousjours mourir, pource qu'il ne pouvoit endurer la temperature d'icelle qui estoit ardente, & le lierre de sa nature aime l'air & le païs froid. Ces digressions là sont un peu hors de propos : mais à l'adventure ne seront elles point ennuyeuses aux lecteurs quelques difficiles qu'ilz soyent, pourveu qu'elles ne soyent pas trop longues.

LXVIII. Au surplus Alexandre s'estant emparé de la ville de Suse, trouva dedans le chasteau quarante mille talens ^{*} en or & en argent monnoyé, sans une quantité inestimable d'autres riches

^{*} * Vingt quatre millions d'or. Amyot. 186,750,000 livres de notre monnoie.

96 ALEXANDRE LE GRAND.

& précieux meubles, entre lesquels on dit qu'il se trouva trois cents mille livres pesant de pourpre Hermionique ¹, que lon y avoit amassée & serrée en l'espace de deux cents ans, il ne s'en falloit que dix, & neantmoins retenoit encore la vivacité de sa couleur aussi guaye, comme si elle eust esté toute fresche : & dit on que la cause pourquoy elle s'estoit ainsi bien conservée, venoit de ce que la teinture en avoit esté faite avec du miel, ès laines qui ja paravant estoient teintes en rouge, & avec de l'huile blanche, ès laines blanches : car on en voit de celles là teintes d'aussi long temps, qui tiennent encore la vigueur de leur lustre nette & reluisante. Dinon ² escrit davantage, que ces roys de Perse faisoient venir de l'eau des rivières du Nil & du Danube, laquelle ilz faisoient serrer avec

¹ Il semble qu'il entende, de laines teintes en pourpre, & la meilleure qui se trouvoit en Europe, estoit celle de Hermione ville de la Laconie. Amyot. Hermione n'étoit point dans la Laconie, mais dans l'Argolide, entre les golphes Argolique & Saronique. Mais ce n'est pas la pourpre d'Hermione dont Plin parle; c'est celle de la Laconie, qu'il vante en plusieurs endroits, & on peut juger par la dix-huitième ode du second livre d'Horace, à quel point elle étoit estimée à Rome.

² Il fut pere de Clitarque, qui accompagna Alexandre dans ses expéditions, & qui écrivit l'histoire de ce conquérant. Ainsi Dinon vivoit du tems d'Ochus, roi de Perse. Cornelius Nepos suivoit son autorité dans ce qui concernoit la Perse. Cependant on voit par Plin, (L. X.) relativement aux Sirènes, que son ouvrage n'étoit pas sans mélange de fables.

leurs

leurs autres tresors par une magnificence , comme pour confirmer par là la grandeur de leur empire , & monstrent qu'ilz estoient seigneurs du monde.

LXVIII. Mais ayant le país de la Perse les entrées & advenues malaisées , tant pource qu'il est de soy aspre , comme aussi pource que les passages estoient gardez par les meilleurs hommes de la Perse , à cause que le roy Darius fuyant de la bataille s'y estoit retiré , il y eut un homme parlant la langue Grecque & Persiene , né d'un pere natif de la Lycie , & d'une mere Persiene , qui conduisit Alexandre au dedans par un destour & circuit de chemin , qui ne fut pas trop long , fuyvant ce qui autrefois avoit esté predit par la prophetisse Pythie , estant Alexandre encore en son enfance , qu'il y auroit un Lycien qui le guideroit & conduiroit à l'encontre des Perses. Si fut fait dedans le país grande occision des prisonniers que lon y prit : car Alexandre luy mesme escrit , que pensant que cela deust servir à ses affaires , il commanda que lon meist les hommes à l'espée. Lon tient qu'il y trouva tout autant d'or & d'argent monnoyé , comme il avoit fait en la cité de Suse , qui fut emporté avec le reste des precieux meubles , & toute la chevance royale , par dix mille paires de mulers , & cinq mille chameaux. Mais en entrant dedans

le chasteau de la cité capitale de Perse, Alexandre advisa d'aventure une grande image de Xerxes, laquelle avoit esté, sans y penser, abbatue en terre par la multitude des soudards qui se jettoient à la foule dedans : s'y s'arresta tout court, & parlant à elle comme si elle eut eu sens & vie, dit : « Je ne sçay si je doy passer oultre sans » te faire redresser, pour la guerre que tu feis » jadis aux Grecs, ou si je te doy faire relever » pour le regard de ta magnanimité & de tes » autres vertus ». Finablement après avoir demouré long temps à penser en luy mesme sans mot dire, il passa oultre, & voulant refaire un peu son armée qui estoit lasse & travaillée, mesmement qu'il estoit lors la saison d'hiver, il y séjourna quatre mois tous entiers. Là où lon dit que la premiere fois qu'il s'asseit dedans le throne royal soubz un ciel d'or, Demaratus Corinthien, qui luy portoit amitié & bienveillance hereditaire, commencée dès le temps de Philippus son pere, se prit à plorer de joye en bon vieillard comme il estoit, disant que les Grecs paravant decedez estoient bien privez d'un fort grand plaisir, de n'avoir pas eu cest heur, que de voir Alexandre assis dedans le throne royal de Xerxes.

LXIX. Et depuis ainsi comme il se preparoit pour aller encore après Darius, il se meit un

jour à faire bonne chere, & à se recréer en un festin, où lon le convia avec ses mignons, si priveement, que les concubines mesmes de ses familiers furent au banquet avec leurs amis, entre lesquelles la plus renommée estoit Thaïs, natifve du païs de l'Attique, estant l'amie de Prolomæus, qui après le trespas d'Alexandre fut roy d'Égypte. Ceste Thaïs partie louant Alexandre dextrement, & partie se jouant avec luy à la table, s'avancea de luy entamer un propos bien convenable au naturel affecté de son païs, mais bien de plus grande consequence qu'il ne luy appartenoit, disant que ce jour là elle se sentoit bien largement à son gré recompensée des travaux qu'elle avoit soufferts à aller errant çà & là, par tout le païs de l'Asie en suyvant son armée, quand elle avoit eu ceste grace & cest heur de jouer à son plaisir dedans le superbe palais royal des grands roys de Perse: mais qu'encore prendroit elle bien plus grand plaisir à brusler, par maniere de passetemps & de feu de joye, la maison de Xerxes qui avoit bruslé la ville d'Athenes, en y mettant elle mesme le feu en la presence & devant les yeux d'un tel prince comme Alexandre, à celle fin que lon peust dire au temps à venir, que les femmes suyvens son camp avoyent plus magnifiquement vengé la Grece des maux que les Perfes luy,

avoient faicts par le passé, que n'avoient jamais fait tous les capitaines Grecs qui furent onques ny par terre ny par mer. Elle n'eut pas si tost achevé ce propos que les mignons d'Alexandre y assistans, se prirent incontinent à battre des mains & à mener grand bruit de joye, disans que c'estoit le mieulx dit du monde, & incitans le roy à le faire. Alexandre se laissant aller à leurs instigations, se jetta en pieds & prenant un chapeau de fleurs sur sa teste & une torche ardente en sa main, marcha luy mesme le premier : ses mignons allerent après tout de mesme, crians & dansans tout à l'entour du chasteau. Les autres Macedoniens qui en sentirent le vent, y accoururent aussi incontinent avec torches & flambeaux tous ardens en grande resjouissance, pource qu'ilz faisoient leur compte que cela estoit signe que Alexandre pensoit de s'en retourner en son país, non pas faire sa demourance entre les Barbares, puis qu'il brusloit & gastoit ainsi le chasteau royal. Voilà comme lon tient qu'il fut ars & brulé : toutefois il y en a qui disent, que ce ne fut pas de ceste sorte, par maniere de jeu, ains par deliberation du conseil : comment que ce soit, c'est bien chose confessée de tous, qu'il s'en repentit sur l'heure mesme, & qu'il commanda que lon esteignist le feu.

LXX. Mais estant de sa nature liberal, & aimant

à donner, ceste volonté luy creut encore davantage à mesure que ses affaires allerent prosperant, & si accompagnoit les presens qu'il faisoit d'une chere guaye, & d'une careffe qui les rendoit encore beaucoup plus agreables. Dequoy je veux en cest endroit reciter quelque peu d'exemples: Ariston, qui estoit coulommel des Peroniens, ayant occis un des ennemis, & luy en monstrant la teste, luy dit: « Sire, un tel present en nostre » pais se recompense d'une coupe d'or ». Alexandre en se riant luy respondit, « Ouy bien » d'une coupe vuide: mais j'en boy à toy dedans » ceste cy pleine de bon vin, que je te donne ». Une autre fois il trouva un pauvre homme Macedonien, qui menoit un mulet chargé de l'or du roy, & comme le mulet se trouva si las & recreu qu'il ne pouvoit plus se soutenir, le muletier Macedonien chargea la somme sur ses espauls, & la porta luy mesme une espace du chemin, mais à la fin il s'en trouva si chargé, qu'il vouloit mettre son fardeau en terre: ce que voyant Alexandre, demanda que c'estoit, & l'ayant entendu, luy dit, « Ne te lasses point, » & fais tant que tu le portes encore jusques en » ta tente, car je le te donne ». Brief il sçavoit plus mauvais gré à ceulx qui ne vouloyent point prendre de luy, qu'à ceulx qui luy demandoient: comme il escrivit à Phocion, qu'il ne le tien-

102 ALEXANDRE LE GRAND.

droit plus pour un de ses amis , s'il refusoit les presens qu'il luy faisoit. Il n'avoit d'aventure rien donné à un jeune garçon qui se nommoit Serapion , lequel servoit de jeter la balle à ceulx qui jouoyent , non pour autre cause , que pource qu'il ne luy demandoit rien. Parquoy un jour que le roy y vint pour jouer , ce garçon jetta tousjours la balle aux autres qui jouoyent avec luy , & à luy non : tellement que le roy à la fin luy dit , « Et à moy , ne me donnes tu » point » ? « Non , répondit il , sire , pource que » tu ne demandes point ». Alexandre entendit incontinent ce qu'il vouloit dire , & s'en prenant à rire , luy feit depuis beaucoup de bien. Il y avoit à sa suite un nommé Proteas , homme plaissant , qui rencontroit fort plaissamment , & de bonne grace , en compagnie : il advint qu'Alexandre , pour quelque occasion fut courroucé à luy : parquoy ses amis se meirent à prier & interceder pour luy , à ce qu'il luy voulust pardonner , & luy mesme estant present , luy requit aussi pardon , ayant les larmes aux yeux. Alexandre dit , qu'il luy pardonnoit : & le plaissant luy repliqua , « Donnes m'en don- » ques , sire , quelque seureté premierement , » si tu veux que je m'en assure » : il commanda sur l'heure qu'on luy donnast cinq talents ¹.

¹ Trois mille escus, Amyot. 23,342 liv. de notre monnoie.

LXXI. Quant aux biens qu'il donnoit , & aux richesses qu'il départoit à ses familiers , & à ceulx qui estoient de la garde de son corps , on peult evidenttement cognoistre qu'ilz estoient fort grands par une lettre missive que sa mere Olympias luy en escrivit un jour , où il y a ces propres termes : « Je suis bien d'advis que » tu faces autrement des biens à tes familiers » amis , & que tu les tienes en honneur auprès » de toy : mais tu les fais egaulx aux grands » roys , & leur donnes les moyens de faire » beaucoup d'amis en te les ostant à toy mesme ». Et comme sa mere luy en escrivist souvent de semblables à ce mesme propos , il les gardoit secrettement sans les communiquer à personne , sinon un jour , que comme il en ouvrit une , Hephæstion qui se trouva present , s'approcha , ainsi qu'il avoit accoustumé , & la leut avec luy : Alexandre ne l'en engarda point , mais après qu'il l'eut achevée de lire , il tira de son doigt l'anneau duquel il seelloit & cachetoit ses lettres , & en meit le cachet contre la bouche d'Hephæstion. Il donna au filz de Mazæus , qui estoit le plus grand personnage que Darius eust autour de luy , un second gouvernement oultre celuy qu'il avoit paravant , encore plus grand que le premier. Le jeune Seigneur le refusa disant : « Comment , sire , par cy devant il n'y

» avoir qu'un Darius , & tu fais maintenant
 » plusieurs Alexandre ». Il donna aussi à Parmenion la maison de Bagoas , là où lon dit
 qu'il se trouva de meubles Susians seulement ,
 pour mille talents ¹. Il manda à Antipater qu'il
 prist des gardes pour la seureté de sa personne ,
 à cause qu'il avoit des ennemis & malvueillans
 qui le guettoient. Aussi donna il & envoya plusieurs
 beaux & grands presens à sa mere : mais
 il luy manda qu'elle ne se meslast point autrement
 plus avant de ses affaires , & qu'elle n'entreprist
 point l'estat d'un capitaine : dequoy elle s'estant
 courroucée , il supporta patiemment l'aspreté de son
 courroux. Et comme Antipater un jour luy eust
 escrit une longue lettre à l'encontre d'elle , après
 l'avoir toute leüe , il dit : « Antipater n'entend
 pas qu'une seule larme de » mere , efface dix mille
 telles lettres ».

LXXII. Au reste s'estant apperceu , que ceulx
 qui avoyent accès autour de luy , estoient devenus
 par trop dissolus & desordonnez en delices ,
 & superflus en despense , de maniere que un
 Agnon Teïen ² portoit de petits clous d'argent
 à ses pantoufles , & que Leonatus faisoit porter
 parmy son bagage la charge de plusieurs cha-

¹ Soixante mille escus. *Amyot.* 4,668,775 liv. de notre monnoie.

² Téos , ville d'Ionie , vis-à-vis l'île de Chio ; c'est la patrie d'Antagréon.

meaux de pouldre d'Ægypte , pour s'en servir
 seulement quand il jouoit à la lucte & autres telz
 exercices de la personne , & que lon trainnoit
 aussi après Philotas des toiles pour la chasse de
 douze mille cinq cents pas de long , & qu'il y
 en avoit qui usoyent de precieux parfums &
 de senteurs liquides quand ilz s'estuvoient &
 baignoyent , plus qu'il n'y en avoit qui se frot-
 tassent d'huile simple seulement , & qu'ilz me-
 noient des valetz de chambre delicatz , pour
 les estriller & frotter dedans le baing , & pour
 faire mollement leurs licts , il les en reprit
 doucement & sagement , en leur disant , « Qu'il
 » s'esmerveilleoit comment eulx qui avoyent com-
 » batu tant de fois & en si grosses batailles , ne
 » se souvenoyent pas , que ceulx qui travaillent ,
 » dorment plus souefvement & de meilleur
 » somme , que ceulx qui ne travaillent point ,
 » & comment ilz n'appercevoyent pas , en con-
 » ferant leur maniere de vivre avec celle des
 » Perfes , que le vivre en delices est chose servile ,
 » & le travailler chose royale. Et comment
 » prendroit la peine de penser luy mesme son
 » cheval , ou de fourbir sa lance & son armer ,
 » celuy qui par delicate paresse desdaigne ou
 » desaccoustume d'employer ses mains à frotter
 » son propre corps ? Ne sçavez vous pas , que
 » le comble de nostre victoire consiste à no

106 ALEXANDRE LE GRAND.

» faire pas ce que faisoient ceulx que nous
 » avons vaincus & desfaits » ? Et pour les con-
 vrier par son exemple à travailler , il prenoit
 encore plus de peine que jamais , à la guerre
 & à la chasse , & se hazardoit à tout peril plus
 adventureusement qu'il n'avoit onques fait : telle-
 ment qu'un ambassadeur Lacedæmonien , s'estant
 trouvé present à luy voir combattre & desfaire
 un grand lion , luy dit : « Tu as certainement
 » bien combatu contre ce lion , sire , à qui
 » demoureroit le roy ». Craterus feit depuis
 mettre ceste chasse au temple d'Apollo en Del-
 phes , où sont les images du lion , des chiens ,
 & du roy combatant le lion , & de luy mesme
 qui y survint au secours , estans toutes les dittes
 images de cuyvre , les unes faittes de la main de
 Lyfippus , & les autres de Leochares.

LXXIII. Ainsi doncques Alexandre , tant
 pour exercer sa personne à la vertu , que pour
 inciter ses gens à faire de mesme , s'exposoit à
 relz hazards : mais ses familiers pour les grands
 biens & grandes richesses , dont ilz estoient
 gorgez , vouloyent vivre en delices sans plus
 se travailler , & leur grevoit d'aller davantage
 errans par le monde d'une guerre en une autre :
 à raison dequoy ilz commenceoyent peu à peu
 à le blasmer & à dire mal de luy : ce que du
 commencement Alexandre supporta doucement ,

disant que c'estoit chose digne d'un roy, souffrir d'estre blasmé, & ouïr mal pour faire bien : toutefois les moindres demonstres qu'il faisoit à ses amis, tesmoignoient une amitié cordiale, & un honneur grand qu'il leur portoit, dequoy je veux en cest endroit mettre quelques exemples : Peucestas ayant esté mors d'un ours, l'escrivit à ses autres amis, & ne luy en manda rien. Alexandre n'en fut pas content, & luycrivit, « A tout le moins mande moy comment » tu te portes maintenant, & si aucuns de ceulx » qui chassoyent avec toy, t'ont point abandonné » au besoing, à fin qu'ilz en soyent punis ». Estant Hephæstion absent de sa cour pour quelques affaires, il luycrivit, que ainsi comme ilz s'esbatoyent à combattre une beste, qui s'appelle ichneumon, Craterus s'estoit de male fortune rencontré au devant du javelot de Perdiccas, & en avoit esté blecé en toutes les deux cuisses. Peucestas estant eschappé d'une grosse maladie, il encrivit à Alexippus le medecin qui l'avoit pensé, en le remerciant. Estant Craterus malade, il eut quelques visions une nuit, à raison desquelles il feit certains sacrifices pour le recouvrement de sa santé, & luy manda qu'il en feist aussi : & comme le medecin Pausanias luy voulust donner une medecine d'ellebore, il luycrivit des lettres, par

lesquelles il luy feit entendre la peine où il en estoit , & l'admoneſta qu'il regardaſt bien ſoigneuſement comment il uſeroit de celle medecine. Il feit mettre en priſon Ephialtes & Ciffus , qui luy allerent les premiers denoncer la fuite & retraitte de Harpalus , comme l'accuſans à tort & faulſement. Ayant commandé que lon feiſt un rolle des vieilles gens & des indispoſez & malades , pour les renvoyer au païs en leurs maiſons , il y eut un Eurylochus *Ægeien* qui ſe feit enroller entre les malades , & depuis fut trouvé qu'il n'avoit point de mal , & confeſſa qu'il l'avoit fait ſeulement pour ſuyvre une jeune femme nommée *Teleſippa* , dont il estoit amoureux , qui s'en retournoit ès païs bas devers la mer. Alexandre demanda de quelle condition estoit ceste femme : il luy fut reſpondu , que c'estoit une courtiſane de condition libre. Adonc ,
 « Je deſire , dit il à Eurylochus , favoriſer ton
 » amour , toutefois de l'arreſter par force , je ne
 » puis : mais adviſe de faire en forte par dons ,
 » ou par bonnes paroles , que elle ſoit contente
 » de demourer , puis qu'elle eſt de condition
 » libre ».

LXXIV. C'eſt choſe merveilleuſe , comment il prenoit la peine d'eſcrire pour ſes amis , juſques à de ſi petites choſes , qu'il faiſoit , comme quand il eſcrivit en Cilicie pour un ſerviteur de *Seleucus*

qui s'en estoit fouy d'avec son maistre , commandant que lon feist diligence de le chercher. Et par une autre missive , il louë Peucestas de ce qu'il avoit fait arrester & prendre Nicon un esclave de Craterus : & à Megabyzus , touchant un autre serf qui s'en estoit fouy en la franchise d'un temple , il luy commande aussi par lettres de tascher à l'en faire sortir pour luy mettre la main sur le collet , mais autrement de ne luy toucher point. Et dit on que au commencement , quand il seoit en jugement pour ouïr plaider quelques causes criminelles , pendant que l'accusateur deduisoit le faict de son accusation , il tenoit tousjours l'une de ses oreilles close avec la main , à fin de la contregarder pure , & non prevenue d'aucune calumnieuse impression , pour ouïr les defenses & justifications de l'accusé. Mais depuis , la multitude des accusations que lon proposa devant luy , l'irrita & le rendit aspre , jusques à luy faire croire les faulses pour le grand nombre qu'il en trouva de vrayes : mais ce qui plus le faisoit sortir hors de soy mesme , estoit quand il entendoit que lon avoit mesdit de luy , & estoit adonc cruel sans vouloir pardonner en façon quelconque , comme celuy qui aimoit mieulx la gloire , que l'empire , ny que sa propre vie.

LXXV. Au demourant , il se remeit lors en chemin pour aller après Darius , pensant qu'il

110 ALEXANDRE LE GRAND.

deust encore combattre : mais entendant comme Bessus l'avoit pris, adonc il donna congé aux Theffaliens de s'en retourner en leurs maisons après leur avoir fait don de deux mille talents ¹ oultre leur soulde & leur paye ordinaire : mais en ceste poursuite de Darius, qui fut longue, laborieuse & penible, pource qu'en unze jours il feit bien à cheval environ deux cents & six lieues ², tellement que pour la plus part ses gens estoient si las & si recreuz, qu'ilz n'en pouvoient plus, mesmement à faulte d'eau, il trouva un jour quelques Macedoniens qui portoyent dessus des mulets des peaux de chevre pleines d'eau, qu'ilz venoyent de querir d'une riviere, & voyans qu'Alexandre mouroit de soif, estant ja environ le midy, ilz coururent viftement à luy, & luy presenterent de l'eau pour boire dedans un armet : il leur demanda à qui ilz portoyent ceste eau, & ilz luy respondirent qu'ilz la portoyent à leurs enfans : « Mais pour- » veu que tu vives, sire, nous pourrons bien » tousjours refaire d'autres enfans, si nous per- » dons ceulx cy ». Ayant ouy ces paroles il prit l'armet, & regardant autour de luy, que tous

¹ Douze cents mille escus. *Amyot.* 9,337,500 livres de notre monnoie.

² Grec, trois mille trois cents stades, qui font 137 lieues & demie, à 14 stades par lieue.

ALEXANDRE LE GRAND. 111

les hommes d'armes qui l'avoient fuyvy, estendoient le col pour voir ceste eau, il la rendit à ceulx qui la luy avoient présentée, en les remerciant, sans en boire : « Car si je boy seul, » ceulx cy, dit il, perdront tout courage ». Et adonc eulx voyans la gentillesse de son courage, luy crièrent tout hault, qu'il les menast hardiment : & quant & quant se prirent à fouetter leurs chevaux, disans qu'ilz n'estoyent plus las, & qu'ilz n'avoient plus de soif, ains qui plus est, qu'ilz ne pensoient pas estre mortelz, tant comme ilz auroient un tel roy.

LXXVI. Si estoit bien la bonne voulunté, de le fuyvre egale en tous, mais toutefois il n'y en eut que soixante seulement, qui donnassent quant & luy jusques dedans le camp des ennemis, là où passans par dessus force or & argent qui gisoit espandu emmy la place, & tirans oultre plusieurs chariots pleins de femmes & d'enfans, qu'ilz trouvoient emmy les champs, fuyans çà & là à l'aventure, sans chartier qui les conduisist, ilz coururent à bride abbatue jusques à ce qu'ilz eussent atteint les premiers fuyans, pensans bien que Darius y devoit estre, & feirent tant qu'ilz le trouverent à la fin à grande peine estendu dessus un chariot, ayant le corps tout percé de plusieurs coups de dards & de javelots, que lon luy avoit donnez : &

estant bien près de rendre l'esprit, ce neantmoins encore demanda il à boire, & beut de l'eau fresche que luy bailla Polystratus, auquel après avoir beu il dit, « Cestuy est le dernier de mes » malheurs, mon amy, qu'ayant reçu ce plaisir » de toy, je n'ay pas moyen de le te rendre : » mais Alexandre s'en donnera la recompense, » & les dieux à Alexandre de la bonté, douceur » & humanité, dont il a usé envers ma mere, » ma femme & mes enfans, en la main duquel » je te prie que tu touches pour moy ». En disant ces dernieres paroles, il prit la main de Polystratus & rendit l'ame tout aussi tost. Alexandre y survint incontinent après, & monstra evidemment qu'il luy desplaisoit fort de sa fortune, & destachant son manteau, le jetta dessus le corps, & l'en enveloppa. Depuis ayant trouvé moyen d'avoir Bessus entre ses mains, il le fait desmembrer avec deux arbres haults & droits, qu'il fait courber l'un devers l'autre, & attacher à chacun une partie du corps, puis les laisser retourner en leur naturel par telle impetuosité, que chacun en emporta sa piece.

LXXVII. Mais pour lors ayant fait ensepvelir & embausmer royalement le corps de Darius, il l'envoya à sa mere, & receut au nombre de ses amis son frere Exatheres¹ : puis avec la fleur

¹ * Axathrès, suivant Quinte-Curce & Diodore de Sicile.

de son armée, descendit au païs des Hyrcaniens, là où il veit le gouffre de la mer Caspiene, qui ne luy sembla pas moindre que celui de la mer de Pont : mais bien en est l'eau plus douce que celle des autres mers. Si ne peut rien trouver ny sçavoir de certain que c'estoit, ny dont elle venoit : mais ce qui luy en sembla plus approchant de la verité, est que ce soit un regorgement des marests Mæotides. Et toutefois les anciens philosophes naturelz semblent en avoir sçeu la verité : car plusieurs ans devant le voyage & les conquestes d'Alexandre¹, ilz ont escrit que des quatre principaux gouffres de mer qui viennent de l'Océan, & entrent au dedans des terres, le plus septentrional est celui de la mer Caspiene, qu'ilz appellent aussi la mer Hyrcaniene : mais en passant par ce païs-là, il y eut quelques Barbares qui au desprouveu se ruerent sur ceux qui menoyent Bucephal le cheval de bataille d'Alexandre, & le prirent, dequoy il fut si despit qu'il envoya denoncer par un herault à ceux du païs, qu'il mettroit tout à l'espée jusques aux femmes & aux petits enfans, s'ilz ne luy faisoient ramener son cheval : & comme ilz le luy eussent ramené, & qui plus est, livré leurs villes & leurs places entre ses mains, il les traita tous humainement, & si paya davan-

¹ Voyez les Observations.

rage la rençon de son cheval à ceulx qui le luy remenerent.

LXXVIII. Au partir de là il entra en la province Parthiene, là où se trouvant de loisir il commença à se vestir à la mode des Barbares, soit ou qu'il se voulust accoustumer aux meurs & façons de faire du païs, estimant qu'il ne pourroit avoir meilleur moyen de gagner les cueurs des hommes qu'en s'accoustumant à leurs manieres de vivre, ou bien qu'il le feist pour sonder & tenter les cueurs des Macedoniens, à fin de sçavoir comment ilz prendroyent l'usance qu'il vouloit introduire de l'adoration, c'est à dire, de faire la reverence & s'encliner devant le roy, en les accoustumant ainsi petit à petit à supporter la mutation & le changement de sa maniere de vivre, combien que du premier coup il ne prit pas l'accoustrement des Medois, qui estoit par trop estrange & de tout point barbaresque : car il ne porta point de braguesques, ny la robe trainnante en terre ; ny le hault chapeau pointu, ains prit un habit moyen entre celui des Medois & celui des Perses, plus modeste que celui là, & plus pompeux que cestuy cy, encore du commencement ne le porta il que quand il avoit à parler à quelques Barbares, ou en son privé entre ses familiers amis ; mais depuis il se monstra au peuple en public avec

cest accoustrement en allant par les champs , ou bien en donnant audience publiquement , qui fut chose bien desplaisante aux Macedoniens : mais ilz avoyent sa vertu en si grande admiration , qu'ilz estimoyent estre raisonnable qu'on luy concedast qu'il peust faire aucunes choses pour son plaisir & à sa fantasie : car oultre les autres heurts qu'il avoit euz auparavant , il avoit naguères reçu un coup de fleche qui luy avoit rompu l'os de la jambe , & une autre fois avoit aussi reçu un coup de pierre sur le chignon du col , dont il tomba en un esblouissement de la veüe qui luy dura bien long temps , & neantmoins ne laissoit pas pour tout cela de s'exposer encore à tous périlz sans en rien s'espargner : car il passa encore la riviere de Orexartes , qu'il estimoit estre le Tanais , & ayant desfait en bataille rangée les Scythes , les chassa barant plus de cinq grandes lieues , quoy qu'il fust travaillé d'un flux de ventre.

LXXIX. Ce fut là où lon dit que la royne des Amazones le vint trouver : car ainsi l'a escrit la plus part des historiens , comme Clitarchus , Polycritus , Onesicritus , Antigenes & Hister : mais Chares le rapporteur , & Ptolomæus , Aniclides , & Philon le Thebain , Philippus le rapporteur ¹ , & oultre ceulx là Hecataeus Ere-

¹ Il y a ici dans le grec une faute de copie occasionnée par la ressemblance des noms. Ce Philippe est un historien dont l'époque n'est

thrien, Philippus Chalcidien & Duris le Samien, disent que c'est chose controuvée & faite à plaisir, & semble que Alexandre, mesme leur en porte tesmoignage : car escrivant toutes choses par le menu à Antipater selon qu'elles passoyent, il luy mande bien que le roy de la Scythie luy vouloit bailler sa fille en mariage, mais il ne fait aucune mention d'Amazones : & dit on que long temps depuis Onesicritus leur à Lyfimachus, qui estoit desjà roy, le quatrieme livre de son histoire, là où ce conte là de l'Amazone est escrit, & que Lyfimachus, en se soubriant luy dit, « Et où estoye je donques en ce temps là ? » Mais quant à cela, ny pour le croire on n'aura ja Alexandre en plus grande reputation, ny pour le descroire en moindre estime.

LXXX. Au reste, craignant que les Macedoniens ennuyez de ceste longue guerre, ne voulussent plus passer oultre, il laissa derriere le demourant du peuple de son armée, & prit seulement vingt mille hommes de pied, & trois mille chevaux, qui estoient la fleur de tout son exercite, avec lesquelz il entra dedans le païs

pas connue. Il a écrit sur l'histoire de la Carie, sa patrie, car il étoit de la ville de Théangèle, à cause de quoi Plutarque l'appelle Théangélien, Θεανγελίτης, nom que les copistes ont changé en celui d'Ισκαρίωτης, Isangèle, épithète donnée deux ligues plus haut à Charès, & qui désigne auprès des rois la fonction d'introducteur.

ALEXANDRE LE GRAND. 117

de l'Hyrcanie, & là leur fit une harenque, en laquelle il leur remonstra, que les nations Barbares de l'Asie ne les avoyent veuz qu'en songe; par maniere de dire, & que s'ilz se retiroient en Macedoine, n'ayans que seulement emeu, & non de tout poinct subjugué & dompté l'Asie, les peuples irritez leur courroyent sus à leur retour, ne plus ne moins qu'à des femmes: toutefois qu'il donnoit bien congé de s'en aller à ceulx qui se voudroyent retirer, en protestant neantmoins à l'encontre de ceulx qui s'en iroyent, qu'ilz l'auroient abandonné au besoing, luy, ses amis & ceulx qui auroient si bon cueur, que de le vouloir suyvre en une si glorieuse intention de vouloir soubmettre toute la terre habitable à l'empire des Macedoniens. Cela est ainsi couché & presque en mesmes termes, dedans l'epistre que Alexandre en escrit à Antipater, là où il met davantage que leur ayant tenu ce propos, ilz se prirent à crier tout hault, qu'il les menast en tel quartier du monde qu'il voudroit. Quand ceulx là eurent donné leur consentement à son espreuve, il fut puis après facile de gagner le reste du peuple, qui suyvit aiseement l'exemple des principaux.

LXXXI. Parquoy il se conforma adonc encore davantage en sa maniere de vivre aux meurs de ceulx du païs, & réciproquement aussi les

118 ALEXANDRE LE GRAND.

meurs de ceulx du païs à ceulx de la Macédoine; ayant opinion que moyennant ceste meslange & ceste communication de façons de faire, les choses s'entretiendroyent mieulx en bonne paix, union & concorde par amitié que par force, quand il seroit loing des païs de la Perse. A l'occasion de quoy il feit choisir trente mille enfans du païs, ausquelz il feit apprendre les lettres grecques, & les nourrir & adresser aux armes à la discipline Macedoniene, ordonnant plusieurs maistres pour les instruire en l'une & en l'autre. Quant au mariage de Roxane, il fut bien fait par amourettes, pource qu'il en devint amoureux en un festin¹ où il la veit, & la trouva belle à son gré & de bonne prise: mais si vint il aussi à propos pour le bien de ses affaires, que s'il eust esté fait par meure deliberation de conseil: car les Barbares en prirent assurance de luy davantage, quand ilz veirent qu'il contractoit alliance de mariage avec eulx, & l'en aimerent beaucoup mieulx que devant, quand ilz considererent en eulx mesmes, que s'estant auparavant tousjours monstré fort continent en telles choses, entore n'avoit il point voulu toucher ceste jeune dame, de l'amour de laquelle seule il s'estoit trouvé vaincu, sinon en legitime mariage.

¹ Voyez les Observations.

LXXXII. Et luy considerant que des deux qu'il aimoit plus chèrement, Hephæstion trouvoit bon ce qu'il en faisoit en cela, & qu'il s'accoustroit comme luy, mais que Craterus au contraire retenoit tousjours les façons de faire de son païs, il traittoit d'affaires & negocioir avec les Barbares par l'entremise de celuy là, avec les Grecs & les Macedoniens par l'entremise de cestuy cy: en somme, il aimoit plus l'un, & honoroit plus l'autre, estimant & disant que Hephæstion aimoit Alexandre, & Craterus aimoit le roy. Au moyen de quoy ces deux personnages ne se vouloient point de bien l'un à l'autre, au fond de leurs cueurs, ains entroyent souvent en querelle, tellement qu'une fois en Indie ilz en vindrent jusques à mettre la main aux armes & à desgainer l'un contre l'autre, & y accouroient desjà leurs amis au secours d'une part & d'autre: mais Alexandre y alla aussi, qui en public devant tout le monde tensoit fort Hephæstion l'appellant fol & insensé, de ne cognoistre pas que qui luy osteroit Alexandre, il ne demoureroit plus rien: mais en privé, à part, il reprit aussi bien aigrement Craterus, & les appellant tous deux l'un devant l'autre leur feit faire paix ensemble, jurant par Jupiter Hammon, & par tous les autres dieux, que c'estoyent bien les deux hommes du monde qu'il aimoit le mieulx, mais

neantmoins que s'il s'appercevoit qu'ilz eussent plus de differens ensemble, ils les occiroit tous deux, ou pour le moins celuy qui auroit commencé la querelle : parquoy depuis ceste heure là, on escrit qu'ilz ne feirent ny ne dirent rien l'un à l'autre, non pas en jeu tant seulement.

LXXXIII. Or avoit Philotas filz de Parmenion grande autorité entre les Macedoniens, pource qu'il estoit vaillant homme de sa personne, patient de labeur, liberal, & aimant les siens autant ou plus que nul autre seigneur, qui fust en tout le camp, après Alexandre. Auquel propos on racompte, que quelquefois il y eut un de ses amis qui luy demanda de l'argent : il commanda tout aussi tost à son argentier, qu'il luy en baillast. L'argentier luy respondit, qu'il n'y en avoit point : & son maistre luy repliqua, « Que dis tu, qu'il n'y en a point ? » n'as tu ny vaisselle, ny accoustrement que tu peusses vendre ou engager, pour luy en trouver » ? mais au demourant il estoit si haultain & si importun à faire monstre de ses richesses, en se vествant plus superbement, & se traittant plus curieusement & plus opulamment qu'il n'appartenoit à homme privé, que cela le faisoit haïr, pource qu'il contrefaisoit ainsi à faulses enseignes le grand & le magnifique, de mauvais

ALEXANDRE LE GRAND. 121

jugement, & avec une mauvaise grace, dont il devint par sa folie suspect & envié de tout le monde, tellement que son pere mesme luy dit un jour : « Mon filz, fais roy plus petit ». Il avoit esté jà long-temps auparavant accusé & deferé envers Alexandre, pource que quand le bagage de l'armée de Darius, qui estoit en la ville de Damas, fut pris après la bataille de la Cilicie, il y eut plusieurs prisonniers amenez au camp d'Alexandre, & entre les autres une jeune courtisane native de la ville de Pydne¹, belle de visage; laquelle se nommoit Antigone. Philotas trouva moyen de la recouvrer, & comme jeune homme amoureux qu'il estoit, en banquetant avec elle se laissoit eschapper de la bouche bien souvent des paroles ambitieuses & des vaines vanteries de foudard, en attribuant à luy mesme & à son pere la plus part des haults faicts d'armes qui avoyent esté executez en toute ceste guerre, & appellant à tout propos Alexandre, ce jeune garson, & disant que par leur moyen il jouissoit du nom & tiltre de roy. Ceste femme rapporta ces propos à un sien familier, & celui là, comme il se fait ordinairement, à un autre, tant qu'il parvint jusques aux oreilles de Craterus, lequel prit la femme & la mena devant Alexandre, qui l'ouit, & l'ayant ouye luy com-

¹ Ville de Macédoine.

122 ALEXANDRE LE GRAND.

manda qu'elle continuast tousjours de hanter avec Philotas, à fin qu'elle luy rapportast tout ce qu'elle luy entendroit dire. Philotas ne sachant rien de ceste embusche, tenoit tousjours ceste Antigone auprès de luy, & se permettoit ordinairement de dire plusieurs paroles folles & indiscrettes à l'encontre du roy, une fois par courroux, & autrefois par vaine gloire : mais Alexandre, combien qu'il eust ceste vehemente preuve & accusation à l'encontre de Philotas, la dissimula pourtant sans en rien faire demonstration quelconque pour l'heure, fust ou pour l'assurance qu'il avoit en l'amour & bienveillance que Parmenion luy portoit, ou pour crainte qu'il avoit de leur puissance & autorité grande.

LXXXIV. Mais environ ce mesme temps, il y eut un Macedonien nommé Limnus¹, natif de la ville de Chalæstra², qui espioit en grande sollicitude les moyens de faire mourir Alexandre, & estant amoureux d'un jeune garson qui se nommoit Nicomachus, le sollicita de le vouloir aider à executer son entreprise : le garson le refusa très bien & descouvrit ceste subornation à un sien frere, qui avoit nom Balinus³ lequel s'en adressa à Philotas, & le pria de les intro-

¹ Dymnus dans Quinte-Curce & dans Diodore de Sicile.

² Ville de Macédoine.

³ Quinte-Curce le nomme Cebalinus.

duire tous deux devant Alexandre , pource qu'ilz avoyent quelque chose de grande consequence & très necessaire à luy communiquer. Philotas ne les feit point parler au roy , & ne sçait on pourquoy, disant qu'il estoit empesché à quelques autres plus grands affaires : au moyen de quoy ilz s'adresserent à un autre^r, qui leur donna entrée vers Alexandre, auquel ils exposèrent premierement le faict de la conspiration de Limnus , & feirent aussi en passant mention de ce qu'ilz s'estoyent premierement adressez à Philotas par deux fois , qui n'avoit fait compte de les introduire & les faire parler à luy : cela irrita fort Alexandre , & encore le fut-il plus quand celuy qu'il envoya pour prendre Limnus au corps, le tua , à cause qu'il se meit en défense , & ne se voulut pas laisser prendre , pensant avoir perdu un grand moyen de descouvrir entierement & averer toute la conspiration.

LXXXV. Et pour autant qu'il faisoit mauvais visage à Philotas , il incita ceulx qui de longue main luy vouloyent mal , lesquelz commencerent tout ouvertement , que c'estoit deormais trop attendu au roy , pource qu'il n'estoit point à croire que ce Chalestrien Limnus eust jamais eu la hardiesse d'entreprendre une telle conspiration , & qu'il n'en estoit que le ministre , ou ,

^r Nommé Métroon , selon Quinte-Curce.

124 ALEXANDRE LE GRAND.

pour mieulx dire , que l'instrument remué & manié par une plus grande puissance que la siene , & qu'il falloit enquerir de ceste conjuration sur ceulx qui avoient si grand interest à la faire celer. Depuis que Alexandre eut une fois ouvert les oreilles à telles paroles & telles presumptions , il y eut aussi tost mille calumnies proposées à l'encontre de Philotas , de manière qu'il fut saisy au corps & mis à la torture en présence des autres seigneurs familiers du roy , qu'il commeit à luy faire & parfaire son procès , estant luy mesme caché derriere une tapisserie pour escouter tout ce qu'il diroit : là où l'on compte , qu'ayant ouy les paroles lasches qu'il dit à Hephæstion , en le suppliant d'avoir compassion de luy , & les prieres viles & basses , qu'il luy feit , il dit en soy mesme : « Dea , ayant le cueur si » mol & si effeminé , Philotas , ozois tu bien » entreprendre de si grandes choses » ? Tant y a que Philotas fut executé à mort : & incontinent après son execution , Alexandre envoya en diligence au royaume de la Medie , faire tuer aussi Parmenion , qui y estoit son lieutenant , personnage qui avoit servy Philippus en la plus part de ses principaux affaires , & qui seul ou plus que nul des autres anciens serviteurs de son pere , avoit incité Alexandre à entreprendre le voyage de la conquête de l'Asie , & qui de

ALEXANDRE LE GRAND. 125

trois enfans qu'il y avoit menez quant & luy en avoit veu mourir deux devant luy, & puis fut occis avec le troisieme. Ceste execution rendit Alexandre redoubtable à plusieurs de ses amis, mesmement à Antipater, lequel envoya secretement devers les *Ætoliens* traiter sous main une alliance avec eulx, pource qu'eulx mesmes craignoyent aussi Alexandre, à cause qu'ilz avoyent destruit les *Oeniades*¹ : ce qu'Alexandre ayant entendu, dit que ce ne seroyent pas les enfans des *Oeniades*, mais luy mesme qui en feroit la vengeance sur les *Ætoliens*.

LXXXVI. Non gueres de temps après advint aussi l'inconvenient du meurtre de *Clitus*, lequel, à l'ouir nuement & simplement reciter sembleroit encore plus cruel que celui de *Philotas* : mais en racomptant la cause ensemble, & le temps auquel il advint, on trouvera que ce ne fut point de propos deliberé, ains plus tost par cas d'aventure & de meschef, ayant Alexandre seulement presté l'occasion de son ire & de son vin à la male fortune de *Clitus* : car voicy comme le cas advint : il estoit arrivé quelques gens des païs bas devers la marine, qui avoyent apporté à Alexandre des fruiçts de la Grece. Alexandre s'esbahissant de les voir ainsi beaux & frais, appella *Clitus* pour les luy monstrier

¹ Peuple d'Acarnanie, voisin des *Ætoliens*.

126 ALEXANDRE LE GRAND.

& luy en donner. Clitus d'aventure sacrifioit lors aux dieux , & laissa son sacrifice pour y aller : mais il y eut trois moutons , sur lesquels on avoit desjà fait les effusions accoustumées pour les immoler , qui le suivirent : ce qu'entendant Alexandre , le communiqua aux devins, Aristander & Cleomantis Laconien , qui tous deux respondirent que c'estoit un mauvais signe. A raison de quoy il ordonna sur l'heure que l'on sacrifiast pour le salut de Clitus , pour autant mesmement , que trois jours auparavant , il avoit eu la nuit en dormant une vision estrange , pource qu'il luy fut advis qu'il voyoit Clitus vestu de robbe noire assis entre les enfans de Parmenion qui tous estoient morts : toutefois Clitus n'acheva point son sacrifice , ains s'en alla soupper chez le roy , qui ce jour là avoit sacrifié à Castor & Pollux.

LXXXVII. Il fut beu à bon esciant à ce festin , durant lequel furent chantez quelques vers d'un poëte nommé Pranichus , ou comme les autres mettent , d'un Pierion , composez à l'encontre de quelques capitaines Macedoniens , qui n'agueres avoyent esté barus par les Barbares , pour leur faire honte , & apprestez à rire à la compagnie , dont les vieux qui estoient à ce festin , furent malcontents , & injurierent le poëte qui les avoit faits , & le musicien qui les chan-

toit. Au contraire Alexandre & ses mignons y prenoient plaisir, & commandoyent au chantre qu'il continuast : de quoy Clitus qui estoit desja un peu surpris de vin, avec ce qu'il estoit de sa nature homme assez rebours, arrogant & superbe, se courroucea encore davantage, disant que ce n'estoit point bien ny honestement fait d'injurier ainsi, mesmement parmy des Barbares ennemis, de pauvres capitaines Macedoniens, qui valoyent mieulx que ceulx qui se rioient & se mocquoyent d'eux, encore qu'il leur fust advenu par fortune quelque malheur. Alexandre là dessus luy respondit, qu'en disant cela il plaïdoit pour luy mesme, appellant couardise & lascheté, malheur. Et adonc Clitus se dressant sur ses pieds, se prit à luy repliquer : « Mais » ceste miene couardise te sauva la vie, à toy » qui te dis filz des dieux, lors que tu avois » desja tourné le dos à l'espée de Spithridates, & » le sang que ces pauvres Macedoniens ont res- » pandu pour toy, & les bleceutes qu'ilz ont » receuës en combatant pour toy, t'ont fait si » grand, que tu desdaignes maintenant le roy » Philippus pour ton pere, & te veux à toute » force faire filz de Jupiter Ammon ». Alexandre picqué au vif de ces paroles, luy repliqua soudain : « Dea, meschant malheureux que tu es, » penSES-tu demourer à la fin impuny de telz

128 ALEXANDRE LE GRAND.

» propos que tu tiens ordinairement à l'encontre
 » de moy en mutinant contre moy les Mace-
 » doniens » ? Et Clitus luy repliqua , « D'icy
 » & desja sommes nous assez punis , Alexandre ,
 » veu que nous recevons un tel loyer de noz
 » travaux & labeurs , que nous tenons pour bien
 » heureux ceulx qui sont morts avant que de
 » voir les Macedoniens fouetter de verges Me-
 » doises , & contrains de prier les Persez pour
 » avoir accès & entrée devers le roy ».

LXXXVIII. Clitus alloit disant la teste levée de
 semblables paroles , & Alexandre se soulevoit
 à l'encontre , & luy disoit injure : mais les plus
 vieux taschoient à appaiser la noise & le tu-
 multe : au moyen dequoy Alexandre se tournant
 devers Xenodochus Cardian , & Artemius Colo-
 phonien , leur demanda , « Vous semble il point
 » que les Grecs entre les Macedoniens soyent
 » comme demi-dieux , se promenans entre bestes
 » sauvages » ? Mais Clitus pour cela ne ceder
 point , ny ne diminuoit rien de son audace , ains
 alloit criant, qu'Alexandre dist publiquement tout
 hault ce qu'il avoit à dire , ou qu'il ne conviait
 point à venir soupper avec luy des hommes libres ,
 & qui avoyent accoustumé de parler franchement ,
 ains qu'il se teint avec des Barbares esclaves , qui
 adoreroient sa ceinture persienne , & sa longue
 cotte blanche. Adonc Alexandre , ne pouvant plus
 tenir

tenir sa cholere, prit une pomme de celles que lon-avoit servy à sa table, & la luy jettà à la teste, & chercha son espée, laquelle Aristophanes¹ l'un des gardes de son corps luy avoit expressement ostée : & comme tous les autres se meissent à l'entour de luy pour le retenir, & le prier de s'appaïser, il se jettà neantmoins hors de table, & appella ses gardes en langage Macedonien, qui estoit signe d'un bien grand trouble, & commanda à un trompette qu'il sonnast alarme : & pource qu'il reculoit & ne le vouloit pas faire, luy donna un coup de poing, dequoy le trompette fut depuis bien estimé, comme celuy qui avoit seul empesché, que tout le camp ne se mutinast. Encore ne fleschissoit point Clitus pour cela, jusques à ce que ses amis à toute peine le jetterent hors de la salle : mais il y rentra par une autre porte, prononceant fort audacieusement & irreveremment ce vers de la tragedie d'Andromaque, du poëte Euripides,

Las que les meurs de Grece se corrompent !

Adonc Alexandre ostant par force à un de ses gardes la javeline qu'il tenoit en sa main, ainsi que Clitus luy venoit à l'encontre², & avoit

¹ Ariston, suivant Quinte-Curce & Arrien.

² Quinte-Curce dit qu'Alexandre sortit de table, & s'alla placer dans le vestibule obscur, par où il falloit que tous les conviés passassent pour sortir, & que Clitus sortant le dernier, il le tua, après lui avoir demandé son nom.

sa levé la tapisserie qui estoit au devant de la porte , luy en donna tout à travers du corps , dont il tomba tout aussi tost par terre avec un soupir , & un cry qu'il jetta.

LXXXIX. La cholere fut à l'instant mesme passée à Alexandre , qui demoura tout picqué : & voyant ses familiers autour de luy , qui ne disoyent mot , retira la javeline du corps pour s'en donner à luy mesme dans la gorge : mais ses gardes incontinent luy prirent les mains , & l'emporterent malgré luy de là en sa chambre , où il passa toute la nuit & tout le jour ensuyvant à plorer amèrement , jusques à ce que ne pouvant plus crier ny lamenter , il demoura estendu tout de son long , jettant seulement de profonds soupirs. A l'occasion dequoy , ses amis n'entendans plus sa voix eurent peur , & entrèrent par force en sa chambre pour le reconforter : mais il n'en voulut ouïr parler pas un , sinon Aristander le devin , qui luy ramena en memoire la vision qu'il avoit eue touchant Clitus en dormant , estant le presage de ce qui devoit advenir : par où lon devoit juger que c'estoit chose fatale , & predestinée avant qu'il fust né. Il sembla qu'il prit pied à ces paroles. Depuis on feit entrer Callisthenes le philosophe allié d'Aristote , & Anaxarchus natif de la ville d'Abdera ¹ , dont

¹ Ville de Thrace.

ALEXANDRE LE GRAND. 131

Callisthenes entrant doucement en propos, & allant à l'entour, sans luy alleguer chose qui le peust offenser, taschoit dextrement à luy amollir son dueil.

XC. Mais Anaxarchus qui dès son commencement avoit tousjours tenu un chemin à part en l'estude de la philosophie, & avoit acquis le bruit d'estre homme ecervelé & mesprisant ses compagnons, en entrant dedans la chambre se prit à crier dès la porte tout hault : « Voilà
 » Alexandre le grand, celuy que toute la terre
 » habitable regarde & redouble maintenant : Voi
 » le là jetté par terre plorant comme un esclave
 » pour la peur qu'il a des loix & du blasme des
 » hommes, comme s'il ne deust pas luy mesme
 » leur donner la loy, & leur establir les bornes
 » de ce qui est juste, ou injuste, attendu qu'il a
 » vaincu pour demourer seigneur & maistre, non
 » pas pour servir à une vaine opinion. Ne sçais
 » tu pas que les poëtes disent, que Jupiter a
 » Themis, c'est à dire, le droit & la justice assise
 » à ses costez ? Que signifie cela, sinon que tout
 » ce que le prince fait, est saint, droit &
 » juste ? Ces langages d'Anaxarchus aligerent
 bien pour lors la douleur du roy Alexandre,
 mais aussi rendirent ilz depuis ses meurs bien
 plus dissolues en beaucoup de choses, & bien
 plus violentes : & comme par ce moyen là il

132 ALEXANDRE LE GRAND.

s'insinua soy-mesme merveilleusement avant en la bonnè grace du roy, autant rendit il la conversation de Callisthenes, qui de soy-mesme n'estoit pas autrement trop aggreable, à cause de son austerité, encore plus odieuse qu'elle n'avoit jusques alors esté.

XCI. Auquel propos on racômpte qu'un jour au soupper du roy, on met en avant un discours touchant les saisons de l'année & la temperature de l'air, & que Callisthenes fut de l'opinion de ceulx qui tenoyent que la region où ilz estoient pour lors, estoit plus froide, & que l'hyver y estoit plus aspre qu'en la Grece. Anaxarchus soustenoit le contraire & contestoit opiniastrement à l'encontre, tant que Callisthenes luy dit : « Si est il force que tu confesses » qu'il fait plus froid en ce païs cy que en celuy » là : car tu passois là tout l'hyver, avec une » pauvre simple cappe seulement sur ton doz, » & icy tu es couvert de trois tapis l'un sur » l'autre quand tu es à table ». Ceste attainte poignit au vif Anaxarchus, & l'irrita bien encore plus asprement : & quant aux autres gens de lettres, rhetoriciens & flatteurs, ilz le haïssoient aussi semblablement, pource qu'ilz le voyoyent estimé, suyvy & honoré des jeunes hommes, à cause de son éloquence, & non moins aimé des vieux, à cause de l'honesteté de sa vie, laquelle

ALEXANDRE LE GRAND. 133

estoit grave , venerable & contente du sien , sans qu'il demandast jamais rien. Par où lon cognoissoit que la cause qu'il alleguoit , pour laquelle il suyvoit Alexandre en ce voyage , estoit veritable : car il disoit que c'estoit pour impettrer du roy , que ses citoyens bannis fussent remis en leur país , & leur ville repeuplée & rebastie. Mais combien que la bonne reputation qu'il avoit , fust cause principale de l'envie qu'on luy portoit , si est-ce que luy mesme donnoit bien aussi quelques occasions à ses envieux & malvueillans de le calumnier , par ce qu'il refuzoit souvent , quand on le convioit , d'aller soupper chez le roy , & s'il y alloit il ne disoit mot , montrant par ceste siene gravité & taciturnité , que ce que lon y disoit & faisoit , ne luy plaisoit point , de sorte qu'Alexandre mesme dit une fois de luy ,

Je hay celuy , qui d'estre sage fait
Profession , & ne l'est en son faict.

XCII. Suyvant lequel propos on racompte , que souppant un jour chez le roy , il fut requis par plusieurs de ceux qui avoyent aussi esté conviez , de faire à l'improveu une harengue à la louange des Macedoniens durant le soupper , & qu'il parla sur ce subject là , avec un tel flux d'eloquence , que les escoutans s'en leverent de

134 ALEXANDRE LE GRAND.

table, & batans des mains en signe de jöye, jetterent plusieurs bouquets & chapeaux de fleurs dessus luy : mais qu'Alexandre allegua lors ce que dit le poëte Euripide,

Malaisé n'est de bien dire amplement,
Quand on en a bel & riche argument.

« Mais monstre nous, dit il, ton eloquence à
» blasmer les Macedoniens, à celle fin que
» recognoissans ce en quoy ilz faillent, ilz l'e-
» mendent pour en estre meilleurs à l'advenir » :
& qu'adonc Callisthenes se tournant à dire tout le contraire, deduisit franchement plusieurs choses au grand desavantage des Macedoniens, monstrant comme la division & dissension des Grecs entre eulx, avoit esté cause de l'accroissement de Philippus, alleguant ces vers :

Là où discord regne en une cité,
Le plus meschant a lieu d'autorité.

A l'occasion dequoy, il suscita encontre soy-mesme une grande & grieve malvueillance des Macedoniens, tellement que Alexandre mesme dit à l'heure qu'il n'avoit pas tant fait monstre de son eloquence, que de sa malignité, & de la mauvaïse vöulunté, qu'il portoit aux Macedoniens. Hermippus ¹ historien escrit, qu'un

¹ De la ville de Smyrne, vivoit du tems de Prolémée Evergète I.

ALEXANDRE LE GRAND. 135

Stræbus serviteur de Callisthenes, qui lisoit devant luy, le récita ainsi depuis à Aristote, & que Callisthenes voyant bien que Alexandre s'en estoit offensé, & qu'il luy en vouloit mal, repeta deux ou trois fois ces vers d'Homere en s'en allant,

Patroclus est luy mesme decédé,
Qui en vertu t'avoit bien excédé.

A quoy lon peut voir clairement qu'Aristote jugea bien, quand il dit de ce Callisthenes, qu'il estoit bien homme eloquent, mais qu'il n'avoit point de jugement. Car en rejetant fort & ferme, comme philosophe, l'adoration de faire en s'enclinant & ployant le genouil la reverence au roy, & en disant hault & clair en public, ce que les plus gens de bien & les plus vieux Macedoniens n'ozoyent dire que secretement en l'oreille, combien qu'ilz en fussent tous fort marris, il delivra bien la Grece d'une grande honte, & Alexandre aussi d'une plus grande, en le divertissant de prochasser telle maniere d'adoration : mais aussi se perdit il soy mesme, par ce qu'il sembla qu'il voulust avoir le roy d'audace, & le forcer plus tost, que l'induire par raison.

XCIII. Suyvant lequel propos Chares le Mitylenien a laissé par escript, que un jour en un festin, Alexandre après avoir beu, tendit sa coupe à

136 ALEXANDRE LE GRAND.

l'un de ses amis, lequel la prit, & se levant sur ses pieds y bent aussi, en se tournant devers l'autel domestique, & faisant premierement une grande reverence, alla baiser Alexandre, & puis se meit à table : & que tous les autres conviez feirent semblablement les uns après les autres, jusques à ce que Callisthenes prit aussi la coupe à son reng, le roy n'y prenant point garde, ains devisant avec Hephæstion, & après avoir beu s'approcha pour le baiser comme les autres : mais qu'il y eut un Demétrius, surnommé Phidon, qui dit au roy, « Ne le baise point, sire, car luy » seul ne t'a point fait de reverence » : Alexandre tourna la teste de l'autre costé sans le vouloir baiser, & que Callisthenes adonc cria tout hault, « Et bien de par dieu, je m'en vois ayant moins » que les autres d'un baiser ». Ainsi commença la malvueillance contre lui à s'imprimer au cueur d'Alexandre, dont il s'ensuyvit que premierement Hephæstion fut creu, disant que Callisthenes luy avoit promis qu'il adoreroit & feroit la reverence à Alexandre, mais qu'il luy avoit failly de parole : & puis un Lyfimachus, un Agnon, & autres semblables, poulferent encore à la rouë, disans que ce sophiste s'en alloit glorifiant, ne plus ne moins que s'il eust ruiné & aboly une tyrannie, & que tous les jeunes gens le suivoient, & s'amaïsoient autour de luy par hon-

neur, comme celuy qui seul, entre tant de milliers d'hommes portans les armes, avoit le cueur franc & noble. Et pourtant, quand la conjuration de Hermolaus à l'encontre de la propre personne d'Alexandre vint à estre descouverte, l'on trouva la calumnie vray-semblable, que quelques fauls accusateurs proposerent à l'encontre de Callisthenes, qu'il avoit respondu à cest Hermolaus, qui luy demandoit comment il pourroit devenir le plus renommé homme du monde, « En tuant » celuy qui estoit jà le plus renommé » : & que pour l'inciter à executer sa conspiration, il luy avoit dit, qu'il ne falloit point qu'il eust peur d'un liect d'or, ains se souvenir qu'il avoit à faire à un homme, lequel estoit aucunesfois malade & aucunesfois blecé comme les autres.

XCIV. Toutefois il n'y eut jamais pas un des complices de Hermolaus, quelque angoisse de tourmens qu'on leur feist souffrir, pour leur faire dire qui estoient leurs consors, qui nommast Callisthenes : & Alexandre mesme escrivant de ce faict, incontinent après, à Craterus, à Attalus & à Alcetas, dit que les serviteurs mis à la torture avoyent tousjours persisté à dire, que eulx seuls avoyent conspiré contre luy, & que nul autre n'en estoit consentant. Mais depuis en une autre missive qu'il en escrivit à Antipater, il en chargea Callisthenes, disant, « Ses servi-

138 ALEXANDRE LE GRAND.

» teurs ont esté lapidez par les Macedoniens ,
 » mais je puniray moy mesme le maistre cy après ,
 » & ceulx qui me l'ont envoyé , & qui ont receu
 » & logé en leurs villes les meurtriers , qui
 » venoyent de propos deliberé pour me tuer ».
 En quoy il descouvre manifestement la mauvaïse
 volonté qu'il avoit contre Aristote , pource que
 Callisthenes avoit esté nourry en sa maison , à
 cause de la parenté qui estoit entre eulx , estant
 Callisthenes filz de Hero , niepce d'Aristote. Si
 disent les uns qu'Alexandre le feit pendre : &
 les autres , qu'il mourut de maladie en prison :
 toutefois Chares escrit , qu'il fut gardé prisonnier
 l'espace de sept mois entiers , à fin qu'il fust jugé
 en plein conseil present Aristote mesme : mais
 qu'estant devenu fort gras , il mourut à la fin
 de la maladie des poux , environ le temps
 qu'Alexandre fut blecé en combatant contre les
 Malliens Oxydraques , en la conquête des
 Indes , ce qui fut quelque temps après. Mais
 Demaratus Corinthien , estant jà bien avant au
 declin de son aage , prit envie d'aller voir
 Alexandre & l'ayant veu de faict , dit que les
 Grecs qui estoient decedez au paravant , estoient
 privez d'un singulier plaisir , de ne voir point
 Alexandre seant dedans le throne royal de
 Darius. Toutefois il ne jouit pas longuement
 de la bienvueillance que le roy luy portoit ,

pource qu'il mourut de maladie bien tost après qu'il fut arrivé en son camp, & luy furent faites des funeraillles magnifiques, car tout l'exercite en armes luy dressa un comble de terre en forme de tumbeau, duquel l'enceinte estoit fort grande, & la haulteur de quatre vingts coudées. Ses cendres puis après furent conduittes jusques à la coste de la marine dessus un chariot à quatre chevaux, équipé & accoustré sumptueusement.

XCV. Au demourant Alexandre estant prest à partir pour aller à la conqueste des Indes, s'advisa que son armée estoit pesante & malaisée à remuer pour la grande multitude de bagage & de butin, qu'elle trainnoit après elle : parquoy un matin que les chariots estoient desjà chargez, il brusla premierement les siens & ceulx de ses amis après, puis commanda que lon meist aussi le feu dedans ceulx des soudards Macedoniens, dont le conseil en sembla plus dangereux au deliberer, que l'exécution à l'espreuve ne s'en trouva difficile, pource qu'il y en eut bien peu qui en fussent malcontens, & la plus part, ne plus ne moins que s'ilz eussent esté poulsez & inspirez par quelque esprit divin, avec un cry & un chant de joye, s'entredonnerent les uns aux autres qui en avoyent affaire, les utensiles necessaires dont l'homme ne se sçauroit passer, & puis bruslerent & gasterent eulx mesmes le

demourant. Ce qui encouragea & incita Alexandre encore davantage, oultre ce qu'il estoit ja devenu un peu severe, & qu'il punissoit aigrement sans pardonner à ceulx qui faisoient faulte : car ayant ordonné Menander l'un de ses familiers pour luy garder une forte place, il le fait mourir, à cause qu'il n'y voulut pas demourer, & tua luy mesme à coups de traitt Orsodates un capitaine Barbare qui s'estoit rebellé & soulevé contre luy.

XCVI. Au reste environ ce temps là y eut une brebis qui fait un agneau, lequel avoit dessus la teste, la forme & la couleur propre d'un chapeau royal à la Persienne, qui s'appelle Tiare, aux deux costez duquel il y avoit deux genitoires. Alexandre eut ce presage en horreur & abomination, tellement qu'il se fait purifier par quelques presbtres Babylo niens, qu'il avoit tousjours accoustumé de mener quant & luy pour cest effet, & dit à ses amis que ce presage ne l'emouvoit pas tant pour le regard de foy, que pour le regard d'eulx, craignant que les dieux après son decès n'eussent destiné de faire tumber la puissance de son empire entre les mains de quelque homme couard & de lasche cuer. Toutefois un autre signe & presage qui advint incontinent après, luy osta ceste crainte & ce descouragement. Car un Macedonien nommé Proxenus qui avoit charge des meubles du roy, ainsi comme il

faisoit caver en quelque lieu près la riviere d'Oxus¹ pour y dresser la tente & le logis du roy, descouvrit une source d'humeur grasse & huileuse, dont après que lon eut epuisé la premiere, il en sourdit un autre claire, qui ne differoit de rien, ny en odeur ny en goust & saveur, de l'huile naturelle, ayant le lustre & la grassesse si semblable, que lon n'y eust sceu trouver ny cognoistre aucune difference : ce qui estoit de tant plus esmerveillable, qu'en toute celle contrée il n'y avoit point d'oliviers. Lon dit bien que l'eau mesme de la riviere d'Oxus est fort molle, de maniere qu'elle laisse le cuir gras de ceulx qui s'y lavent ou s'y baignent : toutefois on voit bien par ce qu'Alexandre luy mesme en escrit à Antipater, qu'il en fut fort aise, mettant cela entre les plus grands signes que les dieux luy eussent envoyez. Les devins luy interpteterent ce presage, que c'estoit signe que son voyage luy seroit glorieux, mais penible & laborieux, à cause que les dieux, disoient ilz, ont donné l'huile aux humains pour un refreshissement en leurs travaux.

CXVII. Aussi encourut-il en plusieurs griefz dangers, & fut blecé à bon esciant par plusieurs fois en combattant en ce voyage. Mais la principale perte qu'il y feit de ses gens vint de faulte de vivres & du

¹ Dans l'Hyrcanie.

mauvais air : mais luy s'efforçant de surmonter fortune par hardiesse, & sa puissance par vertu, n'estimoit rien imprenable à cueur vaillant & hardy, ny rien trop fort pour un courage ferme & assuré. Auquel propos on recite, que comme il allaît mettre le siege devant la roche de Sisimethres¹, qui sembloit du tout inaccessible, de maniere que les soudards en desesperoyent, il demanda à Oxiarthes quel cueur avoit ce Sisimethres. Oxiarthes luy feit responce que c'estoit le plus couard homme de tout le monde. « Cela va » bien, dit adonc Alexandre, car la place est » doncques prenable, s'il est vray ce que tu » dis, puis que celuy qui y commande n'a point » de cueur » : & de faict il la prit par la frayeur qu'il feit à Sisimethres : mais il en assiegea depuis encore une autre, aussi roide & aussi difficile à approcher que celle là, & y faisant aller les jeunes soudards Macedoniens à l'assault, en appella l'un qui se nommoit Alexandre comme luy, & luy dit : « Il fault bien que tu te monstres » tres aujourd'huy homme de bien, quand ce » ne seroit que pour le nom que tu portes ». Le jeune homme n'y faillit pas, car il y combattit si hardiment qu'il y fut occis, dequoy Alexandre fut fort desplaisant.

¹ On ne la connoît point sous un autre nom. Ce fut là qu'Alexandre épousa Roxane. Elle étoit dans la Bactriane.

XCVIII. Une autre fois comme ses gens craignissent d'approcher la ville de Nyse ¹, pour-
 autant que le long d'icelle passe une riviere pro-
 fonde, il se presenta sur la rive, & dit : « O
 » lasche que je suis, que n'ay-je appris à nager ?
 & voulut traverser la riviere à nage sur son escu :
 mais après qu'il eut fait cesser le combat de
 l'assault, il vint devers luy des ambassadeurs
 des villes assiegées, pour luy requerir pardon,
 lesquels furent bien esbahis premierement de
 le voir armé de toutes pieces, sans cerimonie
 à l'entour de sa personne : mais plus encore,
 quand luy estant apporté un quarreau, il com-
 manda au plus vieil d'entre eulx, qui s'appelloit
 Acuphis, qu'il le prist pour se seoir. Acuphis s'es-
 merveillant de ceste grande courtoisie & huma-
 nité luy demanda quelle chose il vouloit que eulx
 feissent pour desormais estre ses bons amis. « Je
 » veux, luy respondit il, que ceux au nom desquelz
 » tu viens en ambassade devers moy, t'elisent pour
 » leur prince, & qu'ilz m'envoyent pour osta-
 » ges, cent les plus gens de bien qui soyent entre
 » eulx ». Acuphis se prit à rire de ce commande-
 ment, & luy repliqua : « Voire mais, sire, je les
 » regiray, bien mieulx & plus facilement en t'en-
 » voyant les pires, qu'en t'envoyant les meilleurs ».

¹ Il y a plusieurs villes de ce nom. Celle-ci est dans l'Inde, entre
 les fleuves Cophène & Indus.

XCIX. Il y avoit aussi un roy nommé Taxiles, qui tenoit un païs aux Indes de non moindre estendue, à ce que lon dit, que toute l'Égypte, gras en pasturages, & abondant de tous fruits autant qu'il y en ait point au monde, & si estoit homme sage, lequel après avoir salué Alexandre, luy dit : « Qu'avons nous besoing de » nous combattre & faire la guerre l'un à l'autre, » Alexandre, si tu ne viens point pour nous » oster l'eau ny le demourant de ce qui est ne- » cessaire pour nostre nourriture ? pour lesquelles » choses seules, les hommes de bon sens doyvent » entrer en combat : car quant aux autres biens » & richesses, si j'en ay plus que toy, je suis » tout prest & appareillé de t'en departir des » miens : & si j'en ay moins, je ne refuse pas » de t'en remercier si tu m'en veux donner des » riens ». Alexandre ayant pris plaisir à l'ouir ainsi sagement parler, l'embrassa & luy dit : « Cuides tu que ceste entrevueë nostre se puisse » desmesler sans combattre, nonobstant toutes » ces bonnes paroles & ces aimables caresses ? » non, non, tu n'y as rien gagné : car je te » veux combattre & te combattray de courtoisie » & d'honesteté, à fin que tu ne me surmontes » point en beneficence & bonté. Ainsi recevant » de luy plusieurs beaux presens, & luy en donnant » encore davantage, finalement à un soupper » en

ALEXANDRE LE GRAND. 145

en beuvant à luy, il luy dit, « Je boy à toy » mille talens¹ d'or monnoyé». Ce present fascha bien ses familiers : mais en recompense il luy gagna bien aussi les cueuts de plusieurs princes & seigneurs Barbares du païs.

C. Or y avoit il quelque nombre de gens de guerre Indiens les plus belliqueux de tout le païs, qui vivans de la soude ordinairement, se mettoient au service des bonnes villes franches, & les defendoyent vaillamment, faisans beaucoup de maux & d'empeschemens en plusieurs endroits à Alexandre, lequel ayant fait appointement avec eulx dedans une ville, où ilz s'estoyent enfermez, quand ilz en furent sortiz sur la fiance de l'appointement qu'ilz avoyent fait, il les rencontra par le chemin ainsi comme ilz se retiroient, & les meit tous au fil de l'espee. Il n'y a que ceste seule tache en tous ses haults faictz d'armes, qui ternisse un peu son honneur : car au demourant, il s'est tousjours en tout & par tout porté justement & royalement en toutes ses guerres. Au demourant les philosophes & gens de sçavoir des Indiens ne luy donnoient pas moins d'affaire, pource qu'ilz alloient blasmans & tensans les princes & roys qui se rendoyent à luy, & faisoient prendre les armes

¹ Six cents mille escus. Amyot. 4,668,775 livres de notre monnoie.

aux citez franches à l'encontre de luy, à raison dequoy il en fait pendre plusieurs.

CI. Quant au roy Porus, Alexandre luy mesme en ses epistres descrit au long ce qu'il fait contre luy : car comme la riviere Hydaspes courust entre les deux armées, Porus tenoit tousjours ses elephans sur l'autre rive en bataille, les testes tournées devers les ennemis, pour les engarder de passer, & luy¹ faisoit tous les jours mener grand bruit, & faire grand tumulte en son camp, à fin d'accoustumer les Barbares à ne s'en estonner point, & ayant choisy une nuit fort obscure, que la lune ne luisoit point, il prit une partie de ses gens de pied, & la fleur de sa chevalerie, & s'en alla bien loing des ennemis passer en une isle, qui n'estoit pas gueres grande, là où passé qu'il fut, il se leva un orage impetueux de pluyes, vents, esclairs & tonnerres, qui tumboyent dedans son camp, tellement qu'il veit devant ses yeux plusieurs de ses gens, qui furent ars & bruslez par la foudre en ceste petite isle : mais pour cela il ne laissa pas de vouloir comment que ce fust, gagner l'autre rive. Or la riviere estant enflée des grandes pluyes qu'il avoit fait la nuit precedente, rompit une grande ouverture par où bonne partie de l'eau s'escouloit : ainsi se trouva il, quand il fut passé sur l'autre

¹ Alexandre.

bord de la riviere, entre deux-eaux mal asseuré, & n'ayant pas le pied ferme, pource que la terre y estant fort trempée, glissoit, & l'impetuosité de la riviere la minoit & rompoit d'un costé & d'autre. Ce fut là où lon escrit qu'il dit : « O » Atheniens, pourriez vous bien croire, com-
 » bien de travaux & de dangers j'endure, pour
 » estre loué de vous » ? Toutefois c'est Onesicritus qui le met ainsi quant à ce point là : mais luy mesme escrit qu'ilz laisserent là les radéaux, sur lesquels ils avoyent passé le grand cours de la riviere, & qu'ilz traverserent avec leurs armes sur leurs dos, le bras qui s'escouloit par la rupture, estans dedans l'eau jusques aux mamelles, & qu'ayant à la fin passé, il picqua avec sa chevalerie environ cinq quarts de lieuë devant la bataille de ses gens de pied, faisant son compte que si les ennemis le venoyent chocquer avec leur gendarmerie, il se trouveroit de beaucoup le plus fort, & que s'ilz pouloyent en avant leurs gens de pied, les siens y pourroyent bien arriver assez à temps. L'un des deux advint comme il l'avoit imaginé : car mille chevaux & soixante chariots armez des ennemis se jetterent devant leur grosse troupe, qu'il desfeit, & prit tous les chariots, & des hommes d'armes en demoura quatre cents de morts sur le champ.

CII. Parquoy Porus cognoissant à telles en-

148 ALEXANDRE LE GRAND.

seignes qu'Alexandre en personne estoit passé, luy marcha adonc à l'encontre avec toute son armée en bataille, exceptée quelque partie qu'il laissa derriere pour faire teste au reste des Macedoniens, s'ilz s'efforceoyent de passer la riviere. Alexandre donques craignant la multitude grande de ses ennemis, & la violence de leurs elephans, ne donna pas de front dedans le milieu, ains estant en la poincte gauche de sa bataille, chargea sur un coing de celle des ennemis, ayant ordonné à ceulx qui estoient en la droite d'en faire autant de leur costé tout ensemble : ainsi furent les deux coings de l'armée des ennemis rompus & tournez en fuitte, mais ceulx qui y avoyent esté forcez se retirerent vers leurs elephans, & se rallierent à l'entour d'eulx. Par ce moyen estant la bataille meslée, le combat y fut long, tellement qu'à peine furent les Barbares desconfits entierement à trois heures après midy. Ainsi le descrit en ses epistres, celui mesme qui gagna la journée. Au reste la plus part des historiens s'accorde à escrire, que Porus avoit quatre coulées & un palme de hault, & qu'estant monté dessus un elephant, il ne s'en falloit rien qu'il ne respondist en haulteur, grandeur & grosseur, à la proportion de sa monture, combien que ce fust un fort grand elephant, lequel monstra en ce combat une merveilleuse prudence naturelle, &

un grand soing de sauver le roy son maistre : car tant qu'il le sentit encore forr , il repoulsa tousjours courageusement & reboutta ceulx qui luy couroyent fus : mais quand il apperceut , que pour les coups de traict & autres bleceures. qu'il avoit receues sur son corps , le cueur luy commenceoit à faillir , alors craignant qu'il ne tumbast en terre , il se baissa tout bellement à genoux , & prenant doucement avec sa trompe les dards & traicts qu'il avoit dedans le corps , les luy tira tous l'un après l'autre dehors.

CIII. Estant donques ce roy Porus pris , Alexandre luy demanda comment il le traitteroit. Porus luy respondit qu'il le traittast royalement. Alexandre luy redemanda s'il vouloit rien dire davantage , & il respondit de rechef , que le tout se comprenoit soubs ce mot royalement. Parquoy Alexandre ne luy laissa pas seulement les provinces dont il estoit roy au paravant , pour de là en avant les tenir de luy comme satrape , en forme de gouvernement , mais aussi luy adjousta encore beaucoup de païs. Et ayant aussi subjugué les peuples francs & libres , dont il y avoit jusques à quinze nations , cinq mille villes assez bonnes , sans un nombre infiny de villages , & encore trois fois autant d'autre païs , il en establit gouverneur & satrape un de ses familiers , qui s'appelloit Philippus. En ceste bataille mourut son

150 ALEXANDRE LE GRAND.

bon cheval Bucephal, non sur le champ, mais depuis, ainsi comme on le pensoit des bleceures qu'il y avoit receuës, ou comme dit Onesicritus, de vieillesse, pour avoir trop travaillé veu son aage, car il avoit trente ans quand il mourut : dont Alexandre eut aussi grand regret, comme s'il eust perdu quelque sien familier amy, en resmoignage dequoy il feit bastir une grosse ville au lieu ou son corps fut enterré sur la riviere, d'Hydaspes, qu'il appella de son nom Bucephalie. Lon dit aussi qu'ayant perdu un chien nommé Peritas, qu'il avoit nourry & qu'il aimoit, il feit semblablement bastir une ville qu'il appella de son nom. Sotion^{*} escrit qu'il l'avoit ainsi entendu de Potamon le Lesbien.

CIV. Ceste derniere bataille contre le roy Porus, feit reboucher les cueurs des Macedoniens, & les desgouta de passer oultre à la conquête du demourant des Indes : car considerans qu'ilz avoyent eu tant de peine à le rompre, encore qu'il n'eust que vingt mille hommes de pied, & deux mille chevaux, ilz desdirent fort & ferme Alexandre, quand il les cuida à toute force faire encore passer la riviere de Ganges, entendans

^{*} Potamon le Lesbien enseigna à Rome du tems de Tibère, ce qui fixe aussi l'époque de Sotion l'historien, qu'il ne faut pas confondre avec Sotion le philosophe qui vivoit au tems de Ptolémée Philométor, sixieme successeur d'Alexandre.

ALEXANDRE LE GRAND. 151

dire aux gens du païs qu'elle avoit deux lieues de large , & cent brasses de profond , & que la rive de delà estoit toute couverte d'armes , de chevaux & d'elephans , pource que lon disoit que les roys des Gangarides ¹ & des Præsiens l'attendoyent avec quatre vingts mille combatans à cheval , & deux cents mille à pied , huit mille chariots de guerre bien armez , & six mille elephans aguerris. Si n'estoit point cela un compte fauls , augmenté & enrichy à plaisir : car un roy nommé Androcottus qui regna peu de temps après , donna à Seleucus cinq cents elephans pour un coup , & avec une armée de six cents mille combatans traversa , conquist & subjuga toutes les Indes.

CV. Alexandre doncques irrité & courroucé du refus de ses gens , se teint quelques jours renfermé en sa tente couché par terre , disant , qu'il ne leur sçavoit gré aucun de tout ce qu'ilz avoyent fait jusques à là , s'ilz ne passoyent encore la riviere de Ganges , & que le retourner en arriere n'estoit autre chose , que confesser avoir esté vaincu. Mais quand il veir & considera qu'il y avoit grande apparence aux remonstrances que ses amis luy faisoient pour le reduire & reconforter , & que les soudards venoyent à sa porte

¹ Plutarque les nomme Gandarites , aussi bien que Strabon. Les Præsiens sont appellés Tabræsiens par Diodore de Sicile.

152 ALEXANDRE LE GRAND.

crier & lamenter, en le suppliant de les remener, il en eut à la fin compassion, & se laissa conduire à vouloir retourner : toutefois avant que partir il imagina plusieurs faulces & vaines inventions, pour augmenter & perpetuer la gloire de son nom en ces quartiers là : car il feit forger des armes plus grandes, des mangeoires pour les chevaux plus haultes, & des mords de brides plus pesans que l'ordinaire, & les feit semer & laisser çà & là. Il y feit aussi bastir de grands autelz à l'honneur des dieux, que les roys des Præses jusques aujourdhuy, ont encore en veneration grande, & travetfians la riviere y viennent faire des sacrifices à la guise des Grecs. Androcottus estoit lors un jeune garson, qui veit Alexandre, & depuis dit qu'il s'en fallut bien peu qu'il ne prist & gaignast tout le païs, tant le roy qui regnoit pour lors, estoit mesprisé & haï de ses subjects pour sa meschanceté, & pour la bassesse du lieu dont il estoit issu. Au partir de là, il voulut aller voir la grande mer Oceane, & feit faire plusieurs bateaux à rames, & plusieurs radeaux, sur lesquels il se devalla tout à son aise par les rivieres : mais ceste navigation ce pendant ne fut point oisive ny sans guerre : car il descendoit souvent en terre, & alloit assaillant les villes, & conquerant tout par où il passoit.

CVI. Mais en assaillant la ville des Malliens^{*}, que lon dit estre les plus belliqueux hommes de tous les Indiens, il s'en fallut bien peu qu'il ne fust luymesme mis en pieces : car ayant fait retirer à coups de traict ceulx qui defendoyent les murailles, il monta dessus le premier par une eschelle, laquelle rompit aussi tost qu'il fut monté : & adonc les Barbares se rallians ensemble tout contre la muraille, luy tirerent d'embas force coups, & luy ayant bien peu de ses gens autour de soy, se lancea, en se tenant ferré, du hault à bas au beau milieu des ennemis, là où de bonne adventure, il se trouva, en rumbant, sur ses pieds : & comme ses armes eussent sonné de la secouffe, les Barbares effroyez, cuiderent voir une lumiere & un fantosme qui marchast devant luy, de façon qu'ilz se prirent à fouir du commencement, & s'escarterent les uns çà, les autres là : mais depuis s'estans un peu revenus de l'effroy, quand ilz apperceurent qu'il n'y avoit que deux de ses escuyers seulement autour de luy, ilz recoururent tous contre luy, & le combatirent les uns de près à coups d'espée ou de javeline, dont ilz le blefferent à travers son harnois : & un entre les autres soy tenant quelque peu plus arriere, luy tira un

* Les Malliens & les Oxydraques habitoient près du confluent de l'Indus & de l'Hydaspe.

154 ALEXANDRE LE GRAND.

coup de fleche si violent & si roide , qu'il luy faulfa la cuirace , & luy entra dedans les costes à l'endroit de la mamelle. Le coup fut si grand , que le corps s'en laissant aller , ploya le genouil en terre : parquoy celuy qui luy avoit tiré accourut viftement avec son cymette tout nud en la main , mais Peucestas & Limnæus ¹ se jetterent au devant , qui tous deux furent blecez , tellement que Limnæus en mourut sur la place , & Peucestas fait teste , tant qu'Alexandre luy mesme tua le Barbare de sa main après avoir receu plusieurs playes & bleceures sur son corps. Finalement il luy fut deslasché un coup de pilon sur le col , duquel se trouvant estourdy , il s'appuya contre la muraille regardant les ennemis : mais à l'instant accoururent les Macedoniens de tous costez , qui le prirent & l'emporterent dedans sa tente tout pafmé , & ayant desjà perdu toute cognoissance : à l'occasion dequoy , il courut incontinent un bruit par tout le camp , qu'il estoit mort. Si y eut grande difficulté & beaucoup d'affaire à fier la fleche , qui estoit de bois : ainsi luy estant sa cuirace à toute peine ostée , il fallut encore tirer le fer ² de la fleche , lequel estoit fiché dedans l'un des os , ayant quatre doigts de

¹ Quinte-Curce l'appelle Timée.

² Le fer de la flèche ; car Plutarque n'a pas voulu dire qu'elle ne fût point armée de fer , mais qu'elle étoit de bois au lieu d'être de roseau.

long & trois de large , à ce que lon dit : au moyen dequoy en le luy arrachant , il luy prit tant d'esvanouiffemens , qu'il approcha bien près de rendre l'esprit : toutefois à la fin il se revint & eschappa de ce danger : mais se sentant fort foible , il demoura long temps à tenir diette , & à se faire achever de penser , sans sortir du logis , jusques à ce qu'il entendit les Macedoniens , qui crioient & menoyent un grand bruit devant son logis , pour le desir qu'ilz avoyent de le voir. Et adonc il prit une robbe longue , & sortit en public : puis après avoir sacrifié aux dieux pour le recouvrement de sa santé , il se remeit de rechef en chemin , sur lequel il subjügua encore plusieurs grands païs , & prit beaucoup de bonnes villes.

CVII. Il prit aussi dix des sages du païs , qui vont tous nuds , & que lon appelle pour ceste cause Gymnosophistes , lesquelz avoyent fait rebeller Sabbas contre luy , & avoyent fait beaucoup de grands maux aux Macedoniens : & pource qu'on les tenoit pour les plus agus , plus subtilz & plus courts en leurs responses , il leur proposa plusieurs questions , qui sembloient insolubles , leur commandant de les soudre , autrement qu'il feroit mourir celuy qui auroit le premier failly à bien respondre , & tous les autres après : & voulut que l'un qui estoit le plus vieil de tous , fust le juge de leurs responses. La demande qu'il

fait au premier fut , « Lesquelz il estimoit estre
 » en plus grand nombre , les morts ou les vivans.
 » Il respondit , que c'estoyent les vivans : pource ,
 » dit il , que les morts ne sont plus. Au second
 » il demanda , laquelle nourrissoit de plus gran-
 » des bestes , la terre ou la mer. Il respondit ,
 » la terre , pource que la mer n'est qu'une partie
 » d'icelle. Au troisieme , lequel est le plus fin des
 » animaux. Il respondit , celui que l'homme
 » n'a point encore cogneu. Au quatrieme , pour-
 » quoy il avoit fait rebeller Sabbas : à fin , dit il ,
 » qu'il vescuist honorablement , ou qu'il mouruist
 » malheureusement¹. Au cinquieme , lequel avoit
 » esté le premier , le jour ou la nuit. Il res-
 » pondit , le jour a precedé d'un jour. Et comme
 » le roy trouvaist ceste response estrange , il y
 » adjousta , A demandes estranges , il est force
 » que les responses soyent aussi estranges. Parquoy
 » passant oultre , il demanda au sixieme , par quel
 » moyen se pourroit l'homme plus faire aimer.
 » En estant très bon , & ne se faisant point
 » craindre. Au septieme il demanda , comment
 » se pourroit un homme faire dieu. En faisant ,
 » respondit il , quelque chose impossible à l'hom-
 » me. Au huitieme , laquelle estoit la plus forte ,
 » la vie ou la mort : il respondit , la vie , veu
 » qu'elle supporte tant de maux. Et au dernier ,

¹ Je prefere l'autre leçon ; ou qu'il mourût glorieusement

» Jusques à quel aage est il expedient que l'homme
 » vive ? Jusques à tant , dit il , qu'il n'estime
 » point le mourir meilleur que le vivre ». Ces
 réponses ouyes , il se tourna devers le juge , luy
 commandant de prononcer sa sentence sur icelles.
 Le juge dit , « Qu'ilz avoyent tous respondu ,
 » l'un pis que l'autre ». « Tu mourras doncques
 » toy mesme le premier , luy dit adonc Alexandre ,
 » ayant donné une telle sentence ». « Non feray
 » pas , repliqua il , sire , si tu ne veux estre men-
 » teur , attendu que tu as dit , que tu ferois
 » mourir le premier , celuy qui auroit pirement
 » respondu ». La fin fut , qu'il les laissa aller , en
 leur donnant encore des presens.

CVIII. Il envoya aussi Onesicritus devers les
 autres sages Indiens qui estoient les plus estimez ,
 & reputez les plus gens de bien vivans à part en
 repos , pour les prier de venir devers luy. Cestuy
 Onesicritus avoit esté des disciples de Diogenes
 le Cynique , auquel on dit que Calanus un de
 ces sages respondit fort arrogamment & fiere-
 ment , qu'il despouillast ses habillemens pour
 ouir ses paroles tout nud , autrement qu'il ne
 parleroit point à luy , non pas s'il venoit de la
 part de Jupiter mesme : mais Dandamis luy
 respondit plus gracieusement : & l'ayant ouy
 compter quelz hommes avoyent esté Socrates ,
 Pythagoras & Diogenes , il dit que ces person-

158 ALEXANDRE LE GRAND.

nages là luy sembloient avoir esté bien nez & de bon entendement , mais qu'ilz avoyent trop reveré les loix en leur vie : toutefois les autres escrivent que Dandamis ne dit autre chose , sinon qu'il demanda pour quelle cause Alexandre avoit fait un si long chemin , que d'estre venu jusques aux Indes. Quant à Calanus , le roy Taxiles feit tant envers luy , qu'il luy persuada de s'en aller devers Alexandre. Il s'appelloit par son droit nom Sphines : mais pource qu'il saluoit ceulx qu'il rencontroit en son langage Indien : disant Cale , qui estoient autant à dire comme , dieu vous gard , les Grecs le surnommerent Calanus : & dit on qu'il meit devant les yeux d'Alexandre une figure & exemple de son empire : ce fut qu'il jetta en terre devant luy un cuyr tout sec & retraits de grande secheresse , puis meit le pied sur un des bouts. Le cuyr baissé de ce costé là , se releva en tous les autres , & tournoyant tout à l'environ en marchant tousjours sur les bords , luy feit voir , que le cuyr pressé d'un costé se relevoit semblablement par tout ailleurs , jusques à ce qu'il vint à mettre le pied sur le milieu du cuyr : & lors le total se teint également bas. Voulant donner à entendre par ceste similitude à Alexandre , qu'il devoit principalement & le plus du temps résider au milieu de ses païs , & non point s'en esloigner trop loing.

CIX. Au reste le voyage que feit Alexandre par les rivières, pour aller voir la grande mer Oceane, dura sept mois entiers : & y entrant sur des navires, y naviga jusques en une petite isle qu'il appella Scyllustin¹, mais les autres l'appellent Psitulcin, là où il descendit, & y feit des sacrifices aux dieux, & y considéra la nature de la grande mer Oceane, & la qualité de toute celle coste de marine, autant comme il y peut penetrer. Puis ayant fait prieres aux dieux, que jamais conquerant après luy ne passast oultre les bornes de son voyage, il s'en retourna arriere de la marine : mais il voulut que ses vaisseaux, qui estoient en mer, feissent le circuit, en laissant le païs des Indes à la main droite, establisant pour capitaine de toute la flotte Nearchus, & pour principal pilote Onesicritus. Et ce pendant luy mesme se meit en chemin par terre à travers le païs des Orites², là où il se trouva en extreme necessité de vivres, & y perdit beaucoup d'hommes : tellement qu'il ne ramena pas des Indes la quatrieme partie des gens de guerre qu'il y avoit menez, qui estoient jusques au nombre de six vingts mille combatans à pied, & bien quinze mille chevaux : car les uns mouroyent de maladies aiguës : les autres pour avoir mangé de mauvaises

¹ Cilluta, suivant Arrien qui la place à l'embouchure de l'Indus.

² Ils font partie de la Gédrosie, ou y touchent.

choses : les autres pour les chaleurs & secheresses extremes : mais la plus part mouroit de male faim, en traversant le país non cultivé ne semé, de ces pauvres gens qui vivoyent fort durement, n'ayans pour tous moyens qu'un peu de petites brebis, qu'ilz nourrissent de poissons de mer, dont leur chair est de mauvaise senteur. A la fin ayant traversé ce país avec beaucoup de peine en l'espace de soixante journées, il entra en la Gedrosie, là où il trouva abondance grande de tous vivres, dont luy feirent provision les gouverneurs, princes & roys les plus voisins de celle marche.

CX. Après doncques avoir là un peu refreschy son armée, il se remeit en chemin à travers la Carmanie ^{*}, où il fut l'espace de sept jours durant à banqueter continuellement, en passant tousjours país : car il estoit dessus un eschaffault plus long que large, hault élevé, & trainné par huit coursiers, en continuel festin, avec ses plus privez amis, la nuit & le jour : après lequel eschaffault suyvoyent plusieurs chariots couverts, les uns de belles tapisseries & de riches draps de pourpre, les autres de belle ramée fresche que lon renouvelloit à chaque bout de champ,

^{*} La Carmanie touche à la Gédrosie. Ces pays sont à l'occident de l'Indus vers la mer Erythrée. Strabon parle des Ichthyophages qui touchent aux Orites, & se nourrissent de poissons eux & leurs troupeaux.

où estoient les autres amis & capitaines tous couronnez de chapeaux de fleurs, qui beuvoient & faisoient bonne chere ensemble. L'on ne voyoit ny armet, ny lance, picque ny rondelle en toute l'armée : ains par tout ce chemin les foudards avec flacons, coupes, tasses & gobelets d'or & d'argent puisoyent le vin dedans de grandes pippes & tonneaux defoncez, dont ilz beuvoient les uns aux autres, aucuns en marchant par les champs & tirant tousjours avant, autres assis à table : & ne oyoit on que flustes & haultsbois, aulbades, chansons, & danses de femmes qui balloient & follostroyent par tout ce chemin : car parmy ceste dissolue manière de marcher par pais, & parmy toutes ces yvrongneries estoit meslé un jeu, que chacun s'efforçoit de contrefaire toutes les insolences des Bacchanales, comme si le dieu Bacchus y eust esté present en personne, & qu'il eust luy mesme guidé & conduit toute ceste mommerie. Quand il fut arrivé au chasteau royal de la Gedrosie¹, il y séjourna encore quelques jours pour refreschir son armée, en festes, banquets & festins, là où l'on dit qu'un jour après avoir bien beu, il alla voir le jeu de prix des danses, entre lesquelles, celle qu'avoit dressée & deffrayée Bagoas un jeune homme, dont Alexandre estoit amou-

¹ Voyez les Observations.

162 ALEXANDRE LE GRAND.

reux, emporta la victoire, & que ce Bagoas, tout ainsi vestu qu'il estoit des accoustremens du bal, passa à travers le theatre, & s'alla seoir tout joignant Alexandre, dequoy les Macedoniens furent si aises, qu'ilz se prirent à battre des mains & à mener un grand bruit de joye, luy crians tout hault qu'il le baïst, tant qu'à la fin il le prit entre ses bras, & le baïsa devant tout le monde. Là le revint trouver Nearchus, qui luy racompra tout ce qu'ilz avoyent fait & veu en leur navigation : dequoy il fut si aise, qu'il luy prit envie de naviger luy mesme, entrant par la bouche de l'Euphrates en l'Ocean avec une bonne & grosse flotte de vaisseaux, & s'en aller environner toutes les costes de l'Arabie & de l'Afrique, pour puis après rentrer dedans la mer Mediterranée par le destroit des coulounes de Hercules : à laquelle intention il feit bastir grand nombre de vaisseaux en la ville de Thapsaque¹, & assembloit on desjà matelots, pilotes & mariniers de tous costez.

CXI. Au demourant la difficulté du voyage qu'il entreprit pour la conqueste des Indes, le danger où il fut en combatant contre les Malliens, avec le grand nombre que lon disoit qu'il avoit perdu de ses gens en ceste expedition, toutes ces causes ensemble faisans croire qu'il n'en retour-

¹ Aux confins de la Syrie & de l'Arabie, près de l'Euphrate.

neroit jamais à fauueté , donnerent la hardieſſe aux peuples , qu'il avoit ja conquis , de ſe ſoulever , & à ſes lieutenans & gouverneurs de provinces , occaſion de commettre mille meſchancetez , pilleries & oppreſſions de peuples. Brief , cela mit tout ſon eſtat en grand branle , & y cauſa de grandes nouvelletez , & tant que Olympias & Cleopatra entrées en diſſenſion à l'encontre d'Antipater , diviſerent entre elles deux ſon gouvernement ; prenant Olympias pour ſoy le royaume d'Epire , & Cleopatra celui de Macedoine. Ce qu'entendant Alexandre , dit , que ſa mere avoit eſté la mieux adviſée : pource que jamais les Macedoniens n'euffent enduré d'eſtre regis & gouvernez par une femme. A ceſte cauſe il renvoya de rechef Nearchus vers la marine , delibérant d'emplir de rechef d'armes & de guerre toutes les coſtes & toutes les provinces maritimes : Et luy meſme en perſonne viſitant les païs eſloignez de la marine , alla puniſſant les capitaines & gouverneurs qui avoyent mal verſé en leur charge , entre leſquelz il tua de ſa propre main avec un coup de picque , qu'il luy paſſa au travers du corps , Oxyartes , l'un des enfans d'Abulites. Et comme Abulites luy meſme n'eut fait aucune proviſion de vivres pour ſon armée , ains luy eut préparé & amené trois mille talents¹ ſeulement ,

¹ Dixhuit cents mille eſcus. Amyot. 14,006,225 l. de notre monnoie.

il luy feit mettre l'argent devant ses chevaux, lesquelz n'en goustèrent aucunement : & lors il luy dit, « Que me sert donques maintenant ta » provision » ? & quant & quant le feit arrester prisonnier.

CXII. Et en passant par le país de Perse premierement il renouvela la coustume ancienne, qui estoit, que toutes & quantes fois que les roys retournoient d'aucun loingtain voyage, ilz donnoient à toutes les femmes un escu¹ pour teste, de sorte que lon dit que pour ceste cause aucuns de leurs roys. naturelz ne retournoient pas souvent au país, & que Ochus entre les autres n'y fut jamais une seule fois, se bannissant ainsi volontairement de son país, pour la chicheté & crainte de faire ceste despenſe ; & puis y ayant trouvé la sepulture de Cyrus descouverte & fouillée, il feit mourir celuy qui l'avoit fait, combien qu'il fust natif de Pella en Macedoine, homme de qualité, nommé Polymachus² : & en ayant leu l'inscription qui estoit escripte en lettres & paroles Persiennes, il voulut qu'on l'escrivist aussi en lettres grecques au dessoubs, & estoit la substance de l'inscription telle : « O homme, qui que tu sois, » & de quelque part que tu vienes, car je suis

¹ Grec, une piece d'or.

² Voyez les Observations.

ALEXANDRE LE GRAND. 165

» afferé que tu viendras : Je suis Cyrus , celuy
 » qui conquit l'Empire aux Perses : & te prie
 » que tu ne me portes point d'envie de ce peu
 » de terre qui couvre mon pauvre corps ». Ces
 paroles emeurent grandement à compassion le
 cueur d'Alexandre , quand il considéra l'incer-
 titude & l'instabilité des choses humaines.

CXIII. Et là mesme Calanus ayant esté un
 peu de temps indisposé de flux de ventre , requit
 qu'on luy dressast un bucher tel que lon fait
 pour bruster le corps d'un trespasé , là où il alla
 à cheval : & après avoir fait sa prière aux dieux ,
 espendit sur soy mesme les effusions que lon a
 accoustumé de respendre aux funerailles des trespas-
 sez : & ayant couppé un touffeau de ses che-
 veux , avant que monter dessus le bucher , il
 prit congé de tous les Macedoniens , qui estoient
 là presens , en leur touchant en la main , les
 priant de faire ce jour là bonne chere & banqueter
 avec le roy , lequel il reverroit bien tost après
 dedans la ville de Babylone. Ayant dit ces pa-
 roles il se coucha de son long sur le bucher ,
 & se couvrant le visage , ne se remua unques ,
 quand le feu s'approcha & l'alla saisir : ains se
 maintenant tousjours en la mesme disposition
 qu'il s'estoit couché , sans remuer ne pied ne
 main , se sacrifia luymesme , selon que le portoit
 la coustume des sages du pais. Autant en feit ,

plusieurs années depuis, un autre Indien, qui estoit à la suite de Cæsar en la ville d'Athenes, & y monstre lon encore jusques aujourd'huy, une sepulture que lon nomme communement, la sepulture de l'Indien. Alexandre retourné de voir ce feu, convia plusieurs de ses amis & de ses capitaines à soupper quant & luy, là où il proposa une couronne en prix à celuy qui beuroit le mieulx. Celuy qui beut le plus fut un nommé Promachus, qui but jusques à quatre brocs de vin, & gagna la couronne, qui valoit six cents escus, mais il ne vescu que trois jours après ; & des autres qui jouerent à ce jeu de boire à l'envy, il en mourut quarante & un, comme Chares l'a escrit, pource qu'il survint un fort grand froid sur leur yvresse & leur vin.

CXIV. Quand ilz furent en la ville de Suse, il y feit les nopces de ses plus familiers, & y espousa luy mesme Statira, l'une des filles de Darius, departant semblablement les autres dames Persiennes, selon qu'elles estoient de plus grand sang & de plus hault lignage, aux plus grands de ses amis. Si feit un festin solennel des espouailles publiques des Macedoniens, de ceux mesmes qui par avant avoyent esté mariez, auquel festin, on escrit que y ayant heuf mille personnes assises à table, à chascune fut donnée une coupe d'or, pour espandre & offrir du vin à

l'honneur des dieux : & là, oultre les autres magnificences admirables qu'il feït, il acquitta toutes les debtes des Macedoniens, lesquelles monterent à la somme de dix mille talents^r, cent & trente moins. Mais comme Antigenes le borgne se fust fait enroller à faulſes enſeignes entre les endebtez, ayant amené un qui affermoit luy avoir preſté argent à la banque, il feït payer l'argent : mais depuis on avera contre luy qu'il n'en eſtoit rien, dont Alexandre fut ſi courroucé contre luy, qu'il l'en chaſſa de ſa cour, & le priva de ſon eſtat de capitaine, combien que ce fust un vaillant homme à la guerre : car eſtant encore jeune, il eut un coup de traiçt dedans l'œil devant la ville de Perinthe, que Philippus tenoit aſſiegée, & luy voulut on bien ſur l'heure meſme oſter le traiçt, mais luy ne ſe laſcha onques pour ce coup, ny ne voulut permettre qu'on luy arrachaſt le traiçt, qu'il n'eût premierement repoulſé & rembarré les ennemis, juſques aux dedans de leurs murailles. Il prit adonc fort aigrement ceſte ignominie, & l'eut ſi fort à cuer, qu'il eſtoit tout evident qu'il en mourroit de douleur & de regret : ce que Alexandre craignant, luy pardonna, & ſi voulut encore qu'il reteintſt l'argent qui luy avoit eſté baillé.

^r Six millions d'or, moins ſoixante & dixhuit mille eſcus. *Amoyot.*
46,687,750 livres de notre monnoie.

CXV. Or les trente mille jeunes garçons qu'il avoit laissez soubz des maistres pour les duire, dresser & exercer à tout ce qui appartient au mestier de la guerre, estans devenus forts & puissans de corps, beaux de visages, & merveilleusement dispos & adroits aux armes à les voir en leurs exercices, Alexandre en fut fort joyeux quand il les veit : mais cela descouragea grandement les Macedoniens, & les mit en grande crainte, pource qu'ilz estimerent que de lors en avant le roy feroit moins de compte d'eulx : & pourtant comme il voulust renvoyer es pais bas devers la mer, les malades ou impotens, & qui avoyent perdu quelque membre à la guerre, ilz respondirent que cela estoit leur faire tort & injure, d'esloigner ainsi de soy ces pauvres gens là : après s'en estre servy à tout ce qu'il avoit voulu, & puis les rejeter ainsi à leurs pais & à leurs parens, non en telle disposition qu'ilz estoient quand il les en avoit tirez. A l'occasion dequoy, ilz disoyent s'il vouloit donner congé aux uns, qu'il le donnast donques à tous, & qu'il les reputast tous inutiles, mesmemens puis qu'il avoit autour de luy, ses beaux jeunes danseurs, disoyent ilz, avec lesquelz il iroit achever de conquerir toute la terre habitable. Alexandre fut fort indigné de ces propos, tellement qu'il leur en dit à tous des injures en

tholere, & chassant ses gardes ordinaires, en prit d'autres Perfiens, en faisant les uns gardes de son corps & ses satellites, les autres ses huisfiers, heraults & executeurs de ses mandemens, desquelz les Macedoniens le voyant accompagné, & eux mesprisez, reculez & rejettez honteusement en arriere, rabaisserent bien la hauteſſe de leur courage, & après avoir parlé ensemble cuiderent enrager de jalouzie & de despir. Finablement la matiere consultée entre eulx, ilz s'en allerent d'un commun advis sans armes tous nuds en chemises devant sa tente se rendre à luy, crians & plorans, en le priant qu'il feist d'eulx ce qu'il luy plairoit, comme de meschans & ingrats qu'ilz estoient : mais luy, encore que son courroux s'ammollist & s'addoucist desjà, ne les receut pas neantmoins pour ceste premiere fois, & eulx aussi ne s'en allerent point, ains demourerent deux jours & deux nuicts devant sa porte en tel estat, se plaignans à luy, & l'appellans leur souverain & leur roy, jusqu'à ce que au troisieme jour sortant hors de son logis, & les voyant ainsi affligez, esplorez & piteux à voir, il s'en prit à plorer luy mesme bien longuement : puis, après les avoir un peu tencez, leur usa de gracieuses paroles, donnant congé de soy retirer à ceulx qui estoient devenus inutiles pour la guerre en leur faisant de très ma-

gnifiques presens, & escrivant à son lieutenant Antipater, qu'en toutes les assemblées de jeux & esbatemens publics, ilz fussent tousjours preferez & assis aux plus honorables lieux, couronnez de chapeaux de fleurs, & voulut que les enfans orphelins de ceux qui seroyent decedez à son service, receussent la soute de leurs peres.

CXVI. Au reste, estant arrivé en la cité d'Ecbatane¹ au royaume de la Medie, après y avoir despesché les plus pressifs affaires, il se remeit de rechef à faire jeux, festes & passetemps publics luy estans nouvellement venus de la Grece trois mille maistres & ouvriers de telz esbatemens. Mais il advint environ ce temps là que Hephæstion tumba malade d'une siebvre, & comme jeune homme de guerre qu'il estoit, il ne se contregarda pas de la bouche, comme il devoit, ains ayant espié l'occasion que son medecin Glaucus s'en estoit allé au theatre pour voir les jeux, il se meit à disner, & mangea un chappon rosty, & beut un grand plein pot de vin qu'il avoit fait refreschir, dont sa siebvre luy rengregea si fort, que peu après il en mourut.

¹ Près du mont Oronte, ville dont l'origine remonte au moins, suivant Hérodote, à Déjoces, roi de Médie, c'est-à-dire, vers la 21^e olympiade, & l'an de Rome 58. Beaucoup plus haut, suivant Diodore de Sicile; beaucoup plus bas, suivant Pline qui s'est trompé certainement. Il y avoit une autre ville de ce nom dans la Perse, & une dans la Syrie.

ALEXANDRE LE GRAND. 171

Alexandre porta cest inconvenient impatiemment oultre toute mesure : car il commanda que les crins des chevaux & des mulets, en signifiante de deuil, fussent tous coupez sur l'heure, & que tous les creneaux des murailles des villes en fussent semblablement abbatus, & fait pendre le pauvre medecin, & defendit que lon ne jouast de flustes ny d'autre instrument quelconque de musique dedans son camp, jusques à ce que lon luy apporta un oracle de Jupiter Ammon, par lequel il estoit commandé de reverer Hephæstion & luy sacrifier comme à un demi-dieu. A la fin, pour reconforter son dueil, & passer un peu son ennuy, il s'en alla à la guerre, comme à la chasse d'hommes, là où il subjuga la nation des Cosséiens¹ qu'il extermina toute, y tuant jusques aux petits enfans : ce qui fut appelé le sacrifice des funerailles de Hephæstion. Et ayant vouluté de despandre en sa sepulture & en l'appareil de ses obseques dix mille talents², & de surmonter encore la despense par la singularité de l'invention & excellence de l'artifice, il desira fort entre les autres maistres ingenieurs un Staficrates, pource

¹ C'est leur nom chez les autres écrivains ; mais Plutarque les appelle Cosséens. Ils les croient à l'orient de la Susiane, selon Pline ; ils étoient contigus à la Médie, selon Arrien. Il faut donc les placer vers les portes de Suze.

² Six millions d'or. *Amyot.* 46,687,750 livres de notre monnoie.

172 ALEXANDRE LE GRAND.

qu'en ses inventions il y avoit tousjours quelque chose de grand , de hardy & de magnifique : car un jour en devisant avec luy , il luy dit , que de toutes les montagnes qu'il cognoissoit au monde , il n'y en avoit point qui fust plus propre à former en figure de l'homme , qu'estoit le mont d'Atho en la Thrace , & que s'il vouloit ; il luy en feroit la plus noble & la plus durable statue , qui onques eust esté au mondé , laquelle en sa main gauche tiendrait une ville habitable de dix mille personnes , & de la droite verseroit une grosse riviere en la mer : toutefois Alexandre n'y voulut point entendre , mais lors il estoit après à deviser & imaginer avec les maistres ingenieurs des inventions bien plus estranges & de plus excessive despense.

CXVII. Et comme il prenoit son chemin pour s'en aller en Babylone , Nearchus étant de rechef retourné de la grande mer Oceane par la riviere d'Euphrates , luy dit , qu'il s'estoit adressé à luy quelques devins Chaldeiens qui luy conseilloyent & l'admonestoient qu'il n'entrast point dedans Babylone , dequoy Alexandre ne fit point autrement de compte , & tira oultre : mais quand il fut tout joignant les murailles , il apperceut un grand nombre de corbeaux , qui crailloient & s'entrebatoient les uns les autres , dont les uns tumberent en terre tout auprès de

luy : & luy ayant esté rapporté que le capitaine de Babylone Apollodorus avoit sacrifié aux dieux pour sçavoir qu'il adviendrait de luy, il envoya querir le devin Pythagoras pour sçavoir de luy, s'il estoit vray. Le devin ne renia point le faict, & Alexandre luy demanda quelz avoyent esté les signes du sacrifice : il respondit, qu'ilz n'avoient point trouvé de teste au foye. « O dieux, » dit adonc Alexandre, voilà un vehement pre-
 » sage » ! toutefois il ne fit point de desplaisir pour cela à Pythagoras : mais bien se repentir il qu'il n'avoit adjousté foy aux paroles de Nearchus.

CXVIII. A l'occasion dequoy il se logeoit souvent en campagne hors de Babylone, & s'en alloit esbatant sur la riviere d'Euphrates : car il advint plusieurs autres signes & presages les uns sur les autres, qui le fascherent. Entre les autres il y eut un asne privé qui alla assaillir le plus beau & le plus grand des lions, que lon nourrissoit en Babylone, & le tua d'un coup de pied. Et un jour comme il se fust despouillé tout nud pour se faire frotter & huiler, & jouer à la paulme, quand il voulut après reprendre ses vestemens, les jeunes gentilzhommes qui jouoyent avec luy, trouverent un homme assis dedans sa chaire, qui ne disoit mot, ains avoit mis le bandeau royal à l'entour de sa teste, & la robbe du roy sur son dos : on luy demanda qui il estoit,

& il fut longuement sans respondre , jusques à ce que s'estant à la fin revenu , il dit , qu'il se nommoit Dionysius, qu'il estoit natif de Messene , & que pour aucunes charges que lon luy avoit mis sus , il avoit esté envoyé de la mer jusques là , où lon l'avoit longuement detenu prisonnier : mais que nagueres le dieu Serapis s'estoit apparu à luy , luy avoit destaché ses fers , & commandé qu'il prist la robbe & le diademe du roy , & qu'il s'asseist en son siege sans dire mot.

CXIX. Cela ouy , Alexandre feit mourir l'homme , suyvant ce que les devins luy en conseillèrent : mais il en entra en une grande tristesse , & grande apprehension d'estre destitué de l'aide des dieux , & aussi en grande deffiance de ses amis , entre lesquels il redoubtoit plus Antipater & ses enfans , que nulz autres : car l'un nommé Iolas , estoit son premier eschanson , & l'autre Cassander , estant nouvellement arrivé du país , la premiere fois qu'il veit quelques Barbares faisans la reverence à Alexandre , comme celuy qui avoit esté nourry à la Grecque , & qui n'avoit jamais veu telle chose , il s'en prit à rire un peu trop licencieusement à pleine gorge , dont Alexandre fut si despit , qu'il le prit par les cheveux à deux mains , & batit les murailles de sa teste. Une autre fois comme Cassander s'ingeraist de vouloir respondre à quelques uns , qui

accusoyent Antipater son pere , Alexandre le rabroua fort asprement , en luy disant , « Que » veux tu alleguer ? penfes tu que ces gens icy » eussent entrepris un si long voyage , pour calum- » nier à tort & faulxement ton pere , s'il ne leur » eust point fait d'injustice » ? Cassander au con- traire luy repliqua , que cela mesme qu'il disoit estoit indice evident & presumption grande de calumnie , qu'ilz estoient venus ainsi loing , à fin que lon ne peust promptement adverer & convaincre leur faulxe accusation : dequoy Ale- xandre se prit à rire tout hault , & dit , « Voilà » des arguces & subtilitez d'Aristote , pour prou- » ver le pour & le contre : mais cela ne vous » guarentira pas , que je ne vous chastie bien , » si je treuve que vous ayez fait tort à ses gens » icy ». Brief lon dit que dès lors il s'imprima si fort au cueur de Cassander une frayeur , & y penetra si avant , que long temps depuis comme il estoit desja roy des Macedoniens , & tenoit toute la Grece en sa main , en se promenant par la ville de Delphes , & regardant les images qui y font , il en apperceut une d'Alexandre , dont il fut soudainement si effroyé , que les cheveux luy en dresserent en la teste , & en trembla de telle sorte , qu'à peine se peut il de long temps après rasseoir ny rasseurer.

CXX. Alexandre donques depuis qu'une fois

il se fut laissé aller à ceste desffiance de l'aide des dieux, en devint si troublé de sens, & si espouventé en son entendement, qu'il ne luy advenoit plus chose extraordinaire, pour petite qu'elle fust, qu'il n'en feist cas comme d'un signe & presage celeste, de maniere que son logis estoit tousjours plein de presbtres. & de devins, qui sacrifioient, ou qui le purifioient, & qui vacquoient aux divinations: tant a de pouvoir & d'efficace d'un costé la mescreance & l'impieté de contemner les dieux, quand elle se met ès cueurs des hommes, & de l'autre costé aussi la superstition, coulant tousjours, ne plus ne moins que l'eau contre bas, ès ames abbaisées & ravallées par crainte, comme elle remplit alors Alexandre de folie; depuis qu'une fois la frayeur l'eut faisy.

CXXI. Toutefois luy ayant esté apportées quelques responses rouchant Hephæstion, de l'oracle de Jupiter Ammon, il lascia son deuil, & se remeit de rechef à faire banquets & sacrifices: car il festoya magnifiquement Nearchus, & s'estant un jour estuvé, comme de coustume, ainsi qu'il se vouloit endormir, l'un de ses capitaines Medius, le vint prier de se trouver à un banquet, qu'il faisoit en son logis: il y alla, & y beut tout ce soir & tout le lendemain, tellement qu'il en prit la fievre, non pour avoir
 beu

beu la coupe toute entiere de Hercules , comme quelques uns escrivent , ne pour avoir tout soudainement senty une grieve douleur entre deux espauls , ne plus ne moins que qui luy eust donné un coup de lance : car ce sont toutes choses controuvées à plaisir , & faulxement escrites par aucuns qui ont voulu rendre l'issue de ceste grande tragedie , par maniere de dire , plus lamentable & plus pitoyable : mais Aristobulus met , qu'ayant une fievre violente & une alteration extreme , il beut du vin , dont il commença à entrer en resverie , & à la fin en mourut le trentieme jour du mois de juin² : & au papier journal de sa maison , où est descrit par le menu , tout ce qu'il faisoit à chasque jour , il y a que le dixhuitieme de juin , il dormit dedans l'estuve , pource qu'il eut la fievre.

CXXII. Le lendemain après s'estre lavé & estuvé , il s'en alla en sa chambre , & passa tout ce jour chez Medius à jouer aux dez , puis le soir bien tard , après s'estre baigné , & avoir sacrifié aux dieux , il mangea , & eut la fievre la nuit : le vingtieme s'estant de rechef baigné , & ayant fait son sacrifice ordinaire aux dieux , il se meit à table dedans l'estuve mesme , escoutant ce pendant Nearchus qui luy comptoit de sa navigation , & des choses qu'il avoit veüs

² Grec : du mois Daésius. Voyez les Observations.

178 ALEXANDRE LE GRAND.

en la grande mer Oceane : le vingt & unieme jour ayant fait de mesme , il se trouva encore plus enflammé que jamais , & se sentit fort mal la nuit d'une grosse fievre , & tout le jour ensuyvant , auquel il se fait remuer & porter son liest au long du grand vivier , là où il devisa avec ses capitaines , touchant quelques places vacantes en son armée , leur commandant de n'y mettre point d'hommes qui ne fussent bien esprovez. Le vingt & troisieme ayant la fievre fort grosse , il se fait porter aux sacrifices , & ordonna que ses principaux capitaines demourassent dedans son logis seuls , & que les autres moindres , cõme centeniers & chefs de bandes , veillassent & feissent le guet au dehors. Le vingt & quatrieme il se fait porter en l'autre palais royal , qui est delà le lac , où il dormit un petit , mais la fievre ne le lascha onques , & quand ses capitaines vindrent pour luy faire la reverence & le saluer , il ne parloit plus : autant en fait il le vingt & cinquieme , de sorte , que les Macedoniens penserent qu'il fust mort , à raison dequoy , ilz vindrent battre aux portes du palais , & crier en menaçant ses plus privez amis , de façon qu'ilz les forcerent de leur ouvrir : si leur furent les portes ouvertes , & passerent un à un en s'ay au long de son liest. Ce jour là Python & Seleucus par ordonnance des principaux

familiers du roy, furent envoyez au temple du dieu Serapis, pour enquerir de luy s'ilz porteroient là Alexandre. Le dieu leur respondit, qu'ilz le laiffassent là : où il mourut le vingt & huitieme sur le soir. Il est ainsi escript, presque de mot à mot, en ces mesmes termes, dedans le papier journal de sa maison.

CXXIII. Si n'y eut sur l'heure suspicion aucune qu'il eust esté empoisonné : mais on dit que fix ans après, il s'en descouvrit quelque indice, à raison dequoy, sa mere Olympias feit mourir beaucoup de gens, & jetta au vent les cendres d'Iolas, au paravant decedé, pource que lon disoit que c'estoit luy qui luy avoit baillé à boire le poison. Ceulx qui tiennent que ce fut Aristote, qui conseilla à Antipater de ce faire, par le moyen duquel fut porté le poison, disent qu'un Agnothemis le racompta après l'avoir ainsi ouy dire au roy Antigonus : & fut le poison, à ce qu'ilz disent, une eau froide comme glas qui distille d'une roche estant au territoire de la ville de Nonacris, & la recueille lon ne plus ne moins qu'une rosée dedans la corne du pied d'un asne, pource qu'il n'y a autre sorte de vaisseau qui la puisse contenir, tant elle est extrêmement froide & perceante. Les autres maintiennent que tout ce que lon compte de cest empoisonnement est faulx, & alleguent pour le prouver un argument

qui n'est pas petit , c'est que les principaux capitaines , incontinent qu'il eut rendu l'esprit , entrèrent en grande dissension , à raison de laquelle le corps demoura par plusieurs jours tout nud sans estre ensepvely , en pais chauld & estouffé : & neantmoins jamais n'apparut signe aucun sur le corps , qui donnast suspicion ny conjecture de poison , ains se mainteint tousjours net & frais & entier.

CXXIV. Il laissa Roxane enceinte , laquelle pour ceste occasion estoit honorée & reverée des Macedoniens : mais elle haïssoit extremement Statira , pour une jalouzie qu'elle avoit conceüe à l'encontre d'elle , & la trompa moyenant une lettre contrefaite qu'elle luy envoya , comme si Alexandre luy eust mandé qu'elle vinst devers luy : mais si tost qu'elle fut arrivée , Roxane la tua elle & sa sœur , puis en jeta les corps dedans un puis , qu'elle fit après combler du sceu & avec l'aide de Perdiccas , qui eut incontinent après le decès d'Alexandre l'autorité & puissance principale , à cause d'Aridæus , lequel il trainnoit tousjours quant & luy , comme sauvegarde de son autorité royale. Cest Aridæus estoit né d'une femme de basse condition & publique nommée Philinna , & si n'avoit pas au demourant le sens bon pour une indisposition de sa personne , laquelle ne procedoit point de

ALEXANDRE LE GRAND. 181

nature ny d'aucun accident fortuit : car au contraire , lon dit qu'en sa premiere enfance il apparoiſſoit en luy ne ſçay quoy de bonne & gentille nature : mais que le corps ayant eſté gaſté par quelques breuvages que Olympias luy bailla , l'entendement s'en ſentit auſſi & s'en dévoya.

S O M M A I R E

DE LA VIE DE CÉSAR.

*I*NIMITIÉ de Sylla & de César. II. César est pris par des corsaires ; fierté avec laquelle il les traite pendant sa captivité. Il les fait pendre. III. César tient le second rang parmi les orateurs de son tems. Il auroit pu arriver au premier. IV. Faveur de César auprès du peuple. V. Il fait l'oraison funebre de sa femme. VI. Il épouse Pompeia. Dépenses excessives dans les fêtes qu'il donne au peuple. VII. Il place les tableaux de Marius & de ses victoires dans le Capitole. VIII. Il est nommé grand pontife. IX. On reproche à cette occasion à Cicéron de l'avoir épargné au moment de la punition des complices de Catilina. X. Le sénat fait faire au peuple une distribution de bled pour contrebalancer la faveur de César. XI. Clodius s'introduit chez Pompeia, femme de César, pendant les mysteres de la bonne déesse. XII. César répudie sa femme, & Clodius est absous par la faveur du peuple. XIII. Paroles remarquables de César. XIV. Sa conduite dans son gouvernement d'Espagne. XV. Il réconcilie Pompée & Crassus. XVI. Par leur crédit il est élu consul. Sa conduite en cette charge. XVII. Conduite odieuse de César &

de Pompée. XVIII. César fait arrêter Caton , & le fait mettre aussitôt en liberté. XIX. Exposé sommaire des guerres & des succès de César dans les Gaules. XX. Extrême attachement qu'il inspire à ses officiers & à ses soldats, prouvé par plusieurs exemples. XXI. Comment il gagne leur affection. XXII. Sobriété de César. XXIII. Première guerre de César dans les Gaules. XXIV. Seconde guerre de César , contre Ariovistus. XXV. Il remporte sur lui une victoire complète. XXVI. Il défait les Belges. XXVII. Il taille les Nerviens en pieces. XXVIII. On lui continue le gouvernement des Gaules pour cinq ans. XXIX. Il fait la guerre aux Usipiens & aux Tenchtères. XXX. Il ravage les terres au-delà du Rhin. XXXI. Il attaque l'Angleterre. XXXII. Le Gaule se soulève. César y retourne , & défait Ambiorix. XXXIII. Autre soulèvement des Gaules, sous la conduite de Vercingetorix. XXXIV. César le contraint de se renfermer dans la ville d'Alexia dont il fait le siège. XXXV. Il bat une armée nombreuse venue à leur secours ; Vercingetorix se rend avec ses troupes. XXXVI. Commencement des divisions de César & de Pompée. Pompée nommé seul consul. XXXVII. César envoie demander le consulat & la prolongation de son gouvernement. XXXVIII. Pompée prend de fausses idées sur les dispositions des gens de guerre par rapport à César. XXXIX. César offre de quitter les

armes , à condition que Pompée les quitteroit aussi.
XL. Il se réduit à demander le gouvernement de la
Gaule Cisalpine avec deux légions. XLI. Il part
pour se rendre à Ariminum. XLII. Il s'empare de
cette ville. XLIII. Effroi que cette nouvelle répand
dans Rome. XLIV. Pompée s'enfuit de Rome.
XLV. Divers sentimens de crainte ou de con-
fiance dans la ville de Rome. XLVI. César vient
à Rome. XLVII. Il passe en Espagne. XLVIII. Il
se met à la poursuite de Pompée. XLIX. Il entre-
prend de passer à Brindes dans une nacelle ; com-
ment il encourage le patron. L. Disette dans l'ar-
mée de César ; patience de ses soldats. LI. Victoire
de Pompée , dont il ne sait pas profiter. LII. César
décampe. LIII. Pompée se laisse déterminer malgré
lui à le poursuivre. LIV. La prise de Gomphes
rétablit l'abondance dans l'armée de César. LV.
Position des deux armées en présence dans la Phar-
salie. LVI. Les soldats de César le pressent de don-
ner la bataille. LVII. Présages divers. Dispositions
de César. LVIII. Dispositions de Pompée. LIX.
César remporte la victoire. LX. Paroles & conduite
de César après la victoire. LXI. Présages & prédic-
tion de Caius Cornelius. LXII. César pleure en
voyant la tête de Pompée. LXIII. Cléopâtre se fait
porter chez César dans un paquet de hardes. LXIV.
Il la met sur le trône d'Egypte. LXV. Rapidité
de ses victoires en Asie. LXVI. Insolence d'Antoine

& des autres amis de César. LXVII. César passe en Afrique. LXVIII. Disette & autres désavantages de César. LXIX. Il défait en un jour Scipion, Afranius & Juba, & prend leurs trois camps. LXX. Pourquoi César écrivit l'Anti-Caton. LXXI. Dénombrement qui prouve l'énorme dépopulation causée par la guerre civile. LXXII. César défait en Espagne les enfans de Pompée. LXXIII. Il est nommé dictateur perpétuel. LXXIV. Belle conduite de César depuis la fin de la guerre. LXXV. Projets de César pour de nouvelles conquêtes. LXXVI. Travaux qu'il entreprend & projette. LXXVII. Il réforme le calendrier. LXXVIII. Il se rend odieux en voulant se faire nommer roi. LXXIX. Antoine, dans la fête des Lupercales, présente le diadème à César, qui le refuse. LXXX. Commencement de la conjuration de Brutus & de Cassius. LXXXI. Présages qui annoncent à César sa mort. LXXXII. Il va au sénat malgré les avis qu'on lui donne. LXXXIII. Il est blessé d'abord par Casca. LXXXIV. Puis tué par Brutus & les autres conjurés. LXXXV. Brutus & Cassius se présentent devant le peuple. LXXXVI. Fureur du peuple contre les meurtriers de César. LXXXVII. Mort de Cassius. LXXXVIII. Mort de Brutus.

Depuis l'an 654 jusqu'à l'an 710 de Rome,
avant Jésus-Christ 44.

JULIUS CÆSAR.

SYLLA se trouvant au dessus de ses affaires ; voulut que Cæsar repudiaist sa femme Cornelia fille de Cinna , qui avoit pour un temps eu souveraine puissance à Rome : mais ne l'ayant peu ny par promesses , ny par menaces induire à ce faire , il luy confisqua son douaire : & la cause pourquoy Cæsar vouloit mal à Sylla , estoit la parenté qu'il avoit avec Marius , lequel avoit eu à femme Julia propre sœur du pere de Cæsar , de laquelle il avoit eu le jeune Marius , qui par ce moyen venoit à estre cousin germain de Cæsar. Mais Sylla au commencement de ses victoires estant empesché à de plus grandes choses , & à faire mourir tant d'autres de ses adversaires , ne teint pas compte de le faire chercher : & luy ne se contenta pas d'estre en seureté caché , ains se presenta de luy mesme au peuple , demandant une place vacante de presbtrise , estant à peine entré en son adolescence , dont il fut debouté , par le moyen de ce que Sylla soubz main luy fut a dversaire : & comme il fust entre deux de le faire davantage tuer , quelques uns de ses familiers luy dirent qu'il n'y avoit point de propos de faire mourir un si jeune garson : mais il leur

répliqua , qu'ilz n'estoyent pas bien sages , s'ilz n'appercevoient qu'en ce jeune garçon y avoit plusieurs telz que Marius. Ceste parole ayant esté rapportée à Cæsar , il s'osta de Rome , & demoura long temps caché au païs des Sabins , allant tousjours d'un lieu à autre.

II. Mais un jour , comme il se faisoit transporter d'une maison en une autre , à cause qu'il estoit malade , il tomba entre les mains des satellites de Sylla , qui alloient recherchant ces lieux là , & prenoient au corps ceulx qu'ilz y trouvoient cachez : toutefois il corrompit le capitaine , qui avoit nom Cornelius , moyennant deux talents ¹ qu'il luy donna : & estant ainsi eschappé , descendit vers la coste de la mer , où il s'embarqua , & se retira en la Bithynie devers le roy Nicomedes , là où ayant esté un peu de temps , il remonta de rechef sur mer , & fut pris par des coursaïres auprès de l'isle de Pharmacuse ² , car ces escumeurs là tenoyent desja toute la marine , avec grosses flottes de navires , & nombre infiny de vaisseaux. Ces coursaïres de prime face luy demanderent vingt talents ³ pour sa rençon , dont il se mocqua d'eulx , comme ne

¹ Douze cents escus. Amyot, 9,337 liv. 10 s. de notre monnoie.

² Il y avoit , selon Etienne de Byfance , deux petites îles de ce nom auprès de celle de Salamine.

³ Douze mille escus. Amyot, 93,350 livres de notre monnoie.

ſçachans pas quel perſonnage ilz avoyent pris , & de luy meſme leur en promeit cinquante ¹ , puis envoya ſes gens l'un deçà , l'autre delà , au recouvrement des deniers , tellement qu'il demoura ſeul entre ces larrons Ciliciens , qui ſont les plus grands meurtriers & les plus ſanguinaires hommes du monde , avec un de ſes amis & deux eſclaves ſeulement : & neantmoins il en faisoit ſi peu de compte , que quand il avoit envie de dormir , il leur envoyoit commander qu'ilz ſe teuſſent. Si fut trente huit jours entiers avec eulx , non comme priſonnier gardé , ains plus toſt comme prince ſuyvy & accompagné d'eulx , ne plus ne moins , que ſi c'euffent eſté ſes ſatellites. Durant lequel temps il ſe jouoit & eſbatoit aux exercices de la perſonne avec eulx naïvement en toute aſſurance , & quelquefois eſcrivoit des vers , ou compoſoit des hârengues , puis les appelloit pour les luy ouir reciter , & ſi d'aventure ilz ne monſtroient y prendre gouſt & en faire eſtime , il les appelloit tout devant eulx ignorans & barbares , & en riant les menaçoit ſouvent qu'il les feroit pendre : dont eulx eſtoient bien aiſes , à cauſe qu'ilz prenoient le tout en jeu , penſans que ceſte ſiene franchise de parler ainſi librement à eulx , ne procedoit

¹ Trente mille eſcus. *Amyot.* 233,437 livres 10 ſous de notre monnoie.

que d'une simplicité de jeunesse naïve : mais quand sa rençon fut venue de la ville de Milet , & que l'ayant payée il fut remis en sa liberté , il arma soudainement quelques vaisseaux dedans le port de Milet pour aller après ces larrons , lesquelz il trouva encore à l'ancre en la mesme isle : si en prit la plus grande partie & pilla leur bien , mais quant aux personnes , il les mena en la ville de Pergamum , là où il les mit en prison ; pendant qu'il alla parler à celui qui pour lors avoit le gouvernement de l'Asie , qui estoit un nommé Junius , comme à luy appartenant de faire la justice de ces malfaitteurs , attendu qu'il estoit præteur de l'Asie : mais ce præteur ayant belle envie de mettre la main sur leur argent , à cause qu'il y en avoit bonne somme , respondit qu'il adviseroit tout à loisir au faict de ces prisonniers : parquoy Cæsar le laissant là , s'en retourna à Pergamum , là où il feit publiquement pendre & mettre en croix tous ces larrons , comme il leur avoit souventefois predict & promis en l'isle , là où il sembloit qu'il ne se feist que jouer.

III. Depuis , comme la puissance de Sylla commenceast à se passer , ses amis luy manderent qu'il s'en retournast à la maison : parquoy il s'en alla premierement à Rhodes , pour y estudier quelque temps soubz Apollonius filz de Molon ; que Ciceron mesme oyoit , car c'estoit un honeste

homme, & un grand maistre de rhetorique & d'eloquence. Lon dit que Cæsar estoit fort heu-
reusement né pour bien parler & plaider devant
un peuple, & qu'outre l'aptitude naturelle qu'il
y avoit, il s'y estoit encore fort diligemment
exercité, de maniere, que sans nulle doubte il
avoit le second lieu des bien difans de son temps,
& en quitta le premier pour entendre à se faire
plus tost le premier en armes, en puissance &
autorité, n'estant pas arrivé jusques à tel degré
de la perfection de bien dire, que sa nature
l'eust peu conduire, pour avoir plus tost voulu
vaquer aux guerres & au maniement d'affaires,
qui en fin de compte le rendirent seigneur de
l'empire Romain. A l'occasion dequoy au livre
qu'il composa depuis à l'encontre de celuy que
Ciceron avoit escript à la louange de Caton, il
prie les lecteurs que lon ne face pas comparaïson
du stile d'un homme de guerre à l'eloquence
d'un excellent orateur, qui y avoit employé la
plus part de sa vie. Retourné qu'il fut à Rome,
il appella en justice Dolabella, le chargeant d'avoir
mal & violement versé au gouvernement de sa
province, & y eut plusieurs villes Grecques qui
luy envoyerent leur tesmoignage : toutefois
Dolabella en fut absous, & Cæsar voulant
rendre la pareille aux Grecs de la bonne affection
qu'ilz avoyent monstrée envers luy au faict de

ceste accusation , prit en main la cause pour eulx , quand ilz accuserent de concussion Publius Antonius , devant Marcus Lucullus prêteur de la Macedoine , là où il le poursuyvit si vivement , qu'Antonius fut contraint d'appeller devant les tribuns du peuple à Rome , alleguant , pour donner couleur à son appel , qu'il ne pouvoit avoir sa raison en plaidant dedans la Grece contre les Grecs.

IV. Si fut incontinent Cæsar à Rome en la grace de beaucoup de gens , par le moyen de son eloquence , à cause qu'il defendoit leur cause en jugement , & singulierement aimé & bien voulu de la commune , pour une gracieuse façon qu'il avoit de saluer , caresser & arraisonner priveement & familierement tout le monde , estant en cela plus soigneusement courtois que son aage ne portoit , & si y avoit encore quelque faveur pour la bonne table & maison plantureuse qu'il tenoit ordinairement , & pour la magnificence de la despense qu'il faisoit en tout le reste de son vivre , laquelle petit à petit le poulssoit en avant , & luy donnoit credit envers le peuple. Et ses envieux cuidans que ceste faveur luy deust faillir aussi tost , comme il ne pourroit plus fournir à la despense , ne teindrent compte de la rabattre du commencement , & la laisserent peu à peu croistre & venir en vigueur : mais à la fin l'ayans laissé devenir grande & mal aisée à renverser ,

combien qu'elle tendist manifestement à remuer & changer un jour tout l'estat de la chose publique, ilz apperceurent trop tard, qu'il n'y a si petit commencement en chose quelconque, que la continuation & perseverance ne rende bien tost grand & fort, quand pour le mespriser on n'y met point d'empeschement. Le premier doncques qui semble avoir eu deffiance & crainte de sa façon de proceder en l'entremise des affaires de la chose publique, ne plus ne moins que le sage pilote qui redouble une bonace riante en haulte mer, & qui cogneut la ruzée malice qu'il cachoit sous le manteau de celle privaulté, courtoisie & gayeté qu'il monstroir au dehors, fut Ciceron. « Mais quand je considere, ce disoit » il, ceste petruque si bien peignée, & si curieu- » sement accoustrée, & que je luy voy gratter » sa teste du bout d'un doigt seulement, il m'est » advis au contraire, qu'un tel homme ne pour- » roit jamais avoir mis en sa teste une si mal- » heureuse entreprise, que de vouloir ruiner la » chose publique Romaine ». Toutefois cela fut long tems depuis.

V. Au reste, la premiere demonstration que luy feit le peuple de la bienveillance qu'il luy portoit, fut, quand il demanda un estat de tribun, c'est à dire, de capitaine de mille hommes de pied, à l'encontre de Caius Pompilius, & qu'il
l'emporta

l'emporta, & fut esleu devant luy. La seconde & plus evidente que la premiere, fut, quand la femme de Marius, Julia, qui estoit sa tante, mourut : car il feit sur la place, comme son neveu ; une haranguë funebre à sa louange, & au convoy de ses obseques eut bien la hardiesse de mettre en evidence des images de Marius, qui fut la premiere fois qu'elles furent veuës depuis la victoire de Sylla, à cause que Marius & tous ses confors & adherents avoyent esté jugez & declarez ennemis de la chose publique. Car comme quelques uns murmurassent & criaissent pour ce faict contre luy, le peuple bruyant à l'encontre, avec grands batemens des mains, monstra qu'il en estoit bien aise, & qu'il luy sçavoit bon gré de ce qu'il ramenoit des enfers, par manière de dire, les honneurs de Marius en la ville de Rome, après un si long temps que lon les avoit tenus ensepyvelis. Or estoit ce bien la costume de toute ancienneté, que les Romains faisoient des harengues funebres à la louange des femmes aagées, quand elles venoyent à deceder, mais non pas des jeunes : & Cæsar fut le premier qui loua ainsi publiquement sa femme ¹ decedée, ce qui luy adjousta encore

¹ Cornélie, fille de Cinna, qu'il avoit épousée, dit Suetone, après avoir répudié Cossutia, qui n'étoit que de famille équestre, mais extrêmement riche.

quelque bienveillance , & fait que la commune par une compassion l'en aima encore davantage , comme homme debonnaire & de nature cordiale.

VI. Après les obseques de sa femme il s'en alla quæsteur , c'est à dire , tresorier sous le præteur Antistius Verus , lequel il honora toujours depuis , en sorte que quand il fut luy mesme fait præteur , il feist elire son filz quæsteur : puis au retour de ceste charge , il espousa sa troisieme femme Pompeia ¹ , ayant de sa premiere Cornelia , une fille qui depuis fut mariée à Pompeius le grand. Mais en faisant ceste despenſe extreme qu'il faisoit , pour laquelle il sembloit à quelques uns , qu'il acheptoit une fumée de faveur populaire , courte & de peu de durée , trop cherement , là où au contraire il acheptoit les plus grandes choses qui soyent en ce monde à bien petit prix : on dit que devant qu'il eust aucun office de la chose publique , il se trouva endebté de la somme de treize cents talents ². Et pource qu'ayant esté commis à la charge de faire reparer & entretenir le pavé du grand chemin qui s'appelle la voye d'Appius , il y despendit beaucoup du sien : & que d'autre part à son ad-

¹ Fille de Quintus Pompée , & petite-fille de Sylla.

² Sept cents quatre vingt mille escus. Amyot. 6,069,385 livres de notre monnoie.

venement à l'office de *ædile*, il donna au peuple l'esbatement de voir combattre trois cents & vingt couples de gladiateurs, c'est à dire, escrimeurs à oultrance : & qu'en toute autre sumptuosité de faire jouer jeux, & donner festins publiques, il abyfma, par maniere de dire, la magnificence de tous ceulx qui s'estoyent efforcez d'en faire au paravant : il rendit le peuple tellement affectionné envers luy, qu'il alloit imaginant de nouveaux estats, nouveaux honneurs & nouvelles charges pour le recompenser.

VII. Or y avoit il dedans Rome deux ligues & partialitez, l'une de Sylla, qui estoit forte & puissante, & celle de Marius, qui n'osoit pas alors lever la teste, tant elle estoit dissipée, mise au bas & ravallée : mais Cæsar la voulant remettre sus, au temps mesmement que les festes, esbatemens & jeux publiques de son *ædilité* estoyent en leur plus grande vogue, il feit secrettement faire des images de Marius, & des victoires qui portoyent des trophées, lesquelles images il alla une nuit poser & dresser dans le Capitole. Le lendemain au matin quand on y veid reluire ces ouvrages dorez & singulièrement bien faits & bien labourez, tesmoignans par les inscriptions que c'estoyent les victoires que Marius avoit gagnées sur les Cimbres, chascun s'esmerveilla grandement de la hardiesse

de celui qui les avoit ozé mettre là, car on sçavoit assez qui s'estoit : & en estant incontinent le bruit espendu par toute la ville, chascun y accourut pour les voir. Si y en eut aucuns qui crierent à l'encontre de Cæsar, que c'estoit une tyrannie qu'il se bastissoit en ressuscitant par maniere de parler, des honneurs, qui avoyent esté ensepveliz & enfouiz dedans la terre par edicts & ordonnances publiques, & que cela n'estoit qu'une espreuve & un essay pour fonder la vouldté du peuple, qu'il avoit appasté par la magnificence de ses esbats publiques, à fin de sentir s'il estoit assez apprivoisé, & s'il endureroit bien que lon jouast à telz jeuz, & que lon remuast de telles nouvelletez. Au contraire, ceulx de la part de Marius s'asseurans les uns les autres, se declarerent en bien grand nombre, faisans retentir tout le mont du Capitole à force de crier & de battre des mains, en maniere que les larmes en vindrent aux yeux de plusieurs, de grande joye qu'ilz eurent, quand ilz veirent les images de Marius, & en fut Cæsar haultement loué & estimé par eulx, comme personnage plus digne que nul autre de la parenté de Marius : & estant le senat assemblé là dessus, Catulus Lucatius, l'homme de la plus grande autorité qui fust pour lors dedans Rome, se leva, & parla fort asprement contre Cæsar où il dit une parole, qui

depuis a bien esté notée, Que Cæsar n'alloir plus par mines secrettes, ains par ouverte barerie, attendant de ruiner la chose publique : toutefois Cæsar à l'heure luy respondit si bien, que le senar s'en contenta, dont ceulx qui l'avoient en estime, se leverent en esperance encore davantage, & l'admonesterent qu'il prist hardiment cueur de ne ceder à personne, & que de la vouldunté du peuple mesme, il surmonteroit tous les autres, & feroit le premier homme de la ville.

VIII. Sur ces entrefaites alla de vie à trespas le souverain pontife Metellus, pour la prelatute duquel deux les plus notables personnages de la ville, & qui avoient plus d'autorité au senat, Isauricus & Catulus, entrerent en brigue l'un contre l'autre : & neantmoins Cæsar ne leur ceda point, ains se presenta au peuple, la demandant aussi bien comme eulx : & estant la brigue des uns & des autres egale, Catulus d'autant qu'il estoit homme de plus grande dignité, craignant davantage l'incertitude de l'issue de l'election, envoya devers Cæsar, luy faire presenter sous main grosse somme de deniers, s'il se vouloit deporter de sa poursuite : mais il luy feit response qu'il en emprunteroit encore plus grosse somme pour debatre ceste brigue à l'encontre de luy. Quant le jour de l'election fut escheut, comme sa mere le convoyast jusques à

la porte de son logis les larmes aux yeux, il luy dit en l'embrassant : « Ma mere, tu verras aujourd'hui ton filz souverain pontife, ou bien banny de Rome ». Finablement les voix du peuple recueillies, & la brigue bien debatue, il se trouva vainqueur, & l'emporta : ce qui donna grande crainte au senat & aux gens de bien, pource qu'ilz estimerent que de lors en avant il feroit faire au peuple tout ce qu'il voudroit.

IX. A l'occasion dequoy, Catulus & Piso reprenoyent grandement Ciceron, de ce qu'il l'avoit espargné en la descouverte de la conjuration de Catilina, où il luy avoit donné prise sur luy. Car Catilina ayant proposé non seulement de renverser l'estat de la chose publique, mais aussi de ruiner entierement l'empire de Rome, & mettre tout sans dessus dessous, eschappa des mains de la justice à faulte de preuves suffisantes, avant que le fond de ses conseilz fust à plein descouvert : mais il laissa dedans la ville Lentulus & Cethegus compaignons de sa conspiration, ausquelz on ne sçait pas si Cæsar donna point secrettement quelque confort & aide : mais bien est il certain que publiquement eulx ayans esté en plein senat convaincus à fait, comme Ciceron, qui estoit pour lors consul, demanda à chasque senateur son opinion, comment on les devoit punir, tous les autres precedents jusques

à Cæsar , opinerent qu'il les falloir faire mourir : mais Cæsar quand ce fut à luy à parler , se dressant en pieds prononça une harangue qu'il avoit premeditée , en laquelle il discourut , que ce n'estoit point chose accoustumée ny juste que de faire mourir des hommes , mesmement de telle noblesse & de telle dignité , que prealablement on ne leur eust fait leur procès , & qu'ilz ne fussent judicialement condamnés , si ce n'estoit en une extreme necessité : mais si on les mettoit en prison en quelques villes de l'Italie telles que Ciceron adviseroit pour le mieulx , jusques à ce que Catilina fust desfait , alors le senat pourroit en paix ordonner tout à loisir , ce qui en devoit estre fait. Ceste opinion sembla plus humaine , avec ce qu'elle fut prononcée d'une grande grace & vehemence d'eloquence , de sorte que non seulement ceulx qui opinerent après luy , la suivirent , mais aussi plusieurs de ceulx qui avoyent opiné paravant , revocquerent leur premiere sentence , & adhererent à la siene , jusques à ce que le renc de parler fut venu à Caton & à Catulus , lesquelz y contredirent fort & ferme , principalement Caton , qui parla de sorte qu'il rendit Cæsar mesme suspect de la conspiration , & se formalisa vigoureusement contre luy , de façon que les criminelz furent mis entre les mains des executeurs de justice pour les faire mourir : &

comme Cæsar sortist du ſenat, il y eut une trouppes de jeunes hommes, qui accompagnoient Ciceron pour la ſeureté de ſa perſonne, qui luy coururent ſus les eſpées traictes aux poings : mais on dit que Curion le couvrit lors de ſa robbe, & le tira d'entre leurs mains : & Ciceron meſme, comme ces jeunes hommes jettasſent les yeux ſur luy, leur feit ſigne de la teſte qu'ilz ne le tuaſſent point, fuſt ou pource qu'il redoubtaſt la fureur du peuple, ou bien qu'il eſtimaſt que cè ſeroit meſchamment & injuſtement fait. Toutefois ſi cela eſt veritable, je m'eſbahis bien comment Ciceron ne l'a mis au traitté qu'il a fait de ſon conſulat : mais comment qu'il en ſoit, il fut depuis blaſmé de n'avoir uſé de l'occafion qui ſe preſentoit lors à propos contre Cæſar, & d'avoir trop redoubté le peuple qui embrasſoit fort affectueuſement ſa protection.

X. Car peu de jours après eſtant allé au ſenat pour reſpondre aux ſouſpeçons & preſumptions qu'il y avoit contre luy, & y ayant eſté rabroué fort rudement, tenant le ſenat plus long temps qu'il n'avait accouſtumé, le peuple ſ'en vint à l'entour de la ſalle le demander, & crier tout hault. qu'on le laiſſaſt fortir : parquoy Caton craignant principalement la mutination des pauvres diſetteux, qui eſtoient ceulx qui emouvoyent tout le demourant du peuple, ayans mis leur

esperance en Cæsar, il suada au senat de leur faire distribuer gratuitement du bled pour un mois, laquelle distribution venoit à apporter de despense nouvelle à la chose publique la somme de cinq cens cinquante mille escus¹. Ce conseil esteignit pour lors evidemment une grande crainte, & dissipa la principale partie de la puissance de Cæsar en temps fort opportun, lors qu'il s'en alloit estre præteur & qu'il estoit plus à craindre que jamais, pour l'autorité que luy donnoit son magistrat, du temps duquel toutefois il n'advint aucun trouble en la chose publique, ains luy arriva à luy mesme un sinistre accident en sa maison.

XI. C'est qu'il y avoit un jeune homme de noble & patricienne maison, nommé Clodius, homme riche & eloquent, mais qui au demourant ne cedit en audace, insolence & temerité à nul de ceulx, qui ont esté les plus renommez pour leur meschanteré. Il devint amoureux de Pompeia, femme de Cæsar, laquelle n'en estoit pas mal contente : mais on la tenoit en si estroite garde, & la mere de Cæsar, Aurelia, femme de bien & d'honneur, avoit l'œil sur elle de si près, que ces deux amans ne se pouvoient trouver ensemble, qu'avec grande difficulté & non moindre

¹ Grec, cinq millions cinq cents mille sesterces, 1,049 411 livres 24 sols de notre monnoie.

danger. Or adorent les Romains une deesse, qu'ilz appellent la bonne deesse, comme les Grecs ont celle qu'ilz appellent Gynæcia, qui est à dire, la deesse des femmes, & les Phrygiens se l'attribuans à eulx particulièrement, disent que c'est la mere du roy Midas : mais les Romains tienent que c'est une Nymphé des bois mariée au dieu Faunus, & les Grecs veulent que ce soit celle des meres de Bacchus que lon n'oze nommer, en signe dequoy au jour de sa feste se font des ramées & fueillades de branches de vigne, & y a un dragon sacré près l'image de la deesse, suyvant la fable que lon en recite, joint qu'il n'est point loisible à homme quel qu'il soit, d'assister à ses sacrifices, non pas seulement estre dedans la maison, là où on les fait : & dit on que les femmes à part elles y font plusieurs cerimonies, lesquelles ressemblent fort à celles des sacrifices d'Orpheus. Quand doncques le temps de la feste est escheu, le mary, en la maison duquel se doibt faire l'assemblée du sacrifice, qui est l'un des consulz ou des præteurs, & avec luy tout autre masle sort de son logis, & sa femme demeure pour donner ordre à toute la maison, là où la plus part des cerimonies se font la nuit, & y a tout plein de joyeusetez de chans & de musique meslé parmy ces veilles, qui durent toute la nuit. Pompeia doncques fem-

me de Cæſar ayant à celebrer celle année la feſte , Clodius qui n'avoit point encore de barbe , & par ce moyen eſperoit n'eſtre point deſcouvert , ſe deſguiſa de l'accouſtrement d'une meneftriere , pource qu'il avoit le viſage aſſez ſemblable à une jeune femme : & trouvant les portes ouvertes fut ſans eſtre apperceu mis au dedans par une chambriere , qui eſtoit de l'intelligence , & qui ſ'en courut devant pour advertir Pompeia de ſa venue : elle demoura aſſez longuement à retourner , & Clodius n'ayant pas la patience de l'attendre au lieu où elle l'avoit laiſſé , ſ'en alla errant çà & là parmy la maiſon qui eſtoit grande & ſpatieuſe , fuyant tousjours la lumiere , & fut d'aventure rencontré par l'une des ſervantes d'Aurelia , laquelle cuidant que ce fuſt une femme , le pria de jouer , & comme il en feiſt refus , elle le tira en avant , luy demandant qui & dont elle eſtoit. Clodius adonc luy reſpondit , qu'il attendoit l'une des femmes de Pompeia , qui ſ'appelloit Abra : ainſi eſtant cogneu à la voix , la ſervante de Aurelia ſ'en courut incontinent là où eſtoient les lumieres & la troupe des dames , criant qu'elle avoit trouvé un homme deſguiſé en habit de femme : dequoy les dames ſe trouvant eſtonnées , Aurelia feit auſſi toſt ceſſer les ceremonies du ſacrifice , & cacher ce qu'il y avoit de ſecret , & quant & quant elle meſme

les portes de la maison fermées, alla par tout avec torches & flambeaux, pour trouver cest homme, lequel fut à la fin trouvé dedans la chambre de la servante de Pompeia, avec laquelle il s'y en estoit fouy, & estant recogneu des dames, fut chassé dehors de la maison par les espauls.

XII. Si ne faillirent pas les dames de racompter le faict à leurs maris la nuit mesme, aussi tost qu'elles furent de retour en leurs maisons, & courut le lendemain un bruit par toute la ville, que Clodius avoit attenté une chose malheureuse & meschante, & qu'il en devoit payer la peine, non seulement à ceulx à qui il avoit fait cest outrage, mais aussi à la chose publique & aux dieux, & y eut l'un des tribuns du peuple, qui l'appella en justice & l'accusa de lèse majesté divine : & y eut aucuns des plus puissans & principaux hommes du senat, qui se banderent aussi contre luy, le chargeans de plusieurs autres horribles dissolutions, mesmement d'avoir commis inceste avec sa propre sœur, qui estoit mariée à Lucullus : toutefois le peuple s'opposant à leurs chaudes poursuites, defendit Clodius, & luy servit de beaucoup envers ses juges, qui se trouverent estonnez, & eurent peur d'irriter la commune. Ce neantmoins Cæsar incontinent repudia sa femme, à raison dequoy, estant appelé par l'accusateur pour porter tesmoignage à l'encontre

de Clodius , il respondit qu'il ne sçavoit rien de ce que lon proposoit contre luy. Ceste responce estant trouvée estrange , l'accusateur luy demanda , comment & pourquoy donques il avoit repudié sa femme : « Pource , dit il , que je ne veux pas » que ma femme soit seulement soupçonnée ». Et disent les uns que Cæsar le pensoit à la verité ainsi , comme il l'affermoit : les autres estiment qu'il le faisoit pour gratifier au commun peuple qui desiroit , comment que ce fust , sauver Clodius , lequel fut aussi absouls de ce crime , par ce que la plus part des juges donna sa sentence en lettres confuses , craignant d'un costé le danger de la commune , s'ilz le condamnoient , & de l'autre costé , la mauvaïse opinion des gens d'honneur , s'ilz l'absouloyent.

XIII. Au demourant , estant escheut à Cæsar ; à l'issue de sa prature , le gouvernement de l'Hespagne , ses creanciers vindrent crier après luy , & l'importuner pour estre payez sur son partement , & ne pouvant chevir à eulx , il fut contraint de recourir à Crassus , qui estoit pour lors le plus riche homme de la ville de Rome , & qui avoit besoing de l'execution & active vivacité de Cæsar à l'encontre de la puissance de Pompeius , au gouvernement de la chose publique. Crassus respondit pour luy à ses plus importuns creanciers & qui le pressoyent le plus , en se

constituant plege pour la somme de huit cents & trente talents¹, quoy moyenant, il le laisserent aller en son gouvernement : auquel voyage lon dit, qu'en traversant les monts des Alpes, il passa par une petite villette de Barbares habitée de peu d'hommes pauvres & mal en point, là où ses familiers qui l'accompagnoient se prirent à demander, en riant entre eulx, s'il y avoit point de brigues pour les estats & offices de la chose publique en ceste ville là, & s'il y avoit point de débats & d'envies entre les principaux pour les honneurs d'icelle, & Cæsar parlant à certes, respondit, « Je ne say pas cela, dit il, » mais quant à moy j'amerois mieux estre icy » le premier, que le second à Rome ». Une autre fois semblablement en Hespagne il se meit à lire quelque histoire des faicts d'Alexandre, & l'ayant leuë, il demoura longuement pensif en soy mesme, & puis se prit à plorer. Ce que voyans ses amis, s'esmerveillerent fort quelle douleur en pouvoit estre la cause, & il leur respondit, « Ne vous semble il pas que ce soit » assez pour se douloir, que le roy Alexandre, » en l'aage où je suis, ait jadis tant conquis de » peuples & de païs, & que je n'aye encore fait » chose quelconque digne de memoire ».

¹ Neuf cents quatre vingts & dix mille escus. *Amyot.* 3,875,062 livres 10 sols de notre monnoie.

XIV. Parquoy si tost qu'il eut le pied en Hespagne, il commença incontinent à mettre la main à la besongne, de maniere qu'en peu de jours il eut fait dix nouvelles enseignes de gens de pied, oultre vingt autres qui y estoient desja, & les menant contre les Callaciens & Lusitaniens y conquist tout, & penetra jusques à la grand'mer Oceane, subjuguant toutes les nations qui paravant ne recognoissoient point les Romains à seigneurs : & s'il y donna bon ordre, quant aux affaires de la guerre, il n'ordonna pas moins sagement ne moins diligemment ceulx de la paix, remettant les villes en bonne union & concorde, les unes avec les autres, & sur tout pacifiant les procès & differens qui estoient entre les debteurs & les creanciers à raison des usures : car il ordonna que les creanciers prendroyent par chascun an les deux parts du revenu de leurs debteurs, jusques à ce qu'ilz fussent entierement remboursez, & que les debteurs s'aideroyent de la troisieme, pour lesquelles il retourna de son gouvernement en bonne reputation, s'y estant luy mesme fait riche, & y ayant aussi enrichy ses foudards, qui à raison de ce luy donnerent le tiltre & le nom d'imperator, qui signifie souverain capitaine.

XV. Mais pource que les loix & ordonnances Romaines vouloyent, que ceulx qui poursuiv-

voyent l'honneur du triumphe , demourassent dehors la ville , & que ceulx qui demandoient le consulat fussent au contraire , dedans en personne , se trouvant en ceste difficulté , à cause qu'il estoit arrivé justement au temps que se devoit faire l'élection des consulz , il envoya supplier le senat de luy faire la grace , qu'il peust absent par l'entremise de ses amis prochasser le consulat ; à laquelle requeste Caton du commencement résista , alleguant la loy expresse , qui estoit formellement au contraire : mais depuis voyant , que nonobstant ses oppositions , plusieurs des senateurs gaignez par Cæsar , inclinoyent à sa requeste , il essaya de la faire neantmoins resfortir à neant , luy soubstrayant le temps , en consumant tout le jour à parler. A l'occasion dequoy Cæsar se resolut de quitter plus tost la poursuite du triumphe , & d'entendre à celle du consulat , & entrant dedans la ville y mena une prattique , laquelle abusa tout le monde , excepté Caton : ce fut la reconciliation de Pompeius & de Crassus , les deux plus grands & les plus puissans personnages de la ville de Rome , lesquelz estoient paravant en picque l'un contre l'autre , & Cæsar les ayant reduits en amitié , & ayant par ce moyen recueilly la puissance de tous les deux en luy seul , on ne se donna garde , que sous un acte qui avoit la plus belle apparence

&

& le plus honeste tiltre du monde, il renversa sans dessus dessous toute la chose publique Romaine : car cè ne fut pas la dissension de Pompeius & de Cæsar qui suscita la guerre civile, ainsi que lon estime communement, ains fut plus tost leur union, pource qu'ilz s'allierent ensemble, premierement pour ruiner l'authorité du senat & de la noblesse, & puis après en entrèrent en querelle l'un contre l'autre. Et Caton qui le predict & prophetisa par plusieurs fois, en rapporta pour lors la reputation d'homme fascheux & importun, mais depuis en fut estimé plus sage, que heureux en ses conseilz.

XVI. Ainsi fut adonc Cæsar au milieu de ces deux grands personnages, qu'il avoit reconciliez ensemble, conduit à l'assemblée de l'election, là où il fut, sans contredit, eleu consul avec Calpurnius Bibulus : & si tost comme il fut installé, commença à mettre en avant des edicts, & des loix mieulx seantes à quelque seditieux tribun du peuple, que non pas à un consul ; attendu qu'il proposoit par icelles des departemens de terres & distributions de bleds, sans payer, à chaque citoyen, pour aggreer à la commune : en quoy les gens de bien & d'honneur du senat s'opposerent à son entente, & luy qui ne demandoit que quelque occasion colorée, commença à crier & protester, que la rudesse &

dureté du senat le chassoit malgré luy , & le contraignoit d'avoir recours à caresser le peuple , & de faict s'y encourut , ayant à l'un de ses costez Crassus , & à l'autre Pompeius , ausquelz il demanda tout hault en pleine assemblée de ville , s'ilz approuvoyent pas les edicts qu'il avoit mis en avant ? ilz respondirent tous deux que ouy ; parquoy il les pria de leur vouloir tenir main forte à l'encontre de ceulx qui menaçoient de les empescher à poincte de l'espée , ce que Crassus promet de faire , mais Pompeius y adjousta davantage , que à l'encontre de ceulx qui y apporteroient l'espée , il y viendrait avec l'espée & le bouclier. Ceste parole despleut grandement aux seigneurs du senat , comme n'estant pas seulement indigne de sa gravité , & mal-seante à la reverence qu'on luy deferoit , & au respect qu'il devoit porter au senat , ains estant plus tost furieuse , & plus convenable à quelque jeune estourdy : mais le commun peuple , au contraire , en fut fort aise.

XVII. Et Cæsar voulant encore plus estroitement embrasser la puissance de Pompeius , luy donna en mariage sa fille Julia , laquelle estoit desja fiancée à Servilius Cæpio , luy promettant en eschange , de luy donner celle de Pompeius , laquelle estoit aussi promise à Faustus filz de Sylla : & peu de temps après , luy mesme espousa

Calpurnia, fille de Pifo, lequel il feit designer consul pour luy succeder l'année ensuyvant. A raison dequoy Caton alloit criant & appellant les dieux à tesmoings, que c'estoit chose que lon ne devoit point endurer ne souffrir, qu'ilz allassent ainsi butinans entre eulx l'empire Romain par le macquerellage de telles nopces, en se faisant ainsi donner les uns aux autres, des gouvernemens de provinces, & des charges de grosses armées par le moyen de leurs mariages. Et Bibulus compaignon de Cæsar au consulat, voyant que pour faire toute la resistance qu'il pouvoit à ces loix, il ne gaignoit rien, ains que par plusieurs fois il s'estoit mis en danger d'estre tué sur la place avec Caton, il se teint renfermé dedans sa maison tant que le reste de son consulat dura. Et Pompeius aussi tost qu'il eut espousé Julia, remplit toute la place de gens armez, & feit passer & aauthoriser les loix, que Cæsar mettoit en avant en faveur du peuple, & puis decerner à Cæsar pour sa province toutes les Gaules, tant de deçà que de delà les monts, ensemble l'Esclavonnie, avec quatre legions, pour le temps & le terme de cinq années.

XVIII. A quoy comme Caton s'efforceast de contredire, Cæsar le feit prendre par ses sergens pour le mener en prison, pensant qu'il en appelleroit devant les tribuns du peuple : mais il

s'y en alloit sans mot dire : & Cæsar voyant ; que non seulement les gens de bien & d'honneur en estoient marries , mais aussi que le commun populaire pour la reverence qu'il portoit à la vertu de Caton , s'en alloit après avec un silence & une chere morne & triste , il pria luy même sous main l'un des tribuns qu'il allast oster Caton d'entre les mains des sergens. Depuis lequel acte il y eut peu de senateurs qui se voulussent trouver soubz luy president au senat , ains ne pouvans supporter les choses qu'il faisoit , s'en alloyent hors de la ville : entre lesquels il y en eut un fort vieil , nommé Confidius , qui luy dit un jour franchement , que c'estoit pour la crainte de ses armes que les autres n'y ozoient comparoir : & Cæsar luy respondit , « Et que ne te tiens » tu donques toy même pour la même crainte en » ta maison » ? A quoy Confidius luy repliqua , « Pource que ma vieillesse m'oste la crainte : car » ayant desormais si peu à vivre , je ne me soucie » plus gueres de la contregarder ». Mais la plus villaine chose qui fut faite en tout le consulat de Cæsar , semble avoir esté , de faire eslire Publius Clodius tribun du peuple , qui luy avoit fait un si grand outrage en sa femme , & avoit pollué & violé les saintes veilles mystiques des dames , qui se faisoient dedans sa maison. Ce Clodius ne cherchoit à se faire eslire tribun du peuple

pour autre raison , que pour ruiner Ciceron , & Cæsar mesme ne se partit point de Rome pour aller trouver son armée , qu'il ne les eut attachez l'un à l'autre , & chassé Ciceron hors de l'Italie. Voilà ce que lon treuve qu'il fait avant les guerres de la Gaule.

XIX. Mais le temps des grandes armes & conquestes qu'il fait depuis , & de la guerre , en laquelle il subjuga & dompta toutes les Gaules , prenant un tout autre commencement de vie , & entrant en une façon de faire toute differente du passé , le fait cognoistre aussi grand homme de guerre , & aussi excellent capitaine , que nul des autres , qui onques furent renommez pour sages & vaillans chefs d'armées , & qui plus ont acquis de gloire pour leurs haults faicts de prouesse. Car qui luy voudra comparer tous les Fabiens , les Scipions , les Metelles , & ceulx mesme de son temps , ou un peu plus anciens , comme un Sylla , un Marius , les deux Luculles , & Pompeius mesme ,

Duquel le nom jusques aux cieulx s'esleve ,

on trouvera que les gestes de Cæsar en toute vertu militaire & preference au faict de la guerre , les surmontent tous entierement. L'un en malice des païs , où il fait ses conquestes : l'autre en l'estendue des regions qu'il adjousta à l'empire

Romain : l'autre en multitude & puissance des ennemis qu'il desfeit : l'autre en dureté & aspreté des hommes ausquelz il eut affaire , les meurs desquelz il polit & addoulcit depuis : l'autre en douceur , humanité & clemence vers ceulx qu'il avoit pris : l'autre en liberalité & beneficence grande vers ceulx qui combatirent soubz sa charge en ces guerres : & tous en nombre des journées qu'il gaigna , & multitude des ennemis qu'il occit en bataille. Car en moins de dix ans que dura la guerre de la Gaule , il prit d'assault ou par force , huit cents villes , subjuga trois cents nations : & ayant eu devant soy en bataille trois millions d'hommes armez , à plusieurs fois , il en occit un million , & en prit de prisonniers bien autant.

XX. Au reste il se feit tant aimer de ses gens , qu'ilz furent si ardemment affectionnez à luy faire service , qu'au lieu qu'ilz n'estoyent rien plus que les autres , quand ilz combatoyent pour quelque autre querelle , s'il estoit queſtion de l'honneur ou de la gloire de Cæsar , alors ilz estoyent invincibles , & se jettoient la teste baissée à tout peril , par telle fureur que nul ne les pouvoit souſtenir. Comme l'on peut cognoistre par l'exemple d'Acilius , qui en une bataille navale qu'il eut devant la ville de Marseille , estant faulté dedans un vaisseau des ennemis y eut la main droite abbatue d'un coup d'espee ,

& neantmoins pour cela n'abandonna point son bouclier qu'il tenoit de la main gauche , ains en poulsant & frappant les ennemis aux visages , les feit tous fouir , de maniere qu'il demoura maistre du vaisseau : & Cassius Scæva en une rencontre près de la ville de Dyrrachium , ayant eu l'œil crevé d'un coup de trait , l'espaule percée d'un coup de javelor , & la cuisse aussi d'un autre , & ayant receu sur son pavois trente coups de flesches , appella les ennemis , faignant de se vouloir rendre à eulx : mais comme deux y fussent accourus , il avalla l'espaule à l'un d'un coup d'espée , & blecea l'autre au visage , de sorte qu'il luy feit tourner le dos , & à la fin encore se sauva il , par ce que quelques uns de ses compagnons y accoururent au secours. Et en Angleterre , comme les chefs des bandes se fussent jettez les premiers dedans un marais plein d'eau & de bourbe , & les ennemis leur y courussent sus asprement , il y eut¹ un simple souldard , qui en la presence de Cæsar , lequel voyoir à l'œil tout le combat , se jetta au milieu des combatans , & y faisant de grands & admirables efforts de prouesse , continua si vaillamment , qu'il feit en fin prendre la fuitte aux Barbares , & sauva les capitaines des bandes , qui autrement estoient en grand danger de leurs personnes : puis passant

¹ Voyez les Observations.

le maret le dernier de tous avec grande difficulté à travers de l'eau boueuse & fangeuse, partie à nage, & partie à pied, il feit rant à la fin qu'il gaigna l'autre rive, mais ce fut sans son bouclier, Cæsar s'esmerveillant de son gentil cueur, luy alla au devant avec grands cris de jöye pour le recueillir & caresser : mais le soudard au contraire, la teste baissée & la larme à l'œil, se jetta à ses pieds, luy requerant pardon de ce qu'il avoit abandonné son bouclier. Et en Afrique, Scipion ayant surpris une des navires de Cæsar, dedans laquelle estoit entre autre Granius Petronius, de nagueres esleu quæsteur, il feit mettre en pieces tous les autres, & quant au quæsteur, il dit qu'il luy donnoit la vie. Mais Petronius luy respondit : Que les soudards de Cæsar n'avoient point accoustumé de recevoir en don, ains de donner la vie aux autres, & en disant cela, il se passa son espée propre à travers le corps, & se tua luy mesme.

XXI. Or ce qui engendroit & nourrissoit ceste grandeur de courage, & ceste affection vehemente de bien faire en eulx, c'estoit Cæsar luy mesme : premierement en leur donnant, & en les honorant largement, & leur faisant cognoistre par effet, qu'il n'amassoit point des richesses à la guerre pour vivre puis après en delices à son plaisir, ny pour en abuser à ses propres volup-

tez , ains que c'estoit un prix & salaire commun de la vertu qu'il ferroit pour en recompenser les hommes de valeur & les gens de bien , auquel salaire il ne participoit luy même , sinon en tant qu'il le departoit aux souldards qui le meritoient : & puis en s'exposant luy même le premier franchement à tout peril , & ne se lassant jamais de travail quelconque : & quant à sa hardiesse de se hasarder ainsi adventureusement à tout danger , ilz ne s'en esbahissoient pas tant , sachans bien que c'estoit la convoitise de gloire , dont il estoit enflammé , qui l'incitoit à ce faire : mais la fermeté qu'il avoit de supporter tous travaux plus que les forces de son corps ne portoyent , c'estoit ce qui plus les faisoit esmerveiller : car il estoit gresle & menu de corsage , & avoit la charnure blanche & molle , subject à douleurs de teste , & si tumboit quelquefois du mal caduc , lequel luy prit la premiere fois , comme lon dit , à Cordube ville d'Hespagne : mais il ne se servit pas de la foiblesse de son corps , pour une couverture de se traitter mollement & delicatement , ains au contraire il prit les labeurs de la guerre comme une medecine pour guarir l'indisposition de sa personne , combatant à l'encontre de sa maladie en estant continuellement par chemin , en vivant sobrement , & en couchant à l'air ordinairement : car la plus part des nuits , il

dormoit dedans un chariot, ou dedans une litière, employant par ce moyen son repos à faire toujours quelque chose. Et de jour en allant par païs visitant les villes, les places fortes, ou les camps fortifiez, il avoit toujours auprès de luy dedans son chariot un secretaire assis, lequel estoit accoustumé à escrire en allant par païs, & un souldard derriere luy qui portoit son espée, combien qu'il allast en si grande diligence, que la premiere fois qu'il sortit de Rome, avec charge publique, il arriva en huit journées à la riviere du Rosne. Or d'estre bien à cheval & y avoir ferme tenue, ce luy estoit chose fort aisée, pource qu'il l'avoit apprise dès son enfance, s'estant accoustumé à donner carriere à un cheval courant à toute bride, en tenant ses mains entrelacées derriere son dos. Mais en la guerre de la Gaule, il s'exercita encore davantage à dicter lettres missives en chevauchant par les champs, & à fournir à deux secretaires ensemble, tant qu'ilz en pouvoient escrire, encore dit Oppius à plus de deux, & dit on que ce fut luy qui inventa le premier la maniere de parler avec ses amis par chiffre² de lettres transposées, quand il n'avoit pas loisir de parler de bouche à eulx pour la pressive necessité de quelque affaire, ou pour la multitude de ses occupations, ou pour la grande estendue de la ville de Rome.

² Voyez les Observations.

XXII. Et pour monstret sa facilité & simplicité grande en son vivre ordinaire, on allegue cest exemple, que Valerius Leo un sien hoste, luy donnant un jour à soupper en la ville de Milan, servit à table des asperges où lon avoit mis d'un huile de senteur au lieu d'huile : il en mangea simplement, sans faire semblant de rien, & tenfa ses amis qui s'en offensoient, en leur disant qu'il leur devoit bien suffire de n'en manger point si cela leur faisoit mal au cueur, sans en faire honte à leur hoste, & que celuy qui se plaignoit de telle incivilité, estoit bien incivil luy mesme. Quelque autre fois en allant par païs il fut contrainct par une grosse tempeste qui se leva soudainement, de se heberger en la maisonnette d'un pauvre païsan, où il n'y avoit pour tout logis qu'une seule chambre si petite, qu'il n'y pouvoit gesir qu'une seule personne, encore bien maigrement : il dit à ses amis qui l'accompagnoient, « Il fault ceder les lieux honorables » aux plus grands, & les necessaires aux plus malades ». Suyvant lequel propos, il voulut que Oppius, qui estoit mal disposé, couchast à couvert au dedans, & luy avec ses autres amis, coucha soubz la faillie de la couverture de la maison au dehors.

XXIII. Au demourant, la premiere guerre qu'il eut à son arrivée en la Gaule, fut contre les

Helvetiens ¹, & contre les Tiguriniens ², lesquels ayans brûlé leurs bonnes villes jusques au nombre de douze, & bien quatre cents bourgades, vouloyent passer à travers celle partie de la Gaule, qui estoit en l'obeïssance des Romains, ne plus ne moins qu'avoient fait anciennement les Cimbres, ausquelz ilz ne cedoyent point en hardiesse, & si estoient bien en aussi grand nombre, comme de trois cents mille ames en tout, dont il y en avoit cent quatre vingtz & dix d'hommes portans les armes. Ce ne fut pas luy mesme en personne qui desfeit les Tiguriniens, ains fut Labienus l'un de ses lieutenans qu'il y envoya, & qui les desfeit au long de la riviere d'Arar ³ : mais les Helvetiens le vindrent charger luy mesme au desprouveu par le chemin, ainsi comme il conduisoit son armée vers une ville de ses alliez. Quoy voyant, il se hâta de gagner viftement un lieu fort d'affiette, auquel il rengea ses gens en bataille, & comme on luy eust amené son cheval de bataille pour monter dessus, il dit : « Quand j'auray rompu les ennemis, je » monteray alors dessus, pour les chasser & » pourfuyvre : mais pour ceste heure, allons

¹ Les Suisses. César place leurs limites entre le Rhin, le mont Jura, le lac Léman ou de Genève, & le Rhône.

² C'est le canton de Zurich.

³ La Saône.

« les charger ». En disant cela il marcha à pied , & alla donner dedans, où il demoura longuement à combattre , avant que pouvoir forcer ceulx qui estoient en bataille : mais le plus grand affaire fut encore à forcer leur camp , & le rempart qu'ilz avoyent fait de leur charroy : pource que là non seulement ceulx qui avoyent esté rompus en la bataille , se rallierent ensemble , & feirent teste , mais aussi leurs femmes & leurs enfans combatans jusques au dernier soupir , se feirent tous tailler en pieces , de sorte qu'à peine fut achevé le combat à minuiet. Si l'acte de ceste victoire fut beau de soy mesme , il y en adjousta encore un autre autant ou plus beau , c'est qu'il remeit ensemble les Barbares , qui estoient eschappez de la bataille en nombre de bien cent mille ames , & les contraignit de retourner au pais qu'ilz avoyent laissé , & aux villes qu'ilz avoyent eulx mesmes bruslées : ce qu'il feir de peur que les Allemans passans le Rhin ne vinsent occuper ce pais là comme vacant.

XXIV. La seconde guerre fut ouvertement en defendant les Gaulois contre les Allemans, combien que luy mesme non gueres au paravant eust fait recevoir & advouer leur roy Ariovistus pour amy & allié du peuple Romain : mais ilz estoient insupportables à leurs voisins , & si estoit tout apparent , que là où le moyen & l'oc-

caſion ſe preſenteroit de eulx eſlargir, ilz ne ſe contentetoient pas de ce qu'ilz tenoyent, ains voudroyent uſurper & occuper auſſi le reſte de la Gaule : & ſentant que quelques uns de ſes capitaines reſtiſvoyent de peur, meſmement les jeunes hommes des nobles maiſons de Rome, qui penſoyent eſtre venuz à la guerre ſoubz luy, comme pour un eſbat, & pour ſ'enrichir, & prendre leur plaſir ſeulement, il teint aſſemblée de conſeil, là où il leur commanda, que ceulx qui auroyent peur ſe retiraffent, & qu'ilz ne ſe preſentaſſent point enuiſ à la bataille, puis qu'ilz avoyent les cueurs ſi laſches & ſi foibles que de reculer au beſoing, & qu'au regard de luy il eſtoit tout reſolu d'aller trouver les Barbares; quand il n'auroit que la dixieme legion ſeulement : « Pource, diſoit il, que ny les ennemis, » auſquelz ilz avoyent à faire, n'eſtoyent point » plus vaillans que les Cimbres, ny Marius n'a- » voit point eſté plus grand capitaine que luy ». Ceſte harengue entendue, les ſoudards de la dixieme legion luy envoyerent des ambaffadeurs pour le remercier de la bonne opinion qu'il avoit d'eulx, & les autres legions injurierent leurs capitaines, & tous enſemble le ſuyvirent pluſieurs journées en bonne intention & bonne affection de bien faire leur devoir, juſques à ce qu'ilz arriverent à douze lieues près des ennemis.

XXV. Si fut adonc l'insolence & la braverie d'Ariovistus bien refroidie, quand il entendit ceste arrivée, à cause que les Romains venoyent assaillir & chercher les Allemans, au lieu qu'ilz n'esperoyent pas & ne faisoient pas leur compte qu'ilz les deussent attendre seulement, au moyen dequoy ne s'estant jamais douté qu'il en peust ainsi advenir, il admiroit grandement la hardiesse de Cæsar, joint qu'il voyoit que son armée en estoit toute troublée. Mais ce qui plus encore rebouchoit la poincte de leurs courages, estoient des femmes devinereffes qu'ilz avoyent entre eulx, lesquelles faisoient profession de cognoistre & predire les choses à advenir, en considerant les tournoyemens des rivières, les rourbillons & le bruit que font les eaux en coulant à val, & toutes ces choses considerées leur defendoyent de venir à la bataille jusques à la nouvelle lune : dequoy Cæsar estant adverty, & voyant que pour ceste raison les Barbares ne se bougeoient, estima qu'il feroit bon de les aller assaillir, ce pendant qu'ilz estoient ainsi descouragez par ceste superstition, plus tost que de perdre temps à attendre leur occasion : & les allant escarmoucher jusques dedans leurs forts, & jusques dessus des coustaux & collines, où ilz s'estoyent logez & fortifiez, les irrita tant, qu'à la fin ilz descendirent tous courroucez en la plaine, là où ilz furent rompus

en bataille rangée, & chassez par l'espace de bien dix huit lieues de païs, jusques à la riviere du Rhin, & fut la campagne, qui est entre deux, toute couverte de morts & de despouilles. Mais Ariovistus gaignant le devant de vîtesse, passa le Rhin, & se sauva avec peu de ses gens : car on dit qu'il mourut bien en ceste desconfiture jusques au nombre de quatre vingts mille hommes.

XXVI. Après lequel exploit Cæsar laissa son armée pour hyverner en garnison dedans le païs des Sequaniens¹ & luy ce pendant voulant entendre aux affaires de Rome, passa en la Gaule²; à travers laquelle court la riviere du Po, estant partie du gouvernement qui luy avoit esté donné, pource que la riviere qui s'appelle Rubicon, fait la separation de la Gaule, qui est deçà les Alpes, d'avec le reste de l'Italie : là où faisant séjour, il alloit pratriquant & gaignant amis dedans Rome, à cause que plusieurs l'y alloient voir, auquelz il donnoit tout ce dont ilz avoyent affaire, & les renvoyoit bien garnis de bons presens, & encore plus de promesses & d'esperances pour l'advenir. Et durant tout le temps de ceste conquête des Gaules, Pompeius ne se donna point

¹ La Franche-Comté, la Bourgogne, &c.

² La partie de l'Italie, qu'on appelloit alors la Gaule Cisalpine, comme on le reconnoitra par ce qui suit.

garde ;

garde, que reciproquement il subjugoit les Gaulois par les armes des Romains, & gaignoit les Romains par l'argent des Gaulois : mais ayant nouvelles que les Belges, qui sont les plus belliqueux & les meilleurs hommes de guerre des Gaulois, tenans la tierce partie de la Gaule¹, s'estoyent soulevéz, ayans mis ensemble grand nombre de combatans armez, il dressa incontinent son chemin celle part en toute diligence, & les trouva comme ilz couroyent & pilloyent le païs de leurs voisins Gaulois alliez des Romains : si leur donna la bataille, & en desfeit la plus grande partie qu'il trouva en troupe, s'estant portée laschement au combat, tellement qu'il en tua si grand nombre, que pour la multitude des corps morts les Romains passoyent à pied les rivières profondes, les lacs & les estangs qui en estoyent comblez.

XXVII. Depuis laquelle desfaitte, ceulx qui sont les plus maritimes & plus voisins de l'Océan, se rendirent à luy sans coup ferir : à raison dequoy il mena son armée contre les Nerviens², les plus aspres & plus belliqueux de toutes ces marches là, lesquelz habitans en païs pleins de bois, avoyent retiré leurs femmes, leurs enfans & leurs

¹ La Picardie & les Pays-Bas.

² Ils habitoient la partie de la Belgique, qu'on appelle aujourd'hui le comté de Hainault.

biens, en un fond de forest, le plus arriere qu'ilz avoyent peu de leurs ennemis, & eulx en nombre de plus de soixante mille combatans vindrent un jour en dessoude courir sus à Cæsar, ainsi comme il se logeoit, & qu'il entendoit à faire fortifier son camp, ne se doubant de rien moins que d'avoir la bataille ce jour là. Si rompirent de primfault la chevalerie Romaine, & environnans la douzieme & septieme legion, en tuerent tous les capitaines & chefs des bandes : & n'eust esté que Cæsar luy mesme prenant un pavois sur son bras, & fendant la presse de ceulx qui combattoient au devant de luy, s'alla ruer à travers les Barbares, & que la dixieme legion voyant sa personne en danger, accourut celle part de dessus un coustau où elle estoit en bataille, & fendit les rens des ennemis, il ne se fust pas ce jour là sauvé un seul homme des Romains : mais prenans exemple à la prouesse de Cæsar, ilz combattirent, ainsi que lon dit en commun langage, par dessus leur puissance : & neantmoins encore ne peurent ilz faire tourner le dos à ces Nerviens, ains fallut qu'ilz les taillassent tous en pieces sur le champ : car on escrit que de soixante mille combatans qu'il y avoit, il ne s'en sauva que cinq cents, & trois de leurs conseillers seulement, de quatre cents qu'ilz estoient. Ce que le senat Romain ayant entendu, ordonna

que lon sacrifieroit aux dieux, & feroit on processions & festes chommées par l'espace de quinze jours durant, n'en ayant jamais au paravant esté tant ordonné à Rome pour victoire quelconque qui eust esté gagnée, pource que lon trouva que le danger avoit esté fort grand pour s'estre tant de nations soulevées tout à un coup : mais encore l'amour & la bienveillance que le commun peuple portoit à Cæsar, faisoit trouver la victoire plus glorieuse & plus illustre : car quand il avoit donné ordre aux affaires de la Gaule de delà les monts, il s'en venoit tousjours passer son hyver aux environs du Po, pour disposer les choses de Rome à sa devotion.

XXVIII. Car non seulement ceux qui briguoient les offices estoyent eleuz par le moyen de l'argent qu'il leur fournissoit, dont ilz corrompoient & achetroient les voix du peuple, & faisoient puis après en leurs magistrats tout ce qu'ilz pouvoient pour accroistre & augmenter sa puissance : mais aussi la plus part des plus grands & plus nobles personnages allerent jusques à Lucques par devers luy, comme Pompeius, Crassus & Appius gouverneur de la Sardaigne, & Nepos viceconsul en Hespagne, tellement qu'il s'y trouva pour une fois six vingts sergens portans verges & haches devant les magistrats, & des senateurs plus de deux cents, lesquels teindrent

conseil ensemble, là où ilz arrestèrent que Pompeius & Crassus seroyent eleuz pour l'année ensuyvant une autre fois consulz, que lon feroit de nouveau ordonner argent à Cæsar, pour l'entretenement de son armée, & prolonger le temps de son gouvernement, pour autre cinq ans. Cela sembla fort estrange & fort defraisonnable aux gens de bien & de bon sens, car ceulx mesmes à qui Cæsar donnoit & fournissoit tant d'argent, alloyent preschans & suadans au senat, que lon luy en devoit decerner & ordonner du public, comme s'il n'en eust point eu, ou pour mieulx dire, contraignoyent le senat de souspirer & gémir en voyant les choses qu'ilz mettoient en avant. Caton n'y estoit pas present, car on l'avoit expressement envoyé en Cypre : mais Faonius qui suyvoit la trace de Caton, quand il veit qu'il ne gaignoit rien à y resister & contredire, se jeta hors du senat en courroux, & s'en alla criant parmy le peuple, que c'estoit une grande honte : mais personne ne luy prestoit l'oreille, les uns pour la reverence qu'ilz portoyent à Pompeius & à Crassus, les autres pource qu'ilz desiroient favoriser aux affaires de Cæsar, comme sur lequel ilz avoyent fondé toute leur esperance : au moyen dequoy, ilz ne s'en emouvoyent de rien.

XXIX. Au demourant, Cæsar s'en retournant en la Gaule de delà les monts, trouva une grosse

guerre au païs, à cause que deux grandes & puissantes nations d'Allemagne avoyent de naguères passé le Rhin, pour y conquerir de nouvelles terres, & s'appelloit l'une de ses nations les Ipes¹, & l'autre les Tenterrides : & quant à la bataille que Cæsar leur donna, il en escrit luy mesme en ses Commentaires, de ceste sorte : que les Barbares ayans envoyé devers luy, & fait trefves pour quelque temps, ce neantmoins luy vindrent courir sus ainsi comme il passoit son chemin, tellement que huit cents de leurs hommes d'armés en rompirent cinq mille des siens, pource qu'ilz ne s'en doutoyent ny ne s'en deffioyent point aucunement : & qu'ilz luy renvoyerent encore d'autres ambassadeurs pour l'abuser une autre fois, lesquels il reteint, & fait quant & quant marcher toute son armée contre eulx, estimant estre simplesse de garder foy ne loy à telz Barbares si desloyaux & si infideles : mais Canusius escrit que comme le senat decernast que lon sacrifiait encore, & que lon feist de nouveau des processions & des festes en l'honneur des dieux pour leur rendre graces de celle victoire, Caton au contraire fut d'opinion qu'il falloit livrer Cæsar entre les mains des Barbares, pour

¹ Grec, les Usîpes, appellés ailleurs Usîpiens ou Usîpètes. Ils habitoient la rive ultérieure du Rhin, aussi bien que les Tenterrides, que Cæsar appelle Tenchtères.

descharger & purger la chose publique du crime de foy violée, & en destourner la malediction sur celuy seul qui en estoit autheur. Il estoit bien passé de ces Barbares, jusques au nombre de quatre cents mille chefs, lesquels furent presque tous desfaits, exceptée quelque petite troupe qui s'estant sauvée de la desconfiture, repassa le Rhin.

XXX. Les Sycambriens¹, qui sont une autre nation d'Allemagne, les recueillirent : & Cæsar prenant ceste occasion, avec la bonne envie qu'il avoit autrement d'acquérir la gloire d'estre le premier homme Romain, qui eust passé le fleuve du Rhin avec armée, bastit un pont dessus. C'est une riviere fort large, mesmement à l'endroit où il dressa son pont : car il se respand là fort loing tant d'un costé que d'autre, & si est son cours fort aspre & fort roide, tellement que les troncs d'arbres & les grosses pieces de bois que lon jettoit à val la riviere, avoyent grand coup, & faisoient grand effort contre les poutres qui soutenoient le pont : mais pour resister à leur choc, & aussi pour rompre & alentir un peu l'impetuosité du fil de l'eau, il feit planter au dessus de son pont des défenses de grosses pieces de bois que lon ficha à force au fond de la riviere, &

¹ Peuple voisin qui habitoit sur la petite riviere appelée la Lippe.

eut en l'espace de dix jours dressé & achevé son pont de la plus belle charpenterie, & à voir de plus ingénieux devis, que lon sçauroit penser ne croire : & passant son armée par dessus, ne trouva personne qui s'ozast presenter en bataille devant luy : car les Sueviens ¹ mesmes, qui estoient les plus belliqueux de toute la Germanie, s'estoyent retirez avec leurs biens en des profondes vallées & fondrieres toutes couvertes de bois & de forests : parquoy après y avoir brulé le país de ses ennemis, & asseuré ceulx qui tousjours avoyent tenu le party des Romains, il s'en retourna de rechef en la Gaule, après avoir demouré dix huit jours en tout dedans l'Allemagne au delà du Rhin.

XXXI. Le voyage qu'il feit aussi en Angleterre, fut d'une hardiesse grandement recommandable : car ce fut luy premiet qui navigua l'Ocean occidental avec armée navale, & qui à travers la mer Atlantique passa son armée pour aller faire la guerre en ceste isle, si grande, que plusieurs des anciens n'ont pas voulu croire qu'elle fust en nature, & qui a mis plusieurs historiens en grande dispute, maintenans que c'estoit chose faulse & controuvéee à plaisir, & luy fut le premier qui commença à la conquerir, & qui entendit l'empire Romain plus avant que le rond

¹ Voyez les Observations.

de la terre habitable : car il y passa par deux fois de la coste opposite, vis-à-vis en la terre ferme de la Gaule , & en plusieurs batailles qu'il y eut, fait plus de dommage aux ennemis que de profit à ses gens, pource qu'ilz n'eussent sceu rien prendre ny gagner, qui eust valu, sur des hommes pauvres & necessiteux : au moyen dequoy sa guerre n'y eut pas telle issue comme il la desiroit, ains prenant seulement des ostages du Roy, & luy imposant certain tribut qu'il payeroit par chascun an au peuple Romain, s'en retoutna de rechef en la Gaule, là où il trouva à sa descente des lettres prestes à passer la mer, par lesquelles ses amis luy mandoyent de Rome le trespas de sa fille, laquelle estoit morte en travail d'enfant chez Pompeius, dont Pompeius mesme & Cæsar aussi menerent grand dueil, & leurs amis s'en trouverent fort troublez, pensans bien que l'alliance qui maintenoit la chose publique, laquelle autrement n'estoit pas gueres saine, en quelque paix & en quelque repos, estoit dissoulte & rompue : mesmement pource que l'enfant, après avoir peu de jours survescu sa mere, mourut aussi. Si prit la commune le corps de Julia, en despit qu'en eussent les tribuns du peuple, & le porta au champ de Mars, là où elle fut inhumée.

XXXII. Mais Cæsar ayant esté contraint de

departir son armée en plusieurs garnisons pour hyverner, tant elle estoit grande & grosse : & s'en estant allé, pendant l'hyver, du costé de l'Italie, comme il avoit accoustumé, toute la Gaule à un coup se souleva en armes, & meit sus de puissans exercites, qui allerent çà & là courir sus aux soudards Romains, & essayer à forcer les forts où ilz s'estoyent logez en leurs garnisons. Le plus grand nombre, & des plus belliqueux Gaulois qui fussent de ceste conspirée rebellion, estoit conduit par un nommé Ambiorix, & s'adresserent premierement aux garnisons de Cotta & de Titurius qu'ilz occirent, eulx & tout ce qu'ilz avoyent de gens de guerre quant & eulx : puis allerent assieger avec soixante mille combatans la garnison qui estoit sous la charge de Quintus Ciceron, & s'en fallut bien peu qu'ilz ne la prissent à force, pource que les soudards y furent tous entierement blecez : mais ilz eurent si bon cueur qu'ilz feirent en se defendant plus, par maniere de dire, qu'ilz ne pouvoyent. Ces nouvelles venues à Cæsar, qui en estoit lors bien loing, il s'en retourna en extreme diligence, & ayant assemblé sept mille hommes de guerre en tout, se hesta d'aller secourir Ciceron, qui estoit ainsi pressé. Les assiegeans en furent advertis, qui leverent incontinent leur siege pour luy aller à l'encontre, fai-

sans leur compte, qu'ilz l'emporteroient tout du premier coup, à cause qu'il avoit si peu de gens. Cæsar pour les abuser, reculoit tousjours en arriere, & faisoit semblant de fouir devant eulx, se logeant en lieux propres pour capitaine qui a à combattre avec peu de gens, contre grand nombre d'ennemis, defendant à ses souldards de sortir du logis à l'escarmouche en quelque forte que ce fust, & les contraignant de haulser les rempars de son camp, & d'en fortifier les portes, comme gens qui ont peur, à fin que les ennemis l'en eussent en plus grand mespris, jusques à ce qu'il espia l'occasion qu'ilz vindrent un jour en desordre assaillir les trenchées de son camp, tant ilz furent pleins de presumptueuse temerité: & alors faisant une saillie sur eulx, les meit tous en fuite avec meurtre d'un bien grand nombre. Ce qui amortit & apaisa les rebellions des Gaulois en ce quartier là, joint que luy mesme en personne alloit au cueur d'hyver ès lieux où il entendoit qu'il se remuoit quelque nouvelleté, pource qu'il luy estoit venu de l'Italie un renfort de trois legions entieres, au lieu de celles qu'il avoit perdues, deux que Pompeius luy avoit prestées des sienes, & une qu'il avoit nouvellement levée en la Gaule d'alentour du Po.

XXXIII. Mais en ces entrefaittes, les com-

mencemens de la plus grande & plus perilleuse guerre qu'il eut en toute la Gaule, ayant esté de longue main projettez & menez secretement par les principaux hommes des plus belliqueuses nations du païs, se descouvrirent tout à un coup, y ayant une puissance grande à merveilles tant pour le grand amas de gens de guerre qu'ilz leverent, & d'armes qu'ilz assemblerent de toutes parts, comme pour les richesses qu'ilz meirent ensemble, pour les fortes places qu'ilz preparent, & pour la malaisance des païs où ilz se souleverent, mesmement lors qu'il estoit encore la saison d'hyver, auquel les rivières estoient gelées, les bois & forests couvertes de neiges, les campagnes noyées de torrens, & les champs comblez de nege si haulte, que lon ne pouvoit pas recognoistre les chemins, les maretz, ruisseaux & rivières sorties hors de rives & desbordées, rompans ou couvrans & cachans les voyes publiques. Toutes lesquelles difficultez ensemble, estoient bien, à ce qu'il leur estoit advis, suffisantes pour empêcher que Cæsar ne peut courir sus à ceux qui s'estoyent rebellez. Si estoient plusieurs nations ensemble, qui avoient conspiré ceste rebellion : mais les deux principales estoient les Arverniens¹ & les Carnutes² qui avoient eleu

¹ Qui habitoient ce qu'on appelle aujourd'hui l'Auvergne.

² Et ceux-ci le pays Chartrain.

pour capitaine en chef, & auquel ilz avoyent donné la supetintendence de toute celle guerre ; un Vercingetorix, duquel au paravant les Gaulois avoyent fait mourir par justice le pere, à cause qu'il leur sembla qu'il aspirast à se faire roy. Ce Vercingetorix donques divisant ses forces en plusieurs parties, & y commettant à chascune plusieurs particuliers capitaines sous luy, avoit si bien pratiqué, qu'il avoit tiré à sa ligue tous les peuples d'alenviron jusques à ceux qui sont devers ¹ la mer Adriatique, ayant entrepris de faire prendre les armes tout à un coup à toute la Gaule ensemble, de tant plus mesmement qu'il estoit bien adverty, que ceux de Rome se bendoyent desja à l'encontre de Cæsar : tellement que s'il eust attendu un peu plus tard, jusques à ce que Cæsar fust entré en ses guerres civiles, il eust mis l'Italie en aussi grande crainte & aussi grand danger, qu'elle avoit esté du temps des Cimbres.

XXXIV. Mais Cæsar qui conduisoit très sagement toutes choses appartenantes au faict de la guerre, & qui sur tout se sçavoit très bien servir à poinct de l'occasion du temps, si tost qu'il entendit les nouvelles de ce soublevement,

¹ Les autres lisent en ce lieu, *apud rîv A'penn*, qui seroit à dire jusques à la riviere de la Sonc. *Amyor*. C'est là la bonne leçon, comme les sçavans en conviennent.

se partit en diligence , retournant par les mesmes chemins qu'il estoit allé , faisant cognoistre aux Barbares qu'ilz avoyent affaire à une force invincible , & à laquelle il leur seroit impossible de résister , veu la diligence extreme qu'il avoit faite avec son armée , par un si cruel hyver : car là où ilz n'eussent peu croire que un simple messager fust venu en si peu de temps de là où il estoit jusques à eulx , ilz furent esbahiz qu'ilz le veirent avec tout son exercite , gastant & bruslant leur plat país , forçant & destruisant leurs villes & places fortes , & recevant à mercy ceulx qui se retournoyent devers luy , jusques à ce que les Heduiens ¹ prirent les armes contre luy , lesquelz au paravant se souloyent nommer freres des Romains , & estoient grandement honorez par eulx : à l'occasion dequoy , les gens de Cæsar quand ilz entendirent comme ilz s'estoyent conjoints avec les peuples conjurez , en receurent grand desplaisir , & en furent fort descouragez : & pour ceste cause Cæsar se partant de là passa à travers le país des Lingones ² , pour entrer en celuy des Sequaniens , qui estoient amis des Romains , & les plus près de l'Italie de

¹ Entre la Saône , la Loire & la Seine. Leur capitale étoit Autun.

² Leur capitale étoit Langres , mais leurs possessions s'étendoient fort loin.

ce costé là , au regard du reste de la Gaule. Là le vindrent les ennemis assaillir & environner de tous costez , avec un nombre infiny de milliers de combatans : & luy aussi ne faillit pas de les attendre , & combattre si bien , qu'avec le temps & l'effroy qu'il leur donna , il les rengea finalement à sa volonté : mais du commencement pourtant il semble qu'il y receut quelque secousse , car les Arverniens monstroyent en un de leurs temples , une espée pendue , qu'ilz disoyent avoir esté gaignée sur Cæsar , & luy mesme depuis en passant un jour par là , la veit , & s'en prit à rire , & comme ses amis la voulussent faire oster de là , il ne voulut pas qu'ilz le feissent , disant qu'il n'y falloit pas toucher , puis que c'estoit chose sacrée : toutefois à ce premier commencement , ceulx qui se sauverent de viffesse , ou la plus part d'iceulx se retirerent & s'en fouirent avec leur roy dedans la ville d'Alexia¹ , devant laquelle Cæsar alla mettre le siege , encore qu'elle semblast estre imprenable , tant pour la haulteur des murailles , que pour la multitude des hommes de defense qu'il y avoit dedans.

XXXV. Mais durant ce siege il luy survint un peril de dehors plus grand que lon ne sçauroit à peine exprimer : car une armée de trois cents

¹ Aujourd'hui Sainte-Reine en Bourgogne.

mille combatans, les meilleurs qui fussent entre toutes les nations de la Gaule, le vint trouver ainsi qu'il estoit au siege devant Alexia, oultre ceulx qui estoient renfermez dedans la ville, qui ne montoyent pas moins de soixante & dix mille : tellement que se trouvant enferré entre deux si grosses puissances, il fut contraint de se fortifier de deux murailles, l'une contre ceulx de la ville, & l'autre contre ceulx de dehors, pource que si ces deux grosses puissances se fussent jointes & assemblées ensemble, certainement c'eust esté fait de Cæsar : parquoy ce siege d'Alexia, & la bataille qu'il gaigna devant, à bon droit luy acquirent plus d'honneur & de gloire, que nulle autre, pource que ce fut le danger où il feit plus d'actes de prouesse, de hardiesse, de bon sens & sagesse, qu'il ne feit en affaire où il se trouvaist onques. Mais ce qui fait plus à esmerveiller en cela, est, que ceulx de la ville ne sceurent jamais rien de ceulx qui les venoyent secourir, sinon après que Cæsar les eust desfaits, & encore plus, que les Romains mesmes, qui estoient ordonnez pour garder la muraille bastie contre la ville, n'en sceurent rien non plus, sinon après le faict, quand ilz entendirent le cry des hommes, & les lamentations des femmes qui estoient dedans Alexia, quand ilz apperceurent aux autres costez de la ville force pavois estoifez d'or & d'argent,

force cuiraces & corselets sanglans, force meuble & vaisselle, force tentes & pavillons faits à la mode des Gaulois, que les Romains apportoyent de la desconfiture en leur camp, tant ceste grosse puissance disparut & s'esvanouit soudainement, ne plus ne moins qu'un fantasme ou un songe, ayant esté la plus part occise en un jour de bataille sur le champ. Au reste ceulx d'Alexia après avoir donné beaucoup de travail & à Cæsar & à eulx mesmes, finalement se rendirent : & Vercingentorix, celui qui avoit suscité & conduit toute ceste guerre, s'estant armé de ses plus belles armes, & ayant aussi paré & accoustré son cheval de mesme, sortit par les portes de la ville, & alla faire un tour tout à cheval à l'entour de Cæsar, estant assis en sa chaire : puis descendant à pied, osta tous les ornemens à son cheval, & despouilla toutes ses armes, qu'il jetta en terre, & s'alla seoir aux pieds de Cæsar sans mot dire, jusques à ce que Cæsar le bailla en garde comme prisonnier de guerre, pour après le mener à Rome en triumphe.

XXXVI. Or avoit Cæsar de long temps proposé & entrepris de ruiner Pompeius, comme aussi Pompeius luy, pource qu'ayant Crassus esté tué par les Parthes, qui seul pouvoit espier, que l'un d'eulx deux donnast en terre, il ne restoit plus à Cæsar pour se faire le plus grand, qu'à de
destruire

destruire Pompeius qui l'estoit, ny à Pompeius pour obvier à ce que cela ne luy advinst, que de desfaire le premier Cæsar, que seul il craignoit : combien qu'il n'y avoit pas long temps qu'il commenceoit à le craindre, pource que jusques à un peu devant ce temps il avoit tousjours fait peu de compte de luy, estimant que ce luy seroit tousjours chose bien facile de desfaire, quand il voudroit, celui qu'il avoit fait tel comme il estoit. Mais Cæsar au contraire, s'estant dès son commencement proposé ce but-là, comme un champion de lucte, qui n'estudie sinon comment il pourra terrasser & abbatre ses adversaires, se retira à l'escart loing de Rome pour s'exerciter en ces guerres de la Gaule, là où il aguerrit son armée, & quant & quant augmenta la gloire de son nom par ses haults faicts d'armes : de maniere qu'il se vint à egaler aux gestes de Pompeius, & ne luy resta plus pour executer & mettre à effect son entreprise, que quelques occasions coulörées, que Pompeius en partie luy donna, & en partie aussi les temps luy apportèrent, & sur tout le mauvais gouvernement qu'il y avoit pour lors en la chose publique Romaine, par ce que ceulx qui y poursuyvoyent les estats & offices, acheptoyent les voix du peuple à beaux deniers comptans, qu'ilz delivroyent publiquement à la banque sans vergongne ne

crainte quelconque , & venoit le commun populaire ayant vendu ses voix à prix d'argent , au lieu & jour de l'élection , combatte pour celui qui l'avoit payé , non avec ses voix & suffrages , mais avec arcs , fondes & espées , de sorte que l'assemblée bien peu souvent se départoit , que la tribune aux harengues ne fust souillée & diffamée de sang , & de morts qui y estoient occis sur la place , demourant ce pendant la ville en trouble sans magistrats qui y commandassent , ne plus ne moins qu'une navire en tourmente , sans pilote : tellement que les hommes de bon sens & de bon jugement voyans une telle fureur & une telle confusion , se fussent bien contentez , de peur qu'il ne leur advinst pis , s'ilz fussent tumbez en une monarchie , & en la main d'un seul qui eust eu souveraine puissance , & y en avoit plusieurs qui osoient bien dire publiquement , qu'il n'y avoit plus ordre de remedier aux maux de la chose publique , que par le moyen d'un seul , auquel on donnast plein pouvoir , puissance & autorité souveraine , & qu'il falloit prendre ceste medecine par la main de celui qui seroit le plus doux & plus gracieux medecin , voulans couvertement donner à entendre Pompeius : & comme luy mesme soubz belles paroles fardées , monstraist semblant de ne le vouloir point , & ce pendant soubz main

procurast toutes les choses qui pouvoient servir à ceste fin, & taschaft, plus que nul autre, à se faire eslire dictateur, Caton s'en appercevant bien, & craignant qu'à la fin le peuple ne fust par luy forcé de ce faire, suada au senat de le declarer plus tost seul consul, à fin que se contentant de ceste plus juste & plus legitime principaulté, il n'en convoitast point d'autre : ce que non seulement le senat luy ottroya, mais d'avantage luy prolongea le temps du gouvernement de ses provinces : car il en avoit deux, l'Hespagne & l'Afrique toute entiere, lesquelles il regissoit & administroit par ses lieutenans qu'il y commettoit, entretenant son armée des mille talents,* que la chose publique luy fournissoit par chascun an.

XXXVII. Cela fut cause que Cæsar envoya aussi gens pour demander en son nom le consulat, & semblablement prolongation du temps de son gouvernement, à quoy Pompeius du commencement se teut : mais Marcellus & Lentulus, qui haïssoient Cæsar d'ailleurs, y contredirent fort & ferme, en adjoustant à ce qui estoit nécessaire à dire ou à faire, d'autres choses, qui ne l'estoyent pas, pour luy faire honte & despit : car ils priverent du droit & privilege de

* Six cents mille escus. *Amyot.* 4,668,775 livres de notre monnoie.

bourgeoisie Romaine , les manans & habitans de la ville de Novocomé ¹ en la Gaule de devers l'Italie , ou Cæsar de naguères les avoit logez : & Marcellus estant consul , feit de son temps fouetter de verges un des senateurs de là , qui estoit venu pour cest affaire à Rome , en disant qu'il luy imprimoit expressement ces marques là , à fin qu'il cogneust par là , qu'il n'estoit point citoyen Romain , & qu'il les allast monstrier à Cæsar. Mais depuis ce consulat de Marcellus , Cæsar laissant desja puiser en ses coffres les richesses Gauloises , à ceulx qui s'entremettoient du gouvernement de la chose publique à Rome , tant comme ilz en vouloyent , & ayant ja acquitté Curio d'une somme de debtes , & donné au consul Paulus mille cinq cents talents ² , dont il feit bastir ce tant renommé palais , joignant la place , que lon appelle la Basilique de Paulus , au lieu de celui de Fulvius : alors Pompeius entrant en crainte de ceste menée , commença à prochasser ouvertement , tant par luy comme par ses amis , que lon envoyast un successeur à Cæsar , & luy redemanda les gens de guerre qu'il luy avoit prestez pour la guerre & conqueste de la Gaule.

¹ Come , depuis appelée Novocomé , lorsque César y établit ces nouveaux colons , au-dessus du lac de Come , autrefois Larius , dans la partie de l'Italie appelée alors la Gaule Transpadane , c'est-à-dire , au-delà du Pô.

² Neuf cents mille escus. Amyot, 7,003,125 liv. de notre monnoie.

XXXVIII. Cæsar les luy renvoya faifant present à chafque particulier foudard de deux cents cinquante drachmes d'argent² : mais ceulx qui les ramenerent , quand ilz furent à Rome , semerent parmy le peuple des paroles qui n'estoyent ny belles ny bonnes à l'encontre de Cæsar , & abuserent Pompeius mefme de faulſes perſuaſions & vaines eſperances , luy donnans à entendre qu'il eſtoit ſingulierement deſiré au camp & en l'armée de Cæsar : & que ſi pardeçà dedans Rome il faiſoit malaiſement ce qu'il vouloit , tant pour l'envie qu'on luy portoit , que pour quelques mauvaiſes humeurs cachées entre ceulx qui ſe meſloyent du gouvernement de la choſe publique , il ſe pouvoit aſſeurer que pardelà toute l'armée eſtoit à ſon commandement : & que ſi les foudards repaſſoyent une fois les monts & retournoyent en Italie , ilz ſe viendroyent incontinent tous rendre devers luy , tant ilz haïſſoyent Cæsar à cauſe qu'il les faiſoit trop travailler & continuellement combattre , joint auſſi qu'il leur eſtoit ſuſpect , & qu'ilz ſe doubtoyent qu'il aſpiroit à ſe faire monarque. Ces propos enſlerent Pompeius de vaine preſumption de ſoy meſme , & le rendirent nonchalant , de ſorte qu'il ne teint compte de faire ſes preparatifz pour la guerre , comme n'ayant point d'occafion de

² Vingt-cinq eſcus, *Antyot.* 194 liv. 10 ſ. 7 d. de notre monnoie.

craindre , & s'amusant à résister à Cæsar de paroles seulement , & d'opinions contraires à ses demandes au senat , cuidant bien le combattre pour dire , Je suis d'avis de cecy ou de cela : mais Cæsar ne s'en soucioit point. Car lon dit que l'un de ses capitaines qu'il avoit envoyé pour ses affaires à Rome , estant devant la porte du senat , & entendant que lon ne luy avoit pas voulu donner la prolongation du temps de son gouvernement qu'il avoit demandé , en frappant de la main sur la poignée de son espée dit , « Et » puis que vous ne luy voulez pas ottroyer , ceste » cy le luy baillera ».

XXXIX. Toutefois les demandes que proposoit Cæsar , avoyent la plus belle apparence du monde : car il disoit qu'il estoit content de laisser les armes , pourveu que Pompeius les laissast aussi , & que tous deux , comme personnes privées , vinsent à prochasser d'obtenir quelque bonne recompense de leurs citoyens , remontrant que ceulx qui luy ostoyent la force des armes , & la confirmoyent à Pompeius , le calumnioient à tort de se vouloir faire monarque , & ce pendant donnoient les moyens à l'autre de l'estre. Curion^r faisant ces offres & remonstrances au nom de Cæsar publiquement devant le peuple , fut ouy à grande joye & grands batemens

^r Voyez l'Observation sur le chapitre suivant.

de mains , de maniere qu'il y en eut qui luy jetterent des bouquets & des fleurs sur luy quand il s'en alla, ne plus ne moins que lon fait aux champions qui sont declarez victorieux ès jeux de prix. Et Antonius, l'un des Tribuns du peuple, en apporta une lettre missive que Cæsar en escrivoit , & la feit lire publiquement malgré les consuls. Mais au senat Scipion , beaupete de Pompeius, meit en avant une telle sentence, que si dedans certain jour prefix, Cæsar ne posoit les armes, qu'il fust jugé & déclaré ennemy du peuple Romain. Et lors les consuls demanderent tout hault à l'assistance des senateurs, s'ilz estoient d'avis que Pompeius laissast les armes : à laquelle demande il y en eut bien peu qui s'accordassent : & puis après demanderent s'ilz estoient d'avis que Cæsar les laissast : & à celle là, presque tous dirent que ouy. Mais comme Antonius adonc requist, que tous deux ensemble les laissassent, alors tous egaleement en furent d'avis : toutefois pour l'importune violence de Scipion & de Marcellus, qui crioyent qu'il falloit user de force d'armes, non pas d'opinions, contre un larron, le senat adonc se leva sans rien arrester, & changea lon de robbes par la ville comme lon a accoustumé de faire en un dueil public, à cause de ceste dissension.

XL. Depuis il vint d'autres lettres de Cæsar ;

qui sembloient encore plus raisonnables : car il requeroit qu'on luy baillast la Gaule qui est entre les monts des Alpes & l'Italie ; avec l'Esclavonie , & deux légions seulement , en delaisant toute autre chose , jusques à ce qu'il peust pro-chasser un second consulat. Et Cicéron l'orateur , nagueres retourné de son gouvernement de la Cilicie , cherchant tous moyens de les accorder , amollissoit le plus qu'il pouvoit Pompeius : lequel disoit qu'il estoit bien d'opinion de luy accorder le demourant de ce qu'il demandoit , pourveu qu'il laissast ses gens de guerre. Et Cicéron sollicitoit envers les amis de Cæsar , qu'ilz se contentassent de ces deux provinces , & de six mille hommes de guerre seulement pour avoir paix : à quoy Pompeius mesme se plioit bien , & les luy concedoit : mais Lentulus le consul ne le voulut point , ains chassa Curion^{*} & Antonius ignominieusement hors du senat , en quoy faisant ilz donnerent eulx mesmes à Cæsar la plus belle couleur & plus honeste couverture qu'il eust sceu desirer , par laquelle il irrita le plus ses souldards , en leur monstrant ces deux personnages constitués en dignité & office publique , qui avoyent esté contrains de s'en fouir devers luy deguisez en esclaves sur des voitures de loage , car ilz s'es-toient ainsi habillez de peur , au sortir de Rome.

^{*} Voyez les Observations.

XLI. Or n'avoit il pas pour lors à l'entour de luy plus de cinq mille hommes de pied , & trois cents chevaux , pource que le reste de son armée estoit demouré delà les monts , qu'il avoit jà envoyé querir : mais voyant que l'exécution de son desseing & de son entreprise n'avoit pas besoin de grand nombre de gens de guerre du commencement , ains plus tost d'estonnement de sa hardiesse , & de soudaineté de ravir l'occasion du temps , pourautant qu'il effroyeroit plus facilement ses adversaires en les surprenant au desproveu , lors qu'ilz ne croiroient jamais qu'il deust venir , qu'il ne les forceroit en les allant assaillir avec toute sa puissance , quand il leur donneroit loisir de se prouvoir , il commanda à quelques siens capitaines & chefs de bandes , qu'ilz s'en allassent sans faire semblant de rien avec leurs espées seulement , & non autres armes , en la ville d'Ariminum , grande ville , que lon rencontre la premiere au sortir de la Gaule ^x , & qu'ilz s'en faussent sans tuer ny blecer personne , & sans emouvoir tumulte , que le moins qu'il leur seroit possible : puis ayant commis la superintendence de tout ce qu'il avoit de force quant & luy à l'un de ses familiers nommé Hortensius , tout le long du jour il demoura en public en vëue de tout le monde à regarder com-

^x Cispadane, c'est-à-dire, en deçà du Pô, partie de la Cisalpine.

batre des escrimeurs à oultrance, qui s'exercoient aux armes devant luy, jusques à un peu devant le soir qu'il entra en son logis, là où après s'estre un peu estuvé, il entra dedans la sale, & fut quelque temps avec ceulx qu'il avoit fait convier à soupper quant & luy : puis quand se vint à la nuit close, que lon ne voyoit desjà plus goutte, il se leva de table, & pria la compagnie de faire bonne chere, & que personne ne bougeast, pource qu'il reviendrait incontinent : mais il avoit devant averty quelques uns de ses plus feaux amis, en petir nombre, qu'ilz le suivissent, non pas tous ensemble, mais les uns par un chemin, les autres par un autre, & luy montant dessus un coche de loage, fait semblant d'aller d'un autre costé du commencement, & puis tourna tout court devers Ariminum.

XLII. Quand il fut arrivé au petit fleuve de Rubicon, lequel separe la Gaule de deçà les Alpes d'avec le reste de l'Italie, il s'arresta tout coy : car plus il approchoit du faict, plus il luy venoit en l'esprit un remors, de penser à ce qu'il attentoit, & plus il varioit en ses pensemens, quand il consideroit la grande hardiesse de ce qu'il entreprenoit. Si fit adonc plusieurs discours en son entendement sans en dire mot à personne, inclinant tantost en une part, & tantost en une autre, & changea son conseil en beau-

coup de partis contraires à part foy : aussi en disputa il beaucoup avec ceulx qu'il avoit de ses amis quant & luy, entre lesquels estoit Asinius Pollio, discourant avec eulx, de combien de maux par le monde seroit cause & commencement ce passage de la riviere, & combien leurs successeurs & survivans en parleroyent un jour à l'advenir. Mais finablement se jettant comme par une impetuosité de courage hors de tout ce pensément de l'advenir, & disant ce mot qu'ont accoustumé de dire ordinairement ceulx qui s'aventurent à entreprises fort hazardeuses & hardies : A^x tout perdre n'y a qu'un coup perilleux, poulsons : il se meit à passer la riviere, & depuis qu'il l'eut une fois passée, il ne fait plus que courir sans arrester nulle part, de sorte qu'avant le jour il fut dedans Ariminum & s'en faist. Mais on dit que la nuit de devant qu'il passa ceste riviere, il eut en dormant une illusion damnable, c'est, qu'il luy fut advis qu'il avoit affaire avec sa propre mere.

XLIII. Si tost que les nouvelles de la prise d'Ariminum furent espandues, ne plus ne moins que si la guerre eust esté ouverte tant par mer que par terre à portes arriere renversées, & que si toutes les loix Romaines, aussi bien que les bornes de son gouvernement, fussent entierement transgressées, on eust dit que les villes mesmes toutes

¹ Le grec dit en sa maniere de parler, Le dé soit jetté. *Amyot*.

entieres se levans de leurs places s'en fuyoyent de l'une à l'autre par toute l'Italie, non pas les hommes & les femmes à l'effroy, comme lon avoit bien veu autrefois, de maniere que la cité de Rome mesme fut incontinent toute remplie, comme d'un flux, des peuples voisins tout à l'environ, qui s'y jetterent de tous costez à la foule, sans qu'il y eust plus officier ny magistrat qui la peust par autorité regir, ny par remonstrance de raison contenir en une si violente tempeste & tormente, tellement qu'il s'en fallut bien peu qu'elle ne se ruinaist d'elle mesme, pour autant qu'il n'y avoit endroit où il n'y eust des affections contraires, & des emeures violentes & dangereuses, à cause que ceulx qui estoient bien aises de ce trouble, ne s'arrestoyent pas en une place, ains allans çà & là par la ville, quand ilz en rencontroyent d'autres en plusieurs lieux qui monstroyent semblant d'estre espouventez ou desplaisans de ce tumulte, comme il est impossible autrement en une si grande ville, entroyent de paroles en picque avec eulx, & les menaçoient audacieusement de l'advenir.

XLIV. Pompeius mesme, qui d'ailleurs se trouvoit assez estonné, estoit encore plus troublé par les mauvais langages que les uns luy venoyent tenir d'un costé, les autres d'un autre, luy reprochans aucuns que c'estoit bien employé ;

& qu'il portoit adonc meritoirement la penitence de ce qu'il avoit agrandy Cæsar à l'encontre de soy-mesme & de la chose publique : autres le blasmans de ce qu'il avoit refusé les honestes offres & raisonnables conditions de paix que Cæsar luy avoit offertes, en le laissant contumelieusement injurier par Lentulus. D'autre costé Faonius luy disoit qu'il frappast lors contre la terre, à cause qu'un jour en plein senat Pompeius parlant haultainement, avoit dit que personne ne s'enquist ny ne se souciaist de ses preparatifs pour la guerre, pource que toutes & quantes fois qu'il voudroit frapper du pied contre la terre, il empliroit d'armées toute l'Italie. Ce neantmoins encore estoit il lors plus puissant que Cæsar, en nombre de gens de guerre : mais on ne le laissa jamais user de son conseil, ains luy apporta lon tant de nouvelles faulses, & luy meit on rant de frayeurs devant les yeux, comme s'ilz eussent desja eu leur ennemy à la cueüe, & qu'il eust desja tenu tout en sa main, qu'il ceda à la fin, & se laissa emporter à la foule des autres, prenant ceste resolution qu'il voyoit les choses en tel trouble & en tel tumulte, qu'il estoit force d'abandonner la ville, commandant à ceulx du senat qu'ilz le suyvissent, & qu'il n'y en eust pas un qui demourast derriere, si n'estoit qu'il aimast mieulx la tyrannie que la liberté

& la chose publique. Ainsi les Consulz mesmes avant que faire les sacrifices ordinaires, qu'ilz ont accoustumé de faire premier que sortir de la ville, s'enfouyrent : aussi feit la plus part des ferrateurs, prenans à la haste chez eulx, ce qui premier leur venoit à la main, ne plus ne moins que s'ilz l'eussent pillé à la desrobbée chez autrui : & y en eut aucuns de ceulx mesmes, qui de tout temps avoyent fort affectueusement tenu le party de Cæsar, qui eurent lors le sens si troublé de cest effroy, qu'ilz s'en fouyrent aussi, & se laisserent emmener au cours de l'emeute, sans qu'il en fust aucun besoing.

XLV. Mais sur tout estoit ce chose pitoyable à voir, que la ville, laquelle s'en alloit à l'adventure, comme une navire abandonnée des pilotes, desesperans de la pouvoir sauver en si grosse tourmente : toutefois quoy que la departie en fust si miserable, encore estimoyent les hommes que la fuitte fust leur país pour l'amour qu'ils portoyent à Pompeius, & abandonnoyent Rome ne plus ne moins que si c'eust esté le propre camp de Cæsar, veu que Labienus mesme, qui estoit l'un des plus grands amis de Cæsar, comme celuy qui avoit tousjours esté son lieutenant en la guerre de la Gaule, & qui s'estoit tousjours porté très vaillamment en tous les affaires où il s'estoit trouvé, l'abandonna lors, en se retirant devers

Pompeius : mais Cæsar luy envoya après luy son argent & tout son bagage , puis alla camper devant la ville de Corfinium^{*}, dedans laquelle estoit Domitius avec trente enseignes : lequel se voyant assiégué , cuida incontinent estre perdu , & desesperant de son faict , demanda à un sien esclave , qui estoit medecin , du poison. Le medecin luy bailla un breuvage , qu'il beut , pensant bien en mourir : mais tantost après oyant raconter comme Cæsar ufoit d'une merveilleuse clemence & humanité envers ceulx qu'il prenoit , il se repentit d'avoir beu le breuvage , & commença à se lamenter , & à regretter le trop temeraire conseil qu'il avoit pris. Le medecin le reconforta , en luy remonstrant qu'il avoit beu un breuvage pour faire dormir seulement , dont il fut fort aise , & s'en alla tout aussi tost rendre à Cæsar , lequel luy donna la vie sauve , & neantmoins l'autre ne laissa pas de se desrobber incontinent , & s'en fouir devers Pompeius. Ces nouvelles portées à Rome , resjouirent & reconforterent fort ceulx qui y estoient demourez : & y en eut de ceulx qui en estoient sortis , qui y retournerent.

XLVI. Ce pendant Cæsar prit à sa soude les gens de Domitius , & autant en feit il par toutes

^{*} Aujourd'hui Sulmona , dans le canton des Péligniëns , aujourd'hui l'Abruzze au royaume de Naples.

les villes , où il surprit les capitaines qui levoyent gens de guerre pour Pompeius , de sorte qu'ayant ja assemblé une grosse & redoutable puissance , il tira droit où il le pensoit trouver luy mesme : mais Pompeius ne l'attendit pas , ains s'enfouit en la ville de Brundisium , de là où il feit passer devant à Dyrrachium les deux consulz , avec ce qu'ilz avoyent de forces , & luy mesme y passa aussi puis après , quand il sentit que Cæsar estoit arrivé , ainsi comme nous declarerons plus amplement & par le menu cy après en sa Vie. Si eust bien voulu Cæsar aller après & le pourfuyvre tout promptement : mais à faulte de vaisseaux , il s'en retourna tout court à Rome , s'estant fait en l'espace de soixante jours maistre & seigneur de toute l'Italie , sans aucune effusion de sang. Estant à Rome , il la trouva beaucoup plus paisible qu'il ne s'attendoit , & y rencontra plusieurs senateurs , ausquelz il parla très humainement & gracieusement , les priant de vouloir envoyer devers Pompeius , pour accorder leurs differents avec toutes conditions justes & raisonnables : ce que toutefois ilz ne feirent pas , soit ou pource qu'ilz redoubtassent la fureur de Pompeius , à cause qu'ilz l'avoient abandonné , ou qu'ilz estimassent que Cæsar au fond de son cueur ne le voulust pas ainsi qu'il le disoit de bouche , usant de tel langage pour une honeste

couverture

couverture seulement : & comme l'un des tribuns
 du peuple , Metellus , le voulust empêcher de
 prendre de l'argent ès coffres du tresor & espar-
 gne publique , & luy alleguast quelques loix qui
 le defendoyent , il luy respondit , « Que le temps
 » des armes & le temps des loix estoyent deux : &
 » si ce que je fais d'aventure te desplaist (dit il)
 » oste toy d'icy pour ceste heure : car la guerre
 » ne comporte point ceste licence de contredire
 » ainsi franchement de paroles : & puis quand
 » j'auray posé les armes , & que nous aurons fait
 » appointment , alors tu viendras prescher &
 » harenguer tant que tu voudras : encore te dis-
 » je cela de grace , en remettant & relaschant
 » autant de mon droit : car tu es à moy , toy
 » & tous ceulx qui ayans esté seditieux contre
 » moy , estes tumbez sous mes mains ». En
 disant ces paroles , il s'en alla au tresor : &
 pource que lon ne trouvoit point les clefz , il feit
 venir des ferruriers , & feit lever les ferrures : à
 quoy Metellus s'opposa de rechef , & y eut là
 quelques uns qui l'en louerent , disans qu'il faisoit
 bien , jusques à ce que Cæsar grossissant sa parole ,
 le menaça qu'il le tueroit tout roide , s'il le fas-
 choit davantage , & si luy dit plus : « Tu sçais
 » bien , jeune homme , qu'il m'est plus malaisé
 » de le dire , que de le faire ». Ceste parole feit
 non seulement que Metellus se retira lors bien

viste de peur , mais aussi que depuis on luy fournit tousjours promptement tout ce qu'il luy fallut pour la guerre.

XLVII. Car il la vouloit aller faire en Hespagne pour en chasser Petreius & Varro , lieutenans de Pompeius , & mettre en ses mains les armées & les provinces qu'ilz tenoyent premierement , à fin de s'en aller puis après contre Pompeius mesme , en ne laissant rien derriere , qui luy fust ennemy. Il fut en ce voyage là par plusieurs fois en danger de sa personne , pour les embusches & aguets , que lon luy dressa en beaucoup de lieux & de manieres , & en danger aussi de perdre toute son armée à faulte de vivres : & neantmoins il ne cessa jamais de poursuyvre , provoquer à la bataille , & enfermer de tranchées ces lieutenans de Pompeius , jusques à ce qu'il eust reduit leurs camps & leurs armées par force en son obeïssance : vray est que les chefs se sauverent , & s'enfouyrent devers Pompeius.

XLVIII. Quand il fut de retour à Rome , son beaupere Piso le pria d'envoyer des ambassadeurs à Pompeius , pour chercher les moyens d'appointer avec luy : mais Isauricus pour gratifier à Cæsar y contredit : & ayant esté créé dictateur par le senat , il rappella incontinent les bannis , il remeit en tous honneurs les enfans des proscrits , condumnez & bannis du temps de Sylla,

& fouflagea un peu les debtors, en retrenchant partie des usures qui couroyent sur eulx, & feit encore quelques autres telles ordonnances, mais bien peu : car il ne retint la souveraine puissance de dictateur que unze jours seulement, & en la quittant, il se nomma luy mesme consul avec Servilius Isauricus, puis se meit aussi tost à pour-suyvre le reste de sa guerre, laissant derriere par le chemin le reste de son armée, & se mettant devant avec six cents chevaux, & cinq legions de gens de pied seulement, au cueur d'hiver, environ le mois de Janvier, qui respond à celui que les Atheniens appellent Posideon¹ : & ayant traversé la mer Ionique, & mis ses gens en terre, il prit les villes d'Oricum & d'Apollonie : puis renvoya ses vaisseaux en la ville de Brundisium pour luy amener le reste de ses souldards, qui n'avoit peu cheminer si tost que luy lesquels pendant qu'ilz furent par le chemin, comme gens qui avoyent jà passé la fleur de leur aage & la vigueur de leurs corps, & qui desormais se trouvoient las & recreuz de combattre tant d'ennemis en tant de batailles, faisoient entre eulx leurs plaintes de Cæsar, en disant : « Quand » sera-ce à la fin, & à quel but, que cest homme » cessera de nous trainner par tout le monde après » luy, en se servant de nous, ne plus ne moins

¹ Voyez les Observations.

» que si nous fussions utilz insensibles & impaf-
 » sibles ? il n'est pas le fer de noz armes qui ne
 » soit usé à force de coups : ne cesserons nous
 » jamais après un si long temps d'avoir le halecrer
 » sur le dos , & le pavois sur le bras ? Cæsar ne
 » deust il pas penser , au moins quand il void
 » nostre sang , noz playes & noz bleceures , que
 » nous sommes hommes mortelz , & que nous
 » sentons les maulx & les douleurs que sentent
 » les autres hommes ? & il nous va au cueur
 » d'hyver exposer à la mercy des vents & de la
 » mer , en temps que les dieux mesmes ne sçau-
 » roient pas forcer , comme s'il fuyoit devant
 » ses ennemis & ne les poursuyvoit pas ». En
 tenant ces langages , les soudards s'acheminoyent
 tousjours à petites journées devers la ville de
 Brundisium : mais quand ilz y furent arrivez ,
 & qu'ilz trouverent que Cæsar avoit desja fait
 voile , ilz changerent bien soudainement de
 langage & de volonté : car ilz se blasmerent
 eulx mesmes , & dirent injures à leurs capitaines
 aussi , pour autant qu'ilz ne les avoyent hastez
 davantage de cheminer , & se seans sur les plus
 haultz rochers & poinctes de la coste , jettoient
 leur veuë dessus la haulte mer , regardans vers
 le royaume d'Epire , s'ilz verroyent point revenir
 les vaisseaux pour les passer.

XLIX. Ce pendant Cæsar qui estoit en la

ville d'Apollonie , n'ayant pas armée suffisante pour combattre son ennemy, se trouvoit en grande peine de ce que le reste demouroit trop à venir, ne sçachant qu'il devoit faire : mais à la fin il se resolut à un conseil fort dangereux , de s'embarquer à la desrobbée sur une fregate à douze rames seulement pour repasser de rechef à Brundisium : ce qui ne se pouvoit faire sans extreme peril , veu que toute celle mer estoit occupée par grosses flottes & puissantes armées des ennemis. Si s'embarqua une nuit vestu d'une robe d'esclave , & se jetta dedans la fregate sans mot dire , non plus que s'il eust esté quelque personne de basse & vile condition. La fregate estoit sur la riviere d'Anius ¹, la bouche de laquelle souloit estre ordinairement platte & tranquille , pour un petit vent de terre qui se levoit tous les matins , & repoulsoit bien loing les flots de la haulte mer : mais ceste nuit là d'aventure il souffla un vent marin qui amortit le vent de terre , de maniere que la roideur du cours de la riviere venant à combattre contre le flot de la mer & à l'encontre de la violence des vagues , l'emboucheure en devenoit fort perilleuse , estant l'eau de la riviere repoussée & re-

¹ Strabon , Tite-Live , Plin la nomment tous Aous , ou Æas. Elle coule , selon Strabon , à dix stades , un peu moins d'une demi-lieue , d'Apollonie.

bourfée contremont avec grand bruit & dangereux tournoyement d'eau : au moyen dequoy le maiftre qui gouvernoit la fregate, voyant qu'il ne pouvoit venir à bout de fortir hors de cefte emboucheure, commanda à fes mariniers de fier en arriere pour retourner amont l'eau, ce que fentant Cæfar, fe donna incontinent à cognoiftre à luy, qui fut de prime face bien eftonné de le voir au vifage, & Cæfar le prenant par la main luy dit, « Mon amy, ayes bon courage, » & pouffe hardiment fans craindre rien, car » tu menes Cæfar & fa fortune quant & luy ». Adonc les matelots oublians tout le danger de la tourmente, fe remeirent à voguer en avant, & feirent tout l'effort qui leur fut poffible pour cuider forcer le vent & fortir hors la bouche de cefte riviere : mais à la fin il n'y eut ordre, pour ce que la fregate s'empliffoit fort d'eau, & fut bien près d'aller à fond, tellement que Cæfar fe trouva contraint à fon grand regret de retourner en arriere : & comme il s'en retournoit en fon camp, les foudards luy vindrent au devant en foule, fe plaignans à luy, & luy faifans leurs doleances, de ce qu'il ne s'affeuroit pas de pouvoir vaincre fes ennemis avec eulx feuls, ains fe tourmentoit jufques à mettre fa perfonne en danger pour aller querir les absents, à caufe qu'il ne fe fioit pas des presens.

L. Mais sur ces entrefaites arriva Antonius amenant de Brundisium le demourant de l'armée : parquoy Cæsar se sentant fort assez , alla presenter la bataille à Pompeius , lequel estoit logé fort à propos pour avoir vivres tant par mer que par terre : mais Cæsar qui dès le commencement n'en avoit pas eu abondance , s'en trouva bien tost à destroit , tellement que ses gens cueilloient des racines qu'ilz mesloyent avec du lait , & les mangeoyent : ilz en faisoient aussi du pain , & quelquefois en escarmouchant contre les ennemis , & courant au long de ceulx qui faisoient le guet , leur en jettoient jusques dedans leurs trenchées , disans , que tant comme la terre produiroit de telles racines , jamais ne cesseroient de tenir Pompeius assiegé. Pompeius defendit que lon ne feroit ny ces paroles , ny ce pain parmy son camp , de peur que cela ne feist perdre le cueur à ses gens , & qu'ilz n'eussent horreur quand ilz viendroyent à considerer la dureré & aspreté des ennemis à qui ilz avoyent affaire , attendu qu'ilz ne se lassoient de rien , non plus que bestes sauvages.

L.I. Or se faisoit-il ordinairement des courtes & escarmouches tout joignant les trenchées & fortifications du camp de Pompeius , ès quelles Cæsar avoit presque tousjours l'avantage , excepté en une seule où ses gens foyrent à val de

roupte si effroyement, qu'il fut ce jour là en grand danger de perdre camp & tout : pource que Pompeius sortit en bataille sur eulx, & ne le peurent soustenir, ains furent menez batant jusques dedans leur camp, les trenchées duquel en furent toutes comblées de morts que lon ruoit jusques dedans les portes & tout contre les remparemens, tant ilz furent vivement & de près poursuyvis. Cæsar alla bien au devant des fuyans pour tascher à leur faire tourner visage, mais il n'y gagna rien : car quand il cuidoit prendre les enseignes pour les arrester, ceulx qui les portoyent les jettoient à terre, de maniere que les ennemis en prirent jusques au nombre de trente & deux, & s'en fallut bien peu que luy mesme n'y fust occis : car comme il eust jetté sa main sur celle d'un grand & puissant soudard qui fuyoit tout au long de luy, en luy faisant commandement de demourer & monstrier visage à l'ennemy, le soudard plein de frayeur haulsa l'espée pour le frapper : mais l'escuyer de Cæsar le prevint qui luy avalla l'espaule d'un coup d'espée : & fut Cæsar ce jour là en si grand desespoir de ses affaires, que quand Pompeius, pour quelque crainte ou par quelque envie de fortune eut failly de mettre fin à ceste grande besongne, & se fut retiré en son camp, se contentant d'avoir rembarré & chassé ses ennemis

jusques dedans le leur , Cæsar retournant au sien avec ses amis , dit hault & clair , « La victoire » estoit aujourd'huy à noz ennemis , s'ilz eussent » eu un chef qui eust sceu vaincre ».

LII. Retourné qu'il fut en son logis , il se coucha , & luy fut celle nuit la plus mauvaise & plus fascheuse qu'il eut onques : car il ne cessa de discourir en son entendement avec une grande destresse , la grande faulte qu'il avoit faite en sa conduite , de s'estre opiniastré à demourer tant là au long de la marine , estans ses ennemis les plus puissans par la mer , veu qu'il avoit devant soy un païs large & plantureux de tous biens , des villes de la Macedoine & de la Thesalie , & n'avoit pas eu le sens de tirer la guerre hors de là , sans tant s'amuser à perdre temps , en lieu où il estoit plus assiegé de ses ennemis par faulte de vivres , que luy ne les assiegeoit par force d'armes : ainsi se faschant & ennuyant de se voir si fort à destroit de vivres , & ses affaires en si mauvais train , il se deslogea de là où il estoit , en deliberation d'aller trouver Scipion en la Macedoine , faisant son compte , que où il attireroit Pompeius à la bataille malgré luy , quand il n'auroit plus la mer à son dos qui luy fournist vivres en abondance , ou bien qu'il desferoit aiseement Scipion quand il seroit seul , s'il n'estoit secouru.

LIII. Ce deslogement de Cæsar eleva le cueur à l'armée de Pompeius & à ses capitaines , qui voulurent à toute force que lon allast après luy, comme jà fuyant & desfait : mais quant à luy il ne vouloit point en forte du monde, hazarder la bataille qui estoit de si grande consequence, ains se sentant très bien prouveu de toutes choses necessaires pour attendre le temps, vouloit tirer ceste guerre en longueur, à fin de matter & consumer par traict de temps ce peu de vigueur qui restoit à l'armée de Cæsar, de laquelle les meilleurs hommes estoyent bien aguerriz, & avoyent une hardiesse nompareille pour un jour de bataille : mais d'aller ainsi errant par pais, & remuant si souvent le camp de lieu à autre, combattre une muraille, aller au guet, & estre en armes toutes les nuits, ilz ne le pouvoyent, la plus part, plus faire, à cause de leur vieillesse, estans desormais devenus trop pesans pour porter ceste peine, de maniere que la foiblesse de leurs corps leur diminuoit aussi d'autant la vigueur du courage. Davantage il s'estoit mis quelque maladie pestilente entre eulx procedée des mauvaises viandes que ilz avoyent esté contrainsts de manger : &, qui estoit encore pis, il n'estoit ny fort d'argent, ny n'avoit moyen de recouvrer vivres, de sorte qu'il sembloit qu'en peu de temps il se desferoit & se ruineroit de soy mesme. Pour

lesquelles raisons Pompeius ne vouloit combattre en sorte quelconque : mais il n'avoit en cela que Caton seul de son opinion , encore estoit ce pourautant qu'il vouloit espargner le sang de ses citoyens : car ayant veu ceux qui estoient demourez morrs sur la place du costé des ennemis en la derniere escarmouche , lesquelz n'estoyent pas moins de mille hommes , il se couvrit le visage , & s'en alla plorant. Tous les autres au contraire le tensoient & le blasmoient de ce qu'il restifvoit ainsi à venir à la bataille , & aucuns le picquoyent en l'appellant Agamemnon , & le roy des roys , difans qu'il faisoit ainsi durer ceste guerre , pource que il ne vouloit pas se dessaisir de ceste autorité souveraine , & qu'il estoit bien aise de voir tousjours rant de capitaines à ses costez , qui luy venoyent faire la cour jusques en son logis : & Faonius un ecervelé , qui alloit contrefaisant furieusement le franc & rond parler de Caton , faisoit semblant de se tourmenter , en disant , « N'est ce pas grande pitié , que nous ne mangerons pas encore ceste » année des figues de Tusculum ¹ , pour l'ambitieuse convoitise de dominer qui est en Pom-

¹ Tusculum étoit à cinq lieues de Rome en tirant au sud-est. Ce canton étoit plein de maisons de plaisance ; le territoire en étoit très fertile. C'est là qu'est aujourd'hui Frascati : l'ancien Tusculum étoit à mi-côte : Frascati est au pied de la montagne.

» peius » ? Et Afranius naguères retourné de l'Hespagne, là où pource qu'il luy estoit mal succédé, on le calumnioit d'avoir trahy & vendu à Cæsar son armée pour un prix d'argent, alloit demandant pourquoy c'estoit que lon ne combattoit ce marchand, que lon disoit avoir achepté de luy la province d'Hespagne : tellement que Pompeius à la fin poulcé par ces langages, alla malgré luy après Cæsar pour le combattre.

LIV. Si se trouva Cæsar du commencement en grande peine par le chemin, pource qu'il ne trouvoit pas qui luy voulust bailler vivres, estant mesprisé de tout le monde, à cause de la perte & desfaitte qu'il avoit receüe nouvellement : mais depuis qu'il eut pris la ville de Gonphes¹ en la Theffalie, non seulement il recouvra vivres à foison pour nourrir son armée, mais aussi la guarentir & delivra estrangement de maladie, pource que y ayans les souldards trouvé grande quantité de vins, ilz chassèrent la contagion de pestilence à force de boire & de faire grande chere : car ilz ne feirent autre chose que baller, mommer, & jouer les Bacchanales par tout le chemin, tant qu'ilz se guarirent de ceste maladie par yvrongner, & se feirent des corps tout neufs.

¹ La premiere ville de Theffalie, en sortant de l'Epire, dit Cæsar.

LV. Quand ilz furent tous deux arrivez en la Pharfalie , & tous deux campez l'un devant l'autre , Pompeius retourna de rechef à sa premiere resolution , de tant plus mesmement qu'il avoit eu des presages de signifiante sinistre & de mauvaises visions en dormant : car il luy fut advis une nuit qu'il entroït dedans le theatre , là où les Romains le recueilloient avec grands batemens ¹ : mais ceulx d'alentour de luy estoient si presumptueux & si temeraires , & se promettoient si asseurement la victoire , que desja Domitius Spinther & Scipion se debatoyent entre eulx , & briguoient le souverain pontificat que renoit Cæsar , & y en eut plusieurs qui envoyèrent devant à Rome pour retenir & loer les plus prochaines maisons de la place , comme estans plus commodés aux prâteurs & aux consuls , faisans desja leur compte , que ces offices là ne leur pouvoient fourir incontinent après la fin de ceste guerre. Mais sur tous autres brilloient d'ardeur de combattre les jeunes gentilzhommes & chevaliers Romains , qui estoient bien montez & armez à l'avantage de harnois bien fourbis & reluisans , leurs cheveux gras & refaits , & eulx beaux jeunes hommes , & en nombre de sept.

¹ L'original grec est defectueux en cest endroit , & le faut remplir de ce qui est cy devant escrit en la Vie de Pompeius. Amyot. Voyez la Vie de Pompée , T. VI , p. 250.

mille, là où ceux de Cæsar n'estoyent que mille seulement.

LVI. Le nombre des gens de pied n'estoit pas semblable non plus : car ilz estoyent quarante & cinq mille contre vingt & deux : parquoy Cæsar feit assembler les siens, auxquelz il remonstra, comme Cornificius estoit près de là qui luy amenoit deux legions entieres, & qu'il avoit quinze autres cohortes sous la charge de Calenus, lesquelles il faisoit tenir à l'entour de Megare & d'Athenes ; puis leur demanda s'ilz vouloyent attendre ce renfort là, ou s'ilz aimoyent mieulx hazarder la bataille eulx seuls : les soldards s'escrierent tout hault qu'ilz le prioient de ne différer point ; ains plus tost qu'il imaginast & inventast quelque ruze pour attirer l'ennemy à la bataille le plus tost qu'il pourroit.

LVII. Et ainsi comme il sacrifioit aux dieux pour la purification de son armée, la premiere hostie n'eut pas plus tost esté immolée, que son devin luy asseura, que dedanstrois jours il auroit la bataille. Cæsar luy demanda s'il appercevoit point es sacrifices quelque heureux presage touchant l'issue : & le devin luy respondit, « Tu feras » mieulx toy mesme la response à cela que moy : » car les dieux nous promettent une grande mutation & grand changement de l'estat des choses » qui sont à present, en un autre tout contraire :

» parquoy si tu es bien maintenant , attens toy
 » d'avoir cy après pire fortune : & si tu es mal ,
 » assure toy , que tu l'auras meilleure. » Et la
 nuict de devant la bataille , ainsi comme il alloit
 environ la minuiet visitant les guetz , on veit
 comme un grand brandon de feu allumé en l'air
 qui passant par dessus le camp de Cæsar , alla
 fondre dedans celuy de Pompeius : & environ
 l'heure que lon remue le guet du matin , lon en-
 tendit une faulxe alarme , sans cause apparente ,
 que lon appelle communement terreur panique ,
 qui se meut dedans le camp des ennemis : route-
 fois si ne s'attendoit il point de combattre pour ce
 jour là , ains avoit proposé de desloger de là où
 il estoit campé pour tirer vers la ville de Scotuse ,
 & estoient desja les tentes & pavillons de son
 camp abbatus , quand ses coureurs vindrent à
 grande haste devers luy , apporter nouvelles com-
 ment les ennemis se preparoyent pour venir à
 la bataille : dequoy il fut fort joyeux , & après
 avoir fait prieres aux dieux , qu'ilz luy voulus-
 sent estre ce jour là en aide , il rengea ses gens
 en bataille qu'il departit en trois troupes , don-
 nant pour chef à celle du milieu Domitius Cal-
 vinus , & à celle de la poincte gauche Anto-
 nius , & luy se meit à la droite , choisissant son
 lieu pour combattre en la dixieme legion : con-
 tre laquelle voyant que les ennemis avoyent or-

donné toute leur chevalerie , il eut peur quand il les veit en si grand nombre & en si brave equipage , au moyen dequoy , il feit habilement venir de la cueüe de sa bataille six cohortes , lesquelles il meit en embusche derriere sa poincte droite , ayant premierement bien instruit les soudards de tout ce qu'ilz auroient à faire quand la chevalerie des ennemis viendroit à commencer la charge.

LVIII. De l'autre costé Pompeius se meit aussi en la poincte droite de sa bataille , baillant à conduire la gauche à Domitius , & Scipion beaupere de Pompeius prit à mener le milieu. Or s'estoyent les chevaliers Romains tous jettez en la poincte gauche , comme nous avons desja dit , en intention d'envelopper la droite de Cæsar par derriere , & de faire leur plus grand effort à l'endroit mesme où estoit le chef de leurs ennemis , faisans leur compte qu'il n'y avoit bataillon de gens de pied si profond , qu'il peust soustenir le choc d'une si grosse troupe de chevalerie , & qu'au premier heurt ilz foudroyeroyent tout , & leur passeroient par dessus le ventre. Quand ce vint sur le poinct que d'un costé & d'autre les trompettes commencerent à sonner le son de la bataille , Pompeius commanda à ses gens de pied qu'ilz se teinsent fermes en leur marche bien serrez ensemble , & qu'ilz attendissent

attendissent sans bouger le pied la course de leurs ennemis, jusques à ce qu'ilz fussent prests à lancer leurs javelots. En quoy Cæsar depuis dit qu'il avoit fait une lourde faulte, ne considerant pas que ceste rencontre, qui se fait en courant de roideur, oultre ce qu'elle donne force plus roide aux premiers coups, encore enflamme elle le courage des hommes, pource que cest elancement commun de tous les combatans qui courent ensemble, luy est comme un soufflet qui l'allume.

LIX. Ainsi donc que Cæsar faisoit desjà marcher sa bataille pour aller commencer la charge, il apperceut l'un de ses capitaines vaillant homme & bien experimenté au faict de la guerre, & duquel il se fioit beaucoup, qui preschoit les soudards qu'il avoit sous sa charge, les exhortant de bien faire leur devoir de combattre vaillamment. Si l'appella par son nom, & luy dit tout hault : « Et bien, Caius Crassinius ¹, » quelle espetance devons nous avoir ? & comment sommes nous deliberez de bien faire ce » jourdhuy ? Adonc Crassinius haulsant la main, luy respondit tout hault : « Nous vaincrons glorieusement ce jourdhuy, Cæsar, & te promets que tu me loueras avant que ce jour

¹ Dans la Vie de Pompée il est appellé Crassianus; César le nomme Crastinus.

» passe ou mort ou vif ». Ces paroles dites , il fut le premier , qui alla courant donner dedans les ennemis , tirant sa bende après luy qui estoit de six vingts hommes , & fendant les premiers rens , entra avec grande occision bien avant dedans la bataille des ennemis , jusques à ce qu'en faisant ces grands efforts , il fut à la fin rembarré d'un coup d'estoc qui luy donna droit dedans la bouche par telle violence , que la poincte de l'espée luy vint à ressortir par derriere au chinon du col. Ainsi estans ja les gens de pied au milieu de la bataille attachez au combat de main , les gens de cheval de la pointe gauche de Pompeius marcherent aussi fierement , eslargissans leurs troupes pour envelopper par derriere la poincte droite de la bataille de Cæsar : mais avant qu'ilz commenceassent à charger , les six cohortes , que Cæsar avoit mis en aguet derriere luy , se prirent à courir droit à eulx , sans lancer de loing leurs javelots comme ilz ont accoustumé , ny en frapper à coups de main les cuisses , ny les jambes des ennemis , ains raschans à leur donner droit dedans les yeux , & à les en assener au visage , suyvant ce que Cæsar leur avoit enseigné : pource qu'il esperoit que ces jeunes gentilz hommes , qui n'avoient gueres hanté les armes ny accoustumé de se voir blecez , & qui estoient en la fleur de leur aage & de

leur beaulté, craindroyent fort ces bleceures là, & n'arresteroyent jamais, tant pour la crainte du danger present d'y perdre la vie, que pour la doubte que leurs beaux visages n'en demourassent difformes à l'advenir : comme il en advint : car ilz ne peurent onques souffrir, que lon leur apportast ainsi près du visage les poinctes des javelots, ains s'esblouirent de peur, quand ilz veirent qu'on leur approcha le fer luisant si près des yeux, & tournerent le dos en se couvrant le visage de peur que lon ne les y bleceast : ainsi se rompans d'eux mesmes, ilz se prirent finalement à fouir très laschement à val de rouverte & furent cause de faire perdre tout le demourant : car ceulx qui les avoyent rompus, coururent incontinent assaillir le bataillon des gens de pied par derriere, & les meirent en pieces.

LX. Adonc Pompeius voyant de l'autre poincte de sa bataille, ses gens de cheval ainsi desbendez & escartez en rouverte, ne fut plus celuy qu'il estoit auparavant, ny ne se souvint plus d'estre le grand Pompeius, ains ressemblant proprement à un homme, auquel les dieux ont osté le sens, & qui est estonné d'une ruine divinement advenue, il se retira sans mot dire en sa tente, là où il s'asseit, attendant ce qui pourroit advenir, jusques à ce que toute son armée ayant

esté desfaite & mise en rouverte, les ennemis vindrent à monter sur les rempars qui clouoyent son camp, & à combattre à coups de main contre ceulx qui les gardoyent : & lors comme estant un peu revenu à soy, il ne dit que ceste seule parole, « Comment, jusques à nostre camp » ! & despouillant à grande haste sa cotte d'armes & son accoustrement de capitaine, vestit une robe convenable à sa fortune, & s'en sortit à la desrobbée. Au reste, comment il se gouverna depuis ceste fortune, & comme s'estant mis entre les mains de quelques Ægyptiens, il fut par eulx occis meschamment, nous le declarons en sa vie. Mais lors Cæsar entrant dedans le camp de Pompeius, & y voyant les corps estendus de ceulx que lon avoit ja tuez, & d'autres que lon tuoit encore, se prit à dire en soupirant : « Ilz l'ont » eulx mesmes ainsi voulu, & m'ont à ce con- » trainct ». Car Caius Cæsar après avoir fait tant de belles conquestes, & victorieusement achevé tant & de si grosses guerres, eust neantmoins esté condamné, s'il se fust deffaizy de son armée. Asinius Pollio dit qu'il prononcea la sentence de ces paroles en langage Romain, que luy depuis a escrites en Grec : & dit davantage, que la plus part de ceulx qui furent mis à l'espée dedans le camp, estoient valets & serviteurs, & qu'en toute la bataille il ne mourut pas plus

de six mille souldards. Quant à ceulx qui furent pris prisonniers, Cæsar en mella beaucoup parmy ses legions, & pardonna à plusieurs personnages de qualité, entre lesquelz fut Brutus, celui qui depuis le tua : & dit on qu'il fut en grande peine, quand après la bataille, on ne le trouva point soudainement : mais depuis il sceut qu'il estoit vif, & s'estant venu de luy mesme rendre à luy, il en fut fort joyeux.

LXI. Si y eut plusieurs signes qui prognostiquerent l'issue de ceste bataille, telle comme elle fut, mais le plus notable fut celui qui advint en la ville de Tralles¹, où il y avoit dedans le temple de Victoire, une image de Cæsar : la terre d'alentour estant fort dure d'elle mesme, estoit pavée de pierre encore plus dure, & neantmoins on dit qu'il en sourdit une palme, tout joignant la base de la statue. Et en la ville de Padoue², Caius Cornelius homme excellent en l'art de deviner, citoyen & familier amy de Titus Livius l'historien, estoit d'aventure ce jour là assis à contempler le vol des oyseaux, & ainsi que Livius mesme le racompte, cogneut le point du temps que fut la bataille donnée, & predict à ceulx qui estoient presens, « A ceste heure » propre se commence la meslée : à ce mesme

¹ Ville de l'Asie mineure, dans la Lydie.

² A dix lieues de Venise.

» instant s'entrechocquent les deux armées ». Puis se rasseant une autre fois, pour considerer de rechef les oiseaux, après en avoir contemplé les presages, se dressa soudain sur ses pieds, & cria tout hault comme s'il eust esté inspiré & poulcé par quelque esprit divin, « La victoire » est tiene, Cæsar ». Dequoy s'esmerveillans tous les assistans, il osta la couronne qu'il avoit dessus sa teste, en faisant serment, que jamais ne la y remettroit, que l'evenement n'eust porté tefmoignage à la verité de son art. Livius afferme qu'il fut ainsi fait.

LXII. Au reste Cæsar ayant donné entiere exemption & affranchissement à la nation Thessaliene; en consideration de la victoire qu'il avoit eue en leurs pais, s'en alla après Pompeius, & estant passé en Asie, y affranchit aussi les Gndiens, en faveur de Theopompus, celuy qui a fait le recueil des fables, & relascha à tous les habitans de l'Asie le tiers des tributs qu'ilz payoyent: puis arriva en Alexandrie, que Pompeius y avoit desjà esté mis à mort: si eut en horreur Theodorus, qui luy en presenta la teste, tournant le visage d'un autre costé pour ne la point voir: mais bien prit il son cachet, & en le regardant se prit à plorer, & à tous ses familiers & amis, que le roy d'Égypte avoit fait arrester ainsi qu'ilz alloient errans par ses pais, il leur feit des biens, & les

3. Pui
cer de
pâtis
ls, &
sire &
ichon
os non
delfin
ne le
re ref
forme

com
thene,
se est
elant
dies,
fuit le
abime
r: puis
se despi
dout,
vidage
is bien
: pri
que à
lloque
de le

7 11 24 11




Theodotus présente à Jules César la tête de Pompée.

Tom. VII, Pag. 278.

Mout, Del.

L. H. Balleu, sculp.



gaigna tous à sa devotion : suivant leſquelz offices, il eſcrivit à ſes amis de Rome, que le plus grand & plus doux fruit qu'il recevoit de ſa victoire, eſtoit qu'il ſauvoit tous les jours la vie à quelques uns de ſes citoyens, qui avoyent porté les armes contre luy.

LXIII. Quant à la guerre qu'il eut en Alexandrie, aucuns diſent qu'elle ne fut point neceſſaire, & qu'il l'entreprit volontairement pour l'amour de Cleopatra : en quoy il acquit peu d'honneur, & ſi meit ſa perſonne en grand danger. Les autres en rejettent la coulpe ſur les miniſtres du roy d'Ægypte, meſmement ſur Pothinus l'eunuque, lequel ayant la principale autorité entre les ſerviteurs du roy, après avoir naguere fait occire Pompeius, & chaffé de la cour Cleopatra, eſpioit encore ſecretement les moyens, comme il en pourroit autant faire à Cæſar : à raiſon dequoy, en ayant ſenty quelque vent, il commença dès lors à paſſer les nuits entieres en banquets & feſtins, à fin d'eſtre en plus grande ſeureté de ſa perſonne. Mais oultre ce, encore alloit ce Pothinus diſant & faiſant ouvertement beaucoup de choſes inſupportables, pour faire honte & ſuſciter envie à l'encontre de Cæſar : car il faiſoit diſtribuer à ſes gens de guerre le plus mauvais & le plus vieil blé qu'il pouvoit trouver : & ſi les ſoudards s'en plaignoyent, il leur reſpondoit,

qu'il falloit qu'ilz eussent patience, & qu'ilz s'en contentassent, puis qu'ilz mangeoyent aux despens d'autrui : & à la table il ne faisoit servir qu'en vaisselle de bois & de terre, disant que Cæsar avoit eu toute celle d'or & d'argent pour quelque debte, à cause que le pere du roy, qui lors regnoit en Égypte, devoit à Cæsar un million & sept cents cinquante mille escus¹, dont Cæsar auparavant en avoit remis les sept cents cinquante mille à ses enfans : mais lors il demanda le million qui restoit pour en payer ses gens, à quoy Porthinus luy respondit, que pour lors il feroit mieulx de s'en aller à la poursuite de ses autres affaires, qui luy estoient de plus grande consequence, & que puis après il recouvreroit tout à loisir une autre fois sa debte avec la bonne grace du roy. Cæsar luy repliqua qu'il n'avoit que faire du conseil des Égyptiens pour ses affaires, mais qu'il vouloit estre payé : & secrettement manda à Cleopatra, qui estoit aux champs, qu'elle revinst : & elle prenant en sa compagnie Apollodorus Sicilien seul de tous ses amis, se meit dedans un petit bateau, sur lequel elle vint aborder au pied du chasteau d'Alexandrie, qu'il estoitjà nuit toute noire : & n'ayant moyen d'y entrer sans estre cogneue, elle s'es-

¹ Grec, dix-sept millions cinq cens mille sesterces, 3,349,699 livs de notre monnoie.

tendit tout de son long dessus un faisceau de hardes, que Apollodorus plia & lia par dessus avec une grosse courroye, puis le chargea sur son col, & le porta ainsi dedans à Cæsar par la porte du chasteau.

LXIV. Ce fut la premiere emorche, à ce que lon dit, qui attira Cæsar à l'aimer, pource que ceste ruse luy fait appercevoir qu'elle estoit femme de gentil esprit : mais depuis quand il eut cogneu sa douceur & bonne grace, il en fut encore bien plus espris, & la remeit en bonne amitié avec le roy son frere, soubz condition qu'elle regneroit aussi quant & luy. Si fut pour ceste reconciliation préparé un grand festin, auquel le barbier de Cæsar, qui estoit l'un de ses esclaves, la plus craintive personne du monde, ne laissant rien à fureter, rechercher & oreiller, pour ceste deffiance naturelle qu'il avoit, descouvrit que Pothinus & Achillas dressoyent une embusche à son maistre pour le tuer. Ce que Cæsar ayant averé, meit bonnes & seures gardes à l'entour de la salle où se faisoit le festin, si bien qu'il occit Pothinus luy mesme : mais Achillas se sauva de vifvesse, & s'en fouit au camp du roy, là où il suscita une dangereuse & malaisée guerre à Cæsar, pource qu'avec bien peu de gens qu'il se trouvoit lors à l'entour de luy, il avoit à combattre une grosse & puissante

ville. Mais le premier danger auquel il se trouva, fut la faulte d'eau, pource que ses ennemis feirent boucher & fermer les canaux, par lesquelz l'eau venoit de la riviere au chasteau. Le second fut, que voyant comme les ennemis venoyent pour luy oster ses vaisseaux, il fut contraint de repoulser ce peril avec le feu, lequel brusta quant & l'arcenal où estoient les vaisseaux, celle grande & tant renommée librairie d'Alexandrie. Le troisieme fut en la bataille navale qui se donna près la tour du Phar¹, là où voulant aller secourir ses gens qui combatoyent en la mer, il faulta de dessus le mole ou la levée dedans un bateau : ce que voyans les Ægyptiens voguerent de tous costez celle part, & luy se jettant dedans la mer, se sauva à nage en grande peine & avec grande difficulté. Et dit on que ce fut là, que tenant plusieurs papiers en l'une de ses mains, il ne les lascha jamais, ains les teint tousjours hors de l'eau en nageant de l'autre main, combien qu'on luy tiraist ce pendant infinis coups de trait, & qu'il fust contraint de se plonger souvent en l'eau : mais le bateau fut incontinent mis à fond.

¹ On donnoit ce nom de phare à des tours bâties sur des côtes ou des ports de mer, où on allumoit des feux pour éclairer les vaisseaux pendant la nuit. Vis-à-vis d'Alexandrie il y avoit une île appelée Phare ou Pharos, & sur le promontoire de cette île un phare bâti par Ptolémée Philadelphe, d'une grandeur & d'une magnificence telle que quelques-uns l'ont compté parmi les merveilles du monde.

Et finalement le roy s'estant retiré devers ses gens , qui faisoient la guerre à Cæsar , il luy alla à l'encontre , & luy donna la bataille qu'il gaigna , avec grande effusion de sang : mais quant au roy il ne comparut ny ne fut veu onques puis : à raison dequoy il establit royne d'Égypte sa sœur Cleopatra , laquelle estant grosse de luy , peu de temps après accoucha d'un filz , que ceux d'Alexandrie appellerent Cæsarion.

LXV. Et luy s'en alla en la Syrie , & de là se promenant par l'Asie , il eut nouvelles comme Domitius ayant esté desfait en bataille par Pharnaces filz de Mithridates , s'en estoit fouy du royaume de Pont , avec bien peu de gens , & que ce roy Pharnaces pourfuyvant sa victoire , avec une convoitise insatiable , ne se contentoit pas d'avoir jà occupé la Bithynie & la Cappadocie , ains tentoit encore l'Armenie , que lon appelle la Mineur , fuscitant tous les roys , princes & potentats de ceste marche là , à l'encontre des Romains. Si dressa incontinent Cæsar son chemin droit celle part avec trois légions , & luy donna une grosse bataille près la ville de Zela , en laquelle il luy meit en pieces toute son armée , & le dechassa de tout le royaume de Pont : & pour donner à entendre la soudaineté de ceste victoire , l'escrivant à Rome à l'un de

ses amis Anitius , il luy manda ces trois paroles seulement , *VENI¹, VIDI, VICI*, c'est à dire , Je viens, Je vei, Je vainqui. Mais ces paroles pour avoir presque une semblable cadence en langage Romain , ont une grace de briefveté plus plaisante à l'ouye , qu'elle ne se peult rencontrer en autre langue.

LXVI. Cela fait il repassa en Italie , & s'en retourna à Rome finissant l'année pour laquelle il avoit esté esleu dictateur la seconde fois, là où cest office paravant luy n'avoit jamais esté annuel : si fut esleu consul pour l'année ensuyvant, mais on le blasma fort de ce , que ses gens de guerre en une mutination ayans tué deux personnages de dignité pratoriale , Cosconius & Galba , il n'en feit jamais autre punition ny autre demonstration , qu'en lieu de les appeller souldards , il les appella citoyens , & leur donna à chascun pour teste la valeur de cent escus , & de grandes terres dedans l'Italie. Aussi luy donna lon grand blasme pour les insolences furieuses & forsenées que faisoit Dolabella , pour l'avarice d'Anitius , & les yvrongneries d'Antonius & de

¹ On sent bien que Plutarque les a écrites en grec , ainsi les trois mots latins qui sont ceux de César , ont été mis par Amyot pour présenter trois mots seulement , ce que le françois ne permet pas , à cause de la nécessité de joindre au moins le pronom au verbe.

Cornificius * qui faisoit demolir & rebastir la maison de Pompeius , comme n'estant pas suffisante pour luy , dont les Romains estoient fort malcontents. Cæsar n'ignoroit point tout cela , & eust bien voulu que les choses n'eussent point esté telles : mais pour parvenir aux fins où il pretendoit , il estoit contraint se servir de telz ministres qui le secondoyent en ses desseings.

LXVII. Or depuis la bataille de Pharsale Caton & Scipion s'en estant fouis en Afrique , & s'y estant le roy Juba joint avec eulx , ilz avoyent assemblé une grosse & puissante armée : parquoy Cæsar se resolut de leur aller faire la guerre. Si passa environ le cueur d'hyver en la Sicile , là où à fin de retrencher à ses souldards & capitaines toute esperance d'y faire long sejour , il s'alla loger sur la greve mesme de la marine , & au premier vent propice s'embarqua avec trois mille hommes de pied , & quelque petit nombre de gens de cheval : puis les ayant mis en terre , avant qu'ilz s'en apperceussent , il se rembarqua de rechef pour aller querir les autres , craignant qu'il ne leur advinst quelque malencontre au passage , & les ayant trouvez par le chemin ,

* Ce qu'on dit ici de la maison de Pompée n'a point de rapport avec Cornificius , mais bien avec Antoine , comme on le verra dans sa Vie , & comme on le voit dans les Philippiques de Cicéron , & ailleurs.

les conduisr tous en son camp : là où estant adverty que ses ennemis se confioient en un ancien oracle , qui portoit que c'estoir chose fatalement destinée à la famille des Scipions , que d'estre victorieux en Afrique , on ne sçait s'il le feit par moquerie en mespris du chef de ses ennemis Scipion , ou bien si ce fut à bon esciant pour s'attribuer le presage du nom : mais comment que ce fust , en toutes les rencontres , escarmouches & batailles de celle guerre , il donna tousjours la superintendence de son armée à un personnage de bien petite qualité , & dont on ne faisoit compte quelconque , pource qu'il estoit extrait de la race des Scipions Africains , & de fait s'appelloit Scipion , surnommé Sal-lution , auquel il donnoit la preeminence, comme s'il eust esté capitaine en chef , toutes les fois qu'il falloit combattre.

LXVIII. Et estoit contraint de souvent aller harceller ses ennemis , pource que ny les hommes en son camp n'avoient abondance de bledz , ny les bestes de fourrage , ains estoient les gens de guerre contraints de prendre de la mousse & de l'algue qui croist en la mer , après en avoir lavé la salure avec de l'eau douce , pour la donner à manger à leurs chevaulx parmy quelque peu de celle herbe , que lon appelle dent de chien , pour luy donner goust , à cause que les

Nomadiens, qui sont chevaux-legers & hommes fort dispos, & en grand nombre, survenoyent en un moment par tout, & tenoyent toute la campagne à l'environ, de sorte que lon ne s'ozoit escarter du camp pour aller au fourrage. Et un jour comme les hommes d'armes s'amusaient à regarder un Africain, lequel faisoit merveilles de baller & de jouer de la fluste, eulx estans assis en grand plaisir, & ayans ce pendant baillé leurs chevaux à leurs valets, les ennemis par une soudaine surprise les enveloperent de toutes parts, & en tuerent sur le champ une partie, & chassans les autres à val de rouverte, les poursuivirent jusques à entrer pêle melle dedans leur camp parmy eulx : & si n'eust esté que Cæsar en personne, & avec luy Asinius Pollio, sortans du camp y allerent au secours, & arresterent les fuyans, la guerre ce jour là eust esté toute parachevée. Encore y eut il une autre rencontre, où les ennemis eurent le meilleur, en laquelle on dit, que Cæsar prenant au collet le portenseigne qui portoit l'aigle, l'arresta par force, & luy faisant tourner visage luy dit, « C'est là où sont les ennemis ».

LXIX. Ces avantages eleverent le cueur à Scipion, & luy donnerent hardiesse de vouloir hazarder la bataille : & laissant d'un costé Afranius, & de l'autre costé le roy Juba, campez

assez près l'un de l'autre, il se meit à fortifier un logis près la ville de Thapfaque¹ au dessus du lac, pour leur servir de fort & de seure retraite à tous en ceste bataille : mais ainsi comme il travailloit après, Cæsar ayant traversé en extreme & incroyable diligence, un grand país de bois par des advenues dont on ne se doubtoit point, en surprit les uns par derriere, & assaillit les autres par devant au desproueu, de maniere qu'il les meit tous en rouble, & leur fait prendre la fuite : puis suyvant ceste premiere poincte de l'occasion & le cours de sa bonne fortune, il alla tout d'une tire assaillir le camp d'Afranius, qu'il prit aussi de primsfault, & celuy des Nomades semblablement, s'en estant le roy Juba fuy, tellement qu'en une petite partie d'un seul jour, il prit trois camps, & tua sur le champ cinquante mille hommes de ses ennemis sans perdre que cinquante souldards des siens. Ainsi racomptent en somme le discours de ceste bataille aucuns des historiens : mais il y en a d'autres, qui escrivent qu'il n'assista pas en personne à l'exécution, pource que comme il ordonnoit ses gens en bataille, l'accès du mal caduque, auquel il estoit subiect, le surprit, & que sentant bien qu'il luy vouloit venir, avant

¹ C'est Thapfe qu'il faut écrire, comme Ptolémée, Strabon & tous les autres l'écrivent.

qu'il

qu'il en eust le sens troublé , & qu'il en fust totalement faisy , il se fait emporter en un chasteau , près du lieu auquel se donna la bataille ; là où il se teint en repos , jusques à ce que l'accès de sa maladie fust entierement passé.

LXX. Quant à ceulx qui eschapperent de ceste bataille , personnages de dignité prætoriale ou consulaire , plusieurs se desfeirent eulx mesmes , quand ilz se veirent prisonniers , & plusieurs aussi en fait mourir Cæsar : mais desirant pouvoir tenir sur tous les autres Caton vif en sa puissance , il tira incontinent à la plus grande haste qui luy fut possible , vers la ville d'Utique , que Caton avoit prise à garder & defendre , au moyen dequoy il ne s'estoit point trouvé en la bataille : toutefois estant par le chemin certifié qu'il s'estoit luy-mesme desfait de sa propre main , il monstra bien evidemment qu'il en fut fort mary : mais en quelle part , ne pour quelle occasion , on n'en sçait rien. Vray est , qu'il dir bien sur l'heure : « O Caton , je te porte envie de ceste tiene mort , » puis que tu m'as envié la gloire de te sauver » la vie ». Ce neantmoins le livre qu'il escrivit depuis à l'encontre de Caton mort , ne monstre point apparence de cueur amolloy ny addoucy envers luy. Et comment luy eust il pardonné , s'il l'eust tenu vivant en sa puissance , veu que contre luy mort il espandit une si violente cholere ?

Toutefois on conjecture qu'il luy eust pardonné, par l'humanité dont il usa envers Ciceron, envers Brutus, & infinis autres, qui avoyent porté les armes contre luy : & dit on qu'il escrivit ce livre, non tant par rancune qu'il eust à l'encontre du mort, que par une ambition civile, pour une telle occasion : Ciceron avoit escrit un livre à la louange de Caton, & l'avoit intitulé Caton. Ce livre, ainsi que lon peut penser, fut fort bien recueilly, comme estant composé par un très eloquent orateur, & sur un fort bel argument. Cæsar en fut bien mal content, estimant que louer celuy, de la mort duquel il avoit esté cause, n'estoit autre chose que l'accuser luy mesme, & pour ceste cause escrivit un livre à l'encontre, dedans lequel il ramasse plusieurs charges & imputations qu'il met sus à Caton : le livre est intitulé Anticaton. L'un & l'autre livre jusques aujourdhuy a encore beaucoup de partisans qui les defendent, les uns pour l'affection qu'ilz portent à la memoire de Cæsar, & les autres à celle de Caton.

LXXI. Mais retourné qu'il fut de l'Afrique à Rome, tout premierement il feit une harengue devant le peuple, en laquelle il magnifia & loua fort haultement ceste siene victoire derniere, disant qu'il avoit acquis à l'empire Romain tant de pais, qu'il pourroit fournir à la chose publi-

que deux cents mille minots de bled de rente par chascun an, & deux millions de livres d'huile: puis fait trois entrées triumphales, l'une de l'Égypte, l'autre du royaume de Pont, & la troisieme de l'Afrique, non pour y avoir desfait Scipion, mais le roy Juba: le filz duquel, qui avoit aussi nom Juba¹, estant lors un jeune enfant, fut mené captif en la monstre de ce triumphe. ceste captivité luy a esté très heureuse, ayant fait qu'au lieu qu'il fut demouré un Barbare Nomadien, il a depuis par le moyen de l'estude qu'il fait en sa prison, esté nommé entre les plus sçavans historiographes des Grecs. Après ces trois triumphes il fait de grands dons à ses gens de guerre, & pour gagner la grace du commun populaire, fait de grands festins publiques & des jeux aussi: car il festoya tout le peuple Romain à un coup, en vingt & deux mille tables, & luy donna le passetemps de voir combattre plusieurs couples d'escrimeurs à oultrance, & des batailles navales en memoire de sa fille Julia, qui estoit decedée long temps au paravant: puis après tous ces esbatemens fut faite la reveüe & le denombrement accoustumé du peuple, auquel

¹ C'est celui dont nous avons parlé ailleurs. Auguste le rétablit dans la suite sur le trône, en lui donnant, au lieu des états de son pere, une partie de la Gétulie, & des provinces qui avoient été sou-mises précédemment à Bocchus & à Bogade.

furent trouvez au lieu de trois cents vingt mille chefs de citoyens , qui y estoient au paravant , cent cinquante mille seulement , tant ceste guerre civile avoit apporté de calamité & de perte à la chose publique , & tant elle avoit consumé grand nombre de peuple Romain , sans encore parler des maux & miseres qu'elle avoit causées au reste de l'Italie , & aux autres provinces de l'empire Romain.

LXXII. Ces choses toutes achevées , il fut esleu consul pour la quatrieme fois¹ , & s'en alla en Hespagne pour y faire la guerre aux enfans de Pompeius , lesquelz estoient encore jeunes : mais neantmoins avoyent assemblé une merveil-
 leusement grosse & puissante armée , & si monstroyent avoir le courage & la hardiesse digne de commander à une telle puissance , de sorte qu'ilz meirent Cæsar en extreme danger de sa propre vie. La plus grande bataille qui fust donnée entre eulx en toute ceste guerre , fut près la ville de Munda² , en laquelle Cæsar voyant ses gens fort pressez , & ayans beaucoup d'affaires à soutenir les ennemis , se jetta à travers la meslée des combatans , criant aux siens , s'ilz n'avoient autrement point de honte de se laisser battre ,

¹ L'an de Rome 709, avant J. C. 45.

² Munda dans l'ancienne Bétique , aujourd'hui le royaume de Grenade , à cinq lieues de Malaga , très-près du détroit de Gibraltar.

qu'ilz le prissent au corps & le livrassent eulx mesmes de leurs propres mains à ces jeunes enfans , & ainsi avec tout l'extreme effort qu'il peut faire , ayant à toute peine fait reculer & fouir les ennemis , il en tua sur le champ plus de trente mille , & en perdit des siens mille les meilleurs qu'il eust. Après ceste bataille , se retirant en son logis il dit à ses familiers , que plusieurs fois au paravant il avoit combatu pour la victoire , mais qu'à ceste derniere seule il avoit combatu pour sauver sa propre vie. Il gaigna ceste bataille le jour propre de la feste des Bacchanales , auquel on dit que Pompeius , le pere , estoit fort de Rome , pour aller commencer ceste guerre civile , & y eut entre deux quatre ans entiers de distance. Quant à ses enfans , le plus jeune se sauva de la bataille ; mais peu de jours après Didius apporta la teste de l'aîné.

LXXIII. Ceste guerre fut la derniere de celles de Cæsar , mais l'entrée triumphale qu'il en feit à Rome , despleut autant & plus aux Romains , que chose qu'il eust point encore faite , pource qu'il n'avoit point desfait des capitaines estrangers , ny des roys Barbares , ains avoit ruiné les enfans du plus grand personnage qui fust en Rome , à qui la fortune avoit esté contraire , & en ayant esteint la race , on n'estimoit point qu'il luy fust

bien seant de triompher ainsi des calamitez de son païs , en s'esjouissant d'une chose , pour laquelle defendre il n'avoit qu'une seule excuse envers les dieux & envers les hommes , c'est , que ce qu'il en faisoit , il le faisoit par contrainte , de tant plus mesmement que jamais au paravant il n'avoit envoyé ny lettres ny message au public , pour victoire quelconque , qu'il eust obtenue ny gaignée en toutes ces guerres civiles , ains en avoit tousjours de honte rejezté la gloire. Ce nonobstant les Romains fleschissans à sa fortune , & recevans le mors en la bouche , à cause qu'ilz estimoient que la principauté d'un seul leur donneroit moyen de respirer un petit de tant de maulx & de miseres , qu'ilz avoyent endurées en ces guerres civiles , ilz l'eleurent dictateur ^x perpetuel pour toute sa vie. Cela estoit manifestement une tyrannie certaine , pource que lon adjoustoit à la souveraine puissance & plein pouvoir de la dictature , le non craindre d'en estre jamais deposté. Et lors Ciceron commença à mettre en avant au senat , qu'on luy decernast des honneurs , dont la grandeur estoit encore aucunement humaine , mais il y en eut d'autres depuis , qui luy en adjousterent d'excessifs : & faisans à l'envy les uns des autres , à qui plus luy en donneroit , le rendirent odieux & fascheux à

^x L'an de Rome 710, avant J. C. 44.

ceulx meſmes qui luy eſtoient les plus equitables , pour la haulteſſe deſmeſurée , & l'importunité des honneurs , preeminences & prerogatives , qu'ilz luy decernerent : auſſi dit on que ceulx qui le haïſſoyent , n'y favoriſerent pas & n'y teindrent pas moins la main , que ceulx qui le flattoient , à fin qu'ilz euſſent plus grandes occasions de conſpirer contre luy , & qu'il ſemblaſt qu'avec plus juſtes querelles , ilz euſſent attenté contre ſa perſonne.

LXXIV. Car au demourant , quant à luy , depuis qu'il eut achevé ſes guerres civiles , il ſe porta de ſorte , que lon n'eũſt ſceu que reprendre en luy , & me ſemble que meritoirement & à bon droit fut decerné lors entre autres honneurs , que lon feroit baſtir un temple de Clemence , pour luy rendre graces de l'humanité dont il avoit uſé en ſa victoire : car il pardonna à pluſieurs de ceulx qui avoyent porté les armes & fait la guerre contre luy , & , qui plus eſt , donna des honneurs & offices de la choſe publique à quelques uns d'eulx , comme à Caſſius & à Brutus , entre autres , qui tous deux eſtoient præteurs. Et ayans eſté les images de Pompeius abbatues , il les feit redreſſer : à raiſon de quoy Ciceron dit lors , que Cæſar en relevant les images de Pompeius , avoit aſſeuré les ſienes. Et comme ſes amis luy conſeillaſſent qu'il priſt

des gardes pour la feureté de sa personne, & aucuns d'eulx se presentassent à l'en servir, il ne voulut onques le faire, disant, qu'il valoit mieulx mourir une fois, que tousjours attendre la mort en crainte : mais pour acquerir l'amour & la bienvueillance du peuple, comme la plus honorable, & la plus seure garde qu'il eust sceu avoir, il feit de rechef des festins publiques, & des données & distributions generales de bled : & pour aussi gratifier aux gens de guerre, il repeupla plusieurs villes, qui par le passé avoyent esté destruittes, où il logea ceulx qui n'avoient point de retraite, dont les plus nobles & les principales furent celles de Carthage & de Corinthe¹, & advint que tout ainsi comme elles avoyent toutes deux esté par avant prises & destruittes ensemble, aussi furent elles alors repeuplées en un mesme temps. Et quant aux hommes de qualité, il les gaigna aussi, promettant aux uns des prætures & des consulats à l'advenir, & aux autres d'autres honneurs & preeminences, & à tous en general bonne esperance, taschant à faire par tous moyens que chascun fust content de sa domination : tellement qu'estant l'un des consulz, nommé Maximus,

¹ Diodore de Sicile le dit ainsi, & Strabon & Pausanias sont d'accord avec lui par rapport à Corinthe ; mais pour Carthage, elle ne fut rétablie que par Auguste.

par cas fortuit decedé un jour avant la fin de son consulat, il declara consul, pour ce jour qui restoit seulement, en son lieu Caninius Rebi-lius, en la maison duquel comme tout le monde allaſt pour le ſaluer, & s'esjouir avec luy de ſa promotion, comme eſt la couſtume de faire aux magiſtrats nouvellement eleuz, Ciceron en ſe jouant dit, « Haſtons nous d'y aller, de- » vant que ſon conſulat expire ».

LXXV. Au reſte, Cæſar eſtant né pour faire toutes grandes choſes, & ayant de ſa nature le cueur convoiteux de grand honneur, les proſperitez de ſes conquēſtes & prouēſſes paſſées, ne le convierent point à vouloir jouir en paix & en repos du fruit de ſes labeurs, ains plus toſt l'eſchaufferent & l'encouragerent à en vouloir entreprendre encore d'autres pour l'advenir, luy engendrans tousjours de plus en plus imaginations de plus haultes entrepriſes & deſir de gloire nouvelle, comme ſi la preſente fuſt deſja toute uſée. Laquelle paſſion n'eſtoit autre choſe qu'une jalouſie & emulation de ſoy meſme, ne plus ne moins que d'une autre perſonne, & une obſtination de ſe vouloir tousjours vaincre ſoy meſme, combatant tousjours en luy l'eſperance de l'advenir avec la gloire du paſſé, & l'ambition de ce qu'il deſiroit faire, avec ce qu'il avoit deſjà fait. Car il avoit propoſé & faiſoit deſja

ses preparatifs pour aller guerroyer les Parthes , & après les avoir subjugués passer par l'Hyrkanie , & en environnant la mer Caspiene & le mont de Caucaſe , revenir gagner le royaume de Pont , pour puis après entrer en la Scythie : & ayant couru tout le païs & toutes les nations & provinces voiſines de la grande Germanie , & la Germanie meſme , s'en retourner à la fin par la Gaule en Italie , & eſtendre ainſi l'empire Romain à la ronde , de ſorte qu'il fuſt de toutes parts borné de la grande mer Oceane.

LXXVI. Mais ce pendant que ce voyage ſ'apreſtoit , il eſſaya de couper l'encouleure du deſtroit du Peloponeſe à l'endroit où eſt aſſiſe la ville de Corinthe , & fit tirer un canal des rivières de Teveron & du Tybre ¹ , commenceant à la ville meſme de Rome , & le fit aller droit à la ville de Circées , par une large & profonde ſoſſe , qu'il fit caver , laquelle ſ'alloit deſgorger en la coſte de Terracine , pour donner ſeureté & commodité plus grande aux marchands qui venoient à Rome pour y traffiquer. Davantage il delibera auſſi de deſtourner l'eau , qui cauſe les mareſts qui ſont entre les villes de Nomentum ² & de Setium , pour y aſſecher la terre , & la rendre labourable à pluſieurs milliers d'hommes ,

¹ Voyez les Obſervations.

² *Ibid.*

& en la coste de la mer plus prochaine de Rome faite jetter bien avant des grosses & fortes levées, & faire nettoyer toute la rade d'alentour d'Ostie¹ des rochers & pierres cachées sous l'eau au long de la coste, & oster tous autres empeschemens, qui en rendoyent l'abbord mal seur aux vaisseaux, & y bastir des ports, des arcenaux & abris dignes de tant de navires qui y hantoyent & arrivoient ordinairement.

LXXVII. Toutes ces choses se preparoyent encore, & ne vindrent point à effect. Mais la composition du calendrier, & reformation de l'année, pour oster toute confusion des temps, fut sagement inventée & conduite à fin par luy, laquelle s'est trouvée à l'user fort commode & plaisante : car non seulement es plus anciens temps, les Romains n'avoient point de certain formulaire, ny de regle arrestée pour accorder les revolutions des mois avec le cours de l'année, dont il advenoit une telle confusion des temps, que les sacrifices & les festes annuelles venoyent à tumber petit à petit en saisons totalement contraires à ce, pourquoy elles estoient instituées : mais encore lors le peuple ne sçavoit en façon quelconque, combien montoit le cours de la revolution du soleil, & n'y avoit que les presbtres

¹ A l'embouchure du bras gauche du Tibre, divisé en cet endroit par une petite île.

seuls qui l'entendissent, & qui en eussent cognoissance : au moyen dequoy ilz adjoustoyent soudainement, quand bon leur sembloit, sans que personne qu'eulx en preveist rien, le mois super-numeraire & intercalaire, qui anciennement se nommoit Mercedonius. Lon dit que le roy Numa Pompilius fut le premier qui inventa ceste façon d'interposer un mois : toutefois ce fut un foible remede, & qui ne s'estendit pas gueres loing pour corriger les erreurs qui se faisoient au compte de l'année, & les remettre à leur point. Mais Cæsar proposant la matiere aux plus sçavans philosophes, & aux plus experts mathematiciens de son temps, inventa & publia par le moyen des sciences qui estoient desja en estre, une reformation singuliere, & plus exquisement calculée que nulle autre, de laquelle les Romains usans jusques icy, semblent moins errer que les autres nations, en la reduction de ceste inegalité des mois aux ans : toutefois encore ne peut il si bien faire, que ceulx qui portoyent envie à sa grandeur, & qui enduroyent malvouluntiers sa domination, ne luy en donnassent des atteintes. Car Cicéron l'orateur se trouvant en quelque compagnie où il y eut un qui dit, « Demain se levera l'estoile » de la Lyre », il ne se peut tenir de dire, « Ouy » par edict : comme si les hommes recevoient encore cela par contrainte de commandement.

LXXVIII. Mais ce qui luy engendra une plus manifeste haine & plus mortelle, fut la convoitise de se faire nommer & declarer roy, laquelle donna au commun populaire la cause premiere de luy vouloir mal, & à ceulx qui de longue main luy gardoyent une mauvaife volonté couvette, en donna la plus honeste occasion qu'ilz eussent peu desirer. Toutefois ceulx qui luy procuroyent cest honneur, semerent un bruit parmy le peuple, qu'il estoit porté par les livres prophetiques de la Sibylle, que les Romains desferoyent alors la puissance des Parthes, quand ilz leur feroient la guerre sous la conduite d'un roy, mais autrement qu'ilz n'y adviendroyent jamais, & eurent bien la hardiesse un jour qu'il retournoit de la ville d'Alba à Rome, de l'appeller & saluer roy, dont le peuple se courroucea, & luy en estant marry, respondit qu'il ne s'appelloit point roy, ains se nommoit Cæsar, à quoy n'y eut personne qui luy repliquast rien, ains se fit un silence grand de toute l'assistance : & adonc luy tout fâché, marry & ennuyé, tira oultre son chemin. Et comme on luy eust decerné au senat des honneurs transcendants toute haultesse humaine, les consulz & les præteurs suyvis de toute l'assemblée des senateurs l'allerent trouver en la place, où il estoit assis sur la tribune aux harengues, pour luy notifier

& declarer ce qui avoit esté en son absence decerné à sa gloire : mais luy ne se daigna onques lever au devant d'eulx à leur arrivée, ains parlant à eulx, comme si c'eussent esté personnes privées, leur respondit que ses honneurs avoyent plus tost besoing d'estre retrenchez qu'augmentez. Cela ne fascha pas seulement le senat, ains fut aussi trouvé fort mauvais du peuple, qui estima la dignité de la chose publique estre par luy mesprisée & contemnée, à voir le peu de compte qu'il faisoit des principaux magistrats d'icelle, & du senat, & n'y eut homme de ceulx à qui il fust loisible de s'oster de là, qui ne s'en allast la teste baissée, avec une morne & triste taciturnité : tellement que luy mesme s'en appercevant, se retira sur l'heure en sa maison, là où retirant sa robbe d'alentour de son col, il cria tout hault à ses amis, qu'il estoit tout prest de rendre la gorge à qui la luy voudroit couper. Toutefois on dit que depuis pour s'excuser de ceste faulte, il allegua sa maladie, à cause que le sens ne demeure pas en son entier à ceulx qui sont subjects au mal caducque, quand ilz parlent de bout sur leurs piedz devant une commune, ains se trouble aisément, & leur prend soudain un esblouissement : mais cela estoit faulx. Car il avoit bien voulu se lever lors au devant du senat, mais Cornelius Balbus

l'un de ses amis, ou pour mieux dire, de ses flatteurs, qui se trouva lors auprès de luy, l'en engarda, en luy disant, « Ne te veux tu pas » souvenir que tu es Cæsar, & souffrir que lon » te face l'honneur & la reverence qui t'est » deuë »?

LXXIX. Oultre ces occasions de malvueillance & de mescontentement du peuple, survint encore de surcharge, la honte qu'il feit aux Tribuns du peuple, en telle maniere : Il estoit d'aventure lors la feste des Lupercales, laquelle plusieurs escrivent avoir anciennement esté propre & peculiere aux pasteurs, & qu'elle ressemble en quelque chose à celle que lon appelle la feste des Lyceiens en Arcadie. Comment que ce soit, à ce jour là y a plusieurs jeunes hommes & aucuns de ceulx mesmes qui lors sont en magistrat, qui courent tous nuds parmy la ville, frappans par jeu & en riant avec des courtoyes de cuyr à tout le poil, ceulx qu'ilz rencontrent en leur chemin, & y a plusieurs dames de bien & d'honneur qui leur vont expressement au devant, & leur presentent leurs mains à frapper, comme font les enfans de l'eschole à leur maître, ayant opinion que cela sert à celles qui sont grosses, pour plus aisément enfanter, & à celles qui sont steriles, pour devenir grosses. Cæsar regardoit ce passetemps, estant assis sur la tri-

bune aux harengues dedans une chaire d'or, en habit triumphal : & estoit Antonius l'un de ceulx qui couroyent ceste course sacrée, pource qu'il estoit lors consul. Quand donc il vint à entrer sur la place, le monde qui y estoit se fendit pour luy faire voye à courir, & luy s'en alla presenter à Cæsar un bandeau royal, que lon appelle diademe, entortillé d'un delié rameau de laurier, à laquelle presentation il se fit un batement de mains non gueres grand, de quelques gens que lon avoit expressement appostez pour ce faire : mais au contraire quand Cæsar le refusa, tout le peuple unanimement frappa des mains : & comme de rechef Antonius le luy representast, il y eut de rechef peu de gens qui declarassent en estre contents par leurs batemens de mains : mais quand il le rebouta pour la seconde fois, tout le peuple universel feit encore de rechef un grand bruit à force de battre des mains. Ainsi Cæsar ayant cogneu à ceste espreuve, que la chose ne plaisoit point à la commune, il se leva de sa chaire, commandant que lon portast ce diademe à Jupiter au Capitole : mais depuis on trouva quelques unes de ses images par la ville, qui avoyent les testes bandées de diademes à la guise de roys : & y eut deux des tribuns du peuple, Flavius & Marullus, qui les allerent arracher, & qui plus est,

trouvans

trouvans ceulx qui avoyent les premiers salué Cæsar ; roy, les feirent mener en prison, & le peuple à grosse foule alloit après batant des mains en signe de liesse, en les appellant Brutes, à cause que Brutus fut anciennement celuy qui dechassa les roys de Rome, & qui transféra la souveraine autorité & puissance, qui souloit estre en la main d'un seul prince, au peuple & au senat. Cæsar fut si fort irrité & courroucé de cela, qu'il deposa Marullus & son compagnon de leurs offices, & en les accusant injurioit quant & quant aussi le peuple, disant qu'ilz estoient véritablement Brutaux & Cumains, c'est à dire, bestes & lourdaux.

LXXX. A l'occasion dequoy le peuple adonc se tourna devers Marcus Brutus, lequel du costé de son pere estoit extrait & descendu de la race de ce premier Brutus, & du costé de sa mere, estoit de la maison des Serviliens, l'une des plus nobles & des plus anciennes de toute Rome, & si estoit nepveu & gendre de Marcus Cato. Mais les grands honneurs, grande graces & faveurs que luy faisoit Cæsar, le retenoyent & refroidissoient, que de luy mesme il ne conspirast la destruction & extermination de la monarchie, pource que non seulement il luy sauva la vie après la journée de Pharsale & la desfaite & fuitte de Pompeius, & la donna

aussi à sa requête à plusieurs autres de ses familiers & amis : mais encore monstra il , qu'il se fioit beaucoup en luy : car il luy avoit desja fait avoir la plus honorable præture ceste année là , & si estoit designé pour estre consul de là à quatre ans, l'ayant emporté devant Cassius , qui le briguoit à l'encontre de luy , par la faveur de Cæsar , qui dit en ceste brigue , ainsi que lon a laissé par escrit : « Il est vray que Cassius » allegue de plus justes remonstrances & raisons , » mais pourtant si ne passera il point devant » Brutus ¹ ». Et un jour comme quelques uns le luy accusassent , ainsi que la conjuration se menoit & ourdissoit desja , il ne leur voulut point adjouster de foy , ains touchant son corps avec la main leur respondit ; « Brutus attendra ceste » peau ». Comme voulant dire, que Brutus pour sa vertu estoit bien digne de dominer , mais neantmoins que pour ambition de dominer il ne se montreroit jamais ingrat , ny ne commettrait jamais une meschanceté. Toutefois ceulx qui demandoyent la mutation , & qui ne regardoyent que celuy la seul , ou à tout le moins qui le regardoyent plus que nul autre, ne s'ozoyent adresser à luy pour luy dire de bouche ce qu'ilz

¹ Ce trait est rapporté dans la Vie de Brutus ; mais par rapport à la præture urbaine , que Plutarque désigne , quelques lignes plus haut , par ces mots , la plus honorable.

desiroient, mais la nuit ilz emplissoient son tribunal & siege prætorial; là où il tenoit son audience, de petits billets & escritteaux; dont la plupart estoit de telle substance, « Tu dors, » Brutus, & n'es pas vray Brutus ». Pour lesquels escritteaux Cassius sentant que le desir d'honneur s'eschauffoit de plus en plus en luy, sollicita plus instamment que jamais ceulx¹ qui escrivoient ces petits billets, ayant luy même quelques causes particulieres de haine à l'encontre de Cæsar, lesquelles nous avons déclarées en la vie de Brutus. Aussi l'avoit Cæsar pour suspect : tellement qu'un jour parlant à ses plus feaux, il leur demanda, « Que vous semble il que Cassius vueille faire? Car quant à » moy, il ne me plaist point de le voir ainsi » passe ». Une autre fois on calumnia envers luy Antonius & Dolabella, qu'ilz machinoyent quelque nouvelleté à l'encontre de luy, à quoy il respondit, « Je ne me deffie pas trop de ces » gras icy, si bien peignez & en si bon point, » ains bien plus tost de ces maigres & passes là, » entendant de Brutus & de Cassius ».

LXXXI. Mais certainement la destinée se peut bien plus facilement prévoir, que non pas éviter, attendu mesmement qu'il en apparut des signes

¹ Il faut lire, je crois, il le sollicita luy même en particulier; & supprimer, ceulx qui escrivoient ces petits billets.

& presages merveilleux : car quant à des feux célestes & des figures & fantasmes que lon veid courir çà & là parmy l'air : & aussi quant à des oyseaux solitaires, qui en plein jour se vindrent poser sur la grande place, à l'adventure ne meritent pas telz pronostiques d'estre remarquez ny declarez en un si grand accident. Mais Strabon le philosophe escrire, que lon veid marcher des hommes tous en feu, & qu'il y eut un valet de soudard qui jetta de sa main force flamme, de maniere que ceulx qui le veirent penserent qu'il fust bruslé, & quand le feu fut cessé, il se trouva qu'il n'avoit eu nul mal. Cæsar mesme sacrifiant aux dieux, il se trouva une hostie immolée qui n'avoit point de cuer, qui estoit chose estrange & monstrueuse en nature, pource que naturellement une beste ne peult vivre sans cuer : & y en a beaucoup qui comptent, qu'il y eut un devin qui luy predict & l'advertit long temps devant, qu'il se donnast bien de garde du jour des Ides de Mars, qui est le quinzieme, pource qu'il seroit en grand danger de sa personne. Ce jour estant venu, il sortit de sa maison pour s'en aller au senar, & saluant le devin, luy dit en riant, « Les Ides de Mars sont venues » : Et que le devin luy respondit tout bas, « Elles sont venues voirement, Cæsar, mais elles ne sont pas passées ». Et le jour de devant chez Marcus Lepidus, qui

luy donnoit à soupper, il signoit d'aventure des lettres missives, comme il faisoit souvent, & oyant un propos que les autres meirent en avant, quelle sorte de mort estoit la meilleure & la plus desirable : il cria tout hault, en prevenant les autres, « Celle que moins on attend ». Après le soupper estant couché auprès de sa femme, comme il avoit accoustumé, tous les huys & fenestres de sa chambre s'ouvrirent d'elles mesmes, & s'estant esveillé en sursault tout emeu du bruit & de la clarté de la lueur, qui rayoit dedans la chambre, il ouyt sa femme Calpurnia dormant d'un profond sommeil, qui jettoit quelques voix confuses, & quelques gemissemens non articulez, & que lon ne pouvoit entendre : car elle songeoit, que lon l'avoit tué, & qu'elle le lamentoit, le tenant mort entre ses bras : toutefois il y en a qui disent que ce ne fut point ceste vision qu'elle eut, mais que par ordonnance du senat il avoit esté apposé au comble de sa maison, pour un ornement & une majesté, comme quelque pinnacle, ainsi que Livius mesme le recite : Calpurnia en dormant songeoit qu'elle le voyoit rompre & casser, & luy sembloit qu'elle le regrettoit & en ploroit, à l'occasion de quoy, le matin quand il fut jour elle pria Cæsar, qu'il ne sortist point pour ce jour là dehors, s'il estoit possible, & qu'il re-

meist l'assemblée du senat à un autre jour, où bien s'il ne se vouloit mouvoir pour ses songes, à tout le moins qu'il enquist par quelque autre maniere de divination, ce qui luy devoit ce jour là advenir, mesmement par les signes des sacrifices. Cela le meit en quelque souspeçon & quelque des fiance, pource que jamais au paravant il n'avoit apperceu en Calpurnia aucune superstition de femme, & lors il voyoit qu'elle se tourmentoit ainsi fort de son songe : mais encore quand il veit qu'après avoir fait immoler plusieurs hosties les unes après les autres, les devins luy respondoient tousjours que les signes & presages ne luy en promettoient rien de bon, il resolut de envoyer Antonius au senat pour rompre l'assemblée.

LXXXII. Mais sur ces entrefaites arriva Decimus Brutus, surnommé Albinus, auquel Cæsar se fioit tant, que par testament il l'avoit institué son second heritier, & neantmoins estoit de la conjuration de Cassius & de Brutus, & craignant que si Cæsar remettoit l'assemblée du senat à un autre jour, leur conspiration ne fust esventée, se moqua des devins, & tena Cæsar, en luy remontrant qu'il donnoit occasion au senat de soy mescontenter de luy & de le calumnier, par ce qu'il prendroit ceste remise comme pour un mespris, à cause que les senateurs

s'estoyent ce jour là assemblez à son mandement, & qu'ilz estoient tous prests à le declarer par leurs voix, roy de toutes les provinces de l'empire Romain hors l'Italie, en luy permettant de porter à l'entour de sa teste le bandeau royal par tout ailleurs, tant sur la terre que sur la mer, là où si maintenant quelqu'un leur alloit denoncer de sa part, que pour ceste heure ilz se retirassent chascun chez soy, & qu'ilz retournassent une autre fois quand Calpurnia auroit songé de meilleurs songes, que diroyent les malvueillans & les envieux, & comment pourroyent ilz recevoir & prendre en payement les raisons de tes amis qui leur cuideroyent donner à entendre, que cela ne soit point servitude à eux, & à toy domination tyrannique ? toutefois si tu as (dit il.) du tout resolu d'abominer & derefter ce jourdhuy, encore seroit il meilleur au moins, que sortant de ta maison, tu allasses jusques là, pour les saluer, & leur faire entendre que tu remets l'assemblée à un autre jour. En luy disant ces paroles il le prit par la main, & le mena dehors. Il ne fut guetes loing de son logis, qu'il vint un serf estranger, qui feit tout ce qu'il peut pour parler à luy, & quand il veid qu'il n'y avoit ordre d'en approcher pour la foule du peuple, & la grande presse qu'il eut incontinent autour de luy, il s'alla jeter dedans sa maison,

& se meit entre les mains de Calpurnia, luy disant qu'elle le gardast jusques à ce que Cæsar fust de retour, pource qu'il avoit de grandes choses à luy dire : & un Artemidorus natif de l'isle de Gnidos, maistre de rhetorique en langue Grecque, qui pour ceste siene profession avoit quelque familiarité avec aucuns des adherens de Brutus, au moyen dequoy il sçavoit la plus part de ce qui se machinoit contre Cæsar, luy vint apporter en un petit memoire escript de sa main, tout ce qu'il luy vouloit descouvrir : & voyant qu'il recevoit bien toutes les requestes qu'on luy presentoit, mais qu'il les bailloit incontinent à ses gens qu'il avoit autour de luy, il s'en approcha le plus près qu'il peut, & luy dit : « Cæsar, » lis ce memoire cy que je te presente, seul & » promptement, car tu trouveras de grandes » choses dedans, & qui te touchent de bien » près ». Cæsar le prit, mais il ne le peut oncques lire pour la multitude grande des gens qui parloyent à luy, combien que par plusieurs fois il essayast de le faire : toutefois tenant tousjours le memoire en sa main, & le gardant seul, il entra dedans le senat. Les autres disent, que ce fut un autre qui luy presenta ce memoire, & que Artemidorus quelque effort qu'il feist, ne peut oncques approcher de luy, ains fut tousjours repoulsé tout au long du chemin.

LXXXIII. Or peuvent bien toutes ces choses estre advenues accidentellement , & par cas fortuit : mais le lieu auquel estoit lors assemblé le senat ayant une image de Pompeius , & estant l'un des edifices qu'il avoit donnez & dediez à la chose publique avec son theatre , monstroit bien evidemment , que c'estoit pour certain quelque divinité qui guidoit l'entreprise , & qui en conduisoit l'exécution notamment en ceste place là. Auquel propos on racompre que Cassius , un peu devant qu'ilz meissent la main à l'œuvre , jetta sa veüe dessus l'image de Pompeius qui là estoit , & l'invoqua tout bas à son aide , combien qu'autrement il adherast assez aux opinions d'Epicurus : mais le poinct du danger present le ravit & transporta sur l'heure hors de soy , engendrant en luy une passion soudaine au lieu des discours qui le mouvoyent , & ausquelz il adheroit quand il estoit en sens rassis. Quant à Antonius , pource qu'il estoit fidele à Cæsar , & fort & robuste de sa personne , Brutus Albinus¹ l'entreteint au dehors du senat , luy ayant commencé tout exprès un bien long propos. Ainsi comme Cæsar entra , tout le senat se leva au devant de luy par honneur : & adonc les uns des conjurez se meirent derriere sa litiere , les autres luy

¹ Dans la Vie de Brutus , c'est Caius Trebonius qui joue ce rôle.

allèrent à l'encontre de front , comme voulans interceder pour Metellus Cimber , qui requeroit le rappel de son frere estant en exil , & le suyvirent ainsi en le priant tousjours , jusques à ce qu'il se fust assis en son siege : & comme il rejettast leurs prieres , & se courrouceast à eulx les uns après les autres , à cause que d'autant plus qu'il les refusoit , d'autant plus ilz le pressoyent & l'importunoyent plus violement , à la fin Metellus luy prenant sa robbe à deux mains la luy avalla d'alentour du col , qui estoit le signe que les conjurez avoyent pris entre eux pour mettre la main à l'execution : & adonc Cascas luy donna par derriere un coup d'espée au long du col , mais le coup ne fut pas grand ny mortel , pource que s'estant troublé , comme il est vray-semblable , à l'entrée d'une si hardie & si perilleuse entreprise , il n'eust pas la force ny l'assurance de l'assener au vif. Cæsar se retournant aussi tost vers luy , empoigna son espée , qu'il teint bien ferme , & tous deux se prirent ensemble à crier : le blecé , en Latin , « O traistre meschant Cascas , que fais » tu » ? Et celuy qui l'avoit frappé , en Grec , « Mon frere aide moy ».

LXXXIV. A ce commencement de l'emeute , les assistans qui ne sçavoyent rien de la conspiration , furent si estonnez & si espriz d'horreur de voir ce qu'ilz voyoyent , qu'ilz ne sceurent

onques prendre party ny de s'en fouir, ny de le secourir, non pas seulement d'ouvrir la bouche pour crier : mais ceulx qui avoyent conjuré sa mort, l'environnerent de tous costez les espées nues en leurs mains, de sorte que de quelque part qu'il se tournast, il trouvoit tousjours quelques uns qui le frappoyent, & qui luy presentoyent les espées luyfantes aux yeux & au visage, & luy se demenoit entre leurs mains ne plus ne moins que la beste sauvage acculée entre les veneurs : car il estoit dit entre eulx, que chascun luy donneroit un coup & participeroit au meurtre : à l'occasion dequoy, Brutus mesme luy en donna un à l'endroit des parties naturelles : & y en a qui disent qu'il se defendit tousjours & resista aux autres, en trainnant son corps çà & là, & en criant à pleine voix, jusques à ce qu'il apperceut Brutus l'espée traitte en la main : car alors il tira sa robbe à l'entour de sa teste, sans plus faire de resistance, & fut poulcé, ou par cas d'aventure, ou par expès conseil des conjurez, jusques contre la base, sur laquelle estoit posée l'image de Pompeius, qui en fut toute ensanglantée : de maniere qu'il sembloit proprement qu'elle presidast à la vengeance & punition de l'ennemy de Pompeius, estant renversé par terre à ses pieds, & tirant aux traicts de la mort pour le grand nombre de playes qu'il avoit : car on

dit qu'il eut vingt & trois coups d'espées, & y eut plusieurs des conjurez, qui en tirant tant de coups sur un seul corps s'entreblecerent eulx mesmes.

LXXXV. Ayant donques esté Cæsar ainſi tué, le Senat, quoy que Brutus ſe preſentaſt pour vouloir rendre quelque raiſon de ce qu'ilz avoyent fait, n'eut jamais le cueur de demourer, ains ſ'enfouit à travers les portes, & remplit toute la ville de tumulte & d'effroy, tellement que les uns fermoient leurs maiſons, les autres abandonnoient leurs boutiques & leurs bancs, & ſ'en alloient courans ſur le lieu pour voir que c'eſtoit, les autres l'ayans veu ſ'en retournoient chez eulx. Mais Antonius & Lepidus, qui eſtoient les deux plus grands amis de Cæſar, ſe deſrobbans ſecretement, ſ'en fouirent en autres maiſons que les leurs. Et Brutus & ſes confors eſtans encore tous bouillans de l'exécution de ce meurtre, & monſtrans leurs eſpées toutes nues, fortirent tous enſemble en troupe hors du Senat, & ſ'en allerent ſur la place n'ayans point viſages ny contenance d'hommes qui fouiſſent, ains au contraire, fort joyeux & aſſeurez, admonéſtans le peuple de vouloir maintenir & defendre ſa liberté, & ſ'arreſtans à parler aux gens de qualité qu'ilz rencontroyent par le chemin, dont il y en eut aucuns qui les

luyvirent, & se meslerent parmy eulx, comme s'ilz eussent esté de la conjuration, pour en usurper à faulses enseignes partie de l'honneur : entre lesquelz furent Caius Octavius, & Lentulus Spinther, qui depuis furent tous deux puniz de leur vaine convoitise de gloire par Antonius & par le jeune Cæsar, qui pour ceste cause les feirent mourir, & si encores ne jouïrent ilz onques de la gloire, pour l'ambition de laquelle ilz mouroyent, par ce que lon ne creut jamais qu'ilz eussent esté du nombre des conjurez : car ceulx qui les en punissoyent, vengeoyent plus tost en eulx la voulunté que l'effect. Le lendemain Brutus avec ses consors descendit en la place pour parler au peuple, qui luy donna audience telle, qu'il apparoiſſoit qu'il ne reprouvoit ny n'approuvoit trop ce qui avoit esté fait : car il monstroït par un grand silence morne, que d'un costé il avoit pitié de Cæsar mort, & de l'autre costé il reveroit la vertu de Brutus. Mais le senat decerna une abolition generale de tout le passé : & pour contenter & accorder un chascun, ordonna aussi que la memoire de Cæsar seroit honorée comme d'un dieu, & qu'il ne seroit changé aucune chose de ce qu'en son vivant il auroit ordonné, & decerna aussi des provinces & des honneurs convenables à Brutus & à ses adherens, de maniere que chascun esti-

moit les choses estre fort bien composées & remises en très bon estar.

LXXXVI. Mais quand on vint à ouvrir le testament de Cæsar, auquel on trouva qu'il leguoit à chasque citoyen Romain un honeste present d'argent, & que le commun peuple veid son corps qui fur porté à travers la place, tout decouppé à coup d'espée, adonc n'y eut il plus d'ordre de contenir & arrester la commune, qu'ilz ne feissent un amas de bois autour de ce corps, des tables, bancs, establis & barrieres qu'ilz alloient arracher çà & là par la place : & mettans le feu dedans, le bruslerent¹ : puis quand le feu fut bien allumé, ilz prirent des tisons ardens & s'en allerent ès maisons de ceulx qui l'avoient occis pour les brusler : les autres coururent par toute la ville cherchans s'ilz en pourroyent trouver quelqu'un pour le deschirer en pieces : toutefois ilz n'en rencontrerent pas un, pource qu'ilz s'estoyent très-bien renfermez, munis & fortifiez dedans leurs maisons. Mais il y eut un des familiers de Cæsar nommé Cinna, qui la nuit de devant avoit eu en dormant une vision estrange, pource qu'il luy fut advis que Cæsar le convioit à soupper, & que luy n'y vouloit point aller, toutefois que le prenant par la main il l'y avoir mené malgré luy : & lors ayant en-

¹ Grec, dans l'endroit même.

tendu comme le peuple brusloit son corps sur la place, il partit de son logis pour cuider aller faire honneur aux funerailles du defunct, encore que la vision qu'il avoit eüe la nuit précédente le teinct en quelque doute, de sorte qu'il en avoit la fievre. Estant arrivé sur la place, il y eut quelqu'un de la commune qui demanda qui il estoit : il fut nommé par son nom : ce premier le dit à un autre, & cest autre encore à un autre de main en main, de maniere que le bruit courut incontinent parmy le peuple, que c'estoit un de ceulx qui avoyent occis Cæsar, à cause qu'il y en avoit un entre les conjurez qui s'appelloit aussi comme luy, Cinna, & pensans que ce fust il, ilz se ruerent incontinent sur luy par telle fureur, qu'ilz le desmembrerent en pieces sur la place mesme. Cela espouventa Brutus & Cassius plus que nulle autre chose, à l'occasion dequoy peu de jours après ilz sortirent de la ville, & quant à ce qu'ilz feirent & qu'ilz souffrirent depuis jusques à leur mort, nous l'avons amplement escrit en la vie de Brutus.

LXXXVII. Au demourant Cæsar mourut en l'aage de cinquante & six ans ¹, & ne survécut Pompeius gueres plus de quatre ans, n'ayant receu autre fruit de celle domination & principauté qu'il avoit si ardemment prochassée toute

¹ L'an de Rome 710.

sa vie, & à laquelle il estoit en fin parvenu avec tant de travaux & tant de dangers, qu'un nom vain seulement, & une gloire qui luy suscitoit l'envie & la haine de ses citoyens : toutefois celle grande fortune & faveur du ciel qui l'avoit accompagné tout le long du cours de sa vie, luy continua encore en la vengeance de sa mort, poursuivant & par mer & par terre tous ceulx qui avoyent conspiré contre luy, tant qu'il n'en demoura pas un seul à punir de tous ceulx qui de faict ou de conseil avoyent participé à la conspiration de sa mort. Mais de toutes les choses qui en advindrent aux hommes en la terre, la plus esmerveillable fut celle de Cassius, lequel après avoir esté desfait en bataille en la journée de Philippes, se tua luy mesme de la propre espée dont il avoit frappé Cæsar : & de celles qui advindrent au ciel, la grande comete qui apparut fort evidente sept nuits continuelles après sa mort, & aussi l'offuscation de la lumiere du soleil, lequel tout le long de ceste année là, se leva tousjours passe & non jamais avec sa clarté estincellante, dont sa chaleur en fut aussi tousjours fort foible & debile, & l'air consequemment tout le long de l'année gros, tenebreux & espez, pour l'imbecillité de la chaleur qui ne le pouvoit resouldre ny subtiliser : ce qui fut cause que les fruiçts de la terre en demourerent

mourerent cruds & imparfaits, se flettriffans avant que pouvoir meuir pour la froideur de l'air.

LXXXVIII. Mais sur tout la vision qui s'apparut à Brutus, monstra evidemment que l'occision n'en avoit point esté agreable aux dieux : & fut la vision telle : Brutus étant prest à passer son armée de la ville d'Abydos en la coste opposite qui est vis à vis, se reposoit comme de coustume la nuit dedans sa tente, ne dormant point encore, ains pensant à ses affaires & à l'advenir : car on dit que ce a esté l'un des plus vigilans capitaines & moins subject à dormir qui fut onques, & qui de sa nature veilleoit le plus : il luy fut advis qu'il entendit quelque bruit à la porte de sa tente, & regardant celle part à la lumiere d'une lampe qui se baissoit desja fort, il apperceut une vision horrible, comme d'un homme de grandeur extraordinaire & excessive, & hideux de visage, dequoy il s'effroya du commencement : mais quand il veid que ce fantasme ne luy faisoit ny ne luy disoit rien, ains se tenoit devant luy tout coy auprès de son liét, il luy demanda à la fin qui il estoit : le fantasme luy respondit, « Je » suis ton mauvais ange & esprit, Brutus, & » tu me verras près la ville de Philippes ». Brutus luy repliqua, « Et bien je t'y verray donc » ; & incontinent l'esprit disparut. Depuis se trouvant en bataille près ceste ville de Philippes à l'en-

contre d'Antonius & de Cæsar, à la première journée il gagna la victoire, & rompant tout ce qu'il trouva de front au devant de luy, chassa jusques dedans le camp du jeune Cæsar, qu'il pillà : mais la nuit de devant le jour auquel il devoit donner la seconde bataille, ce même fantôme s'apparut une autre fois à luy sans luy mot dire : parquoy Brutus entendant bien que son heure estoit venue, se jeta la teste baissée à tous les perilz & dangers de la bataille, & neantmoins n'y peut encore mourir en combattant : ains voyant ses gens devant soy rompus & desfaits, il se retira à la course sur une croupe de rocher coupé, là où se jettant de l'estomach sur la pointe de son espée nue, avec l'aide de l'un de ses amis qui aida le coup, à ce que lon dir, il se percea le corps d'oultre en oultre, & mourut sur le champ.

LA COMPARAISON

D'ALEXANDRE LE GRAND AVEC JULIUS CÆSAR,

PAR DU HAILLAN*.

QUAND on considère Alexandre & Cæsar, c'est chose bien facile à dire, & plus aisée encores à prouver, que ce sont les deux plus braves chefs

de guerre qu'on puisse remarquer ès histoires, que leurs vertus hors du combat sont excellentes, & ont grand rapport ensemble : que tous deux ont esté de très noble race, doctes, eloquens, liberaux, moderez, très afectionnez envers leurs amis & serviteurs : ardemment cheris & obeis des capitaines & soldats armées, debonnaires envers leurs ennemis : que dès leurs jeunes ans ils ont faiçt belle preuve de la future grandeur de leurs courages : que leurs exploits sont du tout admirables : que ce sont deux miracles en l'art militaire, soit qu'on regarde la brieveté du temps de leurs guerres, & les pays qu'ils ont traversez, comme en un instant, soit qu'on jette l'œil sur les ennemis par eux desfaits, les villes & provinces conquises, leur sagesse, vaillance & bonheur, n'ayans jamais esté repoussez, ains portans toujours la victoire en leurs mains, & faisans valoir leur avantage avec une adresse asseurée. Tous deux se sont trouvez en des dangers merveilleux de leurs personnes, l'un en la ville des Malliens, l'autre en Espagne contre le fils de Pompeius. Tous deux ont esté avertis bien expressément de leur mort par les devins lesquels ils aimoient & respectoient : cependant tous deux se sont comme jettez à yeux clos au danger dont on les vouloit retirer.

II. Mais qui entre en particuliere consideration

de la vie de chascun d'eux , il se trouve, en une campagne dont l'œil ne peut marquer le bout ni les divers chemins qui s'y presentent , & demeure esbloui , ne sachant où se rendre, tant il void de choses à la fois. S'il vient à mettre une vie devant l'autre , il entre lors en un Ocean de discours , & ne sçait laquelle des deux choisir , ni à quel port tendre pour se descharger de celle ci devant celle là. Neantmoins pour encourager quelqu'un à faire voile en ceste mer , voguons au long du bord : & (pour parler sans figure) voyons en quoy l'un devance l'autre, pour laisser au lecteur son jugement libre sur ce que nous en dirons. Pour le present je traiterai en peu de paroles de ce qu'on peut observer de plus digne de memoire en l'adolescence de l'un & de l'autre , de leurs exploits de guerre , de leurs vices & vertus , de leur mort & de ce qui s'en est ensuivi.

III. Je plaide premierement pour Alexandre , & sans toucher à sa race , ni à sa beauté , ni à ce qu'on dit de sa charnure , tout cela estant de nulle consequence au prix de la vertu : sa continence envers les femmes & ce qu'il prenoit fort sobrement les plaisirs du corps condamne tant plus les excez que commit Cesar , estant jeune , faisant & souffrant des ordures qu'il ne faut pas remuer davantage. L'ambition d'Alexan-

dre estoit merueilleusement noble, tesmoin ce qu'il dit de la course des jeux Olympiques, ses devis avec les ambassadeurs de Perse, & la plainte qu'il faisoit à ses compagnons que son père ne lui lairoit rien à conquerir, au lieu que Cesar après avoir croupi quelque temps en Nicomedie & en Grece se vint jetter entre les bras de la commune à Rome, faisant du liberal & du harengueur pour gagner les uns & les autres, briguant les petites charges pour s'emparer finement des grandes : bref suivant des voyes tout autres qu'Alexandre qui tenoit le grand chemin royal de la vertu, pour estre un jour l'honneur du monde. Aussi eut il le plus docte de tous les hommes pour precepteur, & se monstra par efet très digne disciple d'Aristote : mais Cesar tiré par son naturel & par les tyranniques mœurs de son temps print à la malheure pour lui & pour son païs une teinture d'opiniaistreté & d'ambition du tout insupportable, qui fut cause de sa mort. L'amour qu'Alexandre porta dès son enfance aux bonnes lettres & aux hommes doctes l'esleve par dessus beaucoup de princes. Cest honneur qu'il faisoit au poëte Homere retourne à lui mesmes. Combien sont louables ses courtoisies & largesses à l'endroit de Diogenes, Xenocrates & autres ? A l'oposite, Cesar semble n'avoir gueres tenu conte de personne que de soy mesme : ou s'il a respecté

quelques uns , s'il a donné l'or & l'argent à poignées , ça esté afin d'acheter les hommes & s'en servir de degrez pour monter là où il pretendoit , plustost que pour autre consideration.

IV. Or comme on peut appeller l'un & l'autre ,

Sage en conseil & vaillant au combat ,

Voire dire que c'est leur vrai titre d'honneur , & l'avantage qu'ils ont par dessus tous ceux qui les ont devancez & precedez , voions un peu si lon peut point particulierement qualifier Alexandre ,

Rude guerrier , combatans de pied stable
Aux ennemis en armes redoutable ,

comme dict Æschilus : car que fut toute sa guerre en Asie après la mort de Philippus , que tempestes , chaleurs extremes , rivières profondes infiniment , des excessives hauteurs de montagnes , des bestes de grandeur efroiable à voir , des façons de vivre sauvages , des changemens de gouverneurs à tous propos , trahisons & rebellions d'aucuns ? Au commencement de son voyage la Grece se debatoit encore pour la souvenance des guerres que Philippus lui avoit faites : les villes se ralioient : la Macedoine enclinoit à quelques remuemens : divers peuples , près & loin , estoient au guet atendans que feroient leurs voisins : l'or & l'ar-

gent de Perse coulant ès bourses des orateurs & gouverneurs du peuple en chaque ville suscitoit le Peloponese : les thresors & cofres de Philippus estoient espuisez , & y avoit de grandes dettes. Maugré tous ces broüillis , & parmi la pauvreté un jeune homme qui ne faisoit que sortir d'enfance osa bien mettre en son entendement la conquête de l'Asie voire de l'Empire de tout le monde , avec trente mille pietons & quatre mille chevaux , ou (comme les autres tiennent) avec quarante cinq mille hommes de pied & cinq mille cinq cents de cheval : n'ayant pour entretenir cela que quarante deux mille escus contant , ou (selon que Duris l'escrit) provision de vivres & d'argent pour trente jours seulement.

V. Mais il estoit muni de magnanimité , de temperance , de prudence & de vaillance , estant plus secouru en ceste entreprise martiale de ce qu'il avoit appris de son precepteur. Aristote , que de ce que lui avoit laissé son pere Philippus. Il estoit armé d'une juste querelle contre les Perses ennemis jurez de la Grece , à laquelle ils avoient fait une infinité de torts. Sa magnanimité & vaillance s'est monstrée en tous ses combats , soit en bataille rangée , soit en assaux & prises de villes , sans y espargner nullement sa personne , ayant esté grievement blecé en plusieurs combats. Quelles vaillances fit-il

en la ville des Malliens , lui seul contre tant de Barbares ? De quelle constance encourageoit-il ses chirurgiens à lui tirer un trait fiché dans les os de sa poitrine ? Nul , dit-il , ne se montre lasche ni coïard , non pas pour ma vie mesme : je ne sçaurois penser qu'on croye que je ne craigne point la mort , si on la craint pour moi. Or d'avoir fait ces choses en douze ans au plus , & traversé victorieux la plupart du monde , c'est une louange surpassant toute pensée humaine. Cesar au contraire ayant fait ses aprests de longue main , trouve Crassus tout à propos pour respondre des dettes qu'il avoit faites afin de corrompre la ville de Rome : puis ayant brassé une très pernicieuse ligue avec Pompeius prend les armes & entre en Gaule , où ses ruses lui servirent pour le moins autant que ses armes , cependant il avoit ses entremetteurs , à l'aide desquels il mit en fin sans dessus dessous la republique Romaine.

VI. Mais Alexandre n'est pas tant admirable en ce qu'il défit par prouesse ses ennemis , qu'en une infinité de sages & vertueux deportemens parmi les armes , où il se monstra philosophe par efet , dequoy il est bon d'alleguer quelques exemples qui nous tireront au beau discours des vertus de ce prince , surpassant Cesar en cest endroit. Donque on void sa prouesse accompagnée d'une grande justice , une atrempance douce ,

une excellente bonté , un bel ordre & prudence
 exquise , conduisant toutes choses par sens rassis
 & meur jugement. A peine sçauroit on discerner
 en ses gestes , cela est un fait de vaillance , cela
 d'humanité , cela de patience : ains tout exploir
 de lui , semble avoir esté meslé & composé de
 toutes les vertus ensemble. Bien est il vrai que
 tousjours en chaque action il y a une vertu emi-
 nente par dessus les autres : mais cela les pousse
 & dresse à mesme fin. On void ès faits d'Ale-
 xandre que sa vaillance est humaine , & son
 humanité vaillante , sa liberalité mesnagere , sa
 colere aisée à apaiser , ses amours temperez ,
 ses passetemps non oisifs , ses travaux gracieux.
 Qui est celui qui a meslé la feste parmi la guerre
 & les expeditions militaires parmi les jeux ? Qui
 a entrelassé parmi les sieges des villes , parmi
 les escarmouches & combats , les joyeusetez , les
 banquets , & les chansons nuptiales ? Qui fut
 onques plus ennemi de ceux qui font injustice ,
 ne plus gracieux aux affligez ? Qui fut jamais plus
 aspre aux combatans ou plus equitable aux sup-
 plians ? Rapportons ici l'apophthegme de Porus ,
 lequel amené prisonnier à Alexandre , & enquis
 par lui comme il vouloit qu'on le traitast , res-
 pondit , en roy. Et comme Alexandre poursui-
 vit , demandant s'il vouloit rien dire davantage.
 Non , dit-il , car tout est compris sous ce mot-

là. Aussi peut-on en tous les faits d'Alexandre, envers amis & ennemis, au commencement, en la suite & fin de sa vie ajouter ce refrain, en sage. Comment a il vécu? En sage. Comment s'est-il comporté en tous ses exploits de guerre? En sage. Comment a-t-il conversé en public & en particulier? En sage.

VII. Il a quelques fautes en ses deportemens, & nous n'oublirons pas à en parler : mais comme toutes reigles ont des exceptions qui ne les abolissent pas pourtant, & une lentille ou verruë n'estendra pas les perfections d'un visage autrement très beau : aussi les imperfections & folies d'Alexandre ne peuvent lui ôter cet honneur que les sages lui attribuent. Si nous voulions en ajouter ici les exemples il nous faudroit descrire ce que Plutarque en a si doctement & succinctement recueilli de tant de bons auteurs qui ont pris plaisir à faire en la vie d'Alexandre ce qu'on estime Xenophon avoir fait en Cyrus, à savoir de proposer à tous hommes le patron d'un prince accompli en vertus. Et au lieu que Cesar soüilla sa vie d'un continuel violent desir de subjuguier sa patrie, commettant beaucoup plus grand crime en ses dernieres guerres & sur la fin de sa vie que s'il eut habité charnellement avec sa propre mere, comme aussi ceste illusion dannable le tourmenta la nuit avant

qu'il entraist en Italie pour violer la liberté de Rome : Alexandre ne fut poussé que de la vertu seule à commencer une guerre digne d'un grand roy, ne visant pas à ce but de mettre le pied sur la gorge aux Grecs, ains de ranger tout le monde sous un paisible & heureux gouvernement. Ses guerres ne firent point pleurer les Grecs : Cesar remplit sa patrie de feux & de larmes. Alexandre tenant ses soldats en devoir, & ne permettant à ceux qui le suivoient de faire des desordres, à l'aide de ses amis donta & civiliza les Barbares. Cesar ruina une partie de ses amis, fut abandonné des autres, emplit Rome d'insolence militaire, & y sema les graines d'infinies confusions qui sortirent de son sang.

VIII. Mais quelle a esté la continence d'Alexandre, à qui toutes choses succedoient tant à souhait? Il ne veut pas mesme voir les dames prisonnieres, & fut autant vainqueur de leurs beautez par temperance (quoi qu'il fut en fleur d'aage & de robuste complexion) comme de la prouesse des hommes par sa vaillance : mesmes il fit moins de conte de celles qu'on lui monstra, que de celle qu'il ne vit onques : & là où il estoit gracieux à toutes sortes de gens il se monstroit rebours à ceux qui estoient beaux. Comment rabroüa-il ce Philoxenus qui vouloit lui acheter deux garçons d'un marchand de Tarente? S'il s'ena-

moura de Roxane, & de Statira, ce fut pour les espouser legitimement & pour le bien de ses affaires, non pas comme Cesar qui s'est trop oublié en ces matieres-là. Mais au reste combien est louable Alexandre qui ne veut point desrober la victoire : combien est son courage genereux de n'accepter les ofres de Darius, ains vouloir que la Grece commandast à l'Asie, comme il le faloit aussi ? Quelle diligence fit-il à poursuivre son ennemi ? Et d'autrepart quelle compassion eut-il de l'indigne mort d'icelui ? Comment chastia il le traistre Bessus ? Tous ses deportemens precedens monstrent qu'il avoit l'ame bonne & vraiment royale : qu'il n'aimoit les traistres ni la trahison, & ne vouloit avoir le dessus qu'avec honneur. Cesar poursuivit bien Pompeius, mais il ne chastia pas les meurtriers, sinon après qu'il eut descouvert qu'ils conspiroient contre lui.

IX. Pour achever ce que nous avons à dire pour Alexandre, on peut recueillir du discours de sa vie que la providence divine fit present des vertus les plus aparentes ès autres hommes illustres Grecs & Romains à ce prince-ci, lequel outre sa pieté, justice, equité, prudence, suffisance, conduite, experience, sagesse, vaillance, continence & felicité, en ses adversitez se fortifie d'esperance, en prosperité, environné

de flatteurs, ne s'enyvre point de sa grandeur humaine, se reconnoit mortel & fait joug en diverses sortes, est patient à merveilles, supporte les mesdisances de ses familiers, ne met pas la main à la plume ou à l'espée pour se venger de ceux qui l'ofensoient, estimant chose digne d'un roy souffrir d'estre blasmé, & ouyr mal pour faire bien : demonstrent une affection cordiale & un grand honneur à ses amis, jusques à quiter ses commoditez necessaires pour l'amour d'eux, leur escrite fort familiarement, & avoir un soin special de leurs personnes & de leurs affaires. Il prouvoit ses serviteurs, paye aux creanciers six millions d'or deus par ses soldats, envoie d'Asie en Grece pareille somme pour faire rebastir des temples aux dieux au lieu de ceux que les Perles avoient demolis : brief au milieu des affaires il montre une adresse & valeur invincible, sans succomber à difficulté quelconque. Vrai est que Cesar a beaucoup de choses communes avec lui en cet endroit comme aussi nous en parlerons ci-après : ce nonobstant Alexandre se maintient ferme & d'une façon qui ne se donne pas en prise au vice, ni ne semble pas tant souiller ses beaux habits que l'autre.

X. On reproche à Alexandre entr'autres vices l'ivrongnerie & la colere. Je ne veux excuser ni l'un ni l'autre : mais quant à ce dernier, comme

il n'y a eu prince qui ait plustost reconnu ses fautes après les avoir commises par ceste vehemence qui lui estoit aucunement naturelle, on peut aussi dire que Clitus, Callisthenes & quelques autres qui sentirent l'effort de son courroux en estoient le principal motif, & avoient attiré le mal sur eux. Et à la verité ce n'est pas raison qu'un serviteur caressé par son maistre devienne si haut à la main qu'il ne vueille rien endurer, & aille donner de la teste à son esciant contre la pierre qu'il pouvoit eviter aisement, s'il eut daigné contenir un peu sa langue & faire place à la vehemence de celui qui le peut renverser en un instant. Chacun condamnera le mauvais traitement qu'Alexandre fit aux soldats Indiens sortis d'une ville sur la parole qu'il leur avoit donnée. Et quant aux philosophes, c'est un fait dont on peut aucunement debatre, iceux ayans deu estre un peu plus retenus en leurs pratiques pour faire un plus long service à leur patrie, sans trop irriter un puissant & victorieux ennemi. Quant à la nation des Cosséiens qu'il extermina toute pour sacrifice des funerailles de Hephestion, c'est une grande & inexcusable faute, quelque couleur qu'on lui vueille donner.

XI. Mais les gracieux traitemens faits à Taxiles, à Porus, à tant de nations subjuguées, à tant de villes prises, les grands & divers hon-

neurs qu'il departit aux capitaines de son armée, & le cours ordinaire de sa vie debonnaire à merveilles r'habillent aucunement ses playes de colere non premeditée & de douleur excessive contre les particuliers : ce qu'il faut distinguer d'avec l'estrange haine que Cesar couvoit en son cœur contre tous ceux qui faisoient teste à ses desseins, sans espargner personne : & ce qu'il pardonna à quelques uns devant & après la victoire, fut pour son avancement, & non pour amitié qu'il leur portast : car il fit mourir en Afrique grand nombre de ceux qui lui estoient suspects, & n'espargna pas mesme Caton après sa mort. Quant aux larmes qu'il jetta, prenant le cachet de Pompeius, & ne voulant regarder la teste d'icelui, ni Theodorus qui la lui presentoit, au contraire favorisant les serviteurs & amis du defunct, & escrivant de belles lettres à Rome, cela s'appelle baïser son ennemi mort : & les actes precedens & suivans peuvent monstrez qu'il y avoit bien de la tragicomedie & de la ceremonie en tout cela, encores qu'au reste ils avoient eu tant d'affaires à demesler ensemble qu'il n'estoit pas possible que quelque reste de l'ancienne cognoissance se rencontrant lors au cœur n'esmeust du debar au dedans, comme aussi cela avient aux hommes de gros cœur que les passions contraires s'entrechoquent & expriment plus au dehors

qu'il n'en reste au dedans. Le malheureux Theodotus n'en meritoit pas moins que Bessus, mais Cesar n'estoit pas Alexandre, ni n'estoit allé en Egypte, sinon pour l'avancement de ses affaires, qui ne pouvoient bonnement s'acheminer que par l'aneantissement de Pompeius, dont estant venu à bout, le contentement secret qu'il en eut lui fit oublier son devoir en public.

XII. Quant à l'yvrongerie, aucuns l'ont voulu excuser, alleguans qu'Alexandre ne beuvoit pas beaucoup, mais demouroit longuement à table, & passoit le temps à deviser avec ses familiers à table toute la nuit jusques au matin, dont aucuns disoient que les ocupations pour la chose publique estoient cause, pour ce qu'il y vaquoit tout le long du jour : à raison de quoi n'ayant pas loisir d'estudier, quand la nuit estoit venue il prenoit plaisir à conferer & disputer avec les gens de lettres à table. Si Alexandre après avoir travaillé autour de tant d'affaires publiques, lesquelles il n'entremettoit jamais pour vaquer à ses plaisirs, se recreoit avec ses capitaines & beuvoit un peu largement, voire posé le cas qu'il ait passé mesure plus d'une fois, encores ne conclurai-je pas qu'il en fist mestier, & qu'il merite ce titre d'yvrongne. Je n'excuse point la faute qu'il commit à l'instigation de la courtisane Laïs, ni ce qu'il proposa un prix de six cens escus à ses capitaines

capitaines pour celui qui boiroit davantage : car ce n'est pas avec les verres & gobelets que les hommes se doivent monstrier robustes. Aussi mourut-il quarante un de ses capitaines en ce combat. Et quant à lui, certainement il se laissa trop legerement mener par Medius pour aller boire chez lui tout le soir & le lendemain, dont il prit sa maladie, durant laquelle il ne voulut s'abstenir de vin, qui fut cause que la fièvre ne le lascha point. Car ce qu'on dit qu'il fust empoisonné a peu d'apparence de raison. Soit donc que ce prince ait quelquefois excédé au boire, tant y a que le vin ne doit pas noyer ni ensevelir tant de vertus excellentes qui reluisent en lui en temps de paix & de guerre. L'intemperance de Cesar en ses voluptez & en son ambition insatiable, est une extremité sans comparaison plus violente & plus dangereuse que la cholère ni la coupe d'Alexandre.

XIII. Quant à sa mort, comme la durée & grandeur de sa gloire a esté pure & nette, exempte de tache & d'envie durant ceste vigueur d'age qu'il est demeuré au monde, après son trespas on void ceste gloire debout & marchant son pas acoustumé, lui estant regretté de toute son armée, de la Grece & de l'Europe, ayant fait naistre de ses soldats de belles branches royales, laissant le monde en partage à

quatre simples capitaines , desquels les descendants ont depuis duré l'espace de plusieurs années en possession de leurs parts : au lieu que Cesar ayant eu tant de peine à monter par chemins obliques au sommet d'une honteuse gloire & qui lui aqueroit la haine des principaux membres de la Republique , en fut incontinent precipité , peu plaint de ceux qui aimoient les bonnes loix & le bien de l'estat , lequel il laissa embrouillé de guerres civiles , & qui reprint un peu de lustre sous son neveu que la providence divine (ayant esgard à choses trop plus excellentes que n'est le ciel ni la terre) avoit designé en son conseil monarque du monde : comme au contraire Alexandre se trouva arresté de son heure en Babylone , dont il fut averti par les devins , le malin esprit ayant (selon l'efficace qu'il plait au juste juge lui donner) conjecturé & predit quelque chose de ce que Dieu avoit long temps auparavant revelé aux siens par son fidele Prophete. Mais encores après Auguste , l'empire Romain retomba en nouveaux malheurs , & ne cessa de branler de là en avant à ce qu'il fondit finalement sous sa propre pesanteur. Il en avint bien autant aux successeurs d'Alexandre , mais non par sa faute : ce qui rend sa memoire tant plus illustre. Voilà ce que je mets en avant pour lui.

XIV. Difons auffi quelque chose pour Julius Cesar, non point que je pretende ataindre à ce qui s'en pourroit dire, car il en faudroit de beaucoup plus habiles que j'en suis pour en venir à bout : mais pour en faire quelque comparaison avec Alexandre, de qui lisant un jour les faits en un certain livre, il se print à plorer, comme portant envie aux braves exploits de l'autre. Avisons donc s'il a point fait choses qui en aprochent, ou qui mesmes passent plus avant. Premièrement à tout ce qu'on peut remarquer de genereux en la jeunesse d'Alexandre, j'opose ce brave trait de Cesar à l'endroit des coursalres, qui estoient plus ses prisonniers que lui le leur, auxquels il paya tellement rançon qu'il leur fit paier leur folie de s'estre atachez à lui : tellement que sur terre ils sentirent qu'il parloit à bon escient à eux & comme leur juge sur mer, encores qu'il fut bien jeune entre leurs mains. Cela est un eschantillon du reste de sa vie, qui n'a sceu endurer de compagnon, encores moins de maistre : cet homme estant né à toutes choses grandes, & ne prenant plaisir qu'à surpasser tout ce qu'il y avoit de rare & de haut au monde, comme il se verifie par ses deportemens, depuis qu'il commença d'entrer en charges publiques jusques à la fin de ses jours.

XV. Or combien que ce ne soit pas peu de

chose de son éloquence, laquelle lui a fait de bien notables services en plusieurs facheuses rencontres : combien que ce soit un miracle que l'excellence de son style & sa grace à naïvement exprimer toutes choses en termes si purs & si beaux que les muses bien peignées ne voudroient ni ne pourroient parler plus exquisement : toutefois puis que c'est au bien faire que nous aimons mieux nous arrester qu'au bien dire, passons ce point pour supporter d'autant Alexandre, & voyons si c'est pas verité recevable de tous hommes d'entendement que Cesar est le plus excellent capitaine qui ait jamais esté au monde. Encores qu'Alexandre eut peu de moyens, si estoit il seigneur d'un grand royaume, avoit des hommes & du credit, mais Cesar sans patrimoine qui valut beaucoup, sans argent & avec peu d'hommes executa les plus grandes choses qu'il est possible de penser.

XVI. Alexandre eut afaire à des femmes & à des enfans : si on compare les peuples qu'il combatit avec ceux que Cesar renversa, non point en cinq ou six batailles, mais en plus de cinquante bien assignées, où il estoit tousjours plus foible en nombre d'hommes, mais le plus en valeur, jamais vaincu tousjours vainqueur ; sans avoir esté blecé rudement que je sçache, encores qu'il fut hasardeux jusques au bout,

& fit aussi bon marché de sa peau que le moindre soldat de ses legions. Et cependant on le trouva beaucoup plus retenu en ses entreprises qu'Alexandre qui court à force les dangers comme un torrent impetueux, lequel choque indifferemment tout ce qu'il rencontre : aussi estoit-il en la chaleur de son aage, & Cesar entra en affaires estant desja meur & bien avancé. De dire que ce soit grande louange à un chef de guerre de se fourrer à teste baissée parmi tous dangers, & ne mettre difference entre soi & un simple soldat, cela passe trop avant, & je trouve Cesar preferable à Alexandre en cet endroit : tant pour ne s'estre ainsi avancé qu'en très grande necessité, en telle sorte que son bonheur la targué de toutes parts, qu'aussi pource qu'Alexandre semble avoir cherché à se faire battre.

XVII. Dirai-je que Cesar a tué un million d'ennemis, a triomphé d'un million d'autres, & en a mis en route un nombre innombrable ? Qu'en moins de dix ans que dura la guerre de la Gaule, il força huit cents villes, & subjugia trois cents nations ? Si je specifie ses guerres faites en l'espace de quinze ans, il faudra un livre pour toucher seulement les lonanges qu'il a meritées. Les Suisses, Alemans, Gaulois, Romains, Egyptiens, Afriquains, Asiatiques, &

ses cinq triomphes de tant d'ennemis, si puissans, & invincibles selon l'apparence, font foi de sa valeur, & suffisance en toutes les parties qu'on scauroit requerir en un chef de guerre. Ayant pour pedagogues sa vertu & son bonheur il fait un amas de volonte de certains vaillans capitaines & soldats, les dresse si bien qu'il les acoustume à tous ses desirs, ayant une creance non pareille envers eux, les rend invincibles avec soi : & parmi ses continuels travaux lit, medite, dicte, escrit, & a laissé le plus beau livre que l'homme qui aime Mars & les muses fauroit manier. Ses harangues ont esté bien long temps en honneur entre les Romains. Et quant à respecter les hommes doctes, vaillans & vertueux, Cesar se fut renoncé soi mesme s'il eut fermé sa porte à telles gens. Les dangers qu'Alexandre traversa sont très grands : mais qu'est ce au prix de ceux de Cesar environné de si braves ennemis, & en tel nombre, comme estoient les Gaulois & les partisans de Pompeius ? Combien de mauvais tours lui ont esté joiez par aucuns des siens mesmes, sans que pourtant il s'en soit soucié ? Au contraire il a souffert que les uns ayent suivi telle route que bon leur sembloit, a envoyé le bagage & les biens aux autres, a tousjours respecté & honoré ses ennemis quand ils

ont desisté de lui faire teste , & par ses amis presenta des conditions assez raisonnables à Pompeius avant que venir aux mains.

XVIII. Au reste lors qu'il entra en guerres ; estant acablé de dettes & soulagé d'esperance , ayant dedans Rome les principaux pour adversaires , il entreprit de battre tous les ennemis qui estoient dehors & se faire voye maugré tout le monde à la souveraineté de Rome , laquelle il voyoit avoir besoin d'un bon maistre , non pas de tant de petis seigneurs. Sa prevoyance admirable lui servoit de toutes occurrences , n'ayant jamais esté frustré de chose qu'il ait entreprise , ains obtenant tousjours plus qu'il ne desiroit. Sa magnanimité pese plus que nulle autre vertu qu'on puisse remarquer en lui , qui est autant comme si on disoit que Cesar emporte à la balance tous les capitaines Grecs & Romains. Il s'est trouvé presques en toutes les batailles des guerres où il commandoit : n'a jamais esté battu qu'en ses lieutenans ; car l'escarmouche en laquelle Pompeius eut une fois du meilleur ne vaut pas la peine d'en parler , puis qu'il ne sceut pas suivre sa victoire. Et c'est une adresse singuliere favorisée d'un heur très rare que parmi tant de coups donnez Cesar n'en ait oncques receu. S'il a trouvé quelque faveur envers Crassus avant qu'aller à la guerre , cela ne lui doit point tour-

ner à blasme , veu qu'il a tousjours bien contenté ses amis , & mené à la raison ses ennemis , quoi qu'ils entreprinsent contre lui.

XIX. Si la justice acompagne la prouësse d'Alexandre , s'il a usé de moderation & de douceur en ses victoires , s'il se monstre prudent en ses desseins , que faudra-il dire de Cesar ? la debonnaireté duquel est tant preschée que mesme on estime cela avoir esté l'une des ocafions de sa mort. Ses passe temps estoient serieux : & depuis qu'il commença de mettre la main aux affaires , il ne se joïa plus qu'à bon escient , sans perdre toutesfois ses heures de recreation & ses plaisans devis avec ses familiers. Mais au milieu de ses victoires , comment traite-il ses ennemis. C'est une foudre de guerre qui renverse tout ce qui lui ose resister , & ne touche point aux choses qui font joug devant son effort. Il est fidele , & n'aprouvoit pas toutes sortes de moyens pour acquerir la victoire , encores que plus d'une fois il ait eu moyen de coudre (comme on dit) la peau du renard à celle du lion. Mais il se sentoit encor du bon temps de ses predecesseurs , combien qu'il ait dextrement donné le faut à la pluspart de ses ennemis , & ruiné les uns par les autres. Au contraire Alexandre tailla en pieces certains soldats Indiens qui lui avoient rendu une ville par composition , & se retiroient sur la fiance de l'apointement traité avec lui.

XX. L'ambition de Cefar estoit extreme , mais il la cachoit bien d'autre façon qu'Alexandre , qui au passage d'une riviere se laisse eschaper des mots tesmoignans assez qu'il cherchoit la loüange des Atheniens. Et les fausses inventions pour perpetuer la gloire de son nom ès Indes , descouvrent-elles pas de la vanité bien grossiere , & qui ne faisoit que haleter après ce qu'elle ne pouvoit obtenir ? Mais Cefar souhaitoit à bon escient , & touchoit au but de ses intentions. Sa prouësse est gracieuse à merveilles , sa douceur grave & vaillante : sa liberté si grande que plus lui coustoit la pensée de donner que le don mesme tant grand peut-il estre. Aussi n'amassoit-il point des richesses à la guerre , pour vivre puis après en delices à son plaisir : c'estoit un salaire de la vertu qu'il ferroit , pour en recompenser les hommes de valeur , & laisser aux bons soldats un moyen de vivre honnestement chez eux , quand la vieillesse & les playes les contraindroient de poser les armes. Il ne se lassa jamais , non plus qu'Alexandre , de travail quelconque , & ne se donna pas tant de relasche , encores qu'il fust plus aagé , fort gresse & menu de corsage , & sujet au mal caduc : mais il s'endurcit contre cela par un continuel exercice de corps & d'esprit , acompagné d'une incroyable promptitude & diligence. Ayant laissé la Gaule & courant

après Pompeius à Brundisium il subjuga l'Italie en moins de trois semaines, revint de Brundisium à Rome, d'où il s'en alla au fond de l'Espagne, où il surmonta des difficultez extremes en la guerre contre Afranius & Petreius, & au long siege de Marseille. De là il s'en retourna en Macedoine, gagna la journée de Pharfale, poursuivit Pompeius en Egypte laquelle il assujettit : puis vint en Syrie & au royaume de Pont, où il combatit Pharnaces : de là en Afrique où il défit Scipion & Juba, puis rebroussa encor par l'Italie en Espagne, où il vint à bout des fils de Pompeius. Or pesez maintenant avec cela les travaux, combats, conquestes & diligences d'Alexandre, puis dites rondement ce qui vous en semble : Cesar l'emporte de beaucoup. Les seules guerres des Gaules ont esté plus difficiles & dangereuses que toutes les conquestes de l'Asie & des Indes : car ce n'est es passages des montagnes & rivières mal gardées que se monstre l'adresse des hommes : c'est à dompter un ennemi cauteleux & puissant.

XXI. Mais, je vous prie, ces paroles de Cesar au maistre de la fregate, qui sans le conoistre le vouloit passer d'Apollonie à Brundisium, estoient-elles point plus enflées que la mer mesme ? Courage, mon ami, dit-il, pousse hardiement, car tu meistes Cesar & sa fortune.

Et ce qu'il dit traversant le Rubicon pour entrer en Italie, à tout perdre n'y a qu'un coup dangereux, quel esprit descouvre cela ? Un esprit véritablement qui regarde delà la mort, & ne se soucie de rien que de l'exécution de ses conseils. Si on remarque de l'adresse ès exploits d'Alexandre, qu'est-ce au prix de la prudence de César ? coustumier de dire qu'il aimoit la victoire laquelle s'obtenoit plus par conseil que par force. Je sçai qu'Alexandre a esté orné de vertus excellentes, & taré de peu de vices aparens : qu'en cela il semble avoir barre sur César & sur beaucoup d'autres des premiers en l'histoire Grecque & Romaine : combien que je ne puisse pas dissimuler aussi qu'il s'est laissé trainer par des flatteurs & par des femmes avec, tescmoin ce qu'il fit à l'instigation de Laïs & de ses mignons : item, qu'il y avoit du vent en son fait : vices très dangereux en tous hommes, sur tout ès princes, & dont César s'est garenti avec plus d'habilité.

XXII. Mais si on amène en jeu le bon sens, l'esprit, le jugement, la conduite, le profond savoir, l'éloquence, la hardiesse, la grandeur de courage, l'assurance plus qu'humaine au milieu des grands perils, les travaux, la diligence, la bonté, la douceur, la courtoisie, la largesse, & le bonheur de César, il y aura bien à débattre. On lui objecte que d'entre les sénateurs & autres

qui avoient tenu le parti de Pompeius , il a espargné ceux qui ne lui pouvoient pas beaucoup nuire , & a exterminé en Afrique nommément, les autres dont il pensoit ne pouvoir chevir. Mais Brutus , Cassius & ses adherans monstre que Cesar ne demandoit qu'à se porter gracieusement , si ses haineux l'eussent permis : & y a assez daparence que s'ils l'eussent suporté quelque peu davantage , les affaires ne fussent pas passées avec tant de violences comme elles firent après sa mort : ains l'estat de Rome eust esté mieux policé , & l'ambition de ce personnage ayant ataint son desir , se fust saoullée & abaissée de soi-mesme.

XXIII. Car ce qu'il se laissa aller aux flateries de Balbus & d'Antonius pour s'enorgueillir contre le senat , & affecter les marques de la dignité royale, estoient des bouffées de ce mauvais vent que tels soufflets dangereux entretenoient & augmentoient en son cœur. Or n'est-il pas excusable en cela , au contraire on ne sçauroit trop condamner ceste siene passion qui se descouvrit assez au premier voyage qu'il fit en Espagne, lors que passant par une meschante bourgade il preferoit le premier lieu en icelle au second de Rome. Elle acreut tousjours depuis en luy, regnant de si près toutes les autres , & possédant son ame d'une autorité si pleine qu'elle

l'emporta où elle voulut , & fit que sans respect de sa patrie ni de soi-mesme , il ne cessa de courir jusques à ce que ce furieux cheval ne le jetta par terre & lui rompit le col. Mesmes tant de victoires & rriomphes ne le convierent point à chercher repos , ains (comme Alexandre voltigeoit sur l'Ocean, durant sa derniere maladie & quelques heures avant sa mort) il embrassoit des plus grandes guerres & conquestes qu'auparavant. Ce qu'il fit en la reformation du calendrier , & l'entreprise de tant de bastimens & ouvrages pour le public , monstre que cest esprit là estoit tousjours bandé. Quant à ses voluptez , à l'aventure ne nous seroit-il pas seant d'en faire menrion , & vaur mieux avec silence & honte deplorer l'imperfection humaine, qu'en descrivant les personnes illustres contenter ceux qui ne sont aises sinon quand on repaist leur malignité. L'ambition dont il estoit infiniment blessé venant à combattre ceste desbauche après les femmes lui fit bien tost quitter la place pour le maistriser puis après entierement , au lieu que ses plaisirs ne lui firent jamais desrober une minute d'heure, ni destourner un pas des ocaions qui se presentoient pour son agrandissement.

XXIV. Quant à sa mort elle fut violente voirement , mais acheminée par ceux à la pluspart

desquels il avoit donné la vie, & qui ne subsisterent pas long temps après lui. Vrai est qu'il l'atira par ses deportemens hautains : car rien ne defailloit à son heur que d'aimer sa cité, & continuer plus soigneusement qu'il ne fit à donner contentement au senat & au peuple, comme il avoit commencé après ses cinq triomphes, pardonnant à tous, eslevant en charges les uns & les autres, & redressant mesmes les statues de Pompeius. Or estant retombé en ce forcené desir d'estre encor plus grand, il irrita tant de personnes, que plusieurs executerent ce dont un seul ne fust pas aisément venu à chef. Mais encores a-il cela de plus qu'Alexandre, que sa mort fut vengée : au contraire la mere, les femmes & enfant d'Alexandre firent une très pauvre fin, son armée demoura comme un corps sans teste, & eut bonne grace celuy qui l'acomparoit au Cyclope Polipheme, quand Ulysses luy eut crevé son œil : ses capitaines & successeurs s'entremangerent par longues guerres. Quant à Cesar il demoura debout en la personne de son successeur Auguste, lequel ayant surmonté infinies dificultez establit une Monarchie, laquelle en despit d'un milion de tempestes, a duré plusieurs centtaines d'années : mesme le nom de Cesar par excellent privilege est demouré à ceux qui ont presidé après lui sur l'empire Romain, &

sa vaillance a esté, & encores aujourd'hui est desirée de tous hommes qui par valeureux exploits desirent acquerir à leur nom loüange & gloire immortelle.

XXV. Vous m'attendiez ici, lecteur, pour voir auquel des deux je donneroïs préférence : mais puis que le monde a esté trop petit à l'un & à l'autre, ce seroit passer trop avant si je disois resoluement ce qui m'en semble. Puis que j'ay debatü pour l'autre : je me retire, & vous en laisse le jugement.

S O M M A I R E

DES VIES D'AGIS ET DE CLÉOMÈNE.

LA fable d'Ixion est le symbole des ambitieux. II. Danger de l'ambition. III. Elle a poussé les Gracques à des excès qu'ils n'avoient pas prévu eux-mêmes. IV. Plutarque les met en parallèle avec Agis & Cléomène. V. Généalogie d'Agis. VI. Caractère vertueux d'Agis. VII. Nouveauté introduite à Sparte par Epitadée. Décadence de la discipline. VIII. Tentatives d'Agis pour ramener le goût de cette ancienne sévérité. IX. Il gagne sa mere. X. Intrigue de Léonidas contre le projet d'Agis. XI. Rétablissement de l'ancienne constitution proposé au sénat & au peuple. XII. Contestation entre Agis & Léonidas. XIII. Lysandre accuse & fait déposer le roi Léonidas. XIV. Agis & Cléombrote chassent les nouveaux éphores qui avoient rétabli Léonidas. Celui-ci s'ensuit. XV. Agésilas élude le partage des terres. XVI. Agis est envoyé au secours des Achéens contre les Éoliens. XVII. Léonidas remonte sur le trône. XVIII. Admirable conduite de Chelonis, femme de Cléombrote. XIX. Cléombrote va en exil, sa femme le suit. XX. Perfidie d'Ampharès, qui livre Agis à ses ennemis. XXI. Il est étranglé en prison. XXII. Sa mere

mere & sa grand'mere étranglées auprès de lui. XXIII. Horreur que cette cruauté inspire aux Lacédémoniens. XXIV. Léonidas fait épouser à son fils Cléomène la femme d'Archidame, frere d'Agis. XXV. Caractere de Cléomène. XXVI. Cléomène se propose d'exécuter le projet d'Agis. XXVII. Première campagne de Cléomène. XXVIII. Il présente la bataille aux Achéens. Aratus n'ose l'accepter. XXIX. Il bat les Achéens, & prend la ville de Mantinée. XXX. Il fait revenir Archidame, frere d'Agis; mais les éphores le tuent. XXXI. Il remporte une grande victoire sur les Achéens. XXXII. Il mène à une expédition tous ceux des Spartiates qu'il croyoit les plus opposés à ses projets. XXXIII. Il fait tuer les éphores. XXXIV. Discours de Cléomène au peuple pour l'engager à accepter le rétablissement des loix de Lycurgue. XXXVI. Il les rétablit en effet. XXXVII. Il fait le dégât sur les terres des Mégalo-politains. XXXVIII. Réputation de Cléomène parmi les Grecs. XXXIX. Frugalité de sa table. XL. Il bat les Achéens. XLI. Négociation commencée entre Cléomène & les Achéens. XLII. Aratus appelle les Macédoniens en Achaïe. XLIII. Bassesse de la conduite d'Aratus vis-à-vis d'Antigonus. XLIV. Aratus fait rompre la négociation commencée avec Cléomène. XLV. Celui-ci déclare la guerre aux Achéens. Prend Pallène & Argos. XLVI. Grande idée que

l'on conçoit de Cléomène & des Lacédémoniens. XLVII. Cléone , Phliunte , Corinthe s'allient avec Cléomène. XLVIII. Il arrête Antigonus au pas des montagnes Oniennes. XLIX. Révolte d'Argos. L. Cléomène la reprend , & est forcé de se retirer par l'arrivée d'Antigonus. LI. Mort d'Agiatis , femme de Cléomène. LII. Générosité de Cratésclea , mere de Cléomène. LIII. Il surprend la ville de Mégapolis. LIV. Il offre aux Mégalopolitains de la leur rendre , à condition de faire alliance avec Sparte. LV. Sur leur refus , il livre la ville au pillage. LVI. Il ravage le territoire d'Argos. LVII. Il entre par bravade dans Argos. LVIII. Le défaut d'argent ruine les affaires de Cléomène. LIX. Bataille de Sellaste. LX. Cléomène est défait par la trahison de Demoteles. LXI. Il s'embarque après avoir conseillé aux Spartiates de se rendre à Antigonus. LXII. Antigonus traite fort humainement la ville de Sparte. LXIII. Therycion propose à Cléomène de finir leurs jours par une mort volontaire. LXIV. Réponse de Cléomène qui traite le suicide de lâcheté. LXV. Comment Ptolémée reçoit & traite Cléomène. LXVI. Changement des affaires de Cléomène en Egypte. LXVII. Il demande qu'on le laisse aller avec ses amis. LXVIII. Nicagoras accuse Cléomène d'une conspiration. On l'enferme dans une maison. LXIX. Cléomène prend avec ses amis la résolution de se mettre en liberté. LXX.

1

S O M M A I R E. 355

Comment ils exécutent leur projet. LXXI. Mort volontaire de Cléomène & de ses amis. LXXII. Mort de la mère & des enfans de Cléomène. LXXIII. Mort de la femme de Pantée. LXXIV. Superstition des Egyptiens occasionnée par la vue d'un serpent entortillé autour du cou de Cléomène.

Depuis la 130^e olympiade environ, jusqu'à la seconde année de la 140^e, avant J. C. 219.

AGIS ET CLEOMENES.

Ce n'est pas sans propos ny sans apparence ; que quelques uns ont estimé la fable d'Ixion avoir esté composée à l'encontre des ambitieux , qu'il eut affaire à une nuée , pensant que ce fust la deesse Juno , & que de cest embrassement les Centaures en furent engendrez : car tout ainsi les ambitieux embrassans la gloire , comme une image de la vraye vertu , ne font jamais acte qui soit entierement pur & net , ny ne se ressemblent point constamment en leurs faicts : ains produisent des effects , où il y a tousjours quelque bastardise & quelque mélange parmy , selon la diversité des vents qui les poulsent , ores estant incitez par envie ou par jalousie , ores par le desir de plaire à une commune , ne plus ne moins que les pasteurs disent en une tragedie de Sophocles , parlans de leurs troupeaux de bestes ,

Nous leur servons , quoy que maistres soyons ,
Et sans parler fault que nous les oyons.

Cela veritablement se peult aussi dire de ceux , qui au gouvernement de la chose publique n'ont autre but , que s'accommoder aux appetits & aux affections du commun peuple : pource que

à la verité ilz servent & obeissent en tout & par tout, à fin d'avoir le tiltre & l'apparence seule de magistrats & de gouverneurs, ne plus ne moins qu'en une navire les matelots qui sont sur la prouë, voyent ce qui est devant, mieulx que ne font les pilotes qui manient le timon en la poupe, & neantmoins se retournent tousjours vers eulx, & font ce qu'ilz leur commandent : ainsi ceulx qui en leur gouvernement ne visent à autre but qu'à la gloire, sont ministres esclaves de la commune, & n'ont que le nom seulement de gouverneurs. Or celuy qui feroit entierement & parfaitement homme de bien, n'appeteroit jamais gloire quelconque, sinon entant qu'elle luy donneroit passage à pouvoir executer de grandes choses, d'autant que lon se fieroit plus en luy.

II. Bien est il vray qu'il fault permettre à un jeune homme de gentille nature, convoiteux d'honneur, qu'il se glorifie & se plaise un peu en son bien faire, pource que, comme dit Theophrastus, les vertus boutent & florissent en cest aage là, & prennent pied ferme par les louanges que lon leur donne, puis vont en augmentant & croissant à mesure que le sens & le courage leur croist. Mais le trop estant de foy mesme par tout ailleurs dangereux, est pestilent & mortel ès ambitions de ceulx qui s'entremettent du gouvernement des

affaires : car s'ilz ont grande puissance, il leur fait commettre des fautes manifestement furieuses, & commettre des actes de gens forcenez, pource qu'ilz veulent, non que l'honneur procede de la vertu, ains qu'il soit la vertu mesme : là où il faudroit qu'ilz dissent au peuple ce que Phocion respondit une fois à Antipater, lequel luy vouloit faire faire quelque chose qui n'estoit point honeste : « Tu ne sçauois, luy dit » il, avoir Phocion pour amy & pour flatteur en- » semble ». Ainsi ne pouvez vous avoir un qui vous soit maistre & valet, ne qui vous commande & vous obeisse ensemble : autrement il est force qu'il adviene l'inconvenient qui est en la fable du serpent, duquel la cueuë vint un jour à quereller contre la teste, disant qu'elle vouloit à son tour aller devant, non pas tous-jours demourer derriere. Ce que luy estant ot-troyé par la teste, elle s'en trouva très mal elle mesme, ne sachant pas comment ne par où il falloit cheminer, & si fut encore cause que la teste fut toute déchirée, estant contrainte de suyvre contre nature une partie qui n'avoit ny veuë, ny ouye, pour se pouvoir conduire. Nous voyons le mesme estre advenu à plusieurs, qui au gouvernement de la chose publique ont voulu faire toutes choses au gré de la multitude : car s'estans une fois attachez à ce joug de servitude,

de vouloir en tout & par tout aggreer à la commune, qui bien souvent s'esmeut temerairement & sans raison quelconque, ilz n'ont sceu puis après retirer, ny retenir & arrester la fureur & temerité du peuple.

III. Or ce qui m'a fait entrer en ce discours à l'encontre de l'ambition & vaine gloire populaire, ce a esté la considération de la grande puissance qu'elle a, quand j'ay bien eu considéré les accidents de Tiberius & de Gaius Gracques, lesquels estans tous deux fort bien nez, ayans esté très bien nourriz, & estans venus au maniement des affaires de la chose publique en bien bonne intention, furent neantmoins tous deux à la fin perdus, non tant par demesurée convoitise d'honneur, que par crainte de deshonneur, laquelle ne procedoit encore que de grand & noble cueur : car ayans receu du peuple plusieurs demonstrations d'amitié & de bienvueillance, ilz eurent honte de demourer, par maniere de dire, redevables, & tascherent à l'envy à surmonter les honneurs que le peuple leur faisoit, par nouvelles inventions & nouvelles ordonnances, qu'ilz mettoient en avant au profit & avantage de la commune : & la commune aussi de son costé les honoroit de tant plus, qu'ilz s'esforceoyent de luy gratifier. Ainsi par egale ambition, s'enflamans les uns les

360 AGIS ET CLEOMENES.

autres, eulx à gratifier de plus en plus au menu peuple, & le menu peuple à les honorer, ilz ne se donerent de garde qu'ilz se trouverent enveloppez en des affaires, où ilz ne pouvoyent plus dire ¹ ce commun proverbe,

Bien que de foy ne soit la chose honneste,
Le delûster seroit jà deshoneste.

Ce que tu pourras toy mesme aisément juger par la nue exposition de l'histoire.

IV. Nous leur comparons deux autres hommes populaires, tous deux roys de Lacedæmone, Agis & Cleomenes, lesquelz voulans augmenter la puissance & autorité du commun peuple, aussi bien que les deux Romains, & remettre sus le juste & honeste gouvernement de la chose publique Lacedæmonienne, qui ja de long temps estoit hors d'usage, encoururent semblablement la haine des grands, qui ne vouloyent rien perdre ny diminuer de leur avarice accoustumée. Vray est que les deux Laconiens n'estoyent pas freres, mais ilz suyvirent tous deux une mesme

¹ Cette phrase, où il manque peut-être quelque chose, a fort embarrassé les savans. On la rendroit claire, en écrivant : ils ne pouvoient plus que dire ce commun proverbe, &c. Ce qui signifieroit que s'étant laissé engager plus loin qu'ils n'auroient voulu, ils poussèrent leur pointe contre leur sentiment intérieur, par la mauvaise honte de reculer.

& toute semblable forme de gouvernement, lequel commença en cette manière.

V. Depuis qu'une fois la convoitise d'amasser or & argent se fut coulée dedans la ville de Sparte, & qu'avec la possession de la richesse suivit aussi l'avarice & la chicheté, & avec l'usage les voluptez & les delices, Sparte se trouva incontinent destituée de plusieurs grandes & honorables preeminences, & demoura long temps indignement ravallée & rabaisée, jusques à ce que Agis & Leonidas vindrent à regner, étant Agis de la maison des Eurytionides ¹, filz de Eudamidas sixieme en droitte ligne après Agefilaus, qui avoit esté le plus grand homme & le plus puissant de toute la Grece en son temps: car Agefilaus eut un filz nommé Archidamus, qui fut desfait par les Messapiens devant une ville d'Italie qui s'appelle Mandonium. Cestuy Archidamus laissa deux filz, Agis l'aîné, & Eudamidas puîné, qui fut roy, ayant son frere Agis esté tué devant la ville de Megalopolis par Antipater, sans qu'il eust engendré aucuns enfans. Cestuy laissa un filz qui eut nom Archidamus, & Archidamus un autre Eudamidas, & Eudamidas Agis, duquel nous escri-

¹ Voyez la suite des rois de Sparte aux Observations sur le tome XV, p. 464, & les Observations sur le tome XVI, p. 528 jusqu'à 532.

362 AGIS ET CLEOMENES.

vons present. Leonidas aussi filz de Cleonymus estoit de l'autre maison royale des Agiades ¹, huitieme en droitte ligne après Pausanias celui qui desfeit en bataille Mardonius le lieutenant du roy de Perse devant la ville de Platæes : car ce Pausanias eut un filz qui fut nommé Plistonax, Plistonax un autre Pausanias, lequel s'en fouit de Sparte en la ville de Tegée, & au lieu de luy fut roy son filz aîné Agefipolis, lequel étant mort sans enfans, Cleombrotus son frere puîné luy succeda au royaume. Ce Cleombrotus eut deux fils, un autre Agefipolis & Cleomenes, desquelz Agefipolis ne fut pas long temps roy, & n'eut aucuns enfans : mais son frere Cleomenes, qui fut roy après luy, en eut deux, Acrotatus l'aîné qui mourut son pere vivant encore, & Cleonymus le puîné qui le survescut, & neantmoins ne fut point roy, ains le fut son nepveu Areus filz d'Acrotatus. Cestuy Areus mourut devant la ville de Corinthe, & son filz qui fut un autre Acrotatus luy succeda au royaume, qui mourut aussi en bataille devant la ville de Megalopolis, où il fut desfait par le tyran Aristodemus, & laissa sa femme enceinte, laquelle depuis son trespas accoucha d'un filz, duquel Leonidas filz de Cleo-

¹ Voyez la suite des rois de Sparte aux Observations sur le tome XV, p. 464.

nymus eut la tutelle, & estant son pupille mort en bas aage, la succession du royaume par ceste mort luy escheut à luy mesme : mais ses meurs ne furent jamais agreables ny convenables à ses citoyens. Car encore que par la corruption universelle de toute la chose publique, tous les citoyens egalelement eussent ja fourvoyé, si est ce qu'en cestuy Leonidas y avoit plus notable dissolution, & plus apparente torse & devoyement de l'ancienne façon de vivre des Lacedæmoniens, qu'en nul autre, comme en celuy qui avoit longuement hanté ès maisons des princes & fatrapes, & qui avoit suyvy la cour de Seleucus, dont il avoit apporté mal à propos la pompe, & l'orgueil duquel on use en ces cours là, en la Grece, là où les loix & la raison dominent.

VI. Mais Agis au contraire surpassa en gentillesse de nature, & en grandeur de courage, non seulement ce Leonidas là, mais aussi tous les autres presque, qui avoyent regné en Sparte depuis le grand Agefilaus, de maniere que n'estant pas encore arrivé à l'aage de vingt ans, & ayant esté nourry opulently entre les delices & voluptueuses superfluites de deux femmes, Agelistrata sa mere, & Archidamia son ayeule, qui avoyent plus d'or & d'argent comptant, que nulz autres Lacedæmoniens, com-

mencea neantmoins incontinent à se roidir à l'encontre des voluptez, & contre la curiosité de se rendre principalement agreable par la grace de sa beauté, ostant tout parement & tout embellissement d'alentour de sa personne, fuyant toutes delices, & se despouillant de toute superfluité, jusques à faire gloire d'aller simplement vestu d'une pauvre meschante cappe, & à regretter le manger, le laver, & tout le reste de la regle de vivre de l'ancienne discipline Laconique, disant publiquement qu'il ne voudroit point estre roy, si n'estoit pour l'esperance de remettre un jour sus ceste forme de vivre par le moyen de l'autorité royale.

VII. Or avoit commencé à se corrompre & gaster ceste discipline dès lors presque, que les Lacedæmoniens ayans ruiné la puissance des Atheniens, s'estoyent remplis d'or & d'argent : mais neantmoins estant tousjours demouré le nombre des parts & portions des heritages que Lycurgus avoit instituées, & ayant tousjours de main en main le pere laissé à son filz la sienne, cest ordre & ceste egalité s'estant aucunement maintenue, avoit preservé la chose publique de plusieurs autres fautes & erreurs, jusques à ce qu'il y eut un personnage d'autorité nommé Epitadeus, homme rebours, fier & superbe de nature, lequel estant en office d'ephore, vint

à avoir debat à l'encontre de son propre filz , si asprement , qu'en haine de luy il meit en avant une loy & ordonnance , qu'il fust loisible à un chacun de donner son heritage & son bien dès son vivant , ou bien après sa mort par testament , à qui lon voudroit. Celuy là proposa ceste ordonnance pour satisfaite à un sien particulier courroux , & les autres l'accepterent pour servir à leur avarice , qui fut cause de renverser & abolir une très belle institution : car les riches commencerent alors à acquerir de tous costez , en deboutant les vrais heritiers des succeſſions qui leur appartenoyent : par ce moyen estant l'opulence en peu de temps coulée ès mains de petit nombre de gens , il y eut aussi tost une grande pauvreté en la ville de Sparte , qui fut cause d'y faire cesser tous exercices honestes & liberaux , & d'y introduire les mechaniques , avec envie & haine à l'encontte de ceulx qui possedoyent les biens , de maniere qu'il n'y demoura pas plus de sept cents naturelz Spartiates en tout , & de ceulx là encore n'y en avoit il pas plus de cent qui possedassent des terres & heritages : tout le reste estoit un amas de peuple souffreteux qui se tenoit en la ville , sans y avoir degré d'honneur quelconque , allant mal volontiers & laschement à la guerre contre les ennemis de dehors , & n'attendant autre chose que

quelque occasion de remuer & changer tout au dedans.

VIII. Pourtant Agis estimant que ce seroit une belle chose, comme à la verité elle l'eust esté, de repeupler la ville, & y ramener l'ancienne egalité, alloit sondant les cueurs & les vouldentez des hommes, & trouva contre son esperance, que les jeunes furent ceulx qui plus tost y presterent l'oreille, & se rengèrent du costé de la vertu, en changeant facilement, & tournant; ne plus ne moins qu'un habillement, leur maniere de vivre pour recouvrer liberté: mais la plus part des vieux, comme ceulx qui estoient envieilliz en la corruption, craignoient de retourner à l'austerité des ordonnances de Lycurgus, comme un esclave fugitif qui tremble de peur quand on le remene devant son maistre: au moyen dequoy ilz tensoient Agis quand il venoit à deplorer & à lamenter devant eulx la malheureté de l'estat present, & à regretter l'honneur & la dignité ancienne que Sparte avoit eüe par le passé, excepté Lysander filz de Lybis, & Mandroclidas filz de Ecphanes, & encore Agefilaus, qui tous approuverent grandement son intention, & l'enhorterent de la pourfuyvre vivement. Ce Lysander estoit le mieux estimé & le plus honoré personnage qui fust en toute la ville: Mandroclidas le plus advisé pour

bien conduire une menée qui fust en toute la Grece , & si estoit son astuce & sa finesse accompagnée de hardiesse : Agefilaus estoit oncle du roy , homme eloquent , mais au demourant voluptueux & avaricieux , & ce qui plus , à ce que lon voyoit au dehors , le pouloit & l'encourageoit de favoriser ceste entreprise , estoit son filz Hippomedon , qui s'estoit fort bien porté à la guerre en plusieurs batailles , & qui pouvoit beaucoup pour l'amitié que luy portoyent les jeunes hommes : mais la vray cause secrette qui plus l'induisit à entrer en la conspiration , fut la multitude grande de ses debtes , dont il esperoit se descharger en remuant l'estat de la chose publique.

IX. Si tost donques qu'Agis eut gagné celuy là , il essaya d'attirer aussi par son moyen sa mere , qui estoit sœur dudit Agefilaus , & femme qui pouvoit beaucoup pour le grand nombre qu'elle avoit d'amis , de serviteurs , d'obligez & de debteurs en la ville , par le moyen desquelz elle manioit à sa volonté une bonne partie des affaires de la chose publique : luy en ayant doncque ouvert le propos , elle s'en estonna du commencement , & luy dit qu'il se teust s'il estoit sage , & se deportast de mettre en sa fantasie des choses qui n'estoyent ne possibles ny utiles : mais quand Agefilaus luy eut un peu remonstré

la belle chose que ce seroit , & comme elle se pouvoit bien conduire à chef avec une utilité très grande , & que le roy Agis commença à la presser instamment de prieres , qu'il luy pleust quitter volontairement sa richesse , pour acquérir gloire & honneur à son filz , luy alleguant qu'il ne pourroit jamais arriver à estre egal aux autres roys en chevance & en avoir , attendu que les serviteurs & faâteurs seulement des roys Seleucus & Ptolomæus , avoyent plus de biens que n'en eurent jamais tous les roys de Sparte ensemble : mais si par temperance , magnanimité & continence surmontant leurs delices , il venoit à remettre les Lacedæmoniens en communaulté & egalité , comme ilz fouloyent estre ancienement , il acquerroit la gloire & le renom d'un veritablement grand prince & grand roy. Alors ces remonstrances ouyes , les dames emeues & encouragées de voir si grande magnanimité en ce jeune homme , commencerent à changer d'opinion , & furent soudainement , comme par inspiration divine , si esprises de l'amour de vertu , qu'elles se meirent elles mesmes à inciter & haster Agis , & envoyerent querir leurs amis pour les prier & admonester de favoriser à son entreprise , & , qui plus est , en parlerent aussi aux autres dames , sachant bien que de tout temps les Lacedæmoniens

niens croyent & deferent beaucoup à leurs femmes, leurs permettans de s'enquerir & se mesler plus avant des affaires de la chose publique, qu'à eulx mesmes en leurs maisons des affaires domestiques.

X. Or fault il noter que la plus part de la richesse de Lacedæmone estoit pour lors entre les mains des femmes, ce qui rendit l'entreprise plus difficile : car les femmes y résisterent, non seulement pource que par icelles elles venoyent à perdre leurs delices, ès quelles, pour n'avoir pas cognoissance du vray bien, elles constituoient leur felicité : mais aussi par ce qu'elles voyoyent que l'honneur qu'on leur faisoit, & la puissance & autorité qu'elles avoyent à cause de leurs richesses, leur venoyent à estre retrenchées de tout poinct : à l'occasion dequoy en s'adressant à Leonidas, elles l'admonesterent de reprendre Agis, comme estant plus aagé que luy, & d'empescher ce qu'il avoit entrepris de faire. Leonidas avoit bien bonne envie de favoriser aux riches : mais craignant le commun peuple, qui ne demandoit autre chose que la mutation, il n'ozoit pas luy résister ouvertement, ains faisoit soubz main tout ce qu'il pouvoit pour rompre & empescher ses desseings, en tenant propos avec les officiers de la ville, & calumniant Agis envers eulx, leur donnant à enten-

370 AGIS ET CLEOMENES.

dre qu'il offroit aux pauvres les biens des riches, le departement des heritages, & abolition de toutes debtes, pour salaire de luy mettre la tyrannie en main, & que par ce moyen il s'alloit acheptant à luy mesme plusieurs satellites, non pas plusieurs citoyens à la ville de Sparte.

XI. Ce nonobstant Agis ayant fait eslire Lyfander ephore, proposa incontinent au conseil & meit en avant son ordonnance, de laquelle les articles principaux estoyent, « Que ceulx qui » devoyent, fussent entierement absouls de leurs » debtes : que le territoire de Lacedæmone fust » de rechef divisé en portions egales, de sorte » que depuis la vallée de Pallene¹ jusques au » mont de Taugetus, & aux villes de Mallea² » & de Selasia³, il y eust quatre mille cinq cents » parts, & hors ces bornes là, qu'il y eust en » tout le reste autres quinze mille, lesquelles » seroyent distribuées aux circonvoisins, qui seroyent idoines à porter armes, & les autres » aux naturelz Spartiates : le nombre desquelz seroit remply des peuples voisins & des estran-

¹ Pallène, ville d'Arcadie aux confins de la Laconie. Il y avoit une autre ville dans l'Achaïe, que la similitude de nom fait quelquefois confondre avec celle-ci; mais qui doit se nommer Pellène, selon le Scholiaste d'Apollonius.

² Malée est seulement un promontoire au sud de la Laconie.

³ Sellasie près de la riviere d'Ænus, à l'orient d'été par rapport à Sparte.

» gers aussi, qui auroient esté bien nourriz, &
 » qui se trouveroyent forts & dispos de leurs
 » personnes, & en aage pour bien servir : les-
 » quelz puis après seroyent departis en quinze
 » convives, qui seroyent les uns de deux cents ¹,
 » les autres de quatre cents hommes, & vi-
 » vroyent selon la forme & regle de vivre que
 » leurs ancestres avoyent instituée & observée». Ceste ordonnance estant mise en avant au senat, les senateurs se trouverent differents d'opinion là dessus : parquoy Lyfander de luy mesme, sans attendre autres advis, assemblea le grand conseil de tout le peuple : en laquelle luy mesme parla aux assemblez, & Mandroclidas & Agelilaus aussi, les prians de ne vouloir pas permettre que pour les delices d'aucuns particuliers en petit nombre, la dignité de Sparte demourast aneantie & esteincte : ains se vouloir souvenir des oracles des dieux, qui anciennement leur avoyent esté respondus, qu'ilz se donnassent soigneusement garde de l'avarice & convoitise d'avoir, qui seroit un jour la peste & ruine de leur estat : & semblablement aussi de celuy qui nagueres leur avoit esté apporté du temple de Pasiphaé ² : car il y avoit un temple & un oracle

Voyez les Observations.

¹ Pausanias l'appelle Paphia dans ses Laconiques, p. 276. Mais des Savans prétendent qu'il faut lire en cet endroit Pasiphaé.

372 AGIS ET CLEOMENES.

de Pasiphaé, auquel y avoit grand apport en la ville de Thalames ¹. Si disent aucuns que ceste Pasiphaé estoit l'une des filles d'Atlas, laquelle conceut & enfanta de Jupiter un filz nommé Hammon : les autres tiennent que c'est Cassandra l'une des filles du roy Priam, qui mourut en ce lieu là, & fut surnommée Pasiphaé, pource qu'elle rendoit à tout le monde les oracles des choses à advenir. Mais Phylarchus ² escrit que Daphné fille d'Amycla, fuyant Apollo qui la vouloit prendre à force, fut transmuée en un laurier, & honorée par Apollo du don de prophetie : si disoyent que les oracles de ce dieu leur commandoyent que les Spartiates retournassent de rechef à estre tous egaux, comme il avoit esté ordonné par les loix de Lycurgus.

XII. Quand tous les autres eurent parlé, le roy Agis le dernier se tira en avant, lequel après peu d'autres paroles dit, qu'il contribuoit à ceste reformation de la chose publique, qu'il vouloit remettre sus, de très grandes contributions : car premierement il mettoit en commun tous ses heritages, qui estoient grands tant en terres la-

¹ Au couchant de la Laconie, vers la Messenie.

² Il vivoit du temps de Prolémée Evergète I, & de son successeur Philopator; & par conséquent du tems de cet Agis même & de Cléomène. Il fut auteur de divers ouvrages historiques & mythologiques. On ignore sa patrie.

AGIS ET CLEOMENES. 375

bourables qu'en pasturages : & davantage six cents talents¹ en argent comptant, & qu'autant en feroient sa mere, son ayeule & ses parents & amis, qui estoient tous les plus riches des Spartiates. Ce qu'entendant le peuple s'esmerveilla grandement de la magnanimité de ce jeune roy, & en fut merveilleusement aise, disant que depuis trois cents ans il n'y avoit eu roy digne de Sparte que luy : mais Leonidas au contraire s'esforcea lors de tout son pouvoir de luy resister, discourant en soy mesme que si l'entreprise d'Agis avoit lieu, il seroit contrainct faire de mesme luy, & si ne luy en scauroit on pas mesme gré qu'à luy, pource que tous Spartiates egale-ment seroyent contraincts de mettre leurs biens en commun, mais l'honneur en demoureroit à celui qui auroit commencé : si demanda publiquement à Agis, s'il estimoit Lycurgus avoir esté homme de bien. Agis luy respondit que ouy : « Et où as tu veu, repliqua adonc Leonidas, qu'il ait jamais aboly les contraux des debtes, ou qu'il ait receu des estrangers au nombre des bourgeois de Sparte? veu que à l'opposite il n'estima point que sa chose publique peust estre faine, sinon que tous estrangers en fussent entierement bannis ». Agis

¹ Trois cents soixante mille escus. *Amyot*, 2,801,250 liv. de notre monnoie.

374 AGIS ET CLEOMENES.

à cela redoubla , disant qu'il ne s'esbahissoit pas si Leonidas ayant esté nourry en païs estranger, & ayant pris femme en cour de satrape, ignoroit les ordonnances de Lycurgus , lequel chassant hors de sa ville l'or & l'argent, en chassa aussi le devoir & le prestér. Et quant aux estrangers, il haïssoit ceulx qui ne se vouloyent renger aux meurs, coustumes & façons de vivre qu'il introduisoit, & estoient ceulx là qu'il chassoit, non qu'il voulust mal à leurs personnes, mais pource qu'il craignoit leurs meurs & leur maniere de vivre, de peur que se meslans parmy ses citoyens ilz ne leur apportassent & engendrassent un desir de vivre mollement & delicieusement, avec une convoitise de s'enrichir : car au demourant Terpander, Thales & Pherecydes, qui tous estoient estrangers de nation, furent jadis singulierement aimez, honorez & reverez en Sparte, pour autant qu'ilz chantoient en leurs escripts, les mesmes choses que Lycurgus establissoit en ses loix : & toy mesme loues Ecprepes ¹ de ce, que estant ephore il couppa avec une hache les deux chordes que Phrynys le musicien avoit adjoustées à la cythre de plus que les sept ordinaires, & aussi semblablement ceulx qui en feirent autant à Timo-

¹ Il est nommé Emérépès dans les Apophthegmes des Lacédémoniens, ch. xxix, T. XVI, p. 531.

theus : & neantmoins tu me blasmes de ce que je veux oster de Sparte la superfluité, les delices, la pompe & l'orgueil, comme si ces personnages là n'eussent pas voulu de loing obvier à ce que ceste superfluité & ce trop en la musique ne procedast jusques à telle corruption de vie & de meurs des hommes, que l'inegalité desmesurée & disproportionnée entre les citoyens rendist la cité descordante & mal convenante avec soy-mesme.

XIII. Depuis ceste contention le commun peuple suyvit Agis, & les riches se rengerent du costé de Leonidas, le prians & admonestans de ne les point abandonner : & par prieres & remonstrances feirent tant envers les senateurs, desquelz l'autorité principalement consiste à consulter & digerer les matieres avant qu'elles puissent estre proposées au peuple, qu'ilz gaignerent ce poinct, que l'ordonnance fut reboutée par une voix de plus tant seulement. Parquoy Lyfander estant encore en son magistrat, se meit à poursuyvre Leonidas en justice par une ancienne loy, laquelle defendoit que un de la race d'Hercules ne peust espouser femme estrangere ny en engendrer des enfans legitimes, & qui establissoit peine de mort contre ceulx qui sortoyent de Sparte pour aller demourer ailleurs : & en fuscita d'autres, ausquelz il enseigna de tenir ces langages, pendant

que luy avec ses compagnons observeroit le signe du ciel : ce qui estoit une telle coustume : De neuf en neuf ans les ephores choisissant une nuit que le ciel fust fort clair & net , & qu'il ne feist point de lune , se seoyent en quelque lieu à decouvert , regardans contre mont vers le ciel , & s'ilz appercevoient aucune estoile qui saulast d'un endroit du ciel à un autre , ilz mettoient leurs roys en justice , comme ayans commis quelque peché à l'encontre des dieux , & les suspendoyent de leur royauté , jusques à ce qu'il fust venu ou de Delphes ou d'Olympe , quelques oracles qui les restituassent. Lyfander donques disant qu'il avoit veu & observé le signe d'un astre volant , appella Leonidas en justice , & produisit des tesmoins contre luy , comme il avoit espousé une femme Asiatique , que l'un des lieutenans du roy Seleucus luy avoit baillée en mariage , & qu'il en avoit eu deux enfans : mais que depuis sa femme le haïssant & ne voulant plus de luy ; il s'en estoit retourné contre sa volonté au païs , où il s'estoit emparé de la royauté à faulte d'autre hoir legitime qui la pretendist , & par mesme moyen en commençant ce procès il meit en teste à son gendre Cleombrotus , lequel estoit aussi de la race royale , de quereller la royauté. Leonidas craignant l'issue de ce procès , s'alla jetter en franchise au temple de Junq

furnommée Chalceæcos, & sa fille aussi, abandonnant Cleombrotus son mary. Si fut Leonidas adjourné à comparoir en personne : & ne l'ayant voulu faire, fut par sentence privé de la royauté, laquelle fut baillée à Cleombrotus.

XIV. En ces entrefaittes Lyfander sortit hors de son magistrat, estant son temps expiré : & les nouveaux ephores qui luy succederent, releverent Leonidas, & accusèrent Lyfander & Mandroclidas de ce que contre les loix ilz avoyent voulu faire abolir les contraux des debtes, & faire de rechef repartir les terres & heritages. Eulx se voyans appelez en justice, suaderent aux deux roys, que s'entendans ensemble ilz ne feissent plus compte des decrets & ordonnances de ces ephores, alleguans que ce magistrat là n'estoit venu à avoir autorité sinon par la dissension des deux roys, à fin qu'ilz donnassent leurs voix à celuy des roys qui auroit plus faine opinion, quand l'autre se voudroit obstiner contre ce qui estoit le plus expedient : mais quand les deux roys s'accorderoyent, qu'il leur estoit loisible de faire tout ce qu'ilz voudroyent, sans que personne les peust empescher, & que c'estoit contrevenir aux loix, que de resister aux roys, attendu que de droit il ne leur appartenoit autre prerogative, sinon de arbitrer & decider quand il advenoit quelque

different entre eulx, non pas les aller contreroller quand ilz seroyent d'accord. A quoy les deux roys adjoustans foy, s'en allerent ensemble sur la place accompagnez de leurs amis, & feirent lever les ephores de leurs sieges, & en meirent d'autres en leur place, desquelz l'un fut Agefilaus: oultre cela ilz armerent un bon nombre de jeunes hommes, & tirerent les prisonniers hors des prisons: ce qui effroya fort leurs adverfaires, lesquelz penserent incontinent qu'ilz eussent proposé de faire mourir beaucoup de gens: mais ilz ne feirent tuer personne: ains au contraire comme Agefilaus voulust faire tuer Leonidas, lequel s'en fuyoit en la ville de Tegée, & eust envoyé gens sur le chemin pour l'attendre & executer ceste voulunté, Agis en ayant senty le vent, y envoya d'autres hommes, dont il se fioit, qui accompagnerent Leonidas & le menerent à sauveté jusques dedans Tegée.

XV. Ainsi estant leur entreprise bien achevinée, n'y ayant personne qui ozaist lever la teste contre eulx pour les empescher, un seul homme Agefilaus renversa tout, & gasta une très belle & très Laconique ordonnance par un très infame vice, qui fut son avarice & convoitise d'avoir. Car ayant beaucoup de terres & des meilleures du pais, & devant aussi beaucoup d'argent, il ne pouvoit payer ses debtes, ny ne

vouloit laisser ses terres : à raison dequoy il donna à entendre à Agis que s'ilz attentoyent de faire l'un & l'autre tout ensemble , ilz fusciteroyent un grand trouble & dangereuse combustion en la cité : mais que s'ilz gaignoyent ceulx qui possedoyent des terres , en mettant en avant pour le commencement l'abolition des debtes seulement ilz recevroyent puis après plus facilement sans dire mot au contraire le departement des terres. Lyfander en fut bien d'advis , l'un & l'autre estant deceu par la malice d'Agefilaus. Si feirent commandement à tous creauciers , qu'ilz eussent à apporter sur la place , tous papiers , schedules & lettres obligatoires , que les Lacedæmoniens appellent claria , & en faisant un monceau , meirent le feu dedans. Quand les creanciers & ceulx qui faisoient mestier de prester argent à usure , en veirent la flamme en l'air , ilz s'en allerent en leurs maisons fort mal contents : mais Agefilaus en se mocquant d'eulx , dit qu'il n'avoit jamais veu plus beau ne plus clair feu.

XVI. Le peuple demandoit au surplus que le departement des terres se feist tout quant & quant : & les roys le vouloyent aussi : mais Agefilaus y faisant naistre tousjours quelques empeschemens , & alleguant quelques excuses tiroit la chose en longueur , jusques à ce qu'il advint une occasion , qu'il fallut qu'Agis allast à

la guerre, ayans les Achæiens envoyé demander le secours, que ceulx de Lacedæmone estoient tenus de leur fournir par les capitulations de la ligue qu'ilz avoyent avec eulx, à cause que lon attendoit de jour à autre, que les Ætoliens entraissent par les terres des Megariens dedans le païs du Peloponese : pour à quoy obvier, Aratus capitaine general des Achæiens avoit assemblé son armée, & avoit escrit aux ephores qu'ilz envoyassent leur secours : & eulx despescherent incontinent le roy Agis, voyans mesmement l'affection & la bonne volonté de ceulx qui estoient deputez pour aller à celle guerre soubz luy, la plus part jeunes hommes & pauvres qui se voyoyent deschargez de la crainte de leurs debtes, & esperoyent que lon leur departiroit les terres aussi rost comme ilz seroyent de retour de ce voyage : à raison dequoy ilz se monstroyent merueilleusement bien deliberez & obeïssans au roy Agis : tellement que les villes par où ilz passoyent les consideroyent avec admiration grande, voyans comme ilz traversoyent tout le Peloponese d'un bout à autre doucement, sans faire desplaisir ny dommage à personne, & presque sans mener bruit quelconque, en maniere de parler. Si alloient les Grecs discourans en eulx mesmes, comment il devoit donques au pris faire bon voir l'armée de Lacedæmone an-

cienement, quand ilz avoyent pour capitaines
 un Agefilaus, un Lyfander, ou un Leonidas,
 veu que tous ceulx qui lors estoient en l'armée
 qui passoit, obeïssoyent si promptement à Agis,
 qui estoit à peu près le plus jeune homme de tout
 son camp, lequel faisant gloire de se passer de
 peu, d'aimer à beaucoup travailler, & à n'estre
 point ny vestu ny armé plus sumptueusement
 qu'un privé souldard, en estoit bien regardé,
 loué & aimé de la commune : mais les riches
 ne prenoient point de plaisir à celle nouvelleté
 qu'il introduisoit, craignans que cela ne donnast
 occasion aux autres peuples de se mouvoir aussi,
 & d'en vouloir autant faire en leur endroit. Agis
 donques attaignit le camp d'Aratus près la ville
 de Corinthe, sur le point qu'il consultoit s'il
 devoit donner la bataille à l'ennemy, ou non :
 & en ce conseil monstra Agis une vouldenté bien
 delibérée, & une hardiesse non temeraire ny
 furieuse : car il dit qu'il estoit d'avis que lon
 devoit combattre, & ne laisser point entrer la
 guerre plus avant, en abandonnant l'entrée du
 Peloponese : toutefois qu'il feroit ce qu'Aratus
 eliroit pour le meilleur, à cause qu'il estoit plus
 ancien & capitaine general des Achæiens, aus-
 quelz il n'estoit pas venu pour commander, ains
 pour leur aider & pour les secourir. Toutefois
 Baton Sinopien escrit qu'il ne voulut pas com-

batre, quoy qu'Aratus le voulust : mais il n'avoit pas leu ce qu'Aratus mesme a laissé par escript pour sa justification & defense, là dessus alleguant que les laboureurs ayans jà recueilly & ferré la plus grand part des fruiçts de la terre, il estima qu'il valoit mieulx laisser entrer les ennemis, que de hazarder la bataille, où il estoit question de la perte de tout le Peloponese, & que pour ceste cause il donna congé à tous les alliez, & rompit son armée.

XVII. Ainsi se retira Agis aussi, fort estimé de tous ceulx qui furent en ce camp, estans ja les affaires fort brouillees & troublees en la ville de Sparte : car Agefilaus estant ephore, & se sentant delivré de la crainte qui le tenoit bas auparavant, n'espargna ny ne laissa à commettre crime quelconque, prouveau qu'il luy en vinst argent : car entre autres choses, il feit ceste année là payer oultre le devoir les tailles & tributs deuz au public pour treze mois, en y adjoustant le trezieme, sans que l'ordre du temps ny la revolution ordinaire des ans le requist. Au moyen dequoy, voyant qu'il estoit haï de tout le monde, & craignant ceulx à qui il faisoit tort, il entretenoit des soudards portans espées qui l'accompagnoient, & luy servoyent de garde quand il alloit au palais. Quant aux deux roys, il ne faisoit compte de l'un, & de l'autre il

vouloit que lon pensast qu'il en feist cas , plus à cause de la parenté qu'il avoit avec luy , que pour la royale dignité , & si sema un bruit , qu'il seroit encore ephore l'année ensuyvant : au moyen de quoy ses malveuillans se bandant ensemble premier que cela se feist , & se hazardans au peril , ramenerent à vive force tout ouvertement Leonidas de Tegée pour le remettre en sa royauté : ce que le commun peuple mesme fut bien aise de voir : car ilz estoient mal contents de se voir abuzez , en ce que lon ne faisoit pas le departement des terres , comme lon leur avoit promis : & quant à Agefilaus , son filz Hippomedon estant bien voulu de tout le monde pour sa vaillance , feit tant par ses prieres envers le peuple , qu'il le sauva , & le tira hors du danger.

XVIII. Mais quant aux deux roys , Agis se jetta en franchise dedans le temple de Juno Chalcæcos , & Cleombrotus en celuy de Neptune : car il sembloit que Leonidas luy en voulust plus qu'il ne faisoit à Agis : tellement qu'il laissa Agis pour aller contre luy , accompagné de gens de guerre : si luy reprocha , quand il fut près de luy , que combien qu'il fust son gendre , il l'avoit neantmoins espié , pour le priver de sa royauté , & l'avoit chassé de son país. A quoy Cleombrotus ne sachant que respondre , se teint assés sans luy rien repliquer : mais Chelonis sa femme,

fille de Leonidas , qui paravant s'estoit sentie outragée du tort que lon faisoit à son pere , & s'estoit separée d'avec son mary Cleombrotus , qui avoit usurpé la royauté sur luy , pour aller servir son pere en son adversité , & tant comme il fut en franchise , se rendit aussi suppliante comme luy , puis quand il s'en fut allé à Tegée , demoura tousjours portant le dueil , indignée à l'encontre de son mary : mais lors au contraire changeant son courroux avec la fortune , se rendit aussi suppliante avec son mary , se seant auprès de luy , & le tenant entre ses bras , ayant au dessoubz d'elle ses deux petits enfans , l'un d'un costé & l'autre d'un autre : tellement que tous les assistens s'en esmerveilloyent , & ploroyent par compassion de voir la debonnaireté & charité de ceste dame , laquelle monstrant son vestement de dueil & ses cheveux espars sans ornement quelconque , se prit à dire , « Ce » n'est point la pitié que j'ay de Cleombrotus , » qui me fait prendre cest habit ny ceste con- » tenance , mon pere , ains est le dueil qui a » tousjours demouré avec moy , & que j'ay con- » tinuellement porté depuis le commencement » de tes maux , quand tu fus chassé en exil : » lequel donques des deux doy-je plus tost faire » maintenant , ou continuer de vivre en dueil & » porter ce piteux accoustrement , ores que tu es
venu

» venu au dessus de tes ennemis , & es restitué
 » en ta royauté , ou bien vestir un accoustrement
 » royal & robbe de parement , voyant que tu
 » veux occire le mary , auquel tu m'as donné
 » fille en mariage ? lequel s'il ne te peult mouvoir
 » à pitié , & obtenir de toy mercy par les larmes
 » de sa femme & de ses enfans , souffrira encore
 » une plus dure peine de son mauvais conseil ,
 » que celle que tu luy veux faire souffrir , c'est
 » qu'il verra sa femme , laquelle il aime plus
 » cherement que chose de ce monde , mourir
 » devant luy : pource qu'autrement , comme
 » pourrois-je ny avec quel front me trouver en
 » la compagnie des autres honestes dames , quand
 » je n'auray onques peu emouvoir à pitié ny mon
 » pere en priant pour mon mary , ny mon mary
 » en priant pour mon pere , & que je me voy
 » née pour estre & fille & femme tousjours mal-
 » heureuse & mesprisée des miens ? Mais quant
 » à mon mary , s'il avoit aucune raison apparente
 » de faire ce qu'il fait , je la luy ostay en me
 » rengeant de ton costé , & protestant contre luy
 » du tort qu'il te faisoit : & au contraire tu
 » luy donnes honneste couverture d'excuser sa
 » faulte , faisant paroître que la royauté soit chose
 » si desirable & si grande , qu'il soit loisible de
 » tuer ses gendres , & ne faire aucun compte de
 » ses propres enfans pour l'amour d'elle ».

XIX. Chelonis en faisant ces regrets & lamentations, met son visage dessus la teste de Cleombrotus, & jetta ses yeux enfonchez de douleur, & fondus à force de larmoyer, devers les assistens : parquoy Leonidas, après avoir un peu communiqué avec ses amis, commanda à Cleombrotus qu'il se levast de là, & qu'il s'en allast hors de la ville en exil, priant sa fille qu'elle voulust demourer pour l'amour de luy, & n'abandonner point son pere qui l'avoit tant aimée, que pour l'amour d'elle, il avoit sauvé la vie à son mary : mais, quoy qu'il dist, il ne la sceut induire à vouloir ce faire, ains se levant quant & son mary, luy tendit l'un de ses enfans, & prit elle mesme l'autre entre ses bras : puis ayant fait son oraison devant l'autel de la deesse¹, s'en alla en exil avec luy, de maniere que si Cleombrotus n'eust eu le jugement depravé par ambition & vaine gloire, il eust deu estimer que cest exil luy estoit plus grand heur pour sa femme telle qui l'accompagnoit, que n'estoit la royauté mesme sans elle.

XX. Ainsi Leonidas ayant chassé Cleombrotus hors de la ville, & au lieu des premiers ephores qu'il deposa, en ayant substitué d'autres, se mit incontinent à penser les moyens

¹ Lisez : du dieu. On a vu au commencement du chapitre xviii que Cleombrote s'estoit réfugié dans le temple de Neptune.

comment il pourroit avoir Agis : si tascha de luy persuader ptemierement qu'il sortist de la franchise du temple où il estoit, & qu'il s'en allast avec luy à seureté exercet sa royaulté, luy donnant à entendre que ces citoyens luy avoyent pardonné tout le passé, à cause qu'ilz cognoissoient bien qu'il avoit esté deceu & circonvenu par Agefilaus; comme jeune homme desirieux d'honneur qu'il estoit. Toutefois pour cela Agis ne bougeoit point de sa franchise, ains avoit pour suspect tout ce que l'autre luy alleguoit : au moyen dequoy Leonidas se deporta de rascher à l'attirer & l'abuzer par belles paroles : mais Amphares, Demochares & Arcefilaus alloient souvent le visiter & deviser avec luy, tant que quelquefois ilz le menoyent jusques aux estuves : puis quand il s'y estoit estuvé & lavé, ilz le ramenoient dedans la franchise du temple, car ilz estoient tous ses familiers. Mais Amphares ayant de nagueres emprunté d'Agefistrat quelques precieux meubles, comme tapisseries & vaisselle d'argent, entreprit de le trahir, luy, sa mere & son ayeule, soubz esperance que ces meubles qu'il avoit empruntez luy demoureroient. Et dit on que ce fut luy, qui plus que nul autre presta l'oreille à Leonidas, & incita & irrita les ephores, du nombre desquelz il estoit, alencontre de luy. Comme doncques Agis

eust accoustumé de se tenir tousjours le reste du temps dedans le temple, excepté que quelquefois il alloit jusques aux estuves, ils proposerent de le surprendre quand il seroit hors de la franchise. Si espierent un jour qu'il s'estoit estuvé, & ainsi qu'ilz avoyent accoustumé luy allerent au devant, & le saluerent, faisans semblant de le vouloir reconvoyer, en devisant & raillant avec luy, comme avec un jeune homme duquel ils se tenoyent fort familiers : mais quand ilz furent à l'endroit du destour d'une rue traversante qui alloit à la prison, Amphares mettant la main sur luy, pource qu'il estoit en magistrat, luy dit, « Je te fais prisonnier, Agis, » & te mene devant les ephores pour rendre » compte & raison de ce que tu as innové en » l'estat de la chose publique ». Et lors Demochares qui estoit grand & puissant homme, luy jetta aussi tost sa robbe à l'entour du col & le tira par devant, les autres le pouloyent par derriere, comme ilz avoyent conspiré entre eulx. Ainsi n'y ayant personne auprès d'eulx qui peust secourir Agis, ilz feirent tant qu'ilz le trainerent en prison, & incontinent y arriva Leonidas avec bon nombre de soudards estrangers, qui environnerent la prison par le dehors.

XXI. Les ephores entrerent dedans & envoyerent querir ceux du senat, qu'ilz sçavoyent

bien estre de mesme volonté qu'eulx : puis commanderent à Agis comme par forme de procès, de dire pour quelle cause il avoit fait ce qu'il avoit remué en l'administration de la chose publique. Le jeune homme se prit à rire de leur simulation : & adonc Amphares luy dit qu'il n'estoit pas temps de rire, & qu'il falloit qu'il payast la peine de sa folle temerité. Un autre ephore faisant semblant de luy favoriser & de luy monstrier un expedient pour eschapper de ceste criminelle procedure, luy demanda s'il avoit pas esté seduict & contrainct à ce faire par Agesilaus & par Lyfander. Agis respondit qu'il n'avoit esté induit ne forcé de personne : mais qu'il l'avoit fait seulement pour ensuyvre l'ancien Lycurgus, ayant voulu remettre la chose publique au mesme estat, que luy jadis l'avoit ordonnée. Le mesme ephore luy demanda s'il se repentoit pas de ce qu'il en avoit fait. Le jeune homme respondit franchement, qu'il ne se repentiroit jamais de chose si sagement & si vertueusement entreprise, encore qu'il veist la mort toute certaine devant ses yeux. Alors ilz le condamnerent à mourir, & commanderent aux sergens de le mener en la Decade^r, qui est un certain lieu de la prison, là où lon estran-

^r Plusieurs savans croient qu'il faut lire : la Cécade, nom connu de la prison de Sparte.

gle ceulx qui sont condamnez à mourir par justice. Et Demochares voyant que les sergens n'oyent mettre la main sur luy, & que semblablement les soudards estrangers refuyoyent & avoyent en horreur une telle execution, comme chose contraire à tout droit divin & humain, de mettre la main sur la personne d'un roy, en les menaçant & leur disant injure, trainna luy mesme Agis dedans celle chartre : car plusieurs avoyent desjà entendu sa prise, & y avoit ja grand tumulte à la porte de la prison, & force lumieres & torches, & y accoururent aussi tost la mere & l'ayeule d'Agis, qui crioient & requeroient que le roy de Sparte peust au moins avoir justice, & que son procès luy fust fait par ses citoyens. Cela fut cause de faire hastier & precipiter son execution, pource que ses ennemis eurent peur que lon ne le recourust par force la nuit d'entre leurs mains, s'il y arrivoit encore plus de gens. Ainsi estant Agis mené à la fourche, apperceut en allant l'un des sergens qui ploroit & se tourmentoit, auquel il dit, « Mon amy, ne te tourmente point pour pitié de moy : car je suis plus homme de bien, que ne sont ceux qui me font mourir si meschamment & si malheureusement » : & en disant ces paroles bailla volontairement son col au cordeau.

XXII. Cependant Amphares sortit à la porte de la prison, là où il trouva Agésistrata mere d'Agis, qui se jeta à ses pieds, & luy la relevant comme pour la familiarité & amitié qu'il avoit eue avec elle, luy dit, que lon ne feroit force ne violence aucune à Agis, & qu'elle le pouvoit aller voir si bon luy sembloit : elle pria que lon laissast donques entrer sa mere quant & elle. Amphares respondit que rien ne l'empeschoit, & ainsi les mit dedans toutes deux, faisant refermer les portes de la prison après elles. Mais entrées qu'elles furent, il bailla aux sergens Archidamia la premiere à executer, laquelle estoit fort ancienne, & avoit vescu jusques à son extreme vieillesse en plus grand honneur & plus de dignité, que nulle autre dame de la ville. Celle là executée, il commanda à Agésistrata d'entrer après, & elle voyant le corps de son filz mort estendu, & sa mere encore pendue au gibet : aida elle mesme aux bourreaux à la despendre, & l'estendit au long du corps de son filz : & après l'avoir accoustrée & couverte, se jeta par terre auprès du corps de son filz, & en le baisant au visage, « Helas ! dit-elle, ta trop grande bonté, douceur & clemence, mon filz, sont cause de ta mort & de la nostre ». Adonc Amphares qui regardoit de la porte ce qui se faisoit au dedans, oyant ce

qu'elle disoit, entra sur ce poinct & luy dit en cholere, « Puis que tu as esté consentante du » faict de ton filz, tu souffriras aussi mesme peine » que luy ». Lors Agésistrata se relevant pour estre » estranglée, « Au moins, dit elle, puisse cecy » profiter à Sparte ».

XXIII. Ce cas estant divulgué par la ville; & les trois corps emportez hors la prison, la crainte des magistrats ne peut estre si grande, que les citoyens de Sparte ne montraissent évidemment qu'ilz en estoient fort desplaisans, & qu'ilz ne haïssent de mort Leonidas & Amphares, estimans qu'il n'avoit oncques esté commis un si cruel, si malheureux ne si damnable forfait en Sparte, depuis que les Doriens estoient venus habiter au Peloponese : car les ennemis mesme en bataille ne mettoient pas volontiers les mains sur les roys des Lacedæmoniens, ains s'en destournoient s'il leur estoit possible, pour la crainte & reverence qu'ilz portoyent à leur majesté, de sorte qu'en tant de batailles, que les Lacedæmoniens avoyent eüs à l'encontre des Grecs, il n'y en eut oncques que Cleombrotus, avant le temps de Philippus, qui fut tué d'un coup de javeline en la journée de Leuctres ¹. Il est vray que les Messeniens

¹ La seconde année de la cent deuxieme olympiade, avant J. C. 371. C'est Cléombrote premier.

tiennent que leur Aristomenes tua aussi Theopompus : mais les Lacedæmoniens disoyent qu'il l'avoit seulement blecé : toutefois en cela il y a quelque diversité d'opinions : mais bien est il certain que cest Agis fut le premier des roys que les ephores feirent mourir, pour avoir voulu faire de très belles choses & très convenables à la gloire & dignité de Sparte, estant en l'age, en laquelle quand les hommes faillent, encore leur pardonne lon, & ayans eu ses amis plus juste occasion de se plaindre de luy, que non pas ses ennemis, pource qu'il sauva la vie à Leonidas, & se fia aux autres, comme la plus douce & la plus humaine creature du monde qu'il estoit.

XXIV. Ayant doncques esté Agis ainsi executé, Leonidas ne fut pas assez habile pour surprendre aussi Archidamus son frere, car il s'en fuit incontinent : mais il feit emmener par force sa femme hors de sa maison avec un petit enfant qu'elle avoit de luy, & la feit espouser à son filz Cleomenes, combien qu'il ne fust pas encore en aage de marier, de peur que ceste jeune dame ne fust remariée ailleurs, pource qu'elle estoit heritiere d'une grande & riche maison, estant fille de Gylippus, nommée Agiatis, outre ce qu'elle estoit la plus belle jeune dame qui fust pour lors en toute la Grece, la plus

394 AGIS ET CLEOMENES.

honeste & la mieulx conditionnée : pourtant feit elle tout ce qui luy fut possible , pour n'estre point forcée : toutefois étant à la fin mariée avec Cleomenes , elle eut tousjours Leonidas en haine mortelle : mais elle se monstra bonne & amiable envers son jeune mary , lequel aussi incontinent qu'il l'eut espousée en fut amoureux , & par une compassion luy sceut bon gré de l'amour qu'elle portoit encore à son premier mary , & de l'amiable souvenance qu'elle avoit de luy , de maniere que bien souvent il l'en mettoit luy mesme en propos , luy demandant comme les choses estoient passées , & prenoit plaisir à luy ouir racompter quelle intention & quelle vouté avoit eue Agis.

XXV. Car Cleomenes estoit bien autant desireux d'honneur , & avoit bien le cueur aussi hault comme Agis , & n'estoit pas moins bien né à la temperance & à la simplicité & suffisance de peu , que luy : mais il n'avoit pas celle bonté trop reservée , & ceste trop grande douceur , que l'autre avoit : ains se trouvoit en son naturel un petit aguillon de cholere davantage , & une vehemence de vouloir mettre à execution ce qu'il trouvoit honeste : si luy sembloit bien qu'il estoit plus desirable & plus honeste , pouvoir venir au dessus de ceulx , ausquelz il avoit à faire , de leur consentement & bon gré , mais encore

estimoit il honeste d'en venir au dessus comment que ce fust, voulussent ou non, en les forçant de se renger à ce qui estoit le meilleur. Et ne luy plaisoit point l'estat de la ville de Sparte, voyant que les citoyens s'alloyent aneantissant par oyisiveté & voluptez, & que le roy laissoit aller tous les affaires comme ilz pouvoient, prouven que lon ne l'empeschast point de vivre à son plaisir en ses delices, sans rien faire, de sorte que personne n'y ayant soing du public, chacun tiroit tout ce qu'il pouvoit au profit particulier de sa maison : au demourant, de faire exercer les jeunes enfans, de les nourrir à la temperance, d'introduire une egalité & une reformation de vie, il n'estoit pas seulement seur d'en parler, attendu qu'Agis avoit de fresche date esté mis à mort pour ceste occasion. Lon dit davantage que Cleomenes encore jeune garçon avoit ouy quelques discours de la philosophie, quand le philosophe Sphærus natif du país de Boristhenes passa par le país de Lacedæmone, où il s'estoit affectueusement arresté à instruire les jeunes garçons & les jeunes hommes : c'estoit l'un des premiers & principaulx diciples de Zenon le Citien, & prit plaisir à considerer & aimer la generosité du naturel de Cleomenes, & à luy eschauffer encore davantage le desir qu'il avoit de se faire valoir & renommer : car comme lors

dir, que l'ancien Leonidas interrogué quel poëte luy sembloit Tyrtæus, respondit, « Bon pour » flater & attirer les cueurs des jeunes gens », pource que par telz vers, estans comme remplis de divine inspiration, quand ilz venoyent puis après aux batailles, ilz se jettoient la teste baissée dedans les perilz, sans en rien espargner leurs personnes : aussi les raisons des philosophes stoïques ont bien ne sçay quoy de dangereux pour les natures fortes & vigoureuses, qui les induit quelquefois à temerité : mais quand elles viennent à s'imprimer en un naturel grave, doulx & reposé, c'est lors que plus elles monstrent & produisent ce qu'elles ont de bon fruit.

XXVI. Estant doncques Leonidas pere de Cleomenes venu à mourir, & luy à succeder à la royauté, voyant que les habitans de Sparte estoient de tout point corrompus, par ce que les riches n'entendoyent qu'à leurs particuliers plaisirs ou profits, & ne se soucioient point du public : & que les pauvres ayans assez affaire à vivre en leurs maisons, n'alloyent point guayement ny de bon courage à la guerre, & ne leur chaloit de la nourriture des enfans : que luy n'avoit que le nom de roy, mais que toute l'authorité estoit en la main des ephores, il luy prit dès son advenement à la royauté, envie de remuer & changer l'estat de la chose publique.

& ayant un sien amy Xenares, lequel avoit autre fois esté amoureux de luy, ce que les Lacedæmoniens appellent Empnistai, comme qui diroit, estre inspiré, il commença à sonder son vouloir, en luy demandant quel roy luy sembloit avoir esté Agis, & par quelle maniere & avec qui il estoit entré au chemin qu'il avoit suyvy. Xenares du commencement n'estoit point mal content de remémorer ces choses, & luy racomptoit comme tout estoit passé : mais quand il apperceut que Cleomenes se passionnoit extrêmement & s'affectionnoit oultre mesure à ceste nouvelleté d'Agis, & qu'il en vouloit ouir le récit trop souvent, il l'en reprit & l'en tena en cholere, comme n'estant pas sage, & finalement se deporta du tout de luy en parler, & mesme de retourner le visiter, sans toutefois en descouvrir la cause à personne, disant seulement à ceulx qui la luy demandoyent, que luy mesme la sçavoit bien : parquoy l'ayant ce Xenares ainsi rebuté, & pensant qu'il trouveroit les autres tout de mesme, il resolut d'en inventer les moyens luy tout seul à part soy : & pensant qu'il luy seroit plus facile de remuer les choses en temps de guerre qu'en temps de paix, il mena la ville de Sparte en pique avec la communaulté des Achæiens, lesquels donnerent eulx mesmes les premiers occasions de se plaindre d'eulx.

XXVII. Car Aratus ayant la principale autorité en leur conseil, avoit tousjours tendu dès son commencement à joindre en une ligue tous les habitans du Peloponèse, & estoit cela le seul but où visoyent tous ses travaux en guerre, & toutes ses pratiques & menées en paix, estimant qu'il n'y avoit autre moyen pour faire que les ennemis du dehors ne les peussent atcunement offenser : & y ayant desja rengé presque tous les autres peuples, il ne luy restoit plus que les Eliens, les Lacedæmoniens ; & quelques uns des Arcadiens qui marchoyent soubz les Lacedæmoniens. Si tost doncques que le roy Leonidas fut decédé, il commença à harceler les Arcadiens, & à les irriter, mesmement ceulx qui confinent aux Argiens ; pour sonder que voudroient dire les Lacedæmoniens, ne faisant point de compte de Cleomenes, pource qu'il estoit encore jeune, & n'avoit aucune experience de la guerre : à raison dequoy les ephores de Lacedæmone l'envoyerent premierement saisir le temple de Minerve qui est près la ville de Belbine¹, pource que c'est une entrée du país de la Laconie, mais le lieu estoit lors en querelle entre les Megalopolitains & les Lacedæmoniens. Cleomenes s'en saisit, & le fortifia : dequoy Aratus ne feit point autrement

¹ D'autres écrivent Blérmine, Bélamine, &c. Elle avoit fait partie de l'Arcadie, à qui elle avoit été enlevé par les Lacédémoniens.

de plainte, mais une nuit partant avec son armée alla courir sus à ceulx de Tegée¹ & d'Orchomene² : routefois les traistres qui avoyent intelligence avec luy, eurent peur quand ce vint à mettre leur trahison à execution. Ainsi s'en retourna Aratus sans rien faire, pensant que lon n'auroit rien sceu de sa faillie : mais Cleomenes par mocquerie luy escrivit comme à son amy, luy demandant où il menoit l'autre nuit son armée : Aratus luy rescrivit que ayant entendu qu'il vouloit fortifier Belbine, il estoit fort pour l'en engarder. Cleomenes renvoya de rechef vers luy, & luy manda qu'il le croyoit fermement, mais qu'il le prioit bien fort de luy rescrire, si d'aventure il n'y avoit quelque interest, pour quelle cause il faisoit doncques porter des eschelles & des flambeaux après luy. Aratus se prit à rire de ceste attainte de mocquerie, & demanda quel estoit ce jeune homme. A quoy Democritus Lacedæmonien banny de son pais luy respondit : « Il est tel, que je t'advise si tu as à entreprendre » quelque chose contre les Lacedæmoniens, qu'il » fault que tu te hastes avant que les ergots soyent » venus à ce jeune poulet ».

¹ Grande ville d'Arcadie près de l'Alphée, à une journée environ de chemin de l'Eurotas, sur la route de Mégalopolis à Argos.

² Aussi en Arcadie, près de Tégée & de Mégalopolis, comme le fait l'indiquer.

XXVIII. Depuis estant à la campagne dedans le païs d'Arcadie avec peu de gens de cheval & trois cents hommes de pied seulement, les ephores luy manderent qu'il s'en retournaſt, craignans la guerre : mais il ne fut pas ſi toſt retourné à Sparte, que Aratus luy prit à ſon dos la ville de Caphyes¹, au moyen dequoy les ephores le renvoyerent de rechef incontinent, où il prit la place de Methydrium², & courut tout le plat païs d'Argos. Si ſortirent les Achæiens alencontre de luy avec une armée de vingt mille hommes de pied & de mille chevaux, ſous la conduite d'Ariſtomachus, & s'entrerentrenerent près la ville de Palantium³, là ou Cleomenes luy préſenta la bataille : mais Aratus craignant la hardieſſe de ce jeune homme, ne voulut pas permettre que le capitaine hazardaſt la bataille, ains ſe retira, dont il fut injurié par les Achæiens, moqué & meſpriſé des Lacedæmoniens, leſquelz n'eſtoient pas en tout plus de cinq mille combatans : parquoy le cueur en eſtant creu à Cleomenes, & parlant plus bravement à ſes citoyens, il leur ramenoit

¹ Dans l'Arcadie, près d'Orchomène du Péloponèſe, qu'il ne faut pas confondre avec Orchomène de Béotie.

² L'une des villes dont la réunion formoit la cité de Mégalo-polis.

³ Ville d'Arcadie qui tiroit ſon nom de Pallas, biſayeul d'Evandre. Il faut donc écrire Pallantæum. Voyez Virg. *Æn.* L. VIII, v. 54.

AGIS ET CLEOMENES. 401

en memoire un mot de quelqu'un de leurs anciens roys qui fouloit dire, que les Lacedæmoniens ne demandoient jamais combien estoient les ennemis, mais là où ilz estoient.

XXIX. Quelque temps après les Achæiens faifans la guerre aux Eliens, Cleomenes les alla fecourir, & attaignit l'armée des Achæiens près le mont de Lyceum¹ ainsi comme ilz s'en retournoient desjà : si les effroya de telle sorte, qu'ilz se meirent en rouverte, en tua un grand nombre, & en prit beaucoup de prisonniers, tellement que le bruit courut incontinent par toute la Grece que Aratus luy mesme y estoit mort, & usant sagement de l'occasion que luy donnoit ceste rouverte, s'en alla droit à la ville de Mantinée², sans que personne s'en doubtaft, & l'ayant surprise au desproveu, meit bonne garnison dedans pour la tenir.

XXX. Mais les Lacedæmoniens ayans les cueurs faillis, & resistans à ces entreprises, pource qu'il les vouloit à tout propos mener à la guerre, il luy prit envie d'envoyer querir Archidamus frere d'Agis estant à Messene, auquel appartenoit le droit de la royauté de l'autre maison royale de Sparte, cuidant que la puissance des ephores en viendroit à estre de

¹ Montagne d'Arcadie.

² Au midi de l'Arcadie, près les confins de la Laconie.

402 AGIS ET CLEOMENES.

tant plus affoiblie , quand celle des deux roys ensemble leur feroit contrepoids : dequoy s'appercevens ceulx qui avoyent fait mourir Agis , & craignans qu'ilz ne fussent avec le temps punis de ceste execution , si une fois Archidamus retournoit , ilz le receurent bien secretement en la ville , & aiderent à le faire revenir , mais si tost qu'il y fut , le feirent aussi mourir , soit que ce fust au desceu de Cleomenes , ainsi comme Phylarchus l'escrit , ou bien de son consentement , s'estant depuis laissé induire par ses amis à le leur abandonner : car il est bien certain que la plus part de la coulpe en fut rejetée sur eulx , pource qu'il sembla qu'ilz eussent forcé Cleomenes à ce faire.

XXXI. Toutefois ayant resolu de remuer , au plus tost qu'il luy seroit possible , l'estat de Sparte , il fit tant par argent envers les ephores , qu'il les induisit à luy decerner un voyage : & si attira plusieurs autres des citoyens à sa devotion par le moyen de sa mere Cratesiclea , laquelle luy fournissoit argent tant comme il vouloit , & luy aidoit à se poulser en avant , jusques à prendre mary qui estoit le premier homme de Sparte en autorité & en reputation , pour servir aux desseins de son filz , combien qu'elle n'eust point autrement de vouldté de foy remarier. Ainsi Cleomenes menant son armée

aux champs ; prit une place dedans le territoire de Megalopolis , appelée Leuctra¹ : & les Achæiens estans promptement venus au secours sous la conduite d'Aratus , il y eut bataille donnée tout joignant la ville mesme , où il eut du pire en une partie de son armée : mais toutefois Aratus ne voulut pas souffrir que les Achæiens passassent une grande & profonde fondrière qu'il y avoit pour le pourfuyvre , ains fit sonner la retraite , dequoy Lysidas Megalopolitain se courrouceant , fit neantmoins picquer outre les gens de cheval qu'il avoit sous luy , & en chassant ne se donna garde qu'il se trouva en un lieu plein de vignes , de murailles & de fosses , où il fallut qu'il escartast ses gens , encore n'en pouvoit il sortir. Ce que voyant Cleomenes , envoya ses Tarentins , qui estoient chevaux legers , & ses Candiots contre luy , par lesquelz Lysidas en combatant vertueusement fut porté mort par terre. Cela fit reprendre courage aux Lacedæmoniens , de maniere que avec grands cris ilz retournerent charger les Achæiens par telle fureur , qu'ilz meirent toute leur armée entierement en rouverte , & y mourut sur le champ grand nombre de leurs gens , les corps desquelz Cleomenes à leur requeste leur rendit pour leur donner sepulture : mais il fit

¹ Dans Polybe ce lieu est appelé Laodicies.

404 AGIS ET CLEOMENES.

enlever celuy de Lyfiadas, qu'il revestit d'une robe de pourpre, & luy mettant une couronne sur la teste, l'envoya en ce parement, jusques aux portes mesmes de la ville de Megalopolis. C'est celuy qui avoit quitté la tyrannie qu'il tenoit en sa ville, en rendant la liberté à ses citoyens, & qui avoit joint Megalopolis à la ligue & communauté des Achæiens.

XXXII. Depuis ceste desfaite Cleomenes ne pensa plus qu'à toutes choses grandes, s'estant persuadé que s'il pouvoit ordonner les affaires de Sparte ainsi comme il desiroit, il viendrait puis après facilement à bout des Achæiens. Si remonstra au mary de sa mere Megistonus, qu'il se falloit despestrer des ephores, & faire mettre en commun tous les heritages des Spartiates, & puis quand ilz seroyent egaux en biens, les exciter lors à vouloir recouvrer la principauté de toute la Grece, comme l'avoient anciennement tenue leurs predecesseurs : à quoy Megistonus s'estant accordé, il prit encore deux ou trois de ses amis. Or estoit il advenu environ ce temps la, que l'un des ephores couché dedans le temple de Pasiphaé, avoit eu en dormant un merveilleux songe : car il luy fut advis, que au parquet où les ephores avoyent accoustumé de tenir leur audience, il n'y avoit qu'une seule chaire, & que les autres quatre en avoyent esté

AGIS ET CLEOMENES. 405

ostées : dequoy luy s'esmerveillant , entendit une voix en sortant du temple , disant que cela estoit le plus expedient pour la ville de Sparte. L'ephore racompta ceste vision le lendemain à Cleomenes , lequel en fut un peu troublé du commencement , pensant qu'il luy comptast cela pour sonder ce qu'il avoit sur le cueur , ayant senty quelque vent de sa deliberation : mais quant il se fut persuadé que l'autre ne luy mentoit point , alors il s'en asseura & confirma encore davantage : & menant quant & luy tous ceulx des Spartiates , qu'il pensoit bien devoir estre contraires à l'exécution de son entreprise , il alla prendre Heræa & Alsæ¹ ville des Achæiens , envictuailla Orchomene , & s'alla camper devant la cité de Mantinée : brief , il lassa & travailla tant les Lacedæmoniens , en leur faisant ainsi faire çà & là de longues traittes , que finalement ilz le prierent de les laisser un peu reposer en Arcadie , & ce pendant luy mesme avec les estrangers qu'il avoit s'en retourna droit à Sparte , ayant par le chemin communiqué sa deliberation à ceulx de qui plus il se fioit , & marcha tout à l'aise , à celle fin qu'il surprist les ephores ainsi comme ilz seroyent à table pour soupper.

¹ Villes d'Arcadie , soumises aux Achéens ; celle-ci est appelée Alsæ par Pausanias ; c'est vraisemblablement celle que Pline nomme Alæ.

XXXIII. Quand il fut tout près de la ville, il envoya devant Euryclidas en la salle des ephores, comme pour leur dire quelque nouvelle du camp de par luy : après lequel il feit aller aussi Thericion & Phœbis, & deux autres qui avoyent esté nourris avec luy, que les Lacedæmoniens appelloyent les Samothraciens, menans quant & eulx petit nombre de souldards, tous lesquels, ainsi comme Euryclidas parloit encore à eulx, se jetterent les espées nuës aux poings dedans la salle des ephores, & commencerent à frapper sur eulx. Agefilaus fut le premier atteinct, lequel estant tumbé par terre au premier coup feit semblant d'estre mort, mais ne l'estant pas il se coula tout bellement hors de la salle, & gaigna secrètement une petite chapelle qui est sacrée à la peur, laquelle souloit toujours estre fermée, mais lors d'aventure elle se trouva ouverte, & se jettant dedans ferma la porte sur luy. Les autres quatre ephores furent occis en la place, & plus de dix autres qui se voulurent entremettre de les secourir : car au demourant ilz ne tuerent personne de ceulx qui ne bougerent point, ny n'empescherent ceulx qui voulurent sortir de la ville : ains, qui plus est, pardonnerent à Agefilaus, qui le lendemain sortit de la chappelle de la Peur. Car il y a en la ville de Sparte un temple dedié non

seulement à la peur, mais aussi à la mort, & un autre au ris, & à beaucoup d'autres telles passions de l'ame : & honoroyent la peur, non comme lon fait les mauvais esprits, pour les destourner, estimans que ce fust chose nuisible & dommageable, ains pource qu'ilz croyoyent qu'il n'y a rien qui maintienne mieulx une chose publique que fait la peur : à raison dequoy les ephores à l'entrée de leur magistrat, ainsi comme escrit Aristote, faisoient proclamer, que tous Spartiates eussent à faire raire leurs mentons, & à penser d'obeir aux loix, à fin qu'ilz ne leur fussent rudes. Et faisoient, à mon advis, faire ceste proclamation des moustaches pour accoustumer les jeunes hommes à obeir à leurs supérieurs jusques aux moindres choses : & me semble que les anciens ont estimé la prouesse & hardiesse n'estre point une privation de peur, ains plus tost une peur d'avoir blasme & reproche, & une crainte de deshonneur, pource que ordinairement ceulx qui ont plus de peur de transgresser les loix, sont les plus asseurez à l'encontre de l'ennemy, & ne se soucient point d'endurer tous maux ceulx qui redoubtent d'avoir reproche : & pource parla sagement celuy qui dit premierement,

La peur tousjours accompagne la honte.

408 AGIS ET CLEOMENES.

Aussi fait Homere dire à Helene en un passage ;
parlant au roy Priam ,

Certainement , cher seigneur & beaupere ,
Je te redoubte ensemble & te revere.

Et en un autre endroit parlant des foudards
Grecs ,

Sans dire mot leurs chefs ilz redoubtoient ,

pource que ordinairement les hommes reverent
ceux qu'ilz craignent. Voilà pourquoy auprès
de la salle des ephores estoit à Sparte la chap-
pelle dediee à la Peur , ayans élevé l'autorité
de leur magistrat , presque jusques à une puis-
sance absoluë & souveraine.

XXXIV. Le lendemain donques Cleomenes
à son de trompe bannit quatre vingts des ci-
toyens de la ville , & fait abbatre les sieges &
chaires des ephores , excepté une seule , laquelle
il reserva à fin d'y seoir luy mesme pour donner
audience. Puis faisant assembler le peuple , ren-
dit raison de ce qu'il avoit fait : car il dit que
Lycurgus mesla bien les senateurs avec les roys ,
& que la ville avoit ainsi esté regie long temps
durant , sans avoir besoing d'autre magistrat ;
mais que depuis estant la guerre contre les Mes-
seniens de longue durée , les roys distraicts &
empeschez à ceste guerre , & ne pouvans eulx
mesmes vacquer à ouïr & decider les affaires &

les differents des parties, choisirent quelques uns de leurs amis, qu'ilz laisserent en la ville pour en cognoistre & juger en leur place, lesquels furent nommez ephores, & continuerent longuement à estre seulement ministres des roys : mais depuis ilz s'estoyent petit à petit attribué à eulx mesmes la puissance souveraine, & avoyent usurpé une jurisdiction à part pour eulx. En signe dequoy, disoit il, vous voyez que encore jusques aujourdhuy, quand les ephores appellent le roy pour la premiere fois, il repugne à leur mandement, & pour la seconde aussi, mais à la troisieme il se leve & s'en va vers eulx : & qu'il soit vray, celuy qui le premier estendit la puissance & l'autorité des ephores, Asteropus fut ephore plusieurs siecles depuis l'institution des roys : encore s'ilz se fussent voulu comporter doucement & modereement, il eust à l'adventure mieulx valu les endurer : mais de vouloir par une licence usurpée supprimer les magistrats legitiment instituez de toute ancieneté, jusques à avoir banny aucuns des roys, & en avoir fait mourir d'autres sans aucune forme de procès ny ordre quelconque de justice, & menacer ceux qui desirent encore revoir à Sparte le très beau & très saint gouvernement qui y souloit estre jadis, ce n'est pas, dit il, chose que lon deust plus endurer.

: XXXV. Or s'il eust esté possible d'exterminer de Sparte sans meurtre ces pestes de la chose publique que l'on y a apporté de dehors, j'entends les delices, la superfluité, l'opulence, les debtes, les usures, & encore d'autres plus anciennes, la pauvreté & la richesse, il se fust estimé le plus heureux roy, qui eust onques esté, comme un medecin, qui sans faire douleur auroit guary les maladies de son país: mais s'il avoit esté contraint de mettre la main au sang, il avoit l'exemple de Lycurgus qui le devoit excuser, lequel n'estant ny roy, ny autre magistrat, ains seulement citoyen privé prenant autorité de roy, eut bien la hardiesse de venir sur la place avec armes, de maniere que le roy, qui lors estoit Charilaus, en estant effroyé s'en fouit en la franchise des temples & des autelz: mais estant bon de nature, & aimant le bien & l'honneur de son país, il se rengea bien tost du costé de Lycurgus, luy aidant à executer ce qu'il avoit entrepris, & approuva le changement du gouvernement de la chose publique: par où il appert que Lycurgus en effect monstra, qu'il est mal aisé de remuer un gouvernement de chose publique sans force & sans crainte, dont¹ il avoit usé le plus sobrement & le plus reserveement qu'il luy avoit esté possible, en ostant & chas-

¹ Lui-même, Cléomène.

fant ceulx qui repugnoyent au bien & au salut de Lacedæmone, remettant aux autres toutes les terres du païs à departir également en commun, & delivrant de debtes tous ceulx qui en estoient obligez & chargez : & au surplus, qu'il vouloit faire une preuve & une election des estrangers, pour donner à ceulx qu'il cognoistroit plus gens de bien droit de bourgeoisie Spartaine, à fin de conserver la ville de Sparte & son territoire par force d'armes, à ce que deormais nous ne voyons plus piller ne fourrager le païs de la Laconie par les Ætoliens & Esclavons ¹ à faulte de gens qui le puissent defendre.

XXXVI. Cela fait, il commença le premier à mettre tous ses biens en commun, & après Megistonus son beaupere, & consecutivement chascun de ses amis : puis fait faire le departement des terres, & si ordonna une portion à chascun des bannis, que luy mesme avoit chassé en exil, promettant qu'il les recevrait tous en la ville quand les choses seroyent rassises, & qu'elles auroient pris pied : & ayant remply le nombre des citoyens de Sparte de leurs plus honestes & plus vertueux voisins, en fait quatre mille hommes de pied armez, leur en-

¹ Grec, les Illyriens, le long de la mer Adriatique, venant joindre la Macédoine. Mais cette dénomination est assez vague chez les anciens, & comprend une plus ou moins grande étendue de pays.

412 AGIS ET CLEOMENES.

seignant à user de picques à deux mains au lieu de javelines à une main, & à porter le bouclier avec une bonne anse forte, non point avec une courroye fermant avec une boucle. Puis se mit à ordonner de la nourriture & institution des enfans, & à remettre l'ancienne discipline que l'on appelle Laconique : à quoy le philosophe Sphærus, qui estoit présent, luy aida en plusieurs choses, tellement qu'en peu de temps les lieux des exercices pour la jeunesse, & les convives reprirent l'ordre qu'ilz souloyent avoir au temps passé, & se rengèrent la plus part des habitans d'eulx mesmes volontairement à la forme ancienne Laconique de vivre, & peu y en eut qui le feissent par contrainte, puis à fin que le nom de la monarchie, s'il n'y avoit qu'un seul roy, ne les mescontentast, il déclara son frere Euclidas roy comme luy. Il n'y eut jamais à Sparte deux roys d'une mesme maison tout ensemble, que ceste fois là.

XXXVII. Au demourant estant adverty que les Achæiens & Aratus avoyent opinion qu'il n'oseroit sortir du pais de la Laconie, n'y estans pas ses affaires bien asseurez, veu le grand remuement qu'il avoit fait à Sparte, ny esloigner la ville & la laisser chancellant & flottant en si grand bransle, il estima qu'il luy seroit utile & honorable, de faire cognoistre par effect le bon

vouloir & la prompte affection de son armée. Si entra en armes dedans les terres des Megalopolitains, là où il amassa grande quantité de butin, & y feit un grand gast de país, & après tout, ayant surpris quelques joueurs de farces & d'instruments de musique qui venoyent de Messene, il feit dresser un eschaffault dedans les terres mesmes des ennemis, proposa un prix de quatre cents escus ausdicts joueurs & musiciens, & fut tout un jour à les voir jouer, non pour plaisir qu'il y prist, mais pour plus faire de despit à ses ennemis, & leur faire voir de combien il estoit plus puissant qu'eulx, en leur jouant un tel tour de mocquerie & de mespris. Car autrement de toutes les armées des Grecs ou des roys qui estoient en la Grece, il n'y avoit que celle de Sparte seule, où il n'y eust point de suite de farceurs, basteleurs, joueurs de gobelets & de tours de souplesse, de baladines & de menestrieres : car leur camp estoit seul pur & net de toute dissolution, de toute gaudisserie, & de toute insolence, pource que le plus souvent les jeunes hommes y passoyent leur temps à s'exerciter aux exercices de la personne, ou bien à en apprendre les addresses, & les vieux à les enseigner : & si quelquefois ilz se trouvoyent de loisir, leurs jeux estoient de deviser plaisamment ensemble, & de s'en-

414 AGIS ET CLEOMENES.

tredonner les uns aux autres des attaintes de rencontres courtes & aguës à la Laconiene. Et quant à l'utilité que telle maniere de jouer leur apportoit, nous l'avons escrit plus amplement en la vie de Lycurgus.

XXXVIII. Mais lors Cleomenes estoit le maistre qui enseignoit & monstroit à tous, proposant sa vie en veuë de tout le monde comme un mirouer & un exemple de temperance, où il n'y avoit que toute simplicité, sobriété, rien de delicat ny de superflu, ny rien davantage que le moindre soudard de tout le camp : ce qui luy servit beaucoup quant aux affaires de la Grece. Car les Grecs qui alloyent pour negocier ou parler aux autres roys, ne s'esmerveilloient pas tant de leur opulence & richesse, comme ilz detestoyent & haïssoyent leur orgueil & leur arrogance, tant ilz parloyent fierement & superbement à ceulx qui avoyent à traiter de quelque affaire avec eulx : & au contraire, quand ilz alloyent devers Cleomenes, qui estoit roy comme eulx, & qui tel se nommoit, n'y trouvant des robbes de pourpre ny autres habillemens sumptueux, ny des liëts & litières richement acoustrez ; ny un prince qui negociait par entremise d'une infinité de messagers, d'huiſſiers, & quelquefois par petits bulerins, encore avec difficulté grande, & grande peine, ains voyant que

luy mesme leur venoit au devant avec une simple robe pour les recueillir, deviser avec eulx, & despescher les affaires, pour lesquelz ilz estoient venus, gayement & humainement : cela les attirait & gaignoit leurs cueurs à merveilles, de sorte qu'ilz s'en retournoyent avec ceste opinion de dire, qu'il estoit seul des roys digne du sang & de la race d'Hercules.

XXXIX. Quant au traitement de sa table ordinaire, il estoit fort simple, fort estroit, & fort sobre à la Laconienne, à trois lits seulement : mais si d'aventure il festoyoit quelques ambassadeurs & quelques siens hostes qui le fussent venu voir, il y adjoustoit deux autres lits, & avoyent ses valets soing que la table fust un peu mieulx servie, non point de saulses ny de patisserie ou de confitures, ains seulement qu'il y eust de la viande davantage, & de quelque meilleur vin que l'accoustumé : car il tenoit une fois l'un de ses amis, pource que donnant à soupper en son logis à quelques siens hostes & amis, il ne leur avoit donné que du brouet noir & du gros pain seulement, comme lon leur servoit en leurs convives ordinaires : « Car il ne » fault pas, disoit il, en cela, mesmement quand » il y a des estrangers, observer trop estroite- » ment à la rigueur la discipline Laconique » : puis quand la table estoit ostée, on apportoit une

autre petite table à trois piedz , dessus laquelle on mettoit une tasse de cuyvre pleine de vin, & deux couppes d'argent tenans deux cheoppines chacune , & quelques autres pots d'argent aussi, mais en petit nombre, où il beuvoit qui vouloit, car personne n'y estoit semond à boire contre sa voulnté, & ne s'y jouoit ny ne s'y chantoit aucune chose pour donner plaisir à l'ouye , aussi n'en estoit il point de besoing : car luy mesme entretenoit toute la compagnie , partie en demandant , & partie en comprant quelque plaisante chose , de sorte que la gravité de ses propos n'estoit point sans plaisir, mais aussi en leur grace & gayeté n'y avoit point de dissolution. Car il estimoit les moyens de prendre & gagner les hommes par appasts de presents d'argent, comme faisoient les autres princes & roys, grossiers, sans artifice, & pleins d'injustice : mais le plus honesté, le plus gentil, & le plus royal moyen luy sembloit, de les attirer par courtoisie de plaisant entretien & de devis, ès quelz il y eust grace & foy tout ensemble, ayant opinion qu'il n'y avoit autre different entre l'amy & le mercenaire, sinon que l'un s'acqueroit & s'entretenoit par douceur de nature & par bon entretien, & l'autre se prenoit par argent.

XL. Les premiers donques qui le meirent dedans leur ville, furent les Mantiniens, qui luy

luy ouvrirent les portes une nuit, & luy aidans à chasser la garnison des Achæiens, se livrerent eux mesmes entre ses mains : & luy leur rendant leurs loix & la liberté de gouverner la chose publique à leur mode, le jour mesme s'en alla à Tegée. Peu de temps après, faisant le tour par l'Arcadie, il alla descendre à Pheres en Arcadie, tendant à l'un des deux, ou à donner la bataille aux Achæiens, ou bien à mettre Aratus en leur male grace, pour luy avoir abandonné le plat païs à courir & piller : car il est bien vray que Hyperbatas estoit pour lors general des Achæiens, mais Aratus avoit toute l'autorité. Parquoy estans les Achæiens sortis au champ, avec tout leur peuple en armes, & ayans planté leur camp à Dymes, près le temple¹ de Hecatombeum, Cleomenes tirant celle part, alla loger entre la ville de Dymes qui luy estoit contraire, & le camp de ses ennemis : ce que aucuns ne trouvoient pas trop sagement fait : mais à force de harasser les Achæiens & les provoquer hardiment, il les contraignit à la fin de venir à la bataille, là où il les desfeit, & meit toute leur armée en rouverte, en laquelle il en fut tué un grand nombre sur le champ, & y en eut aussi beaucoup de prisonniers. Au

¹ Temple, n'est point dans le grec ; & d'après Polybe, il paroît que c'est le nom d'un petit canton.

418 AGIS ET CLEOMENES.

partir de là , il alla assaillir la ville de Langon , dont il chassa la garnison des Achæiens , & la rendit aux Eliens. Ainsi estans les Achæiens fort au bas , Aratus qui avoit accoustumé d'estre toujours ¹ ou à tout le moins de deux ans l'un esleu capitaine general , refusa la charge , combien que les Achæiens l'y appellassent nommeement & l'en priaissent : ce qui ne fut pas bien fait à luy , d'abandonner la conduite du timon à un autre , lors que la tourmente estoit la plus violente.

XLI. Au moyen dequoy les Achæiens envoyèrent ambassadeurs devers Cleomenes pour faire paix , ausquelz il sembla avoir donné assez dure responce : mais depuis il en envoya d'autres devers eulx , par lesquelz il leur manda qu'ilz luy cedassent la principaulté de la Grece seulement , & que de toutes autres choses il n'auroit au demourant point de querelle ny de debat avec eulx : ains leur rendroit incontinent les places & les prisonniers qu'il avoit pris sur eulx. Les Achæiens furent bien aises d'appointer avec ces conditions , & feirent entendre à Cleomenes , qu'il se trouvast en la ville de Lerne , là où ilz devoient tenir une generale assemblée de conseil pour en conclurre. Mais il advint que s'estant

¹ Ceci est très éloigné du texte , qui signifie : qu'Aratus étoit toujours alternativement préteur , de deux années l'un.

eschauffé en y allant , & ayant beu de l'eau froide trop chaud & rendu grande quantité de sang , il devint si fort enrôué qu'il ne peut pas parler : parquoy il renvoya aux Achæiens les principaux de leurs prisonniers , & remettant l'assemblée à un autre temps , s'en retourna en Lacedæmone.

XLII. Cela seul fut occasion de ruiner les affaires de la Grece , laquelle autrement estoit encore pour se relever & se delivrer de l'arrogance & de l'avarice des Macedoniens : car Aratus , fust ou pour crainte & deffiance qu'il eust de Cleomenes , ou pour envie qu'il portast à sa gloire , de le voir ainsi avoir prospéré si grandement & en si peu de temps , estimant que ce luy feroit trop grande honte , après avoir tenu l'espace de trente ans la principauté de la Grece , que ce jeune homme s'estant venu jeter à la traverse luy ostast ainsi sa gloire & la puissance qu'il avoit luy mesme acquise & tenue si long temps ; il essaya premierement de divertir les Achæiens de faire cest appointment : mais à la fin voyant qu'ilz ne luy vouloyent point prester l'oreille , pour la crainte qu'ilz avoyent de la hardiesse & promptitude de Cleomenes , joint qu'ilz estimoient la demande de Cleomenes juste & raisonnable , attendu qu'ilz vouloyent remettre les affaires du Peloponese en l'estat qu'ilz avoyent

420 AGIS ET CLEOMENES.

esté anciennement , alors il se tourna à mener une pratique qui n'estoit bien seante à nul homme Grec , mais estoit très infame à luy principalement , & très indigne des beaux & bons actes qu'il avoit faits auparavant : ce fut d'appeller & mettre Antigonus dedans la Grece , & emplir tout le Peloponese de Macedoniens en sa vieillesse , lesquelz il en avoit luy mesme chassez en sa jeunesse , ayant osté des mains de leur garnison la forteresse de Corinthe , & ayant tousjours esté suspect & ennemy des roys , mesmement d'Antigonus , duquel il avoit autrefois dit tous les maulx qui s'en pouvoient dire , comme il appert par les commentaires & memoires de ses faicts qu'il a laissez , & ayans luy mesme escrit qu'il avoit beaucoup travaillé , & s'estoit exposé à beaucoup de dangers , pour delivrer la ville d'Athenes de la garnison des Macedoniens.

XLIII. Et neantmoins il les amena depuis luy mesme par la main en son pais , & les fait entrer jusques en son foyer propre avec les armes , voire jusques aux chambres & cabinetz des dames , ayant à desdaing qu'un prince descendu de la race d'Hercules , & roy de Sparte , qui vouloit reduire l'estat de la chose publique corrompu , ne plus ne moins qu'un instrument de musique defaccordé , à ce bel accord de l'ancienne & sobre discipline & vie Dorique , instituée par Lycurgus ,

AGIS ET CLEOMENES. 421

fust appellé en ses tiltres capitaines general des Sicyoniens & des Tricœiens¹ : & en fuyant ceulx qui se contentoyent de manger du gros pain, & se vestir de grosses cappes de bureau, & qui vouloyent oster toute richesse (ce qui est le principal poinct, dont on accusoit Cleomenes) & remedier à la pauvreté, il s'alla soubmettre luy & toute l'Achaïe à un diademe royal, à une robbe de pourpre, & à des mandemens fiers & superbes des Macedoniens, de peur que lon ne pensast que Cleomenes luy peust commander : & si eut bien le cueur de faire des sacrifices à Antigonus, de chanter des hymnes à son honneur, avec des chapeaux de fleurs sur sa teste, ne plus ne moins que si c'eust esté un dieu, là où c'estoit un homme qui avoit tous les poulmons pourriz. Toutefois ce que nous en escrivons en cest endroit, n'est pas tant pour accuser Aratus, qui en plusieurs belles choses s'est monsté grand personnage & digne de la Grece, comme pour compassion que nous avons de l'imbecillité de nostre nature humaine : laquelle ne peut faire qu'encore en personnages douez de conditions si excellentes & de vertus si eminentes, le devoir d'honneur y soit entierement accomply, sans qu'il y ait rien à redire.

XLIV. Estans doncques les Achæiens allez en

¹ Voyez les Observations.

422 AGIS ET CLEOMENES.

Argos , où se devoit de rechef tenir l'assemblée du conseil de toute leur ligue , & y estant aussi descendu Cleomenes partant de Tegée , chascun estoit en grande esperance qu'il en deust sortir une bonne paix : mais Aratus qui estoit jà d'accord des principaulx poincts & articles de sa capitulation avec Antigonus , craignant que Cleomenes par belles paroles ou par force ne feist accorder tout ce qu'il voudroit à la commune , luy manda qu'il entendoit qu'il n'entraist que luy seul dedans la ville , & que pour seureté de sa personne on luy bailleroit trois cents ostages ; ou bien s'il ne vouloit point esloigner son armée , que lon luy donneroit audience en conseil hors de la ville dedans le parc aux exercices , qui s'appelle Cyllarabium ¹. Cleomenes ceste responce ouye , dit qu'on luy faisoit tort , pource que lon le devoit advertir dès le commencement , premier qu'il se meist en chemin , non pas lors qu'il estoit venu jusques à leurs portes , monstrier qu'ilz se deffiasent de luy , & le renvoyer sans rien faire : si en escrivit une lettre missive au conseil des Achæiens , laquelle ne contenoit presque autre chose qu'une accusation continuelle d'Aratus : de l'autre costé aussi , Aratus parlant à l'assemblée du peuple dit plusieurs paroles injurieuses à l'encontre de luy.

¹ On le trouve dans Plutarque écrit ailleurs Cylarabis & Cyllabaris. Le vrai nom est Cyllarabis.

XLV. Parquoy Cleomenes partant de là en diligence, envoya par un herault denoncer la guerre aux Achæiens, non point en la ville d'Argos, mais en celle d'Ægion¹, comme l'escrit Aratus, à fin de les surprendre avant qu'ilz peussent estre prests. Si y eut adonc un grand trouble en toute la ligue des Achæiens, de maniere que plusieurs villes s'en voulurent departir & se rebeller, à cause que le menu populaire esperoit le departement des terres, & l'abolition de debtes. Et les nobles en beaucoup de lieux se faschoyent d'Aratus, & y en avoit mesmes aucuns courroucez contre luy, & qui le haïssoyent pource qu'il vouloit mettre les Macedoniens dedans le Peloponese. A raison dequoy Cleomenes se confiant en toutes ces choses, entra en armes dedans la province de l'Achaïe, là où d'arrivée il prit la ville de Pallene² de primfault, & en chassa la garnison qui estoit dedans pour les Achæiens, & puis gaigna aussi Pheneum³ & Pentelium: & comme les Achæiens craignans une trahison qui se menoit ès villes de Corinthe & de Sicyone, y eussent envoyé leur chevalerie qui estoit en Argos, pour garder ces villes là, & eulx ce pendant en Argos

¹ Ville d'Achaïe au nord du Peloponèse, près du golfe de Corinthe, à l'ouest de Sicyone.

² Entre Sicyone & Ægium, mais un peu plus au nord, à deux lieues & demie du golfe.

³ Phénée, ville d'Arcadie.

424 AGIS ET CLEOMENES.

s'amusassent à celebrer la feste des jeux Nemées ; Cleomenes pensant ce qui estoit vray, que s'il tiroit droit à Argos, il trouveroit la ville pleine de peuple venu à la feste pour voir l'esbatement des jeux, & que les assaillant ainsi au desproveu, il les mettroit en grand trouble & grand effroy, il mena la nuit son armée jusques tout contre les murailles de la ville d'Argos, & de primsfault se saisit du quartier qui s'appelle Aspis, au dessus du theatre, lieu fort d'assiette & malaisé à approcher.

XLVI. Cela effroya tellement le peuple qui estoit dedans la ville, qu'il n'y eut homme qui s'ozast mettre en defense, ains receurent garnison, & donnerent vingt ostages, promettans estre de lors en avant bons alliez & confederez des Lacedæmoniens soubz sa charge & conduite, ce qui ne luy fut pas petit accroissement de reputation & de puissance : car les anciens roys de Lacedæmone pour quelque peine qu'ilz y employassent, n'avoient jamais peu gagner asseurement la ville d'Argos : & Pyrrhus l'un des plus grands & plus vaillans capitaines qui fut onques, y estant entré par force ne la peut tenir, ains y mourut & y perdit la plus part de son armée, dont chascun à bon droit, admiroit grandement la prompte vivacité & vehemence de Cleomenes, de sorte que ceulx qui paravant s'estoyent mocquez de luy, quand il disoit qu'il vouloit imiter Solon &

Lycurgus, en égalant les biens de ses citoyens, & abolissant toutes debtes, se persuaderent alors entierement que cela estoit la cause veritable du grand changement que lon voyoit au courage des Spartiates : car auparavant ilz estoient si abastardis, & avoyent si peu de moyen & de courage de soy defendre, que les Ætoliens estans entrez en armes dedans la Laconie, en emmenerent pour une fois cinquante mille esclaves, & y eut un des plus vieulx Spartiates qui dit alors, que les ennemis leur avoyent fait un grand plaisir, de descharger le país de la Laconie d'une si pesante charge : & peu de temps entredeux, quand ilz commencerent à reprendre la trace de celle ancienne discipline de Lycurgus, comme si luy mesme eust esté present à les remettre en train, ilz monstrerent de grandes preuves de vaillance & de prouesse, & d'obeïssance à leurs superieurs, regaignans la principaulté de la Grece, & recouvrans tout le país du Peloponese.

XLVII. Depuis la surprise d'Argos se rendirent aussi tout d'une tire à Cleomenes les villes de Cleones¹ & de Phliunte². Aratus ce pendant

¹ Ville de l'Argolide sur le chemin d'Argos à Corinthe.

² Dans la partie de l'Achaïe, distinguée sous le nom de Sicyonie, entre Sicyone & Cléones. Car le Philiunte que Ptolémée place auprès de Nauplie dans l'Argolide, devoit être fort peu de chose, puisque Strabon n'en parle pas en faisant la description des lieux voisins de Nauplie.

estoit à Corinthe, là où il informoit & enqueroit à l'encontre de ceulx qui estoient suspects de Laconiser, c'est à dire, de favoriser au party des Lacedæmoniens, & luy estant ceste nouvelle venue, il s'en trouva bien estonné, sentant bien que la ville mesme de Corinthe inclinoit fort du costé de Cleomenes, & que les Achæiens se vouloyent retirer en leurs maisons. Si fait semblant de faire appeller les citoyens de Corinthe en conseil, & ce pendant se coula jusques à l'une des portes de la ville, là où luy estant amené un cheval, il monta dessus & s'en fouyt à bride abbatue à Sicyone. Quoy entendu, les Corinthiens s'en coururent, à l'envy les uns des autres à qui plus tost y seroit, devers Cleomenes en Argos, pour luy porter ceste nouvelle, en si grande haste que les chevaulx en creverent, ainsi comme Aratus luy mesme a escrit : mais Cleomenes les tenfa de ce qu'ilz l'avoyent laissè eschapper, & qu'ilz ne l'avoyent pas arresté. Toutefois il dit que Megistonus vint par devers luy de la part de Cleomenes, pour le prier de luy livrer le chasteau de Corinthe, où il y avoit une grosse garnison des Achæiens, moyenant une bonne somme d'argent qu'il luy offroit. Aratus luy fait response, qu'il ne tenoit pas les affaires en sa main, mais que plus tost les affaires le tenoyent luy mesme.

XLVIII. Au reste Clomenes partant de la ville d'Argos gagna les Trœzeniens, les Epidauriens, & les Hermioniens : puis arriva à Corinthe, là où il feit incontinent enceindre la forteresse de trenchées & de pallis, & envoyant querir les amis & entremetteurs des affaires d'Aratus, leur commanda qu'ilz prissent sa maison & ses biens pour les luy garder diligemment, & renvoya de rechef Tritymallus¹ Messenien devers luy, le priant de vouloir à tout le moins consentir que ceste forteresse fust gardée par les Achæiens & par les Lacedæmoniens ensemble, luy promettant particulièrement le double de la pension que luy donnoit le roy Ptolomæus² : à quoy Aratus ne voulut condescendre, ains envoya son propre filz à Antigonus avec les autres ostages, & si suada aux Achæiens de luy livrer le chasteau de Corinthe entre ses mains : quoy entendu, Cleomenes entrant en armes sur les terres de Sicyone, courut & pillâ tout le plat païs, & prit en don les biens d'Aratus, que ceulx de Corinthe par decret public luy donnerent. Et comme desja Antigonus eust passé le mont de Gerania³ avec une grosse & puissante armée, il ne fut pas d'avis de remparer l'en-

¹ Dans la Vie d'Aratus celui que Cléomène envoie, est nommé Tripylus.

² Evergète I.

³ Entre Mégare & Corinthe.

428 AGIS ET CLEOMENES.

coulure du destroit par lequel on entre au dedans du Peloponese , ains de fortifier & murer les pas des montagnes Onienes ¹ , & en faisant teste aux Macedoniens à chascun d'iceulx , pour les garder & defendre , les y faire consumer par long traict de temps , plus tost que de combatre en bataille rengée contre une armée qui estoit de longue main bien aguerrie. Suyvant lequel advis il meit Antigonus en grande perplexité , pource qu'il n'avoit pas fait de bonne heure provision de vivres , & si n'estoit pas chose facile de gagner le passage à force , y estant Cleomenes arresté de pied ferme pour le garder : bien essaya il de se couler au dedans à la desrobbée par le port de Lechaum ² , mais il en fut rebouté , & y perdit quelque nombre de ses gens : au moyen dequoy Cleomenes & ses gens soy confians en cest avantage , se meirent à soupper : & Antigonus se desesperoit de se voir réduit par la nécessité à des partis fort mal aisez à executer : car il deliberoit de se retirer sur le chef où est assis le temple de Juno , & de là passer son armée par mer sur des vaisseaux en la ville de Sicyone , à quoy il falloit un long temps & un grand appareil.

XLIX. Mais sur le soir il arriva devers luy

¹ Près de Corinthe , entre le château de Soligie & Cenchrées , l'un des ports de Corinthe , à l'orient , sur le golfe Saronique.

² Autre port de Corinthe , à l'occident , sur le golfe de Crissa.

AGIS ET CLEOMENES. 425

Quelques Argiens amis d'Aratus, lesquelz venans d'Argos par mer, luy apporterent nouvelles comme les Argiens s'estoyent rebellez contre Cleomenes. Celuy qui avoit pratiqué ceste rebellion, estoit un nommé Aristoteles, lequel n'eut pas grande peine à y induire le peuple estant mal content de ce que Cleomenes n'avoit pas donné abolition des debtes, ainsi comme ilz avoyent esperé. Parquoy Aratus avec mille cinq cents hommes que luy bailla Antigonus, s'en alla par mer à Epidaure : mais Aristoteles n'attendit pas son arrivée : ains avec ceulx de la ville, alla assaillir la garnison des Lacedæmoniens qui tenoit le chasteau, & luy aida Timoxenus avec les Achæiens venus de Sicyone : dont Cleomenes estant adverty environ le second guet de la nuit, envoya incontinent querir Megistonus, & luy commanda en cholere qu'il s'en allast promptement secourir leurs gens qui estoient en Argos : pource que c'estoit luy qui plus avoit asseuré Cleomenes de la foy des Argiens, & qui l'avoit gardé qu'il ne chassast hors de la ville ceulx qu'il tenoit pour suspects. Ainsi l'ayant despesché soudainement avec deux mille hommes, il entendoit ce pendant à Antigonus, & reconfortoit le mieulx qu'il pouvoit ceulx de Corinthe, leur donnant à entendre que ce n'estoit rien qu'une mutinerie de petit nombre de

gens, qui estoit survenue en Argos. Mais comme Megistonius estant entré dedans y eust luy mesme esté occis en combatant vaillamment, & que la garnison des Lacedæmoniens se trouvant fort pressée, eust par plusieurs messages envoyé devers Cleomenes le solliciter de leur envoyer vistement du secours, luy craignant que ses ennemis se faussassent d'Argos & luy clouans les passages, n'allassent sans danger courir & fourrager le païs de la Laconie, & assieger la ville mesme de Sparte, attendu qu'elle estoit totalement vuide de gens de defense, il emmena son armée arriere de Corinthe, de laquelle il fut incontinent privé, pource qu'il n'eut pas plus tost le dos tourné, que Antigonius y entra, qui laissa bonne garnison dedans.

L. Arrivé que fut Cleomenes devant Argos, il essaya de monter par dessus les murailles, & rallia son armée encore escartée du chemin qu'elle avoit fait, puis rompit les voultres & arceaux qui soustienent la place d'Aspis, par où il monta dedans la ville, & se joignit à ses gens qui resistoyent encore à ceulx de dedans, & se faussant de quelques autres quartiers aussi avec des eschelles, vuida les rues si bien, que personne des ennemis n'y oza plus comparoir, à cause des Candiots & gens de traitt qu'il y faisoit tirer : mais sur ces entrefaites, il apper-

teut de loing Antigonus descendant des coustaux en la plaine avec ses gens de pied, & veit que desja les gens de cheval à la foule se jetoient dedans la ville : alors desesperant de la pouvoir plus tenir, il rassembla tous ses gens, & descendant à sauveré au long de la muraille, se retira sans rien perdre, ayant en bien petit espace de temps conquis grand païs, & esté bien près de tenir tout entierement ce qui est dedans le Peloponese : mais aussi en ayant esté puis après bien tost deboutté totalement, pource que des alliez qui estoient en son camp, les uns se retirerent incontinent à la premiere défaveur de la fortune, les autres bien tost après rendirent depuis leurs villes entre les mains d'Antigonus.

LI. Estans donques ses affaires de la guerre en tel estat, quand il fut de retour à Tegée avec le reste de son armée, sur le soir luy vindrent nouvelles de Lacedæmone, qui ne luy furent pas moins griefves que la perte de ses conquestes : car il fut adverty, comme sa femme Agiatis estoit decedée, laquelle il aimoit si chèrement, qu'au plus fort de ses grandes prosperitez, il ne se pouvoit tenir qu'il ne feist souvent des courses jusques à Sparte pour l'aller voir. Si luy fut une griefve douleur & un grand crevecœur, comme lon peult penser, à luy qui

432 AGIS ET CLEOMENES.

estoit jeune homme , d'avoir perdu une si belle & si honeste jeune dame , dont il estoit tant amoureux : toutefois si n'en feist il point de honte à sa magnanimité premiere , ne pour regret qu'il en eust ne rabaisa point la haultesse de son courage , ains reteint tousjours la mesme voix , la mesme parole , la mesme contenance , & le mesme visage qu'il avoit tousjours eu auparavant. Et ayant ordonné aux capitaines particuliers ce qu'ilz avoyent à faire , & prouvé à la feureté des Tegeates , le lendemain au point du jour il s'en alla à Sparte , là où ayant demené le dueil de la mort de sa femme en son privé , avec sa mere & ses enfans , il se remeit aussi tost à penser & prouvoir aux affaires publiques.

LII. Or avoit il envoyé devers Ptolomæus le roy d'Ægypte , qui luy promettoit bien de le secourir , mais il vouloit avoir en ostage sa mere & ses enfans. Si demoura longuement sans l'ozer descouvrir à sa mere , de honte , & allant souvent devers elle expressement pour le luy exposer , quand ce venoit à luy declarer il n'en ozoit ouvrir la bouche : tellement qu'elle mesme s'en doubta la premiere , & demanda à ses plus familiers , s'il y avoit point quelque chose que son filz ne luy ozast descouvrir : toutefois , à la fin ayant pris la hardiesse de luy dire , elle s'en prit fort

fort à rire & luy dit , « Comment , est ce donc
 » ce que tu as si souvent esté entre deux de me
 » dire , & que tu n'as ozé ? Mets moy , mets
 » moy vistement dedans une navire & m'envoye
 » là où tu verras que ce mien corps pourra plus
 » servir au bien de Sparte , premier que vieil-
 » leffe acheve de le consommer sans rien faire » .
 Quand donques toutes choses furent apprestées
 pour leur voyage , ilz allerent par terre jusques
 au chef de Tanarus , accompagnez de l'exercite
 en armes : & comme Cratesiclea fust preste à
 monter dedans la navire , elle tira Cleomenes
 à part au temple de Neptune , & en l'embras-
 sant & baïsant , sentit que le cueur luy souble-
 voit & fendoit de regret & de douleur , si lui
 dit : « Or fus , roy de Lacedæmone , que per-
 » sonne n'apperçoyve quand nous serons hors
 » de ce temple , que nous ayons ploré , ny fait
 » chose aucune indigne de Sparte , car cela seul
 » est en nostre puissance : au demourant les affai-
 » res iront comme il plaira à dieu » . Ces paro-
 les dittes , elle rasseit son visage & sa conte-
 nance , puis s'en alla droit embarquer avec un
 petit filz de Cleomenes , & commanda au pi-
 lote qu'il feist voile incontinent : mais arrivée
 qu'elle fut en Ægypte , elle fut advertie que le
 roy Ptolomæus recevoit des ambassadeurs d'An-
 tigonus , & estoit en termes d'appointement avec

434 AGIS ET CLEOMENES.

luy. D'autre costé elle fut aussi advertie que les Achæiens sollicitoyent Cleomenes de faire appointement avec eulx, mais qu'il n'ozoit y entendre, ny mettre fin à la guerre, sans le consentement de Ptolomæus, à cause de sa mere : à l'occasion dequoy elle luy escrivit, qu'il feist ce qu'il verroit estre le plus expedient pour le bien & l'honneur de Sparte, sans craindre de displeire à Ptolomæus pour le regard d'une pauvre vieille & d'un petit enfant : tant se portoit vertueusement ceste dame ès adversitez de son filz.

LIII. Au reste, Antigonus ayant pris la ville de Tegée, & saccagé celles d'Orchomene & de Mantinée, Cleomenes se voyant réduit à defendre la Laconie seulement, affranchit tous les Ilotes, qui sont les esclaves de Lacedæmone, prouveu qu'ilz peussent payer cinquante escus¹, dont il amassa jusques à la somme de trois cents mille escus², & arma deux mille de ces esclaves affranchis à la Macedoniene, pour faire teste à la troupe des Leucaspides, c'est à dire, boucliers blancs d'Antigonus : puis luy vint en l'entendement de tenter une entreprise grande, & de laquelle personne ne se fust jamais doubté. La cité de Megalopolis estoit pour lors grande, & de rien moindre ne moins puissante que celle

¹ Grec, cinq mines, 389 liv. 1 f. 9 d. de notre monnoie.

² Grec, cinquante talens, 233,437 liv. 10 f. de notre monnoie..

de Sparte, & si avoit encore le secours de la communauté des Achæiens & d'Antigonus, qui estoit tousjours à ses costez, & que les Achæiens avoyent, ce sembloit, appelez à la poursuite & à l'instance des Megalopolitains principalement. Cleomenes se meit en fantasie de l'aller ravager, (car il n'est rien à quoy ressemble mieulx la foudaineté de cest exploit, dont personne ne se fust jamais douté, qu'à un ravage). Si commanda à ses gens de prendre des vivres pour cinq jours, & se meit aux champs tirant vers Selasie, comme s'il eust voulu aller au dommage des Argiens : mais de là il tourna tout court sur les terres des Megalopolitains, & ayant souppé près de Rætium¹, prit incontinent son chemin droit vers la ville mesme passant par Elicunte² : puis quand il en fut assez près, il envoya devant en diligence Panteas avec deux bandes de Lacedæmoniens, luy enjoignant de se saisir d'un certain pan de muraille entre deux tours, qu'il sçavoit estre le plus desert endroit & le plus mal gardé de route la ville : & luy avec le reste de l'armée marchant tout bellement après, Panteas trouva non seulement ce

¹ Vraisemblablement Zætium, petite ville obscure, absorbée par Mégalopolis.

² Vraisemblablement aussi Hélifonte, ville du même genre & dans le même cas.

436 AGIS ET CLEOMENES.

quartier là , mais grande partie de la muraille sans garde ny defense quelconque. Si en occupa de primsfault une partie , & se meit à en abatre une autre , mettant à l'espée autant de gardes qu'il en trouva , jusques à ce que Cleomenes arriva , lequel fut dedans avec toute son armée , premier que les Megalopolitains en sceussent rien. Toutefois la surprise estant à la fin divulguée par la ville , les uns des citoyens s'en fouyrent soudainement avec ce qu'ilz peuvent prendre de leurs biens à la haste de cest effroy : les autres se rengerent ensemble avec leurs armes , pour cuider faire teste à l'ennemy : mais pour quelque effort qu'ilz feissent de s'attacher à eulx , & de les combattre , ilz ne purent neantmoins venir à bout de les rechasser hors de la ville : bien donnerent ilz moyen & loisir aux fuyans de se retirer à sauveté , de sorte qu'il n'y demoura pas plus de mille personnes : car tous les autres se retirerent avec leurs femmes & leurs enfans dedans la ville de Messene : aussi se sauva la plus part de ceulx qui feirent teste & qui combattirent , & y en eut bien peu de pris , entre lesquelz furent Lyfandridas & Thearidas , les deux plus nobles & plus puissans hommes qui fussent entre les Megalopolitains.

LIV. A l'occasion dequoy si tost que les soudards les eurent pris , ilz les menerent à

AGIS ET CLEOMENES. 437

Cleomenes : & Lyfandridas incontinent qu'il l'advifa de tout loing, luy cria, « Tu as aujourd'hui, Sire roy des Lacedæmoniens, le moyen de faire un acte encore plus grand & plus royal que celuy que tu as executé, & qui te donnera une plus glorieuse renommée ». Cleomenes se doutant bien de ce qu'il luy vouloit dire, luy demanda, « Et qu'est ce que tu veux dire, Lyfandridas ? car ja ne me conseilleras tu pas que je vous rende ceste ville. Mais c'est, luy respliqua Lyfandridas, ce dont je te veux advertir, que tu ne la destruises point, ains que plus tost tu la remplisses d'amis & alliez, qui te feront cy après loyaux & fideles : ce que tu feras en rendant aux Megalopolitains leur ville, & en preservant un si grand peuple qui en est fort ». Cleomenes demoura une espace sans dire mot à cela, puis respondit, « Il est bien mal aisé de pouvoir croire & s'asseurer de cela : toutefois vainque tousjours endroit nous l'honneur, plus tost que le profit ». Ces paroles dittes, il envoya incontinent un herault devers ceulx qui s'en estoient fouis à Messene : par lequel il leur feit entendre qu'il estoit prest de leur rendre leur ville proueu qu'ilz voulussent devenir bons alliez & confederez des Lacedæmoniens, en abandonnant l'alliance des Achæiens : mais Philopœmen ne voulut pas, &

Ec 2

438 AGIS ET CLEOMENES.

empescha qu'ilz n'acceptassent ceste gracieuse & humaine offre de Cleomenes, ne qu'ilz se departissent de l'alliance des Achæiens, disant que Cleomenes, ne leur vouloit pas rendre leur ville, ains vouloit avoir les habitans & la ville tout ensemble. Et à ceste cause chassa Thearidas & Lyfandridas hors de Messene, qui conduisoient ceste pratique. C'est celuy Philopœmen, qui depuis fut le premier homme des Achæiens, & qui acquit une très grande gloire entre les Grecs, ainsi comme nous avons escrit particulièrement en sa vie.

LV. Ce qu'estant rapporté à Cleomenes qui jusques à là avoit espargné la ville & conservé en son entier, sans que lon y eust touché à rien, ne pris la moindre chose du monde : alors il en entra en si grande cholere & s'en irrita si aigrement, qu'il abandonna aux souldards les biens à piller, fait transporter à Sparte les tableaux, images & peintures, & ruina ou gasta les plus beaux quartiers de la ville : puis s'en retourna à la maison, craignant Antigonus & les Achæiens : lesquelz neantmoins ne firent rien : car ilz tenoyent d'aventure lors leur conseil en la ville de Ægium, là où Aratus estant monté sur la tribune aux harangues demoura longuement ; tenant un pan de sa robe au devant de ses yeux, dequoy toute l'assemblée s'esmerveillant, luy commanda de

dire qu'il avoit : « Et adonc il respondit , Mega-
 » lopolis a esté prise , ruinée & destruite par
 » Cleomenes ». Les Achæiens effroyez de la
 soudaineté & perte grande de cest inconvenient ,
 rompirent aussi tost l'assemblée de ce conseil , &
 Antigonus y cuida aller au secours , mais il ne
 sceut jamais tirer à temps ses gens hors des
 garnisons où il les avoit departiz pour hyverner ,
 & leur contremanda qu'ilz ne bougeassent : mais
 luy s'en alla en la ville d'Argos , accompagné de
 petit nombre de gens de guerre.

LVI. Et pourtant la seconde entreprise &
 faillie de Cleomenes semble de prime face faite
 d'une temerité furieuse & forcenée : mais elle fut
 entreprise & executée d'un bon sens , & avec
 une grande provoyance , ainsi comme l'a des-
 critte Polybius. Car sçachant que les gens de
 guerre Macedoniens estoient espars çà & là par
 les garnisons , & que Antigonus passoit son hyver
 en Argos , avec quelque nombre de gens de
 pied estrangers , & sa maison seulement , il entra
 en armes sur les terres des Argiens , faisant ce
 discours que ou Antigonus meu de honte sortiroit
 aux champs , & que là il le desferoit , ou s'il
 n'ozoit sortir , au moins le mettroit il en la male
 grace & mauvaise opinion des Argiens : lesquelz
 voyans que lon destruisoit leur país , & que lon
 y pilloit & gastoit tout , perdoyent patience , &

s'amalloyent devant la porte du logis d'Antigonus, criers qu'il fortist en campagne p^our combattre, ou qu'il cedast la principaulté de la Grece & la charge de capitaine, à ceulx qui estoient plus vaillans que luy. Mais Antigonus comme capitaine meur & sage, estimant que c'estoit deshonneur de se hasarder temerairement & ne se tenir pas bien sur ses gardes, non pas estre injurié par estrangers, ne sortit point aux champs, ains persista tousjours en sa resolution. Au moyen dequoy Cleomenes ayant mené son armée jusques au plus près des murailles d'Argos, & ayant ruiné, pillé & gasté tout à l'environ, sans aucun danger, s'en retourna à la maison.

LVII. Quelque temps après il fut adverty qu'Antigonus estoit venu jusques à Tegée, pour de là entrer sur le païs de la Laconie, & luy s'en alla par un autre chemin avec son armée, sans que les ennemis s'en apperceussent, de maniere que au poinct du jour on fut tout esbahy, que lon le veit tout près de la ville d'Argos, qui destruisoit tout le plat païs, non point en fiant les bledz avec des faucilles ou des espées, comme font les autres, ains les batant & foulant avec de longues perches faictes en forme de rancons, de sorte que les souldards en passant leur chemin, sans peine, ne faisans que se jouer abbatoyent & renversoyent tous les bledz. Quand ilz furent au

faulsbourg où est le parc aux exercices , qui s'appelle Cyllabaris , il y eut des soudards qui voulurent y mettre le feu , mais Cleomenes les en garda , leur remonstrant que ce qu'il avoit fait à Megalopolis estoit plus par cholere que par devoir. Quant à Antigonus il s'en retourna premierement tout court , comme pour aller droit en Argos : mais depuis s'estant ravisé , il faisit tout les cimes des coustaux & montagnes d'alentour : dequoy Cleomenes faisant semblant de ne tenir compte , envoya par des heraults demander les clefs du temple de Juno , & qu'il se retireroit après y avoir sacrifié : & ainsi s'estant joué & mocqué d'Antigonus , après avoir sacrifié à la deesse , au dessoubs du temple qui estoit fermé , il envoya son armée à Phliunte , & de là , ayant dechassé la garnison qui estoit dedans Ologunte , alla passer au long de la ville d'Orchomene , ayant non seulement asseuré & encouragé grandement ses citoyens , mais aussi acquis envers les ennemis mesmes reputation de très grand homme de guerre , & digne d'avoir de grands affaires en main. Car il n'y avoit celuy qui ne jugeast que c'estoit bien œuvre de grande magnanimité & de grande suffisance & maistrise en l'art militaire , qu'avec les forces d'une seule ville faire & soutenir la guerre contre toute la puissance du royaume de Macedoine , contre tous

les peuples du Peloponèse , & contre les finances d'un puissant roy , & ce pendant garder que non seulement il ne fust aucunement touché au pais de la Laconie , ains au contraire aller endommager ceulx des ennemis , & prendre sur eulx tant & de si grosses villes.

LVIII. Mais celuy qui dit premierement , que l'argent estoit le nerf des affaires , le dit , à mon advis , principalement pour le regard des affaires de la guerre. Et Demades l'orateur , comme un jour les Atheniens commandassent que lon tirast en diligence des galeres de l'arsenal en la mer , & qu'on les armaist promptement , combien qu'ilz n'eussent point d'argent : celuy , dit il , qui guide la prouë , doibt descouvrir & fonder devant ¹. Et dit on que l'ancien Archidamus , comme les peuples alliez & confederez de Lacedæmone requissent au commencement de la guerre Peloponesiaque , que lon taxast combien chascun auroit à contribuer , leur respondit , « La » guerre ne se nourrit pas à prix certain & » arresté ». Car tout ainsi comme entre les combatans ès jeux de prix , ceulx qui de longue main ont par continuelz exercices endurcy & enforcé

¹ Aucuns vieux exemplaires lisent , *τὸ ἀγῶνα ἡγήσῃ* , qui est le sens , que nous avons suyvy. Autre lisent , *τὸ ἀγῶνα τὸ ἡγήσῃ* , c'est à dire , le paistrir va devant la proue , qui est bon aussi , & plus aigu que l'autre , comme qui diroit , il faut du biscuit devant que s'embarquer. Amyot.

leurs corps , abbattent tousjours avec le temps , & gaignent ceulx qui n'ont rien que l'art & l'agilité de l'adresse & de l'escrime : aussi Antigonus qui avec la puissance d'un grand royaume soustenoit la despense de ceste guerre , lassa & desfeit à la fin Cleomenes , par ce qu'il ne pouvoit plus fournir la paye aux estrangers qu'il avoit à sa soude , ny nourrir mesme ses citoyens : car au reste le temps faisoit certainement pour luy , à cause que les affaires qui survindrent à Antigonus dedans son royaume , le rappelloient à la maison. Pource que les Barbares qui en sont voisins , couroyent & pilloyent toute la Macedoine , mesmement les haults Esclavons qui lors y estoient descendus avec grosse puissance , à raison dequoy les Macedoniens se trouvant pillés de tous costez , envoyerent en diligence rappeler Antigonus.

LIX. Et si les lettres luy eussent esté apportées un peu devant la bataille , comme elles le furent après , il s'en fust aussi tost allé , & eust abandonné les Achæiens : mais la fortune qui a tousjours accoustumé de decider les plus grandes choses à un poinct près du but , monstra lors un si grand poids & si grande efficace de l'occasion , que incontinent après la bataille de Selasie , en laquelle Cleomenes perdit son armée & sa ville , arriverent les messagers qui

rappelloyent Antigonus : ce qui rendit de tant plus pitoyable la desconvenue de Cleomenes : car s'il eust reculé deux jours seulement à donner la bataille , il n'en eust plus esté de besoing , ains eust appointé avec les Achæiens à toutes telles conditions qu'il eust voulu , quand les Macedoniens s'en fussent allez : mais à faulte d'argent , n'ayant plus d'esperance qu'en ses armes , il fut contrainct de donner la bataille avec vingt mille combatans contre trente mille , ainsi comme escrit Polybius , là où il se monstra excellent capitaine , quant à luy , & ses citoyens aussi y feirent très vaillamment leur devoir , & les estrangers mesmes ne le feirent pas trop mal : mais il fut desfait par la façon des armes de ses ennemis & l'effort du bataillon des gens de pied Macedoniens.

LX. Toutefois Phylarchus dit qu'il y eut encore une trahison , qui fut la principale cause de sa desfaite , pource qu'Antigonus avoit ordonné aux Acarnaniens & aux Esclavons qu'il avoit en son ost , de se couler à la desrobbée au long de la poincte de l'armée , où estoit Euclidas frere de Cleomenes , pour l'envelopper par derriere , pendant que luy rengerait le demourant de ses gens en bataille. Au moyen de quoy Cleomenes qui estoit monté sur un hault , pour voir la contenance de l'ennemy , ne voyant

point les armes des Acarnaniens & Esclavons, eust peur qu'Antigonus ne s'en voulust servir à quelque telle ruze de guerre. Si feit appeller Demoteles qui avoit la charge de la patrouille, qui est de rechercher & enquerir les choses secretes, & luy commanda qu'il allast regarder comment se portoit le derriere de l'armée, & qu'il advist de descouvrir bien tout à l'environ. Demoteles qui avoit, comme l'on dit, esté ja corrompu par argent, luy respondit, qu'il ne se souciait point de la queue de son armée, pource que tout y estoit bien : & qu'il entendist seulement à forcer & rompre ceulx qu'il avoit en teste devant luy. Cleomenes se reposant sur ces paroles, marcha droit contre Antigonus, & feirent les naturelz Spartiates, qu'il avoit autour de luy, si grand effort, qu'ilz contraignirent de reculer le bataillon des Macedoniens bien un quart de lieuë en les poulfant & pressant tousjours à force : mais cependant Euclidas avec l'autre poincte de l'armée fut enveloppé par derriere, & Cleomenes se retournant & voyant la desconfiture s'escria tout hault, « Ha !
 » mon très cher frere, tu es perdu, tu es perdu, mais au moins meurs tu en homme de
 » bien, & sera ta mort proposée pour exemple
 » de prouesse aux enfans, & chantée par les
 » dames de Sparte ». Ainsi estant Euclidas &

ses gens mis au fil de l'espée, ceulx qui les avoyent desfaicts coururent aussi tost sus à ceulx de l'autre poincte. Adonc Cleomenes voyant les siens effroyez de telle sorte, qu'ilz n'avoient pas le courage d'arrester, il se sauva de viffesse. En ceste bataille mourut grand nombre de soudards estrangers, & tous les naturelz Lacedæmoniens, qui estoient six mille, il ne s'en falloit que deux cents.

LXI. Quand Cleomenes fut arrivé à Sparte ; il conseilla luy mesme aux citoyens qui le vindrent voir, qu'ilz se rendissent volontairement au vainqueur Antigonus, & au regard de luy, que s'il pouvoit faire aucune chose pour le bien & l'honneur de Sparte, fust en vivant ou en mourant, qu'il le feroit : & voyant les dames de la ville qui couroyent au devant de ceulx qui s'estoyent sauvez quant & luy, & les deschargeans de leurs armes leur presentoyent à boire, il entra dedans son logis, là où une jeune garce qu'il avoit prise en la ville de Megalopolis, & dont il s'estoit fervy depuis la mort de sa femme, luy vint au devant comme elle avoit accoustumé, & le voulut refreschir, comme venant tout chauld de la bataille : mais il ne voulut ne boire, encore qu'il endurast soif extreme, ne se seoir, encore qu'il fust fort las : ains tout ainsi comme il estoit armé appuya sa main

contre une coulonne , & meit son vifage fur son coulde, & après s'estre reposé un peu de temps en ceste forte , & avoir discouru en son entendement tous les partis qu'il pouvoit prendre , il s'en alla avec ses amis au port de Gythium ¹, là où il s'embarqua sur des vaisseaux qu'il avoit expressement fait tenir tous prests , & fait voile incontinent.

LXII. Bien tost après entra Antigonus dedans la ville de Sparte , où il traitta humainement les habitans qu'il y trouva , & n'injuria ny n'oultragea point superbement l'ancienne dignité de Sparte : ains leur ayant rendu leurs loix & leur gouvernement , après y avoir sacrifié aux dieux pour leur rendre graces de sa victoire , trois jours après y estre entré , il s'en partit , ayant nouvelles qu'il luy estoit survenu une grosse guerre en son royaume de la Macedoine , & que les Barbares luy pilloyent & couroyent tout son pais. Ja estoit il saisy de la maladie dont il mourut à la fin , laquelle se termina en une phtise forte par un violent catarre : mais toutefois encore ne demoura-il point pour cela , ains se mainteint tousjours en vigueur , jusques à combattre pour ses propres affaires , & à gagner une très belle victoire , avec fort grand

¹ Petite ville au sud de la Laconie , près l'embouchure de l'Eurotas : elle servoit de port à Sparte.

448 AGIS ET CLEOMENES.

meurtre & occision des Barbares, pour puis après en mourir plus glorieusement : car il se deschira les poulmons & le dedans du corps encore plus qu'il n'estoit, à force de crier en l'ardeur du combat, ainsi comme il est vray semblable, & comme Phylarchus mesme l'escrit. Toutefois on compte par les escholes, qu'après la bataille gagnée, il se trouva si espris de joye, qu'en criant, O la belle journée ! il rendit grande quantité de sang par la bouche, & que là dessus une grosse fiebre le saisit, dont il mourut. Voilà quant à Antigonus.

LXIII. Mais pour retourner à Cleomenes, partant de l'isle de Cythere ¹, il alla poser l'ancre en une autre qui s'appelle Ægialia ², de là où voulant traverser en la cité de Cyrene ³, il y eut l'un de ses amis nommé Therycion, qui aux affaires s'estoit tousjours monstté homme de grand cueur, & en son langage avoit aussi tousjours parlé haultement & bravement, & lors prenant à part Cleomenes, luy commença à dire : « Nous » avons, sire roy, fouy la mort qui nous estoit » la plus honorable, de mourir en la bataille, » combien que paravant tout le monde nous eust

¹ Au dessous du promontoire du Peloponèse, appelé Malée.

² Ile située entre le Peloponèse & la Crète. Son vrai nom est Ægilie.

³ En Afrique.

» ouy

» ouy dire , que jamais Antigonus ne passeroit
 » au dessus du roy de Sparte , sinon qu'il fust
 » mort estendu : mais au moins nous en reste
 » il encore une autre , qui , sans point de doub
 » te , est en vertu & en gloire seconde à la
 » premiere. Où est ce que nous naviguons sans
 » propos ? pourquoy fuyons nous la mort ? ou
 » pourquoy l'allons nous chercher bien loing ,
 » quand elle est tout auprès de nous ? Car si ce
 » n'est point de honte ny de deshonneur à ceulx
 » qui sont extraicts de la race de Hercules , de
 » servir aux successeurs de Philippus & d'A
 » lexandre , gagnons le travail & le danger d'une
 » longue navigation , en nous allant rendre en
 » tre les mains d'Antigonus , lequel vray-sem
 » blablement doit estre meilleur que n'est Pto
 » lomæus , d'autant que les Macedoniens va
 » lent mieulx que les Ægyptiens : & si nous
 » dedaignons estre commandez par ceulx qui
 » nous ont vaincus en armes , pourquoy vou
 » lons nous donques faire nostre maistre celuy
 » qui ne nous a point vaincus , en nous monf
 » rant au lieu d'un , inferieurs à deux , l'un
 » Antigonus , que nous fuyons , & l'autre Pro
 » lomæus , à qui nous allons faire la cour ? Pou
 » vons nous là dessus alleguer que nous allons
 » en Ægypte pour le regard de ta mere qui y
 » est ? vraiment tu luy seras un beau & joyeux

450 AGIS ET CLEOMENES.

» spectacle, quand elle montrera aux dames
 » de la cour de Ptolomæus son filz prisonnier
 » & fugitif, au lieu qu'il souloit paravant estre
 » roy. Ne vault il pas donques mieulx, pen-
 » dant que nous voyons encore le païs de la
 » Laconie, & que nous avons noz propres ar-
 » mes en nostre puissance, nous delivrer nous
 » mesmes de celle desfortune, & en ce faisant
 » nous justifier envers ceulx qui sont morts à
 » Selasie pour la defense de Sparte, plus tost
 » que d'aller laschement perdre nostre temps
 » en Ægypte, en attendant des nouvelles pour
 » sçavoir qui Antigonus aura laissé pour son lieu-
 » tenant & gouverneur en Lacedæmone » ?

LXIV. Therycion ayant dit de semblables pa-
 roles, Cleomenes luy respondit, « Tu penses
 » donques que ce soit à toy magnanimité que
 » de chercher la mort, qui est l'une des plus
 » faciles & plus aisées choses qui puisse advenir
 » à l'homme, & celle qu'il a plus à comman-
 » dement & à main toutes les fois qu'il luy
 » plaist : & ce pendant, meschant que tu es,
 » tu fuis d'une fuite plus lasche & plus hon-
 » teuse que la premiere. Car plusieurs vaillans
 » hommes, autres que nous ne sommes, ont
 » bien autrefois cédé à leurs ennemis, ou pour
 » quelque accident de fortune qui leur a esté
 » contraire, ou ayans esté forcez par plus grand

AGIS ET CLEOMENES. 451

» nombre de gens : mais celuy qui se laisse aller
 » & qui succumbe aux travaux & labeurs, ou
 » aux blasmes & louanges des hommes, il fault
 » qu'il confesse qu'il est vaincu par sa propre
 » lascheté : car il ne fault pas que la mort que
 » lon se donne volontairement soit pour fouir
 » à faire des actes laborieux, ains fault que
 » celle mort mesme soit un acte louable, pource
 » que c'est honte de vouloir vivre ou mourir
 » pour l'amour de soy mesme, comme tu m'en
 » hortas que je face maintenant, pour me ti-
 » rer hors des travaux où nous sommes de pré-
 » sent, sans faire autre acte quelconque, ny
 » utile ny honorable : là où au contraire je suis
 » d'advis que roy ne moy ne devons jamais
 » abandonner l'esperance de servir encore quel-
 » que jour à nostre pais : car là où toute espe-
 » rance nous defaudra, alors nous sera il tous-
 » jours assez aisé de mourir toutes & quantes
 » fois que nous voudrons.

LXV. A cela Therycion ne repliqua rien, mais
 à la premiere occasion qu'il eut de se pouvoir un
 peu escarter de Cleomenes sur le rivage en se
 destournant le long de la marine, il se tua luy
 mesme. Et Cleomenes partant de ce mesme riva-
 ge, cingla tant qu'il arriva en Afrique, là où
 il fut conduit par les gens du roy jusques en
 la ville d'Alexandrie, & là Ptolomæus à la pre-

452 AGIS ET CLEOMENES.

miere arrivée luy fait un recueil assez commun : mais depuis quand il eut un peu donné de preuve de son sens & entendement, & fait cognoistre que parmy la simplicité ronde de sa vie Laconique, il y avoit une grace gentille & une grandeur de courage qui ne faisoit point de honte à la noblesse haulte de son sang, ny ne fleschissoit point à la fortune, le roy commença à le goustier davantage & à prendre plus de plaisir à sa compagnie, qu'à ceulx qui luy disoyent & faisoient toutes choses pour le flatter & pour luy complaire : & adonc se repentit il à bon escient d'en avoir paravant fait si peu de compte, & de l'avoir ainsi abandonné à Antigonus, lequel par sa desfaitte avoit grandement augmenté sa puissance & sa gloire. Si commença lors à le reconforter par toutes les caresses & faveurs dont il se peut adviser, luy promettant qu'il le renvoyeroit avec vaisseaux & argent en la Grece, & qu'il le remettroit en son royaume : & ce pendant luy ordonna pour son entretenement une pension de vingt & quatre talents ¹ par an, desquelz il s'entretenoit luy & ses gens simplement & sobrement, & despendoit tout le demourant à recueillir & soustenir ceulx qui se retiroient de la Grece en Ægypte.

LXVI. Mais de malheur ce vieil Ptolomæus,

¹ Quatorze mille escus. *Amoyr.* 112,050 livres de notre monnaie.

AGIS ET CLEOMENES. 433

avant qu'il peust accomplir ce qu'il avoit promis à Cleomenes, de le renvoyer en la Grece; deceda, & depuis sa mort la cour estant tombée en toute dissolution, yvrongnerie & gouvernement de femmes, le faict de Cleomenes fut aussi mis à nonchaloir: car le jeune roy^x estoit tant perdu d'amour de femmes & de vin, que lors qu'il estoit le plus sobre & en son meilleur sens, les plus grands de ses affaires ou plus il s'appliquoit, estoient faire festes & sacrifices; sonner d'un tabourin parmy son palais pour assembler le monde, & faire du basteleur & triacleur, ce pendant qu'une Agathoclea qui estoit son amie, & la mere d'elle, & un macque-reau nommé Oenanthès gouvernoient tous les principaulx affaires du royaume. Toutefois encore à son advenement à la couronne il se servit un peu de Cleomenes, pource qu'il craignoit son frere Magas qui avoit credit entre les gens de guerre, à cause du port que luy faisoit sa mere: au moyen dequoy il approchoit de luy, Cleomenes, & l'appelloit en son estroit conseil; là où il deliberoit des moyens comment il pourroit faire mourir son frere: ce que tous les autres du conseil luy conseilloyent, excepté Cleomenes qui luy dissuadoit fort, remonstrant que plus tost il valoit mieulx engendrer plusieurs au-

^x Philopator.

§ 54 AGIS ET CLEOMENES.

tres freres au roy pour seurété de sa personne, & pour leur departir entre eulx les charges du royaume. A quoy Sosibius, qui estoit celuy des mignons du roy qui avoit le plus grand credit & le plus d'autorité aux affaires, respondit, que tant comme Magas vivoit, les gens de guerre estrangers, qui estoient à la soude du roy, ne luy seroyent point trop asseurez. Cleomenes luy repliqua, quant à cela qu'ilz ne s'en donnassent point de peine, pource que de ces estrangers là il y en avoit plus de trois mille Peloponesiens, lesquelz feroyent tout ce qu'il voudroit, & qu'ilz viendroyent promptement avec leurs armes par tout où il les manderoit, au moindre clin d'œil & signe de la teste qu'il leur feroit. Ceste parole sembla bien sur l'heure faire foy de la bonne affection qu'il portoit au roy, & de la puissance qu'il avoit : mais depuis, la lascheté de Ptolomæus luy augmenta sa desffiance, & comme il advient ordinairement, que ceulx qui ont faulte de sens, reputent le plus seur estre, redoubter toutes choses & soy desffier d'un chascun, la souvenance de ce propos rendit Cleomenes redoubtable à ceulx qui avoyent credit en cour, pource qu'il avoit autorité envers les soudards estrangers, & y en avoit plusieurs qui disoyent, « Voyez vous cestuy cy, c'est un lion parmy des brebis ». Car à

La vérité aussi sembloit il tel proprement aux gens du roy, quand ilz consideroyent ses façons de faire, comment il regardoit de travers sans faire semblant de rien, & avoit tousjours un œil à espier ce que lon y faisoit.

LXVII. Si se lassa à la fin de demander navires & armée : mais ayant nouvelles que Antigonus estoit mort, & que les Achæiens estoient empeschés de la guerre contre les Ætoliens, de maniere que les affaires le desiroient & l'appelloient, estant tout le Peloponese en trouble & en combustion, il demanda que lon le laissast aller seulement luy seul avec ses amis : mais personne ne luy voulut accorder : car quant au roy, il n'en entendoir rien, pource qu'il estoit continuellement entre des femmes à danser, yvroger, jouer & mommer : & quant à Sosibius, qui avoit la superintendence de tous les affaires, il estimoit d'un costé que de retenir Cleomenes contre sa volonté il leur seroit malaisé, & si y auroit du danger : & d'autre costé aussi de le laisser aller, luy qui estoit homme aventureux, & personnage de grande entreprise, & qui avoit cogneu les vices & les fautes qui estoient en leur gouvernement du royaume, ce ne seroit pas trop seurement fait : car il n'y avoit ny dons ny presens qu'on luy sceust faire, qui le peussent addoucir. Mais ne plus

456 AGIS ET CLEOMENES.

ne moins que le bœuf sacré, qu'ilz appellent en Ægypte Apis, encore qu'il ait à boire & à manger tout son saoul, & qu'il semble estre en grandes delices, desire neantmoins tousjours sa vie naturelle, & sa liberté de courir & sauter à son plaisir, & monstre evidemment qu'il se fasche d'estre tousjours entre les mains du presbtre qui a charge de le garder : aussi n'y avoit il rien ès delices de la cour qui pleust à Cleomenes, ains, comme dit Achilles en Homere,

Il languissoit d'estre tenu en serre,

Ne demandant que d'aller à la guerre.

LXVIII. Etant donques Cleomenes & ses affaires en tel estat, il arriva en Alexandrie un Messenien nommé Nicagoras, qui le haïssoit particulièrement en son cueur, mais au dehors faisoit semblant de l'aimer : car il luy avoit autrefois vendu un beau lieu de plaïssance, & n'en avoit pas receu l'argent, fust ou pource que Cleomenes n'eust pas le moyen de luy payer, ou pource qu'il n'eust pas le loisir pour les guerres qui l'occupoyent. Un jour donques que Cleomenes d'aventure se promenoit sur la greve du port, il apperceut ce Nicagoras descendant d'une navire, qui ne faisoit qu'arriver, & l'ayant reconnu, le salua amiablement, & luy demanda quelle occasion l'amenoit lors en Ægypte. Ni-

Nicagoras luy ayant rendu bien amiablement aussi son salut, respondit, qu'il avoit amené de beaux chevaux de service pour la guerre au roy. Cleomenes s'en prit à rire, & luy dit, « Il eust mieulx » valu que tu eusses amené de belles courtisanes, des baladines & des putains : car c'est » ce qui plus agréé maintenant au roy ». Nicagoras sur l'heure fait semblant de rire, mais peu de jours après il luy vint ramentevoir le lieu qu'il luy avoit autrefois vendu, & le prier qu'à tout le moins lors il luy en voulust bailler l'argent, l'assurant qu'il ne l'en eust point encore importuné, n'eust esté qu'il avoit perdu à sa marchandise. Cleomenes luy respondit qu'il n'avoit rien de reste de la pension qu'on luy donnoit : dont ce Nicagoras estant courroucé, s'en alla rapporter à Sosibius le traict de mocquerie qu'il luy avoit ouy dire contre le roy. Sosibius fut bien aise de l'avoir entendu : mais desirant avoir encore plus grande occasion d'irriter le jeune roy contre Cleomenes, il suada à Nicagoras d'escrire une lettre au roy contre lui, comme ayant conspiré si le roy luy donnoit des vaisseaux, de l'argent & des gens de guerre, de se saisir de la ville de Cyrene. Ce que Nicagoras fit : & ayant escrit la missive, fait voile : quatre jours après qu'il fut party, Sosibius porta la lettre au roy, comme s'il l'eust receuë à l'heure. Et irrita tel-

lement le jeune roy, qu'il fut deslors ordonné que lon reserreroit Cleomenes en une grande maison, où lon luy bailleroit son vivre ordinaire, comme de coustume, excepté que lon luy defendroit de sortir du logis.

LXIX. Cela desja fascha bien Cleomenes, mais encore eut il bien pire esperance de son affaire à l'advenir par un tel accident : il y avoit l'un des mignons du roy, qui s'appelloit aussi Ptolomæus filz de Chrysermus, lequel avoit tousjours auparavant devisé assez familièrement avec Cleomenes, & avoyent pris une liberté & privauté de parler librement de toutes choses ensemble. Cleomenes l'envoya un jour prier de venir parler à luy. Ptolomæus y alla, ou en devisant, il tascha de luy destourner toutes les suspicions qu'il avoit, & de luy excuser tout ce que le roy avoit fait en son endroit : puis quand ilz eurent assez devisé; il s'en retourna, ne prenant pas garde que Cleomenes le suyvoit & estoit derriere jusques à la porte, à laquelle Ptolomæus tenfa bien asprement les gardes, de ce qu'ilz gardoyent si negligemment & si peu soigneusement une beste sauvage si furieuse, & si mal aisée à reprendre si une fois elle eschappoit. Cleomenes ouit ces paroles, & s'en retourna au dedans du logis sans que Ptolomæus eust apperceu qu'il fust derriere luy : & retourné qu'il fut,

compta à ses amis ce qu'il avoit entendu & ouy. Parquoy tous adonc jettans en courroux le reste qu'ilz avoyent de bonne esperance, resolurent de se venger du tort & de l'injure que leur faisoit Ptolomæus, en mourant ainsi comme il appartenoit à des Spartiates, sans attendre que lon les vinst hacher en pieces comme moutons, après que lon les auroit longuement tenus en meue à l'engres. Pource que ce seroit une grande honte à Cleomenes après avoir refusé d'appointer avec Antigonus, qui estoit homme de guerre & prince de faict, attendre le loisir de cest autre roy basteteur & triacleur, jusques à ce qu'il luy pleust laisser son tabourin, & rompre sa danse & sa mommerie, pour le venir faire mourir.

LXX. Ayans prins ceste resolution entre eulx, le roy Ptolomæus alla d'aventure à la ville de Canopus¹, & eulx feirent premierement courir un bruit par Alexandrie, que le roy estoit en propos de le delivrer de prison, & suyvant une coustume que ces roys d'Égypte avoyent quand ilz vouloyent eslargir un prisonnier & le remettre en sa pleine liberté, qu'ilz luy envoyoyent le soir de devant à soupper avec des presens, les amis de Cleomenes ayans préparé plusieurs

¹ Canope, à l'embouchure la plus occidentale du Nil, & qui portoit son nom.

460 AGIS ET CLEOMENES.

telz presens, les luy envoyerent, en trompant les gardes, & leur donnant à entendre que c'estoit de la part du roy que lon les luy envoyoit : car Cleomenes mesme sacrifia aux dieux, & envoya à ses gardes bonne part des viandes que lon luy avoit envoyées de dehors, & souppa le soir en festin avec ses amis, ayans des chappeaux de fleurs sur leurs testes, & dit on, qu'il se hastia de executer ce qu'il avoit entrepris, plus tost qu'il n'eust fait autrement, pour avoir aperceu qu'il y avoit un de ses valets sachant leur conspiration, qui alloit hors du logis coucher avec une femme, dont il estoit amoureux, ayant peur qu'il ne descouvrist leur entreprise. Quand ce vint sur le midy, & qu'il veit que les gardes estans yvres dormoyent, il prit son saye sur son dos, & en ouvrant la cousture à l'endroit de l'espaule droite se jetta hors la maison l'espee nue en la main avec ses amis accoustrez tout de mesme, qui estoient treze en tout. Entre lesquels y en avoit un nommé Hippotas, qui estoit boitteux, lequel sortit avec eulx bien delibereement à la premiere faillie : mais quand il veit que pour l'attendre ilz marchoyent trop bellement, il les pria qu'ilz le tuaissent, & qu'ilz ne laissassent point à executer leur entreprise pour le regard d'un homme inutile. Toutefois ilz rencontrerent d'aventure un homme de la ville, qui passoit

sur un cheval par devant la porte de leur logis : ilz le feirent descendre & monterent Hippotas dessus, puis s'en allerent courans parmy les rues, crians au peuple, liberté, liberté : mais tout ce populaire n'avoit de vertu sinon jusques à louer Cleomenes & à admirer sa hardiesse, car au demourant de le suyvre ou de luy porter faveur personne n'en eut le courage : & en courant par la ville ilz rencontrerent Ptolomæus, celuy que nous avons dit qui estoit filz de Chrysermus, ainsi comme il sortoit du palais, & se ruerent trois sur luy, qui le tuerent en la place. Il y avoit un autre Ptolomæus, qui avoit charge de garder la ville d'Alexandrie, lequel ayant ouy le bruit, s'en venoit vers eulx dedans une coche : ilz luy allerent à l'encontre, & ayans premierement fait escarter ses satellites & archers, qui marchoyent devant luy, le tirerent à bas de dessus son chariot & le tuerent aussi : puis s'en allerent vers le chasteau en intention de delivrer tous les prisonniers qui y estoient & s'en servir : mais les geoliers qui en avoyent la garde, avoyent bien fermé & muni les prisons de sorte que Cleomenes fut rebouté de ceste entente.

LXXI. Au moyen dequoy il s'en alla errant çà & là par la ville, sans que personne se joignist à luy, ne qui luy feist teste aussi, pource que tout le monde s'en fuyoit de peur devant luy : parquoy

à la fin après avoir bien couru , se retournant devers ses amis , il leur dit , « Ce n'est pas de » merveille si des femmes commandent à un si » lasche peuple , veu qu'il fuit ainsi sa liberté ». Si les pria qu'ilz voulussent doncques tous mourir aussi magnanimement , comme il appartenoit à ceulx qui avoyent esté nourriz avec luy , & à la dignité des belles choses qu'il avoit faittes. Et lors le premier qui se fait tuer fut Hippotas , lequel mourut d'un coup d'espée que luy bailla l'un des plus jeunes de la compagnie à sa requeste , puis chascun des autres se tua aussi consequemment après , facilement & sans rien craindre , excepté Panteus , celui qui estoit entré le premier dedans la ville de Megalopolis : c'estoit un fort beau jeune homme de visage , & qui avoit fort bien esté nourry en la discipline Laconique , & mieulx qu'autre de son aage , aussi en avoit Cleomenes esté amoureux , qui luy commanda , que quand il le verroit tumbé mort & tous les autres aussi , que lors il se tuast le dernier : parquoy estans jà tous les autres gifans par terre , Panteus les alla tous revisiter les uns après les autres , & fonder avec la poincte de son espée , pour voir s'il y en avoit point quelqu'un qui ne fust pas encore mort , & comme ayant entre les autres picqué Cleomenes auprès du talon , il eust apperceu qu'il fronceoit encore le

visage, il le baïsa & s'asseit auprès de luy : puis quand il veit qu'il eut à faict rendu l'esprit, alors l'embrassant tout mort, il se tua luy mesme dessus luy.

LXXII. Cleomenes doncques ayant esté roy de Sparte l'espace de seize ans, & ayant esté tel personnage que nous l'avons décrit, acheva ses jours en ceste sorte : dequoy le bruit s'estant incontinient espendu par toute la ville, Cratesiclea sa mere, encore qu'elle fust au demourant femme magnanime, oublia neantmoins un peu lors sa generosité, pour l'excessive douleur qu'elle sentit de ce grand accident, & embrassant les enfans de Cleomenes se prit à lamenter : mais l'aîné des enfans, sans que personne s'en fust jamais douté, trouva moyen de se despestrer de ses mains, & montant dessus la couverture de la maison, se jetta du hault en bas la teste la premiere, dont il fut tout froissé, mais il n'en mourut pas pourtant, ains fut emporté criant & se courrouceant de ce que lon ne le vouloit pas laisser mourir. Le roy Ptolomæus ayant entendu ceste nouvelle, commanda que lon pendist le corps de Cleomenes l'ayant devant² conroyé, &

² *Κρίματι καταψεύεσθαι*, le pendre après l'avoir defeché & conroyé. Autres vieux livres lisent *καταψεύεσθαι*, c'est à dire, l'ayant premierement embaumé, à fin qu'il demeurast plus longuement entier au gibet, comme estoit la façon des Egyptiens de garder les corps. Diodore Sicilien. *Amyot.*

que lon feist mourir ses enfans , sa mere & toutes les femmes qui estoient avec elle , entre lesquelles estoit la femme de Panteus , l'une des plus belles dames de son temps & de plus gentil cueur. Il n'y avoit gueres qu'ilz estoient mariez ensemble quand ces malheurs leur advindrent , & estoit encore leur amour en sa plus grande chaleur : ses parents ne l'avoient pas voulu laisser aller & s'embarquer avec son mary, ains l'avoient enfermée pour la retenir à force : mais peu de temps après ayant trouvé moyen de recouvrer un cheval & quelque peu d'argent, elle s'en fouit une nuit , picquant à toute bride vers le port de Tænare , là où elle s'embarqua sur une navire qui pattoit pour aller en Ægypte , & s'en alla trouver son mary , avec lequel elle suporta doucement & joyeusement le vivre hors de sa maison en pais estranger. Et lors que les sergens vindrent prendre Cratesiclea pour la mener mourir , elle la conduisit par dessous le bras , en luy aidant à porter sa robbe & la reconfortant , combien qu'elle ne fust point autrement estonnée pour l'apprehension de la mort , & qu'elle demandast seulement ceste grace , que lon la feist mourir devant ses petits enfans : toutefois quand ilz furent au lieu ou lon avoit accoustumé de faire telles executions, les bourreaux tuerent premierement les enfans devant ses yeux , & puis elle après ,
laquelle

laquelle en si grieve angoisse de douleur ne dit autre parole sinon, « Helas ! mes enfans, où estes » vous allez » ?

LXXIII. Et la femme de Panteus estant grande & forte, ceignant sa robbe par dessus, accoustra & enveloppa les corps des autres à mesure qu'elles furent executées, de ce qu'elle peut recouvrer, sans dire un seul mot, ny monstrier aucun signe d'estre troublée : & finalement s'estant elle mesme accoustrée, & ayant avallé son vestement autour d'elle, sans vouloir souffrir qu'autre personne s'approchast d'elle ny la regardast, sinon le bourreau qui estoit ordonné pour luy couper la teste, elle mourut aussi constamment que sçauroit faire le plus vertueux homme du monde, sans avoir besoing de personne qui couvrîst son corps ny l'enveloppast après sa mort, tant elle fut soigneuse de garder, mesme à la fin, l'honesteté qu'elle avoit tousjours observée en sa vie, & retenant encore en mourant le soing de l'honneur, dont elle avoit tousjours muni son corps tant comme elle avoit vescu. Ainsi ces dames Lacedæmonienes en ceste piteuse tragédie ayans joué leur rolle à l'envy des hommes en leurs derniers jours, à qui plus magnanimement endureroit la mort, fournirent de preuve evidente, pour verifïer que la vertu ne peult estre outragée par la fortune.

LXXIV. Peu de jours après , ceulx qui estoient ordonnez pour garder le corps de Cleomenes pendu en croix , apperceurent un fort grand serpent entortillé à l'entour de sa teste , qui luy couvroit tout le visage , de sorte que nul oiseau de proye n'en approchoit pour en manger , dont le roy entra en une superstition & frayeur , craignant d'avoir offensé les dieux : ce qui donna occasion aux femmes de sa cour de faire plusieurs sacrifices de purification pour nettoier ce peché , se persuadans qu'ilz avoyent fait mourir un personnage bien voulu & aimé de la divinité , & qui avoit quelque chose de plus que homme. Les citoyens mesmes de la ville d'Alexandrie allans sur le lieu , luy faisoient prieres & l'invoquoient comme un demidieu , en le nommant filz des dieux , jusques à ce que les plus sçavans les osterent de cest erreur , en leur remonstrant que tout ainsi comme des beufz , quand ilz viennent à se pourrir , s'engendrent les abeilles : des chevaux , les mouches guespes : & semblablement des asnes , quand ilz viennent aussi à putrefaction , grouillent des escharbors : aussi les corps des hommes , quand la liqueur de la mouëlle vient à se fondre & à se figer ensemble au dedans , produisent des serpents : ce que les anciens ayans entendu & cogneu , ont choisi entre tous les animaux le dragon pour l'approprier à l'homme.

S O M M A I R E

DES VIES DE TIBERIUS

ET CAIUS GRACCHUS.

*D*U pere & de la mere des Gracques. II. Succès de l'éducation que leur donna leur mere. III. Différences de caractère entre les deux freres. IV. Leur ressemblance. V. Mariage de Tiberius. VI. Campagnes de Tiberius sous Scipion Africain le jeune. VII. Il sert en qualité de questeur sous le consul Caius Mancinus contre les Numantins. VIII. Il fait avec eux un traité qui sauve l'armée Romaine. IX. Jugement prononcé par le peuple sur Mancinus & Tiberius relativement à ce traité. X. De l'usage d'affermir aux pauvres citoyens Romains les terres des ennemis vaincus , réunies au domaine. Comment les riches étoient venus à bout de les en évincer. XI. Tiberius entreprend de faire rendre ces terres aux pauvres citoyens. XII. Sagesse de sa loi. XIII. Discours dont il l'appuie. XIV. Le tribun Octavius s'oppose à la loi de Tiberius. XV. Tiberius propose une nouvelle loi , pour obliger tous ceux qui possédoient plus de terres que les anciennes ordonnances ne le permettoient , de les quitter. XVI. Autre loi de Tiberius qui suspen-

doit tous magistrats de leurs fonctions jusqu'à ce que sa loi fût approuvée ou rejetée. XVII. Il fait déposer Oclavius du tribunat. XVIII. La loi de Tiberius pour la réduction des terres est reçue. XIX. Il met sa femme & ses enfants sous la protection du peuple. XX. Il propose une nouvelle loi pour ordonner de partager aux pauvres citoyens l'argent qui proviendrait de la vente de la succession d'Attalus. XXI. Question embarrassante que lui fait Titus Annius. XXII. Discours de Tiberius pour justifier la déposition d'Oclavius. XXIII. Autres loix proposées par Tiberius. XXIV. Pré-sages funestes pour Tiberius. XXV. Blossius l'encourage. XXVI. Fulvius Flaccus vient l'avertir qu'on avoit formé dans le sénat le dessein de le tuer. XXVII. Nasica sort du sénat pour aller tuer Tiberius. XXVIII. Mort de Tiberius. XXIX. Son corps est jetté dans le Tybre. XXX. Nasica est obligé de sortir de Rome ; il meurt à Pergame. XXXI. Ressentiment du peuple contre Scipion l'Africain. XXXII. Vie retirée de Caius après la mort de son frere. XXXIII. Comment Caius est engagé à marcher sur les traces de son frere. XXXIV. Il engage les villes de Sardaigne à fournir des vêtemens aux soldats Romains. XXXV. Il revient à Rome , & se justifie de l'accusation intentée contre lui à cause de son retour. XXXVI. Il est nommé tribun. XXXVII.

Premieres loix proposées par Caius. XXXVIII. Plusieurs autres loix proposées par Caius. XXXIX. Propositions sages & utiles faites par Caius au sénat. XL. Comment il fait construire des grands-chemins. XLI. Il est nommé tribun pour la seconde fois. XLII. Le sénat suscite Livius Drusus pour détruire le crédit de Caius en gagnant le peuple par des concessions outrées. XLIII. Réflexions sur cette conduite du sénat. XLIV. Caius nommé commissaire pour présider au rétablissement de Carthage. Mort de Scipion. XLV. Présages funestes. Caius retourne à Rome. XLVI. Il échoue en la demande d'un troisieme tribunat. XLVII. Un liéteur du consul Opimius est tué par des gens du parti de Caius. XLVIII. Le peuple s'indigne de l'intérêt que le sénat montrait prendre à la vengeance de cette mort. XLIX. Le peuple fait la garde pendant la nuit autour de la maison de Caius. L. La femme de Caius le conjure de ne point aller à la place publique. LI. Mort de Fulvius. LII. Mort de Caius. LIII. Leurs corps sont jetés dans la riviere. LIV. Opimius meurt convaincu de s'être vendu à Jugurtha. LV. Honneurs rendus par le peuple à la mémoire des Gracques.

Depuis l'an 591 jusqu'à l'an 633 de Rome, avant J. C. 121.

La comparaison de Tiberius & Caius avec Agis & Cléomènes.

TIBERIUS ET GAIUS GRACCI.

Ainsi doncques estant l'histoire des deux Grecs exposée, il reste que nous escrivions aussi celle des deux Romains, en laquelle nous ne verrons pas de moindres inconveniens advenus à Tiberius & à Gaius, qui tous deux furent filz de Tiberius Graccus : lequel encore qu'il eust esté deux fois consul¹, & une fois censeur, & qu'il eust eu l'honneur de deux triumphes, avoit neantmoins plus de dignité & plus de gloire à cause de sa vertu seule, pour laquelle il fut estimé digne d'espouser Cornelia fille de Scipion, qui desfeit Annibal, après la mort du pere : combien que de son vivant il ne luy eust point esté amy, ains plustost adverfaire & ennemy.

II. Lon dit qu'il trouva un jour dedans son liect une couple de serpens, & que les devins ayans considéré que vouloit signifier ce presage, luy defendirent de les tuer tous deux, & de les laisser aussi eschapper tous deux, mais ouy bien l'un seulement, luy asseurans que s'il faisoit mourir le male, cela luy apporteroit la mort à luy mesme, & s'il tuoit la femelle, que

¹ L'an de Rome 577 & 591.

ce feroit à Cornelia. Tiberius doncques aimant sa femme, joinct qu'il estimoit estre plus raisonnable que luy mourust premier qu'elle, attendu qu'il estoit le plus vieil, & elle encore jeune, tua le masse, & laissa eschapper la femme : mais il mourut aussi tantost après, laissant douze enfans vivans, lesquelz il avoit tous euz de Cornelia, laquelle après le trespas de son mary, prenant tout le soing de sa maison & de ses enfans, se monstra si honeste, si bonne envers ses enfans, & si magnanime, que lon jugea Tiberius avoir sagement fait, d'avoir voulu mourir plus tost qu'une telle femme. Car estant en sa viduité, le roy Ptolomeus luy voulut communiquer l'honneur du diademe royal, & la faire royne, la demandant à femme : mais elle le refusa, & perdit en sa viduité tous ses enfans, exceptée une fille, qu'elle donna en mariage au jeune Scipion Africain, & Tiberius & Gaius dont nous escrivons presentement, lesquelz elle nourrit & institua si diligemment, qu'estans devenus plus honestes & mieulx conditionnez que nulz autres jeunes hommes Romains de leur temps, on estima que la nourriture en valoit mieulx que la nature : mais tout ainsi comme ès images de Castor & de Pollux on apperçoit ne sçay quoy de difference, qui fait cognoistre que l'un valoit mieulx à la lûste,

472 TIBERIUS ET GAIUS.

& l'autre à la course : aussi entre ces deux jeunes freres, parmi les autres grandes similitudes qu'ilz avoyent, d'estre tous deux heureusement nez à la prouesse de leurs personnes, à la temperance, à la liberalité, aux lettres, & à la magnanimité, il sourdit de grandes differences quant aux effects & quant à leurs administrations en la chose publique : & me semble qu'il vaudra mieulx les declarer premier que d'entrer plus avant en matiere.

III. En premier lieu doncques, quant à la forme du visage, quant au regard & au mouvement de la personne, Tiberius estoit plus doux & plus posé, & Gaius plus vehement, de sorte que l'un en harenguant se maintenoit constamment en une place : & l'autre fut le premier des Romains qui commença à se promener par la tribune aux harengues en preschant, & à tirer sa robe de dessus son espaulle : comme lon escrit de Cleon Athenien, qu'il fut le premier des orateurs qui ouvrit sa robe, & frappa sur sa cuisse en parlant. Davantage la parole de Gaius parmi la force persuasive qu'elle avoit, estoit terrible & pleine d'affections : & celle de Tiberius au contraire, plus douce & plus attrayante à pitié, la diction propre & pure, & exquisement bien ordonnée : & celle de Gaius figurée, embellie & fardée. La mesme difference se cog-

noissoit aussi en leur table & en leur despenſe ordinaire : car celle de Tiberius estoit ſimple & ſobre : & celle de Gaius , à comparaifon des autres Romains , estoit bien ſobre & eſtroite auſſi , mais au regard de ſon frere il ſe trouvoit curieux , delicat & ſuperflu , comme Drusus luy reprocha un jour , qu'il avoit achepté des ¹ daulphins d'argent au prix de ² douze cents cinquante drachmes pour chaſque livre peſant. Et quant aux meurs & à leur inclination naturelle , ſuyvant la difference de leur langage , l'un estoit doux & gracieux , l'autre violent & cholere , de ſorte qu'en harenguant il ſe laiſſoit aller quelquefois à ſon courroux contre ſa voulunté , juſques à haulſer ſa voix en un ton plus agu , à dire des injures , & à confondre ſon parler : mais pource qu'il ſe ſentoit ſubject à ſemblables failles , il y uſa d'un tel remede. Il avoit un ſerviteur nommé Licinius , homme de bon entendement , qui avec un instrument de muſique , dont lon enſeigne à haulſer & baiſſer les tons , ſe tenoit derriere luy quand il harenguoit : & quand il ſentoit que ſa voix eſclattoit un peu trop , & par cholere ſortoit hors de ton , il luy ſouffloit par derriere un ton doux , au ſon duquel Gaius

¹ Autres liſent en ce lieu *Δαφνὰς*, c'eſt à dire, tables d'argent de l'ouvrage de Delphes. *Amyot.* De la forme du *trepied* de Delphes.

² Six vingts cinq eſcus. *Amyot.* 972 liv. 10 ſ. de notre monnoie.

474 TIBERIUS ET GAIUS.

se moderoit incontinent, relaschant la vehemence de sa cholere & de sa voix, & se revenoit facilement. Voilà les differences qui estoient entre eulx.

IV. Au demourant leur vaillance contre les ennemis, justice vers les subjects, soing & diligence ès charges de leurs offices, temperance & continence alencontre des voluptez, estoient en tout & par tout semblables ès deux. Il est vray que Tiberius estoit plus aagé que son frere de neuf ans, ce qui fut cause que leur entremise du gouvernement de la chose publique fut divisée de temps, & l'une des principales occasions pourquoy leurs entreprises ne succederent pas, pource qu'ilz ne florirent pas en un mesme temps, ny ne peurent pas conjoindre leur puissance ensemble, laquelle si elle se fust rencontrée en un mesme temps, eust esté très grande, & à l'aventure invincible.

V. Il nous fault doncques escrire separeement de chascun, & premierement de celuy qui est l'aîné, lequel dès l'issue de son enfance fut tant estimé, que tout incontinent on l'associa au college des presbtres; que lon appelle à Rome les augures, qui ont la charge de considerer les signes & presages des choses à advenir, plus pour sa vertu que pour sa noblesse, ainsi que monstra le resmoignage d'Appius Clodius, personnage

qui avoit esté consul ¹ & censeur , & de telle dignité qu'il avoit esté déclaré & nommé prince du senat , aussi avoit il plus d'autorité que nul autre de son temps. Et un jour comme tous les augures mangeassent ensemble , après avoir salué & caressé fort amiablement Tiberius , il le rechercha luy mesme de vouloir espouser sa fille ² : ce que Tiberius accepta bien volontiers , & fut sur l'heure mesme passé l'accord du mariage entre eux : parquoy Appius retournant en son logis dès le sueil de la porte appella sa femme à haulte voix , criant : « Antistia , j'ay fiancé nostre fille » Clodia » : Dequoy elle s'emerveillant , « Dea , » dit elle , quel besoing estoit il de soy haster » & precipiter tant ? Qu'eusses tu peu faire » davantage , si tu luy eusses trouvé Tiberius » Graccus pour mary » ? Je n'ignore pas toutefois , que quelques uns ont attribué ceste histoire à Tiberius pere de ceulx cy , & à Scipion l'Africain : mais la plus part des historiens la met ainsi que nous l'escrivons à present : & Polybius mesme escrit , qu'après la mort de Scipion les parents assemblez choisirent Tiberius entre tous les autres jeunes hommes pour luy donner Cornelia en mariage , comme n'ayant esté ny fiancée ny promise à autre quelconque par son pere.

¹ L'an de Rome 611.

² Tiberius n'avoit alors que vingt ans.

VI. Tiberius doncques le jeune estant à la guerre en Afrique sous le second Scipion ¹, qui avoit sa sœur en mariage, & logeant avec luy sous une mesme tente, cogneur incontinent la nature de son capitaine douée de plusieurs belles, bonnes & grandes parties pour attirer les cœurs des hommes à imiter & désirer en-fuyvre sa vertu. Si devint en peu de temps le plus humble & plus obeissant, & le plus vaillant de sa personne qui fust entre tous les jeunes hommes de son temps, tellement que ce fut le premier qui monta sur la muraille des ennemis, ainsi comme dit Fannius, affirmant y avoir monté quant & luy, & l'avoir secondé en cest acte de prouesse : au moyen dequoy, estant present il estoit fort aimé de tout le camp, & absent fort désiré & regretté de tout le monde.

VII. Après ² ceste guerre il fut esleu quæsteur, & luy escheut par le sort d'aller à l'encontre des Numantins avec l'un des consulz Caius Mancinus, lequel n'estoit point mauvais homme, mais bien le plus mal fortuné & le plus malheureux capitaine que les Romains eussent : & neantmoins en fortune si contraire, & en si grand malheur reluisit

¹ L'an de Rome 607 & 608. Il avoit seize ans.

² Plusieurs années après. L'affaire dont il va être question, & le consulat de Mancinus, sont de l'an de Rome 617. Tiberius étoit dans sa vingt-sixieme année.

encore plus clairement , non seulement le bon sens & la prouesse de Tiberius , mais , qui est encore plus emerveillable , la reverence & l'obeïssance qu'il portoit à son supérieur , combien qu'il fust si travaillé & si troublé de ses mesadventures , qu'il ne sçavoit luy mesme , s'il estoit capitaine ou non. Car ayant esté desfait & batu en de grosses batailles , il se partit de nuit abandonnant son camp : ce que les Numantins ayans apperceu , firent premierement son camp , puis coururent après les fuyans , là où donnans sur la cueüe ilz en occirent les derniers , & envelopperent toute son armée , de sorte qu'ilz la rengerent en lieux malaisez , dont il n'y avoit aucun moyen d'eschapper : parquoy Mancinus desesperant en pouvoir sortir à force , leur envoya par un herault demander appointement , à quoy les Numantins firent responce qu'ilz ne se fieroyent à personne , sinon à Tiberius seul , & luy manderent qu'il l'envoyast devers eulx , ayans pris ceste affection en partie pour les vertus du jeune homme , à cause que lon ne parloit que de luy en toute celle guerre , & en partie aussi , par la souvenance qu'ilz avoyent de son pere Tiberius , qui faisant la guerre en Hespagne , & y ayant subjugué plusieurs nations , donna la paix à ceulx de Numance , laquelle il feit depuis ratifier & confirmer au peuple Romain.

VIII. Ainsi y fut envoyé Tiberius qui parla à eulx , & leur faisant passer partie de ce qu'il vouloit , & aussi leur accordant partie de ce qu'ilz demandoyent , arresta la paix avec eulx , en quoy faisant il sauva asseurement la vie à vingt mille citoyens Romains , outre les esclaves & autres volontaires qui suyvoyent le camp sans estre des bendes : mais au demourant les Numantins prirent & pillèrent tous les biens qui estoient demourez dedans le camp des Romains , entre lesquelz se trouverent les papiers où estoient contenus les comptes de la charge de Tiberius touchant l'administration des deniers , lesquelz desirant singulierement recouvrer , il s'en retourna à Numance avec deux ou trois de ses amis seulement , combien que l'armée Romaine fust desja bien avant en chemin : & appellant les gouverneurs & officiers de la ville , les pria de luy faire rendre ses papiers , à fin qu'il ne donnast point d'occasion à ses envieux & malvueillans de le calumnier , quand il ne pourroit rendre compte de ce qu'il auroit manié. Les Numantins furent bien aises de ceste adventure , & le prièrent d'entrer dedans leur ville : & comme il s'arrestast tout debout à consulter en soy mesme , s'il y devoit entrer ou non , les officiers de Numance s'approcherent de luy , & le prirent par la main , le supplians de croire qu'ilz n'estoyent plus enne-

mis, ains bons amis, & qu'il se voulust fier en eulx, de façon que Tiberius fut d'opinion de le faire, pour l'envie qu'il avoit de recouvrer ses papiers, & aussi pour la doubte qu'il faisoit d'irriter les Numantins s'il eust monstré qu'il se fust deffié d'eulx. Quand il fut dedans, ilz luy firent appareiller à disner, & le prierent avec toute l'instance qu'il leur fut possible, de se vouloir seoir & manger un peu avec eulx, puis luy rendirent ses papiers, & davantage luy offrirent tout ce qu'il voudroit de ce qui avoit esté pris par eulx dedans le camp des Romains, dequoy il ne voulut prendre chose quelconque, sinon l'encens dont il uza au sacrifice qu'il feit pour la chose publique : & cela fait, il prit congé d'eulx en les remerciant ; & s'en retourna.

IX. Quand il fut de retour, tout le faict de cest appointment fut grandement repris & blasmé, comme indigne & faisant deshonneur à la dignité de Rome : mais les parents & amis de ceulx qui avoyent esté en ceste guerre, faisans la plus grande partie du peuple, s'assemblerent à l'entour de Tiberius, disans que des fautes qui y avoyent esté laschement faïttes, il s'en falloit adresser & prendre au consul, & au reste, que c'estoit luy qui avoit sauvé un si grand nombre de citoyens : toutefois ceulx qui estoient marris de l'infamie de cest appointment, vouloyent

que lon feist comme avoyent autrefois fait leurs ancêtres en cas pareil : car ilz renvoyerent leurs capitaines tous nuds aux ennemis , pource qu'ilz s'estoyent contentez que les Samnites les despouillassent & laissassent eschapper la vie fauve , & ne leur envoyerent pas seulement les capitaines en chef , ains aussi tous ceulx qui avoyent eu aucune charge en l'armée & qui avoyent consenty à la composition , pour convertir sur leurs testes tout le peché de la contravention au serment qu'ilz avoyent presté , & à l'appointement qu'ilz avoyent juré. Mais en cela se monstra bien evidemment l'amour & bienvueillance que le peuple portoit à Tiberius : car il ordonna que le consul Mancinus seroit rendu¹ piedz & poings liez aux Numantins , & pardonna à tout le reste pour le regard de Tiberius : en quoy il m'est bien advis que Scipion luy aida , qui estoit pour lors le premier homme de la ville de Rome , & qui plus y avoit d'autorité , qui toutefois fut blasmé de ce qu'il n'avoit aussi sauvé le consul Mancinus , & fait confirmer l'appointement accordé aux Numantins , veu que ce avoit esté Tiberius son amy & son allié qui l'avoit traité.

X. Ces plaintes pour la plus part procédoient de l'ambition des amis de Tiberius , & de quel-

¹ L'an de Rome 618. Ce fut Mancinus lui-même qui proposa la loi ; mais les Numantins le renvoyerent.

ques hommes de lettres , qui l'irritoyent & le mettoient en picque à l'encontre de Scipion , laquelle toutefois ne proceda point jusques à haine declarée , ny n'en ensuyvit mal aucun : & me semble que Tiberius ne fust point tumbé ès inconveniens où il tumba depuis , si Scipion eust esté present quand il entreprit ce qu'il meit en avant : mais il estoit desja à la guerre devant Numance ¹ , quand Tiberius commença à proposer ses edicts pour une telle occasion : quand les Romains anciennement avoyent vaincu quelques uns de leurs voisins , pour l'amende ilz leur ostoyent bien souvent une portion de leurs terres , dont partie se vendoit au profit de la chose publique , & partie se joignoit au domaine , qui se bailloit puis après à ferme ou à rente aux pauvres citoyens qui n'avoient point d'heritages , en payant un bien peu de rente tous les ans : mais les riches commencerent à haulser la rente & à en debouter par ce moyen les pauvres : à l'occasion dequoy fut faite une ordonnance , qu'il ne fust loisible à citoyen Romain de tenir plus de cinq cents arpents de terre. Ceste ordonnance refrena pour un peu de temps l'avarice des riches , & aida aux pauvres qui demouroient aux champs sur les terres qu'ilz avoyent prises à ferme de la chose publique , & vivoient de ce que eux ou

¹ L'an de Rome 610 & 611.

481 TIBERIUS ET GAIUS.

leurs ancestres en avoyent eu dès le commencement : mais par laps de temps leurs voisins riches, sous noms de personnes supposées trouvoient moyen de transferer en eulx les arrentemens, & à la fin sans plus desguiser rien, en teindrent eulx mesmes publiquement & notoirement en leur nom la plus grande partie, de maniere que les pauvres en estans ainsi deboutez, n'alloyent plus de bon courage à la guerre, ny ne se soucioient plus de nourrir & elever des enfans, tellement qu'en peu de temps l'Italie se fust trouvée depuée d'hommes de libre condition, & remplie de Barbares & d'esclaves, par lesquels les riches faisoient labourer les terres, dont ilz avoyent chassé des citoyens Romains : auquel inconvenient essaya de prouvoier & de remedier Caius Lælius l'amy de Scipion, mais pource que les gros de la ville luy furent à ce contraires, craignant qu'il n'en sortist autre effect que une sedition civile, il s'en deporta : & pour ceste cause fut surnommé Lælius le sage ou le sçavant : car il semble que ce mot Sapiens signifie l'un & l'autre.

XI. Toutefois Tiberius, aussi tost qu'il fut esleu tribun du peuple¹, se meit incontinent sur ses brisées à la suscitation, ainsi que la plus part des historiens escrit, de Diophanes rhetoricien,

¹ L'an de Rome 611.

& de Blossius philosophe, qui le poulsèrent à ce faire, Diophanes estant banny de la ville de Mytilene, & Blossius natif de l'Italie en la ville de Cumes, ayant esté disciple & familier d'Antipater de Tarse à Rome mesme, où il luy feir l'honneur de luy dedier quelques sienes compositions de la philosophie. Aucuns en accusent aussi leur mere Cornelia, laquelle leur reprochoit que les Romains l'appelloient encore belle mere de Scipion, non pas mere des Gracques. Les autres veulent dire que ce fut un Spurius Posthumius, compagnon de Tiberius & son concurrent en la gloire d'eloquence : pource que Tiberius à son retour de la guerre le trouvant fort avancé devant luy en honneur & reputation, & bien estimé de chascun, le voulut surmonter en attendant ceste hardie entreprise, & qui estoit de très grande expectation. Mais son frere mesme Gaius en un sien livre a escrit, que comme il alloit à la guerre de Numance, en passant par la Thoscane il trouva le país presque desert; & ceulx qui y labouroient la terre ou y gardoyent les bestes, pour la plus part esclaves Barbares, venus de país estrange : à l'occasion dequoy deslors il se meit en teste l'entreprise de conduire cest œuvre à chef, qui fut cause d'infinis maux à leur maison : mais, quand tout est dir, ce fut le peuple mesme qui plus enflamma

484 TIBERIUS ET GAIUS.

sa convoirise d'honneur, & hasta sa deliberation, l'invitant à y entrer par escritteaux que lon trouvoit par tout contre les murailles, ès portiques, sur les sepultures, ès quelz on le prioit de vouloir faire rendre aux pauvres citoyens Romains, les terres appartenantes à la chose publique.

XII. Toutefois encore ne fait il pas seul de sa teste l'edict, ains le fait avec le conseil des premiers hommes de la ville en vertu & en reputation, entre lesquelz estoient Crassus le souverain pontife, Mutius Scævola le jurisconsulte, qui lors estoit consul¹, & Appius Claudius son beaupere: & si semble que jamais ne fut faite loy si douce ne si gracieuse, que celle là qu'il proposa contre une si grieve injustice & si grande avarice: car ceulx qui devoient estre punis de ce qu'ilz avoyent contrevenu aux loix, & à qui lon devoit oster par force les terres qu'ilz tenoyent injustement contre les ordonnances expresses de Rome, & leur en faire payer l'amende, il voulut que ceulx là fussent remboursez par le public de ce que les terres qu'ilz tenoyent illicitement pouvoient valoir, & qu'elles fussent remises ès mains des pauvres bourgeois qui n'en avoyent point, & qui avoyent besoing de aide pour vivre.

¹ L'an de Rome 621.

XIII. Et combien que la reformation que son edict introduisoit fust ainsi gracieuse , le peuple neantmoins se contentoit , en oubliant tout le passé , que pour l'advenir au moins on ne luy feist plus de tort : mais les riches & ceulx qui se sentoient bien heritez , haïssoient l'edict pour leur avarice , & par un despit & une opiniastrété de ne vouloir point ceder , en vouloyent mal de mort à celuy qui l'avoit proposé , taschans à en divertir & desgouster le peuple , en disant que Tiberius introduisoit un nouveau departement des heritages , pour mettre la chose publique en combustion & renverser tout sans dessus dessous : mais ilz n'y gaignoyent rien , pource que Tiberius defendant ceste cause , qui de soy mesme estoit bonne & juste , avec une eloquence qui en eust peu prouver & justifier une mauvaïse , estoit invincible , & n'y avoit personne qui le peust refuter ny soustenir , quand il venoit à discourir & à deduire en faveur des pauvres citoyens Romains , estant rout le peuple espendu au devant de la tribune aux harengues , « Que » les bestes sauvages qui estoient par l'Italie » avoyent à tout le moins leurs gistes , leurs » tefnieres , & leurs cavernes où elles se retiroient : là où les hommes qui combatoyent » & mouroyent pour icelle , n'y avoyent chose » quelconque , sinon l'air & la lumiere , ains

486 TIBERIUS ET GAIUS.

« estoient contraincts d'aller errans çà & là avec
 « leurs femmes & leurs enfans , sans sejour &
 « sans maison où ilz se peussent heberger : de
 « sorte que les capitaines (disoit il) mentent
 « ordinairement , quand pour encourager les
 « soudards , ilz les prient & admonestent de
 « combattre vaillamment pour les sepultures , les
 « temples & les autelz d'eulx & de leurs prede-
 « cesseurs : car il n'y a pas un de tant de pauvres
 « bourgeois Romains , qui sçeust monstrier ny
 « un autel domestique , ny une sepulture de ses
 « ancestres : ains vont les pauvres gens à la
 « guerre combattre & mourir pour les delices ,
 « la richesse & superfluité d'autrui : & les appelle
 « lon à faulses enseignes seigneurs & dominateurs
 « de la terre habitable , là où ilz n'ont pas un seul
 « poulce de terre qui soit à eulx.

XIV. Ces parolles & autres semblables pro-
 noncées avec gravité grande & une compassion
 veritable , emouvoyent tellement le commun
 peuple , & le ravissoyent hors de soy , qu'il n'y
 avoit personne des adversaires qui le peust souf-
 tenir : parquoy laissant le contredire & refuter
 par raison , ilz se tournerent devers Marcus
 Octavius , l'un des compagnons de Tiberius en
 l'office de Tribun du peuple. C'estoit un jeune
 homme sage , posé & rassis de sa nature , fami-
 lier amy de Tiberius , tellement que la premiere

fois que lon s'adressa à luy, pour le faire opposer à l'enterinement & confirmation de cest edict, il s'en excusa, pour le regard de la familiarité & amitié qu'il avoit avec Tiberius. Mais à la fin comme forcé par la multitude & l'autorité de tant de gros personnages qui l'en pressoyent, il résista à Tiberius, & s'opposa à son ordonnance : ce qui estoit suffisant pour la rompre : car s'il y a un seul Tribun qui empesche & qui contredise, encore que tous les autres consentent, il l'emporte, & ne peuvent tous les autres ensemble rien faire, s'il y a un seul opposant.

XV. Dequoy Tiberius s'estant irrité, se depotta de mettre en avant ceste premiere loy gratieuse, & par despit en remeir une autre plus agreable au menu peuple, & plus aspre alencontre des riches, par laquelle il vouloit que ceulx qui tenoyent des terres en plus grande quantité que ne permettoient les anciennes ordonnances, fussent contraincts d'en vuidier promptement leurs mains : sur quoy il avoit tous les jours ordinairement de grandes altercations en la tribune aux harangues alencontre d'Octavius, es quelles combien que l'un contestast alencontre de l'autre avec une vehemence d'affection, & avec une obstination extreme, si ne dirent ilz jamais une seule mauvaise parole l'un

contre l'autre, ny ne leur eschappa jamais en quelque cholere qu'ilz fussent, un mot qui touchast l'honneur de son compagnon : par où il appert, que l'estre bien né & bien nourry, modere & arreste l'entendement de l'homme, non seulement ès choses de plaisir, le gardant d'oultre passer les bornes d'honneur ny en faict ny en dict, mais aussi en courroux, & ès plus ardentes ambitions & convoitises d'honneur.

XVI. Auquel propos Tiberius voyant que sa loy touchoit entre autres à Octavius, à cause qu'il tenoit beaucoup des terres publiques, le pria à part de ne plus debatre contre luy, promettant luy rendre du sien propre la valeur des terres qu'il seroit contrainct de lascher, combien qu'il ne fust pas autrement des bien riches : mais Octavius n'en ayant voulu rien faire pour ses prieres, il meit adonc en avant un edict que tous magistrats cessassent toute jurisdiction & tout exercice de leur estat, jusques à ce que sa loy eust esté ou approuvée ou reprouvée par les voix du peuple : & si seella luy mesme de son propre cachet les portes du temple de Saturne, où estoient les coffres de l'espargne, à fin que les quæsteurs ou tresoriers n'y peussent ce temps pendant rien prendre ny rien mettre, imposant de grosses amendes aux prêteurs & autres magistrats ayans jurisdiction ordinaire, qui con-

treviendroyent aucunement à son edict : de maniere que tous les officiers craignans d'encourir ceste peine , laisserent l'exercice de leur jurisdiction. A l'occasion dequoy , les riches qui avoyent grand nombre d'heritages changerent de robbes , se promenant par la place avec une chere dolente , & triste contenance , & espierent secrettement de le surprendre , ayans attilré gens pour l'occire , qui fut cause que luy mesme au veu & sceu de tout le monde , porta aussi dessous sa robbe longue une sorte de courte dague dont usent les brigands , que les Latins appellent proprement *dolon*. Quand le jour prefix fut escheu pour proceder à l'enterinement & publication de son edict , Tiberius appella le peuple pour donner ses voix , & les riches ravirent à force les vases où se mettoient les buletins des voix , de maniere que les choses estoient pour tomber en grand trouble & grande confusion , pource que Tiberius y pouvoit estre le plus fort en nombre d'hommes , qui ja s'assembloyent autour de luy pour cest effect , n'eust esté que Manlius & Fulvius tous deux personages de dignité consulaire , s'adresserent à luy en le priant les mains jointes , & les larmes aux yeux , qu'il s'en voulust deporter. Tiberius tant pource qu'il voyoit qu'il y avoit danger de quelque grand inconvenient , qui estoit pour advenir tout promptement , que

pour la reverence aussi qu'il portoit à deux si notables personnes, se reteint un peu, leur demandant qu'ilz vouloyent donques qu'il feist : ilz respondirent qu'ilz n'estoyent pas suffisans pour le conseiller en affaire de si grande consequence, mais qu'ilz le prioient de vouloir remettre le tout à la deliberation du senat : ce qu'il leur accorda sur l'heure.

XVII. Mais depuis voyant que le senat assemblé là dessus ne concluait rien, à cause que les riches y avoyent trop d'autorité, alors il se mit à poutsuyvre une autre chose qui n'estoit ny honeste ny legitime, c'estoit de faire priver & deposer Octavius de son magistrat, sçachant bien qu'il ne viendroit jamais à bout autrement de faire autorizer son decret : mais premier que de ce faire, il le pria publiquement devant tout le peuple avec très gratieuses paroles, en luy touchant en la main, qu'il se voulust depattir de son opposition, & faire ce plaisir au peuple, qui le requeroit de chose juste & raisonnable, & qui demandoit ceste recompense bien petite au lieu de tant de peines & de travaux qu'il endureoit pour la chose publique. Octavius rejetta toutes ses prieres : & adonc Tiberius dit tout hault, qu'estans tous deux en magistrat d'autorité pareille & de puissance egale, contraires l'un à l'autre en chose de si grande importance, il estoit

impossible que ce different à la fin se vuidast sans guerre civile, & qu'il ne voyoit remede aucun à cest inconvenient, sinon que l'un d'eux fust depose de son magistrat, & dit à Octavius qu'il le meist en jeu le premier, & qu'il descendroit bien volontiers du tribunal, & se rendroit homme privé, si ainsi plaisoit au peuple. Octavius n'en voulut rien faire : & Tiberius luy repliqua qu'il le feroit donques contre luy, s'il ne changeoit d'advis après avoir eu temps d'y penser : & à tant feit rompre l'assemblée du peuple pour ce jour là. Le lendemain s'estant le peuple rassemblé, Tiberius montrant dessus la tribune, essaya de rechef de persuader à Octavius qu'il se deportast : mais à la fin, voyant qu'il ne le pouvoit divertir aucunement, il meit la chose aux voix du peuple, s'il luy plaisoit que Octavius fust depose de son magistrat. Or y avoit il trente & cinq lignées du peuple, desquelles les dixsept avoyent ja donné leurs voix contre luy, & n'en falloit plus que une seule pour le faire destituer : parquoy il feit un peu surseoir la procedure sur ce point, & supplia encore de rechef Octavius en l'embrassant devant tout le peuple, avec toute l'instance de prieres que lon sçauroit faire, qu'il ne voulust point par opiniastrété, souffrir que une telle honte luy fust faite, d'estre publiquement destitué de son estat, ny estre aussi cause qu'on luy

491 TIBERIUS ET GAIUS.

peust imputer qu'il eust esté ministre d'un si piteux acte. Lon dit que Octavius en cest endroit fut un peu emeu & attendry de ses prieres, & qu'ayant les larmes aux yeux, il demoura assez longuement sans respondre : mais quand il jettas ses yeux devers les riches & possesseurs de terres qui estoient ensemble en grosse troupe, il eut à mon advis honte & peur d'estre mal voulu & mal estimé d'eulx, & aima mieulx prendre genereusement le hazard de sa destitution, disant à Tiberius qu'il feist ce qu'il voudroit. Ainsi estant son abrogation passée & autorisée par les voix du peuple, Tiberius commanda à l'un de ses serfs affranchis, qu'il le tirast à bas hors de la tribune aux harengues : car il se servoit de ses affranchis au lieu de sergens. Cela rendit la chose encore plus pitoyable de voir tirer ainsi ignominieusement Octavius à force : &, qui plus est, la commune luy voulut courir sus, mais les riches accoururent à son aide, qui empescherent que lon ne l'oultrageast davantage : & luy se sauva de viffesse tout seul, ayant ainsi esté rescoux de la fureur du peuple : mais un sien serviteur fidele qui se mettoit au devant pour luy sauver les coups, y eut les yeux crevez contre la vouldunté de Tiberius, lequel y accourut à grande haste, quand il en entendit le bruit.

XVIII. Cela fait, l'edict touchant les terres

publiques fut adonc passé & confirmé, & esleut on trois commissaires pour en faire l'inquisition & la distribution. Les commissaires furent Tiberius luy mesme, Appius Clodius son beau-pere, & Gaius Graccus son frere, qui n'estoit pas pour lors dedans Rome, ains estoit au camp devant la ville de Numance sous Scipion l'Africain. Ces choses furent faites paisiblement par Tiberius, sans que personne luy oast plus aller alencontre : & qui plus est, il feit substituer au lieu d'Octavius non une personne de qualité, ains seulement un de ses suyvens & dependans qui s'appelloit Mutius, dont les riches & les nobles estoient grandement indignez contre luy, & redoubtans son accroissement, faisoient au senat tout ce qui estoit en eulx pour luy faire despit & honte : car il demanda qu'on luy baillast une tente aux despens du public, quand il iroit par les champs pour proceder au departement des terres, comme lon faisoit aux autres qui alloient bien souvent en de beaucoup moindres commissions. Ilz la luy refuzerent tout à plat, & pour sa despenfe ordinaire luy taxerent par jour neuf oboles^{*}, à

* Ce sont environ cinq sols & demy. *Amyot.* 1 liv. 3 s. 4 d. $\frac{1}{2}$ de notre monnoie, l'obole valant 1 s. 7 d. $\frac{1}{2}$ de notre monnoie, ce qui donne pour la drachme, qui vaut six oboles selon Plin., 15 s. 6 d. $\frac{1}{4}$, suivant l'estimation que nous avons suivie; & 3 d. $\frac{3}{4}$ pour le chalque, dont dix faisoient une obole, selon le même Plin.

494 TIBERIUS ET GAIUS.

la fuscitation de Publius Nafica , lequel se declara en ce faict son ennemy à toute oultrance , pource qu'il possedoit grande quantité des terres publiques , & estoit fort marry de se voir contrainct à force d'en vuider ses mains.

XIX. Mais le peuple à l'opposite s'en irritoit & enflammoit encore davantage contre les riches : tellement qu'estant mort soudainement un des amis de Tiberius , sur le corps duquel , aussi tost qu'il fust trespasse , il apparut de bien mauvais signes , la commune accourut à son enterrement , criant tout hault que lon l'avoit empoisonné , & chargeans le lict sur leurs espaules assisterent au feu de ses funerailles , là où se descouvrirent aucuns indices , qui feirent penser qu'ilz n'estoyent pas hors de propos de presumer qu'il y eust eu du poison , pource que le corps se creva , dont il sortit une quantité d'humours corrompues qui esteignirent le feu , de maniere qu'il en fallut apporter d'autre , lequel encore ne se voulut point prendre ny brusler , jusques à ce que lon fut contraint de transporter le corps ailleurs , là où lon eut beaucoup d'affaires à l'allumer. Ce que voyant Tiberius , pour plus encore mutiner la commune , se vestit de dueil , & apportant ses enfans en public , supplia le peuple de les vouloir avoir pour recom-

mandez eulx & leur mere, comme ja defesperant quant à luy de son salut.

XX. Environ ce temps deceda Attalus surnommé Philopater ¹, & Eudemus Pergamenien apporta son testament à Rome, par lequel il instituait le peuple Romain son heritier : parquoy Tiberius pour tousjours se mettre de plus en plus en la bonne grace de la commune, meit incontinent en avant un edict, que l'argent comptant qui proviendrait de la succession de ce roy fust distribué entre les pauvres citoyens, ausquelz escherroit d'avoirpart au de partement des tertes communes, pour eulx meubler & se prouvoir des choses necessaires à labourer la terre. Au demourant, quant aux villes qui estoient du royaume d'Attalus, il dit qu'il n'appartenait point au senat d'en rien ordonner, & que c'estoit à faire au peuple à en disposer, & que luy mesme le proposeroit. Cela fut cause de le faire encore haïr davantage du senat, & y eut un senateur nommé Pompeius, qui se dressant en piedz dit qu'il estoit prochain voisin de Tiberius, & que pour ce voisinage il sçavoit comme le Pergamenien Eudemus luy avait donné l'un des bendeaux royaux du roy Attalus, avec une robbe de pourpre, en signifiante qu'il devoit un jour estre roy de Rome : & Quintus Metellus luy

¹ Qui étoit monté sur le trône l'an de Rome 616.

reprocha, que son pere estant censeur, quand les Romains ayans souppé en ville retournoyent après soupper en leurs maisons, ilz esteignoyent leurs torches & flambeaux, de peur qu'il ne semblaist, si on les veoit retourner, qu'ilz demourassent trop tard ès compagnies & ès banquetts : là où, au contraire, les plus seditieux & plus necessiteux du menu populaire esclairoient à son filz, & luy faisoient compagnie quand il alloit par la ville toute la nuit.

XXI. Or y avoit il lors un nommé Titus Annius, homme qui n'estoit ne bon ny honeste, mais on le tenoit pour un grand argueur & pour homme nompareil à subtilement interroguer & cautelement respondre : celui là provoqua Tiberius à compromettre alencontre de luy, s'il vouloit dire qu'il n'eust pas imprimé une note d'infamie à un sien compagnon, en un magistrat qui par les loix Romaines devoit estre sainct & de tout poinct inviolable. Le peuple prit ceste provocation à courroux, & Tiberius se tira aussi tost en avant, & ayant fait assembler le peuple, commanda que l'on amenast cestuy Annius, auquel il vouloit faire faire le procès sur le champ : mais luy se sentant de beaucoup inferieur à Tiberius en dignité & en eloquence, recourut à ses subtilitez de finement interroguer un homme pour le prendre par sa parole, priant
Tiberius.

Tiberius, avant que d'entrer en son accusation, qu'il luy voulast premierement respondre à une seule demande qu'il luy feroit. Tiberius luy permit de demander ce qu'il voudroit : & leur estant donné silence, Annius luy demanda, « Si » ru me voulois diffamer & injurier, & que » j'appellasse l'un de tes compagnons à mon aide, » lequel se levast pour me secourir, & que tu » en fusses despit, luy voudrois tu pour cela » oster son magistrat » ? Lon dit que Tiberius à ceste interrogatoire demoura si confus, que combien qu'il fust l'un des plus prompts à parler & des plus asseurez à harenguer de son temps, ce neantmoins il demoura tout muet sans pouvoir rien respondre, & pour ceste cause rompit l'assemblée sur l'heure mesme.

XXII. Et depuis cognoissant qu'entre tous ses actes, la deposition d'Octavius sembloit, non seulement aux nobles, mais aussi au commun populaire, issue d'une passion trop devoyée de raison, pource qu'il sembloit qu'il eust abbatu & avillé la dignité des tribuns du peuple, qui jusques à ce temps là avoit esté tenue si grande & si honorable : parquoy pour s'en justifier il feit une harangue au peuple, de laquelle il ne sera point impertinent d'extraire & mettre en cest endroit aucuns arguments, à fin que de là on puisse estimer, quelle estoit la force, la

richesse & vehemence de son eloquence. Car
 il dit, « Que le tribunat estoit voirement sa-
 » cré, saint & inviolable, à cause qu'il estoit
 » particulièrement devoué à la protection du peu-
 » ple, & estably pour procurer son bien : mais
 » si au contraire il se trouve qu'il face tort au
 » peuple, il retrenche sa puissance, & luy oste
 » le moyen de declarer sa volonté par ses voix,
 » alors il se prive soy mesme des privileges &
 » prerogatives de son estat, en ne faisant pas
 » ce, pourquoy telles preeminences luy ont esté
 » premierement baillées : autrement il faudroit
 » doncques endurer qu'un tribun, si bon luy
 » sembloit, demolist le Capitole & meit le feu
 » en l'arcenal, & toutefois quand bien il feroit
 » tous ces excès là, encore seroit il tribun du
 » peuple pour le moins mauvais : mais quand
 » il tasche à oster l'autorité & la puissance du
 » peuple, alors il n'est plus aucunement tribun.
 » Ne seroit-ce doncques pas chose de tout point
 » hors d'apparence de raison, que le tribun peust
 » emmener en prison, toutes & quantes fois
 » que bon luy semble, un consul, & que le
 » peuple ne peust oster à un tribun la puissance
 » que luy donne le magistrat, quand il en vou-
 » droit user au prejudice de celuy qui la luy a
 » donnée? car c'est le peuple qui eslit autant le
 » consul que le tribun. Davantage la dignité

» royale, pource qu'elle comprend souveraine-
 » ment en soy l'autorité & la puissance de toutes
 » sortes de magistrats ensemble, est consacrée
 » avec très grandes & très saintes cerimonies,
 » comme approchant fort près de la divinité :
 » & neantmoins le peuple chassa le roy Tarquin,
 » pource qu'il ufoit violement de son autho-
 » rité, & pour l'injustice d'un seul homme, le
 » magistrat le plus ancien, & celuy qui avoit
 » fondé Rome, fut aboly. Et qu'y a il en toute
 » la ville de Rome qui soit si saint ne si ve-
 » nerable, que sont les religieuses Vestales, les-
 » quelles ont charge de conserver & entretenir le
 » feu eternal ? & toutefois si aucune d'elles est con-
 » vaincue d'avoir forfait à son honneur, elle est
 » ensevelie en terre toute vive : & quand elles
 » viennent à mesprendre contre les dieux, elles
 » perdent toute la franchise qu'elles ont pour
 » la reverence du service des dieux. Aussi n'est
 » il doncques point raisonnable qu'il jouisse de
 » la franchise qu'il a pour defendre le peuple,
 » quand luy mesme l'offense : car il veut abo-
 » lir la puissance dont il vient la siene. Et s'il
 » a esté esleu tribun, pource qu'il s'est trouvé
 » que la plus part des lignées du peuple l'ont
 » esleu pour tel, comme n'est il plus juste qu'il
 » en soit privé, pource que toutes les lignées
 » ensemble l'en ont declaré indigne, & l'ont

» destitué ? Il n'est rien si saint ne si inviolable
 » que sont les choses offertes, données & con-
 » sacrées aux dieux : & rousefois jamais il ne
 » s'est trouvé personne qui ait voulu defendre
 » au peuple de s'en servir, de les remuer &
 » transporter de lieu à autre routes & quantes
 » fois qu'il luy a pleu : par ainsi luy a il esté
 » loisible de transferer le tribunal, aussi bien
 » comme une offrande consacrée, en un autre.
 » Davantage, qu'il n'y ait pas un magistrat qui
 » ne se puisse legitimement déposer, il appert
 » par ce qu'il s'est trouvé souvent, que ceux
 » qui les ont euz s'en sont eux mesmes depo-
 » sez, ou ont prié que lon les en dechargeast».
 Voilà les principaux chefs & fondemens de la
 justification de Tiberius.

XXIII. Mais ses amis voyans les menaces &
 les menées que les riches & nobles faisoient
 alencontre de luy, furent d'avis qu'il devoit
 encore poursuyvre pour la seureté de sa person-
 ne, un second tribunal pour l'année ensuyvant ;
 & adonc il commença à resflatter encore de plus
 en plus le commun peuple par edicts nouveaux
 qu'il meit en avant, par lesquels il ostoit le
 temps & le nombre prefix des années que le
 citoyen Romain estoit tenu d'aller à la guerre,
 quand il y estoit appelé, & que son nom estoit
 enrôlé. Il donnoit permission d'appeller de la

sentence de tous juges devant le peuple, & mes-
 loir parmy les senateurs, qui lors avoyent seule
 la preeminence & autorité de juger, nombre
 pareil de chevaliers Romains, allant ainsi par
 toutes voyes diminuant & affoiblissant l'autho-
 rité du senat, en augmentant celle du peuple
 plus par opiniastreté que par discours de raison,
 qui jugeast que ce fust chose juste ne profitable
 à la chose publique. Qui plus est, quand on
 commença à recueillir les voix & suffrages du
 peuple sur l'autorization de ses edicts nouveaux,
 sentant que ses adversaires estoient les plus forts
 en celle assemblée, à cause que tout le peuple
 n'estoit point encore amassé, il commença à
 tenfer & dire injures à ses compagnons, pour
 tousjours gagner temps, & encore à la fin rom-
 pit il l'assemblée, & commanda que lon retour-
 nast le lendemain, auquel il se trouva le pre-
 mier sur la place en robbe de deuil tout exploré
 & affligé à sa contenance, suppliant l'assistance
 du peuple que lon eust pitié de luy, pource qu'il
 disoit avoir peur, que ses ennemis ne vinsent
 la nuit forcer ou abattre sa maison pour le faire
 mourir. Cela eueut tellement le monde, qu'il
 y en eut plusieurs qui dresserent des tentes aen-
 tour de sa maison, & y feirent le guet toute la
 nuit pour le garder.

XXIV. Mais au poinct du jour le poulailler

302 TIBERIUS ET GAIUS.

qui gardoit les poullets, par les signes desquelz on devine les choses à advenir, les apporta, & leur jetta devant eulx à manger; mais ilz ne voulurent point sortir de la cage, excepté un, encore fut ce après qu'il l'eut bien secouée, & si ne voulut point toucher à la mangeaille qu'on luy presenta, ains haulsa seulement l'aile gauche & estendit la cuisse, puis s'en refouit au dedans de la cage. Ce presage feit souvenir à Tiberius d'un autre qu'il avoit eu paravant: car il avoit son armet qu'il portoit à la guerre fort beau & bien accoustre, dedans lequel se glifèrent deux serpens sans que son s'en donnast le garde, & firent des œufs dedans & les esclouirent: ce qui fut cause que Tiberius s'estonna encore plus du sinistre presage des poullets: toutefois si sortit il de sa maison quand il sceut que le peuple estoit desja tout assemblé dedans le Capitole, mais au sortir il donna si grand coup de la poincte du pied contre la pierre du seuil de l'huis, qu'il se rompit l'ongle du gros orteil, dont il sortit du sang qui percea oultre son soulier, & n'eut pas gueres cheminé que deux corbeaux luy apparurent, se combatans l'un l'autre sur les tuiles d'une maison à main gauche, & passant par là une si grosse foule de peuple, toutefois une pierre que poulsa l'un de ces corbeaux, vint à tumber au pied de Tiberius

seul. Cela arresta & y feit penser les plus audacieux mesmes de ceulx qui estoient autour de luy.

XXV. Mais Blossius de Cumes qui l'accompaignoit, luy dit, que ce seroit grande honte à luy, & bien assez pour faire perdre le cuer à ses adherens, que Tiberius qui estoit filz de Graccus, nepveu de Scipion l'Africain, & chef de la part¹ du peuple Romain, pour la crainte d'un corbeau laissast d'obeir à ses citoyens qui l'appelloient, & que ses adversaires & malveillans ne tourneroyent pas ceste faulte en risée, ains prescheroyent au peuple que ce seroit jà un tour de tyrân tout formé, qui par arrogance & mespris abuseroit de leur facilité. Davantage il accourat plusieurs messagers, que ses amis estans desjà au Capitole luy envoyoyent, en luy mandant qu'il se hastast & que tout s'y portoit bien pour luy : aussi y fut son arrivée fort honorable : car si tost que le peuple l'aperceut de tout loing, il jeta un grand cry de joye pour sa bienvenue, & le recueuillit on, quand il fut monté, avec grande demonstration & de grand soing de sa personne & de merveilleuse affection, prenans garde qu'homme quelconque ne s'approchast de luy, qu'il ne fust bien cogneu. Et là comme Mutius commenceast à rappeler les lignées du peuple pour proce-

¹ De la part, n'est point dans le grec, & ne signifie rien.

der à donner leurs voix, on ne pouvoit rien faire de ce que l'on avoit accoustumé en tel cas pour le grand bruit que demenoient les derniers de l'assemblée, tant ilz poulssoient & estoient repoulsez en s'efforçant de penetrer tousjours plus avant, & s'entremeslants les uns parmy les autres.

XXVI. Sur ces entrefaites Flavius^{*} Flaccus l'un des senateurs monta en lieu dont toute l'assistance le pouvoit voir, & quand il veit que sa voix ne pouvoit arriver jusques aux oreilles de Tiberius, il luy feit signe de la main, qu'il avoit quelque chose d'importance à luy dire. Tiberius commanda incontinent que lon fendist la presse, & ainsi monta Flavius à grande peine, & s'approchant luy dit, qu'en plein senat les plus riches & les plus gros de la ville n'ayans peu induire & attirer le consul à leur intention, avoyent resolu de le tuer eulx mesmes, ayans autour d'eulx grand nombre de leurs suyvans & de leurs serfs armez pour cest effect. Tiberius incontinent declara ceste conspiration à ses amis & adherents, lesquelz ceignirent aussi tost leurs longues robes par dessus, & rompirent les javelines, que portoyent les sergens en leurs mains pour faire retirer

^{*} Mais plutôt Fulvius qui fut consul huit ans après, l'an de Rome 619, prit parti avec Caius Gracchus, & fut tué avec lui l'an de Rome 633.

le peuple, dont ilz prirent les tronçons pour en repoulsér & combattre ceulx qui les assaudroyent, dequoy ceulx qui estoient plus loing s'esbahissoient, & demandoient que cela vouloit dire. Tiberius pour leur monstrier par signe le danger auquel il estoit, touchoit à sa teste avec les deux mains, à cause que lon ne pouvoit pour le grand bruit entendre sa voix.

XXVII. Mais ses adversaires ayans veu ce signe là, s'en coururent viftement au senat crier, que Tiberius demandoit au peuple un diademe & bandeau royal, & que s'en estoit un certain signe que lon l'avoit veu toucher de la main à sa teste. Ce rapport meit la compagnie en grand trouble, & adonc Nasica requit au consul president au senat qu'il voulust secourir la chose publique, & exterminer celuy qui attentoit de se faire tyrân. Le consul luy respondit doucement, qu'il ne commenceroit point à user de force ny de main mise, & qu'il ne feroit mourir aucun citoyen qui n'eust esté jugé premierement & condamné : mais que si le peuple seduit ou forcé par Tiberius ordonnoit chose aucune qui fust contraire aux loix, qu'il ne le recevroit ny ne le garderoit point. Nasica adonc se levant en cholere, « Puis que donc le souverain » magistrat ne fait compte de secourir la chose » publique, ceulx qui voudront conserver l'au-

« thortité des loix , qu'ilz me fuyvent ». Ayant dit ces paroles, il tira le reply de fa robbe dessus fa teste, & s'en alla droit au Capitole, & ceulx qui le fuyvirent entortillerent tous leurs robes à l'entour de leurs bras, chassans & faifans retirer ceulx qu'ilz rencontroyent en leur chemin, combien que peu de gens s'ozassent presenter au devant de telz personnages pour les arrester, à cause que c'estoyent tous les plus dignes & les plus notables hommes de la ville : mais s'enfuyoit tout le monde devant eulx, & en tombant de haste, fouloyent les uns les autres aux pieds. Ceulx qui les fuyvoyent, avoyent apporté de la maison de gros leviers & gros bastons, & en allant prenoyent en leurs mains les esclats & les pieds des tables & des chaires, que la foule du peuple en fuyant renversoit par terre & brisoit, & marchoyent atout le grand pas la part où ilz pensoyent trouver Tiberius, frappans sur ceulx qu'ilz rencontroyent en leur chemin, de maniere qu'en peu d'heure ilz eurent fait escarter la commune, & y en eut de tuez en ceste fuite.

XXVIII. Ce que voyant Tiberius, se voulut aussi sauver de viffesse : mais ainsi qu'il fuyoit, il y eut quelqu'un qui le prit par le bout de sa robe pour l'arrester, & luy la laissant s'enfouit tout en saye, mais en courant il bruncha & tomba sur d'autres qui estoyent tumbez devant luy : &

ainsi comme il se cuidoit relever, le premier qui le frappa, au moins que lon veist apertement, fut l'un de ses compagnons au tribunat, Publius Satureius, qui luy donna d'un pied de selle sur la teste, & le second coup qu'il receut luy fut donné par Lucius Rufus, qui s'en glorifioit, comme s'il eust fait un beau chef d'œuvre. Il mourut en ce tumulte plus de trois cens autres personnes, qui tous furent assommez à coups de bastons & de pierres, sans qu'il y en eust un seul occis de ferrement. Ce fut la premiere sedition entre les citoyens de Rome, qui fut decidée avec meurtre & effusion de sang, depuis que les roys en avoyent esté dechassez : car toutes les autres dissensions du paravant qui n'avoyent point esté legeres ne petites, s'estoyent pacifiées doucement, les deux parts ayans cédé l'une à l'autre, le senat pour la crainte de la commune, & la commune pour reverence du senat : & si semble que Tiberius mesme eust alors facilement cédé s'ilz y eussent procedé par amiable voye de remonstrances : & encore plus tost eust il cédé, quand ilz y fussent allez par voye de faict, sans toutefois tuer ny meurtrir personne : car il n'y avoit pas lors à l'entour de luy plus de trois mille hommes du peuple.

XXIX. Mais il semble que ceste conspiration fut executée à l'encontre de luy, plus par la

haine & rancune que luy portoyent les riches, que pour les autres occasions, qu'ilz faignoient & supposoyent à l'encontre de luy, en preuve dequoy lon peult alleguer la cruauté & inhumanité dont ilz userent encontre son corps mort : car ilz ne voulurent jamais permettre à son frere, qui les en requit, de l'enlever pour l'ensepvelir de nuict, ains le jetterent avec les autres morts dedans la riviere, encote ne fut ce pas tout : car de ses amis, ilz en bannirent les uns sans y garder forme de procès, & feirent mourir les autres sur qui ilz peurent mettre les mains, entre lesquelz fut occis le rhetoricien Diophanes, & un Gaius Billius qu'ilz enfermerent dedans un tonneau avec des serpens & viperes, & le feirent en ce point mourir. Blossius de Cumes fut mené devant les consulz qui l'interroguerent sur ce qui s'estoit fait ; il leur confessa franchement qu'il avoit executé tout ce que Tiberius luy avoit commandé. Et comme Nasica luy demanda, « Et quoy, s'il t'eust commandé d'aller mettre le feu au Capitole » ? il respondit, « Que Tiberius ne luy eust jamais commandé une telle chose ». Et comme plusieurs autres par plusieurs fois recoupassent, luy demandans, « Mais s'il te l'eust commandé » ? « Je l'eusse, » respondit il, fait : car il ne me l'eust point commandé, s'il n'eust esté profitable pour le

« peuple ». Toutefois il se sauva lors, & depuis s'en fuit en Asie devers Aristonicus les affaires duquel estans ruinez, il se tua luy mesme.

XXX. Au demourant, le senat pour contenter & appaiser le peuple de ce qui lors se presentoit, ne s'opposa plus au departement des terres publiques, ains luy permit de substituer un autre commissaire pour cest effect au lieu de Tiberius. Si fut esleu Publius Crassus qui estoit son allié, pource que sa fille Licinia estoit mariée à Gaius Graccus, combien que Cornelius Nepos dit, que ce ne fut pas la fille de Crassus que Gaius espouza, mais celle de Brutus qui triompha des Lusitaniens¹ : toutefois la plus part des historiens le met ainsi que nous l'escrivons. Mais quoy qu'il y eust, le peuple estoit très mal content de ceste mort, & voyoit on evidemment qu'il ne cherchoit & n'attendoit que quelque occasion pour la venger, & desjà menaçoit on Nasica de l'en appeller en justice. A raison dequoy, le senat craignant qu'il n'en eust affaire, ordonna sans qu'il en fust autrement besoing, de l'envoyer en Asie : car le commun peuple ne dissimuloit point sa malvueillance quand il le rencontroit, ains s'irritoit bien aigrement à l'encontre de luy, en l'appellant tyran & meurtrier, excommunié & maudit,

¹ Des Portugais, en qualité de proconsul, l'an de Rome 618.

510 TIBERIUS ET GAIUS.

ayant souillé ses mains du sang d'un magistrat sacré, & dedans le plus saint, le plus devot & le plus venerable temple qui fust en toute la ville, tellement qu'il fut contraint de sortir en fin de la ville, combien qu'il fust obligé pour le deu de son office de faire les principaux & plus grands sacrifices, à cause qu'il estoit le souverain pontife : & allant hors de son pais errant, sans honneur, & avec grand travail, & trouble d'entendement, il mourut bien tost après, non gueres loing de la ville de Pergamum.

XXXI. Et ne se fault pas esbahir si le peuple haïssoit ainsi fort Nasica, attendu que Scipion l'Africain mesme, que le peuple Romain avoit autant & plus aimé qu'il ne fait oncques autre homme, & plus justement, en cuida perdre de tout poinct l'amour & bienvueillance que le peuple luy portoit, pource qu'estant au siege devant Numance, quand il entendit ceste mort de Tiberius, il prononça tout hault ces vers d'Homere :

Que desormais autant en puisse il prendre

A qui voudra telle chose entreprendre.

Avec ce qu'en pleine assemblée du peuple estant interrogé par Gaius & par Fulvius qu'il luy sembloit de ceste mort de Tiberius, il fit une réponse, par laquelle il donna à entendre que

les actions du defunct ne luy plaifoyent point : car depuis cela le peuple le rabroua , & luy rompit le fil de son propos quand il cuida haranguer : ce que jamais au paravant il ne luy avoit fait : & luy auffi se laiffa aller à la cholere , jufques à dire des paroles injurieufes à l'affiftence du peuple.

XXXII. Au refte , Gaius Graccus du commencement , fust ou pource qu'il craignift les ennemis de fon feu frere , ou pource qu'il cherchast les moyens de les faire encore plus haïr au peuple , demoura un temps fans hanter la place en public , & fe teint fans rien entreprendre dedans fa maifon , comme perfonne contente de fe tenir baffement , & qui de lors en avant fe deliberoit de vivre à foy petitement fans plus s'entremettre d'affaire quelconque , de forte qu'il donna occafion à quelques uns de penfer & de dire qu'il n'approuvoit point , ains trouvoit mauvaises les chofes que fon frere avoit mifes en avant : mais il eftoit encore lors bien jeune , par ce qu'il avoit neuf ans entiers moins que fon frere Tiberius , lequel n'avoit pas encore trente ans ¹ quand il fut tué : tourefois avec le temps , il commença petit à petit à faire

¹ Il fut tué fur la fin de l'an de Rome 611 ; il étoit donc né à la fin de l'an 591 , ou au commencement de l'an 592 de Rome , & Gaius l'an 600.

cognoistre ses meurs & sa nature, qui n'estoyent amies des delices ny de paresse, ny subgettes à plaisir, & moins à la convoitise d'amasser : ains s'exercitoit à l'eloquence, & en faisoit provision comme d'ailes, pour puis après se jeter aux affaires de la chose publique, de sorte qu'il estoit tout evident, que quand son temps seroit venu il ne chommeroit pas.

XXXIII. Car comme l'un de ses amis nommé Vectius, eust esté appellé en justice, il prit la charge de le defendre en jugement : auquel le peuple assistant tressaillit & fut tout ravy, en maniere de dire, d'aïse & de joye qu'il eut de le voir & ouyr : & fut trouvé si bien disant, que les autres orateurs ne sembloient qu'enfans auprès de luy. A l'occasion dequoy les riches & les nobles commencerent de rechef à entrer en une nouvelle peur, & murmuroyent desjà fort entre eulx, qu'il le falloit bien engarder qu'il ne parvinst à l'office du tribunat du peuple : & advint de fortune qu'estant esleu questeur, il luy escheut par le sort d'aller avec le consul Orestes ¹ en l'isle de Sardagne, dequoy ses ennemis furent bien joyeux, & luy n'en fut pas marry, comme celuy qui estoit homme de guerre, & non moins exercité aux armes qu'au plaider & à l'eloquence : joinct aussi qu'il re-

¹ L'an de Rome 628.

doubtoit

TIBÉRIUS ET GAIUS. 513

doutoit encore la tribune aux harangues & l'entremise des affaires, & neantmoins ne pouvoit du tout résister à la volonté du peuple & de ses amis qui l'y appelloient : au moyen dequoy il fut bien aise d'avoir occasion legitime de s'absenter pour un temps de la ville en faisant ce voyage, combien que plusieurs soyent d'opinion, que cestuy cy estoit encore plus populaire & plus ambitieux de la faveur & de la bonne grace de la commune que n'avoit esté son frere, toutefois la verité est au contraire : car il fut conduict plus par contrainte au commencement de son entremise des affaires, que par jugement ny de propos delibéré : & escrit l'orateur Cicéron, qu'il avoit resolu de foudrayer toute administration de magistrat, & de vivre personne privée en paix & tranquillité : mais son frere luy apparut en songe, qui l'appellant par son nom, luy dit, « Que diffères tu, mon » frere ? Il n'est possible que tu puisses eschapper, pource qu'une mesme vie & une mesme mort nous est à tous deux predestinée pour » avoir procuré l'utilité du peuple ».

XXXIV. Estant doncques Gaius arrivé en Sardagne, il y fit voir toutes les preuves qu'un homme scauroit faire de sa valeur, & se monstra plus vaillant que nul autre des jeunes hommes de son aage encontre les ennemis, plus

314 TIBERIUS ET GAIUS.

juste envers les subjects, & plus obeïssant envers son capitaine, en honneur qu'il luy rendoit, & en bienveillance qu'il luy portoit : mais en temperance, sobriété & tolerance de labeurs, il surpassa ceulx mesmes qui estoient encore plus aagez que luy. Or fut d'aventure l'hiver fort fascheux & maladif en Sardagne, & manda le capitaine aux villes qu'elles eussent à fournir quelques vestemens pour les soudards : mais elles envoyerent en diligence à Rome supplier le senat, que lon les exemptast de celle charge. Le senat trouva leurs remonstrances raisonnables, & escrivit au capitaine qu'il trouvast autre moyen de revestir ses gens. Le capitaine ne le pouvoit faire autrement, parquoy les soudards ce pendant enduroient beaucoup de mal : mais Gaius alla luy mesme par les villes, & leur allegua tant de belles raisons, que d'elles mesmes elles en envoyerent & secoururent le camp des Romains à ce besoing : ce que ayant esté rapporté à Rome, on interpreta incontinent que c'estoit un commencement de gagner la bonne grace du peuple : ce qui donna bien à penser au senat.

XXXV. Là dessus arriverent d'Afrique des ambassadeurs du roy Mycipsa, lesquelz dirent que leur maistre en faveur & pour l'amour de Gaius Graccus avoit envoyé des bledz à leur

armée en Sardagne : dont les sénateurs furent si despités qu'ilz chasserent les ambassadeurs hors du senat, & ordonnerent que lon y envoyeroit d'autres gens de guerre au lieu de ceulx qui y estoient, mais que Orestes y demoureroit toujours comme capitaine, faisans leur compte que Gaius y demoureroit aussi pour quæsteur : mais luy ces nouvelles ouyes, monta incontinent sur mer, & s'en retourna à Rome en cholere¹. Quand on le veit ainsi de retour à Rome contre l'esperance de chascun, il en fut blasmé, non seulement par ses ennemis, mais aussi par le commun peuple, à qui il sembla estrange qu'il s'en fust revenu avant le capitaine, duquel il estoit quæsteur. Dequoy estant accusé par devant les censeurs, il demanda audience pour s'en justifier : & ayant respondu, renversa tellement les opinions des escoutans, qu'il n'y eut celuy qui ne jugeast qu'on luy avoit fait un très grand tort : car il remonstra qu'il avoit esté douze ans à la guerre, là où les autres n'estoyent contraincts d'y aller que dix : & qu'il avoit demouré quæsteur auprès de son capitaine l'espace de trois ans², là où la loy luy permettoit qu'au bout de l'an il s'en peust retourner : & que luy seul de tous ceulx qui avoyent esté à ceste guerre,

¹ L'an de Rome 631.

² Deux ans seulement suivant Aulu-Gelle.

516 TIBERIUS ET GAIUS.

avoit porté sa bourse pleine , & l'avoit rapportée toute vuide , là où les autres ayans beu le vin qu'ilz y avoyent porté dedans des barrots , les avoyent depuis rapportez tous pleins d'or & d'argent.

XXXVI. Depuis on le voulut encore charger d'avoir esté consentant d'une conspiration qui s'estoit descouverte en la ville de Fregelles². Mais ayant effacé tout souspeçon , & s'estant à pur & à plein justifié de tout , il se meit à demander incontinent l'office du tribunat du peuple , en quoy il eut pour adversaires jurez , tous les hommes de qualité universellement : mais aussi à l'opposite , il eut si grande faveur de la commune , qu'il accourut de toutes les parties de l'Italie gens pour assister à son election , en si grand nombre , que plusieurs ne pouvoyent pas trouver à loger : & n'estant pas la place du champ de Mars assez spacieuse pour contenir une si grande multitude de peuple , il y en avoit qui donnoyent leurs voix de dessus les couvertures & les tuiles des maisons. Si ne peurent les nobles forcer d'autre chose la volonté du peuple , ny rabbatre de l'esperance de Gaius , sinon d'autant que esperant estre le premier tribun , il fut déclaré seulement le quatrieme : mais si tost qu'il fut installé en son magistrat² , il se trouva incon-

² Ville du Latium, qu'Opimius, alors préteur, prit & détruisit.

² L'an de Rome 631.

TIBERIUS ET GAIUS. 3517

tint le premier, pource qu'il estoit autant ou
 plus eloquent que nul autre de son temps, &
 avoit le subject d'un accident, qui luy donnoit
 hardiesse grande de parler, en deplorant la mort
 de son frere : car de quelque matiere qu'il par-
 last, il faisoit tousjours rumber là le propos,
 leur ramenant en memoire les choses passées,
 & leur mettant devant les yeux les exemples
 de leurs ancestres, qui avoyent ancienement fait
 la guerre aux Falisques, à cause d'un Genucius
 tribun du peuple, auquel ilz avoyent dit injure,
 & condamnerent à mourir un Caius Veturius,
 à cause que luy seul n'avoit pas voulu ceder &
 donner lieu à un tribun du peuple passant par
 la place : « Là où ceulx cy, disoit il, en vostre
 » presence & devant voz yeux ont assommé à
 » coups de baston Tiberius mon frere, & en
 » ont trainé le corps mort depuis le mont du
 » Capitole par toute la ville, pour le jetter en
 » la riviere, & quant & luy ont aussi cruelle-
 » ment occis tous ceulx de ses amis, sur qui
 » ilz ont peu mettre les mains, sans y garder
 » aucune forme de justice : & neantmoins par
 » la coustume de tout temps observée en ceste
 » ville de Rome, quand quelqu'un est accusé
 » de crime capital, & qu'il faut de se trouver
 » à l'assignation qui luy a esté donnée, encore
 » envoye lon le matin à la porte de son logis

318 TIBERIUS ET GAIUS.

» une trompette , pour le sommer à son de
 » trompe de comparoir : & n'ont point les juges
 » accoustumé de le condamner , que ceste ceri-
 » monie n'ait esté premierement observée : tant
 » noz predecesseurs ont esté retenus & reservez
 » là où il a esté question de la mort d'un citoyen
 » Romain ».

XXXVII. Ayant donques Gaius par telz
 langages premierement emeu le peuple , car il
 avoit une voix forte & puissante à merveilles , il
 proposa deux loix : la premiere , « Que celuy qui
 » auroit une fois esté depose d'aucun magistrat
 » par le peuple , ne fust plus capable d'en pouvoir
 » tenir d'autre : la seconde , Que si quelque
 » magistrat avoit banny aucun citoyen , sans luy
 » avoir prealablement fait son procès , le jugement
 » & la cognoissance en appartainsst au peuple ».
 Desquelles loix , la premiere notoit d'infamie
 evidemment Octavius , que Tiberius avoit fait
 deposer de son tribumat par le peuple : & l'autre
 touchoit Popilius , lequel estant prateur avoit
 banny les amis de Tiberius : au moyen dequoy
 il n'attendit pas l'issue du jugement , ains s'en
 alla volontairement en exil hors de l'Italie.
 Mais quant à la premiere , luy mesme la revoca
 depuis , disant qu'il donnoit Octavius aux prieres
 de sa mere Cornelia , qui l'en avoit requis , dont
 le peuple fut bien aise , & le luy ostroya , honorant

ceste dame non moins pour le regard de ses enfans , que de Scipion son pere , pource que depuis ayant fait dresser une statue de cuyvre en son honneur , il y feit mettre & graver ceste inscription , Cornelia merè des Gracques. Lon treuve par escript plusieurs propos assez affectez , & sentans trop son vulgaire plaideur , que Gaius dit en sa defense contre quelqu'un de ses ennemis : comme quand il dit , « Ozes tu bien mesdire de » Cornelia , celle qui a enfanté Tiberius » ? Et estant celuy qui en avoit mesdit suspect & noté du peché de Sodomie : « Sur quoy , luy dit il , » prens tu la hardiesse de te comparer à Cornelia ? » as tu enfanté comme elle ? Et toutefois il n'y » a celuy dedans Rome qui ne sçache , qu'elle , » qui est femme , a plus longuement esté sans » homme , que toy qui es homme ». Ainsi estoient picquans & aigres les traicts de Gaius : car on en pourroit extraire beaucoup de semblables de ses escrits.

XXXVIII. Au teste , il meit en avant depuis plusieurs loix pour augmenter la puissance du peuple & diminuer celle du senat : l'une fut touchant le repeuplement de plusieurs citaz , par laquelle il distribuoit toutes les terres communes aux pauvres citoyens que lon y envoyeroit habiter : l'autre portoit , que lon donnast des habillemens aux gens de guerre aux despens de la

chose publique, sans que pour cela leur soude diminuast de rien, & que lon ne peust enroller ny recevoir à la soude citoyen, qui n'eust dix sept ans passez pour le moins. Une autre donnoit pareil droit ès elections des magistrats à tous les alliez & confederez habitans par toute l'Italie, qu'aux propres bourgeois manans & habitans dedans la ville de Rome mesme. Une autre taxoit le prix bien petit, auquel se distribueroit le bled au pauvre peuple : une autre appartenoit à l'institution de ceulx qui pourroyent estre juges, par laquelle il retrenchoit beaucoup de la preminence & autorité du senat, pource que paravant les senateurs estoient seuls juges de tous procès, à l'occasion dequoy ilz estoient grandement honorez & redoubtez du peuple & des chevaliers Romains, & luy y adjoustoit trois cents chevaliers Romains, autant comme il y avoit de senateurs, & feit que les jugemens de toutes causes furent communs entre ces six cents hommes. En faisant passer ceste loy, on dit qu'il observa diligemment toute autre chose, & mesmement ce poinct, que là où tous les autres harengueurs en preschant le peuple se tournoient devers le palais auquel se tenoit le senat, & devers l'endroit de la place qui se nomme Comitium, luy au contraire, commença lors à se tourner en harenguant au dehors devers

L'autre bout de la place, & depuis ce temps là l'observa tousjours soigneusement, sans jamais y faillir, en quoy faisant, par un petit destour & changement de regard seulement, il remua unè très grande chose : car il transféra, par maniere de dire, toute la force de la chose publique du senat au peuple, en rendant le gouvernement, qui paravant estoit en la main de la noblesse, entierement populaire, par enseigner aux orateurs qui proposoyent les matieres en public, que c'estoit au peuple où il falloit viser, & là où il convenoit se adresser, & non pas au senat.

XXXIX. Mais ayant le peuple non seulement receu & approuvé sa loy touchant les jugemens, ains luy ayant davantage donné pouvoir de choisir entre les chevaliers Romains ceulx qu'il vouldroit pour estre juges, il se trouva avoir en main une puissance absoluë, par maniere de dire, tellement que le senat mesme recevoit conseil de luy : aussi luy conseilloit il tousjours & luy mettoit en avant choses appartenantes à sa dignité, comme fut entre autres, le decret qu'il proposa touchant quelques bledz que Fabius vicepræteur avoit envoyez d'Hespagne, qui fut très juste & très honorable : car il suada au senat de faire vendre le bled & en renvoyer l'argent aux villes & communaultez qui l'avoient fourny, & quant & quant d'en faire une reprimende à ce Fabius, pource qu'il rendoit l'empire Romain

322 TIBERIUS ET GAIUS.

odieux & insupportable aux subjects d'iceluy. Ceste proposition luy engendra grande gloire & grande bienvueillance ès provinces sujettes aux Romains. Davantage il meit en avant plusieurs repeuplemens de villes destruites, de faire paver & accoustrer les grands chemins, & bastir de grands greniers pour y faire provision & munition de bledz, de toutes lesquelles œuvres luy mesme entreprenoit la charge & la superintendence de les conduire à chef, ne se lassant point, pour travail qu'il eust, de prouvoir & donner ordre à tant & de si grandes entreprises, ains les achevant toutes avec si grand labeur & si merveilleuse diligence & promptitude, qu'il sembloit qu'il n'en eust qu'une seule à faire, tellement que ceulx mesmes qui le haïssoient & qui le craignoient, s'esbahissoient de voir comment il estoit actif & expeditif en toutes choses.

XL. Le peuple semblablement s'esmerveilleoit aussi à le regarder seulement, voyant tousjours autour de luy une tourbe grande d'ouvriers, manœuvres, ambassadeurs, officiers, gens de guerre, gens de lettres, à tous lesquels il satisfaisoit avec une facilité merveilleuse, retenant tousjours sa dignité, en usant toutefois de courtoisie & d'humanité grande, en s'accommodant particulièrement à chascun d'eulx, de sorte qu'il faisoit trouver ses calumniateurs importuns &

fascheux, quand ilz alloient difans qu'il estoit à craindre, en l'appellant homme violent & insupportable, tant il sçavoit bien gagner la bienvueillance de la commune, estant encore plus populaire en sa conversation & en ses actions, qu'il n'estoit en ses harengues. Mais la charge en laquelle il employa plus de diligence & de sollicitude, fut à dresser & accoustrer les grands chemins, ayant le soing, que la grace & beaulté y fust conjointe avec la commodité : car il les faisoit tirer à doitte ligne à travers les champs solides, & les affermir en les pavant de pierre dure taillée, & les fondant dessus force arene entassée qu'il faisoit conduire sur les lieux. Quand il se rencontroit des vallées & des fondrières que les torrents cavent, il les faisoit combler, ou bien bastir des ponts par dessus de haulteur egale aux deux costez, de sorte que l'ouvrage venoit à se trouver tout aplaný & tout uny au niveau, qui estoit chose belle à voir. Qui plus est, il feit compartir & diviser tous ces chemins par milles, contenant chasque mille environ huit stades, (* qui sont une demie lieuë), mettant au bout de chasque mille pour le marquer une pierre : & si feit encore mettre aux deux orées de ces chemins ainsi pavez deçà & delà d'autres pierres un peu relevées, moins distantes l'une de l'autre, pour

* Ceci n'est point dans le grec. La lieue a 24 stades.

aider les voyageurs à monter à cheval sans avoir besoin de personne qui les montât.

XLI. Pour lesquelles causes , le peuple le magnifiant & hault louant à merveilles , & estant prest à luy en faire toutes demonstrations de bienveillance & d'amour , il dit un jour en haranguant publiquement , qu'il avoit une seule grace à leur demander , laquelle s'il plaisoit au peuple luy octroyer , il se sentiroit entierement satisfait , & s'il la luy refuzoit , il ne s'en plaindroit point autrement. Chascun pensa lors que ce fust le consulat qu'il voulust demander , & s'attendoit tout le monde qu'il deust briguer le consulat & le tribunat tout ensemble : mais quand le jour de de l'election des consulz fut escheut , chascun estant fort attentif à voir qu'il feroit , on fut esbahy que lon le veit descendre sur le champ de Mars , amenant Gaius Fannius avec ses amis pour luy favoriser à la poursuite du consulat. Cela servit rant à Fannius , qu'il en fut promptement esleu consul ¹ , & Gaius fut aussi esleu tribun du peuple pour la seconde fois sans qu'il l'eust demandé ne poursuyvy , mais le peuple le voulut ainsi. Et voyant qu'il avoit le senat pour ennemy déclaré , & que Fannius le consul se monstroient en son endroit froid amy , il recommença de rechef à rechercher la bonne grace

¹ Il fut consul l'an de Rome 632. Voyez les Observations.

du peuple par edicts nouveaux & nouvelles loix, mettant en avant que lon envoyast de pauvres bourgeois pour repeupler les villes de Tarente & de Capouë, & que lon donnast droit entier de bourgeoisie Romaine à rous les peuples Latins.

XLII. Ce que voyant le senat, & craignant qu'il ne devinst à la fin si puissant, qu'il n'y eust plus d'ordre de luy pouvoir resister, delibera d'essayer un nouveau & non accoustumé moyen de divertir la faveur du peuple, en luy gratifiant, & luy concedant des choses qui n'estoyent point du tout raisonnables : car il y avoit l'un des compagnons de Gaius en l'office du tribunat nommé Livius Drusus, personnage aussi bien né & aussi bien nourry, que nul autre qui fust de son temps dedans Rome, & qui ja faisoit teste à ceulx qui pour leur richesse & pour leur eloquence estoyent les plus estimez, & qui avoyent plus de credit & d'autorité en l'administration de la chose publique. Les principaux hommes du senat s'adresserent à luy, le prians de se vouloir bender avec eulx, & s'attacher à Gaius, non point en essayant de forcer le peuple, ny de contrevénir à sa vouldté, ains à l'opposite en luy gratifiant, & luy concedant des choses, pour ausquelles contrarier il eust esté plus honeste d'encourir sa male grace. Livius offrant son tri-

bunat pour servir en telles choses au bon plaisir du senat, proposa des loix qui n'estoyent ny au profit ny à l'honneur de la chose publique, & qui ne tendoyent à autre fin qu'à faire à l'envy, & à surmonter Gaius à force de flatter le peuple, & de luy agréer & complaire, ne plus ne moins que ceulx qui font jouer leurs comedies pour luy donner du passetemps.

XLIII. En quoy ceulx du senat monstroient bien evidemment que les choses que Gaius mettoit en avant, ne leur desplaïsoient pas tant, comme ilz desiroient le ruiner, & luy rabbatre son credit à quelque prix que ce fust : car là où Gaius ne proposoit que le repeuplement de deux villes, & y vouloit envoyer des plus honestes citoyens, ilz crioient contre luy, qu'il corrompoit la commune : & au contraire ilz favorisoient à Drusus, qui mettoit en avant, que lon en repeuplast douze, & qui vouloit que lon envoyast en chascune trois mille des plus pauvres bourgeois : & au lieu qu'ilz haïssoient Gaius, lequel avoit chargé de quelque rente annuelle, les pauvres bourgeois à qui il avoit departy les terres publiques : Livius, au contraire, leur estoit agreable, qui ostoit ceste rente à ceulx à qui il en departoit, & les leur baillant toutes franchises & quittes. Qui plus est, Gaius leur desplaïsoit, pource qu'il donnoit à tous les Latins pareil droit

de voix ès elections des magistrats qu'avoient les naturelz Romains : & neantmoins comme Drusus eust mis en avant une ordonnance, que dorenavant il ne fust plus loisible à capitaine Romain, de faire battre & fouetter de verges à la guerre un soudard Latin, ilz en trouverent l'edict bon, & le favoriserent : car Livius à chasque loy qu'il propoisoit, disoit tousjours en ses harengues qu'il le faisoit par l'avis du senat, lequel avoit soing du bien du pauvre peuple, & n'y eut rien en toute son administration qui fust utile ny profitable à la chose publique, que cela, à cause que le peuple en devint plus doux vers le senat, & que là où le populaire au paravant haïssoit & avoit pour suspects tous les principaux hommes d'iceluy, Livius esteignit toute celle malvueillance quand le peuple veit que tout ce qu'il propoisoit, estoit en faveur & au profit du commun peuple du consentement & à la suscitation du senat. Mais ce qui faisoit encore plus croire que Drusus alloit droittement & justement en besongne, & qu'il ne visoit qu'au bien du peuple seulement, estoit qu'il ne mettoit jamais rien en avant de soy, ny pour soy : car en tous les repeuplemens de villes, dont il fut autheur, il y envoya tousjours d'autres commissaires, ausquelz il en feit deleguer la charge, & ne voulut jamais avoir maniement d'argent :

§ 28 TIBERIUS ET GAIUS.

là où Gaius se faisoit commettre la plus part de toutes telles administrations , mesmement des principales & plus grandes.

XLIV. Et comme Rubrius ¹ un autre tribun du peuple eust mis en avant que lon rebastir & repeuplast Carthage, laquelle avoit esté route rasée & destruite par Scipion, il escheut par le sort à Gaius d'en estre commissaire : à l'occasion dequoy montant sur mer, il passa en Afrique. Drusus ce pendant faissant l'opportunité de son absence, passa encore plus outre à s'insinuer en la bonne grace de la commune, mesmement par ce qu'il accusoit & chargeoit Fulvius qui estoit l'un des plus grands amis de Gaius, que lon avoit esleu commissaire quant & luy, pour faire le departement des terres entre les bourgeois, que lon envoyoit à ce nouveau repeuplement. Il estoit homme seditieux, & pour ceste cause notoirement haï & mal voulu du senat : mais encore estoit il aussi suspect à ceulx qui tenoyent le party du peuple, que sous main il emouvoit les alliez, & sollicitoit secrettement les peuples de l'Italie à se rebeller: toutefois on n'en avoit point de preuve suffisante, ny moyen de le verifier contre luy, sinon d'autant que luy mesme en faisoit foy, pource qu'il monstroic

¹ Le pere Pétau place donc mal le rétablissement de Carthage à l'an de Rome 631. Il tombe ici sur l'an 632.

avoir mauuaife volonté, & qu'il luy ennuyoit de voir les choses en paix & en repos. Cela fut l'une des principales causes de la ruine de Gaius, pource que sur luy se deriva partie de la haine que lon portoit à ce Fulvius. Et quand Scipion l'Africain¹ fut un matin trouvé tout roide mort en sa maison, sans aucune cause apparente dont peust estre procedée ceste mort si soudaine, sinon que lon apperceut dessus le corps quelque marque de coups orbes que lon luy avoit baillez, & de la violence qu'on luy avoit faite, ainsi comme nous avons escrit en sa vie, la plus part de la suspicion en fut jettée sur ce Fulvius, pource qu'il estoit son ennemy mortel, & que le jour mesme il avoit eu de grosses parolles avec luy dedans la tribune aux harengues : mais aussi en fut Gaius mesme aucunement souspeçonné : tant y a que ce cas si enorme commis en la personne du premier & plus digne personnage de Rome, ne fut aucunement vengé, ny n'en feist on inquisition quelconque, pource que la commune empescha que le procès & jugement n'en prist traict, craignant que Gaius ne s'en trouvast coupable, si lon en enqueroit à bon esciant, mais cela fut quelque temps au paravant.

XLV. Au reste, Gaius estant lors en Afrique à faire le repeuplement de Carthage, la-

¹ L'an de Rome 625.

530 TIBERIUS ET GAIUS.

quelle il surnomma Junonia , lon dit qu'il luy advint plusieurs signes & presages sinistres : car le baston de la premiere enseigne y fut rompu par la violence du vent poulfant d'un costé, & la resistance du portenseigne qui la teint roide de l'autre : & y eut aussi un tourbillon de vent, qui emporta les sacrifices estans dessus les autelz, & les jeta hors du pourpris que lon avoit trassé pour rebastir la ville : qui plus est, les loups en vindrent arracher les marques que lon y avoit plantées pour borner le pourpris, & les emporterent au loing. Mais nonobstant tout cela, Gaius ayant disposé & ordonné toutes choses en l'espace de soixante & dix jours, s'en retourna incontinent à Rome, pource qu'il eut nouvelles que Fulvius estoit fort pressé & persecuté par Drusus, & que les affaires avoyent necessairement besoing de sa presence, à cause que Lucius Hostilius grand partisan de la noblese, & homme qui avoit bon credit au senat, ayant l'année precedente esté debouté du consulat par la menée de Gaius, qui avoit fait elire Faninius, s'attendoit bien de l'estre à tout le moins celle année, pour le grand nombre de gens qui luy favorifoyent : & s'il y pouvoit parvenir, il avoit bien delibéré de desarçonner Gaius, de tant plus mesmement que son credit & la grace qu'il souloit avoir envers la commune, com-

menceoit, par maniere de dire, à se fener, à cause que le peuple estoit desja comme saoul de telles inventions que les sienes, pource qu'il y en avoit plusieurs qui en proposoyent de semblables pour aggreer au peuple, y accordant & consentant le senat volontairement.

XLVI. Retourné qu'il fut à Rome, il changea de maison, & au lieu qu'il demouroit paravant au mont Palatin, il s'alla tenir au dessoubz de la place, pour se monstrier en cela plus populaire, à cause qu'il y avoit en ce quartier là beaucoup de menues gens & de basse condition: puis il proposa le reste de ses loix: pour les faire passer & autoriser par les voix du peuple, s'estant amassé pour cest effect grand nombre de peuple de toutes parts des environs de Rome: mais le senat persuada au consul Fannius de faire faire commandement, que tous ceulx qui n'estoyent point naturelz Romains, manans & habitans dedans la ville mesme, eussent à vuidier de Rome, & fut faite une criée bien estrange & sans exemple, que nul allié ny confederé ne se trouvast pour quelques jours dedans Rome: mais au contraire Gaius meit es lieux publics une affiche, par laquelle il blasmoit le consul d'avoir fait publier une si inique proclamation, & promettoit aux alliez & confederéz de les secourir, s'ilz vouloyent demourer

532 TIBERIUS ET GAIUS.

contre le mandement du consul : ce que toutes-fois il ne feît pas , ains voyant que les sergens de Fannius trainnoient en prison un de ses hostes & amis , il passa oultre sans faire semblant de rien , & ne le secourut point , fust ou pource qu'il craignist d'esprouver son credit envers le peuple , lequel s'en alloit passant , ou pour ce qu'il ne voulust pas , comme il disoit , commencer à donner occasion de venir aux mains , & d'attacher quelque escarmouche à ses malvueillans , qui ne demandoient autre chose. Davantage il advint qu'il eust different & querelle contre ses compagnons mesmes pour une telle occasion : le peuple devoit avoir le passe temps de voir combattre des escrimeurs à oultrance dedans la place mesme , & y eut plusieurs des officiers qui pour voir l'esbatement feirent faire des eschafaux tout alentour , que lon louoit pour de l'argent. Gaius leur feist commandement de les oster , à fin que sans rien payer les pauvres peussent voir les jeux de ces lieux là. Personne d'eux n'en voulut rien faire , & luy attendit jusques à la nuit de devant les jeux , en laquelle prenant tous les ouvriers & manœuvres qu'il avoit sous luy , il alla abbatre tous leurs eschafaux , de maniere que la commune le lendemain eut la place toute vuide , pour regarder les jeux à son aise , dont le peuple luy sceut bon gré , &

l'en estima homme de cuer. Mais ses compagnons luy en voulurent grand mal, comme à un audacieux & temeraire : & semble que cela fust cause de le faire debouter d'un troisieme tribunat, combien qu'il eust le plus grand nombre des voix en sa faveur, par ce que ses compagnons, en vengeance du tour qu'il leur avoit fait, en feirent injustement & malicieusement une faulse relation : toutefois cela n'est pas du tout certain.

XLVII. Mais bien est il vray qu'il fut fort marry de ce rebut, & treuve lon qu'il dit un peu trop arrogamment à ses ennemis qui s'en rioient, & s'en mocquoyent de luy, qu'ilz rioient un ris Sardonien, ne cognoissans pas de quelles tenebres ses actions les avoyent enveloppez. Au reste ses contraires ayans installé Opimius au consulat ¹, ilz commencerent incontinent à effacer plusieurs des loix de Gaius, comme entre autres celle du repeuplement de Carthage, cherchans tous moyens de l'irriter, à fin que luy leur donnast quelque occasion de courroux pour le tuer : toutefois il endura tout en patience du commencement : mais ses amis à la fin, mesmement Fulvius, l'aiguillonnerent tant, qu'il se remeit de rechef à amasser gens pour faire teste au consul : à quoy lon dit que Cornelia mesme

¹ L'an de Rome 633.

334 TIBERIUS ET GAIUS.

sa mere le seconda , louant secrètement bon nombre d'e'rangers qu'elle envoya dedans Rome comme si c'eussent esté des moissonneurs , & que c'est ce qu'elle entend soubz couvertes paroles ès epistres qu'elle escrit à son filz en maniere de jargon : toutefois il y en a d'autres qui tiennent au contraire, qu'elle fut fort marrie de ce qu'il se meit à faire de telles choses. Quand vint doncque le jour assigné , auquel on devoit proceder à la rescision de ses loix, l'un & l'autre de grand matin se saisit du Cápitole , & après que le consul y eut sacrifié , l'un des sergens du consul , nommé Quintus Antyllius , portant les entrailles des hosties immolées , dit à Fulvius & aux autres de sa ligue qui estoient autour de luy. « Faittes place aux gens de bien , mauvais citoyens que vous estes ». Et y en a qui disent davantage , qu'avec ces paroles injurieuses là , il leur tendit encore le bras nud en une façon deshoneste , pour leur faire honte : à raison dequoy il fut par eulx occis sur le champ à coups de grands poinçons à escrire , qu'ilz avoyent expressement fait faire à ceste intention. Si se trouva la commune troublée de ce meurtre , & les chefs des deux parts diversement affectionnez , pource que Gaius en fut fort marty , & en tenfa bien aigrement ceulx qui estoient auprès de luy , disant qu'ilz avoyent donné occasion à leurs en-

nemis, qui ne demandoient autre chose, de s'attacher à eulx : & Opimius, au contraire, prenant cest anse, s'en esleva, & se meit à emouvoir & inciter le peuple d'en faire la vengeance : toutefois sur l'heure il survint une pluye qui les separa.

XLVIII. Et le lendemain le consul ayant assemblé le senat au point du jour, ainsi comme il despeschoit affaires au dedans, il y en eut d'autres qui prirent le corps d'Antyllius, qu'ilz meirent tout nud dessus un liêt, & le porterent à travers la place, comme ilz avoyent paravant projeté entre eulx, jusques devant la porte du senat, là où ilz commencetent à faire des regrets & lamentations, sachant bien Opimius que c'estoit, mais feignant de n'en rien scavoir & de s'en esbahir, de maniere que les senateurs sortirent dehors pour voir que c'estoit, & trouvant ce liêt emmy la place, se prirent les uns à desplorer le trespasé, les autres à crier que c'estoit un cas trop indigne, & qu'il ne falloit nullement endurer : mais, au contraire, cela renouvella la haine & le courroux du peuple alencontre de la mauvaistié des nobles ambitieux, lesquelz ayans eulx mesmes occis Tiberius Gracchus qui estoit Tribun, & dedans le Capitole mesme, en avoyent encore jetté le corps en la riviere, là où ilz faisoient monstre honorable.

ment en public au milieu de la place du corps d'un sergent Antyllius, lequel à l'adventure avoit esté injustement occis, mais pour le moins avoit il luy mesme donné la cause à ceulx qui le frapperent, de luy faire ce qu'il souffrit : & estoit lors tout le senat alentour de son liét à deplorer la mort & honorer le convoy des funeraillles d'un homme mercenaire, pour irriter le monde à occire encore celuy qui seul estoit demouré des protecteurs & defenseurs du peuple.

XLIX. Cela fait, ilz retournerent de rechef au dedans, là où ilz feirent un decret, par lequel ilz donnerent pouvoir & puissance extraordinaire au consul Opimius, de prouvoir par main souveraine au salut de la chose publique, preserver la ville, & exterminer les tyrans. Ce decret conclud & arresté, le consul commanda incontinent aux senateurs assistans qu'ilz allassent prendre leurs armes : & ordonna aux chevaliers, que le lendemain matin chascun d'eulx eust à amener quant & soy deux serviteurs armez : alencontre dequoy Fulvius se prepara aussi & assembla de la commune : & Gaius s'en retournant de la place, s'arresta devant l'image de son pere, & la regarda d'un œil fiché sans mot dire, seulement se prit il à plorer, & jetant un grand soupir passa oultre. Cela emeut à grande compassion le peuple qui l'apperceut :

tellement qu'ilz alloyent difans entre eulx, qu'ilz estoient bien lasches de faillir au besoing & abandonner un tel personnage. Si s'en allerent en sa maison, là où ilz demourerent toute la nuit à faire le guet devant sa porte, non pas à la façon que faisoient ceulx qui gardoyent Fulvius, lesquelz passerent toute la nuit à boire & à yvrongner, à crier & à bruire, s'estant Fulvius enyvré luy mesme le premier, qui disoit & faisoit plusieurs choses malseantes & convenables à la dignité où il estoit. Car au contraire, ceulx de Gaius estoient en dueil; sans mener bruit, ne plus ne moins qu'en une calamité publique de leur país, & devisoyent entre eulx de ce qui estoit pour en advenir, veillans & dormans les uns après les autres à leur tour.

L. Quand le matin fut venu, ceulx de Fulvius l'esveillerent qu'il dormoit encore fort ferré pour le vin qu'il avoit beu la nuit, & s'atmerent des despouilles des Gaulois pendues alentour des parois de sa maison, les ayant desfaicts en bataille l'année qu'il avoit esté consul, & avec grands cris & fieres menaces s'en allerent occuper le mont Aventin : mais Gaius ne se voulut point armer, ains sortit de sa maison en robe longue, comme s'il eust voulu aller simplement sur la place selon qu'il estoit couf-

tumier, excepté qu'il avoit une courte dague
 ceinte par dessous sa robe. Ainsi comme il
 vouloit sortir de son logis, sa femme l'arresta
 à la porte, & le tenant d'une main, & un sien
 petit enfant de l'autre, elle luy dit, « Helas !
 » Gaius, tu ne vas pas maintenant comme tu
 » foulois, tribun du peuple sur la place pour
 » prescher le peuple, ny pour mettre en avant
 » des loix nouvelles, ny ne vas point à une
 » guerre honeste, à fin que si d'aventure il t'y
 » advenoit ce qui est ordinaire & commun à
 » tous hommes, à tout le moins je peusse por-
 » ter le deuil de ta mort avec honneur : ains te
 » vas exposer aux meurtriers homicides qui ont
 » occis ton frere, & encore y vas tu sans ar-
 » mes, comme en intention de souffrir plus tost
 » que d'y faire aucune chose : mais ta mort ne
 » portera aucune utilité à la chose publique :
 » pource que ce qui est le pire, est ores le plus
 » fort, attendu que les jugemens se font desjà
 » avec violence à l'espée. Si ton frere eust esté
 » tué par les ennemis devant la ville de Nu-
 » mance, au moins nous en eust on rendu le
 » corps pour l'ensepulturer : mais à l'aventure
 » fauldra il que j'aïlle tantost moy mesme sup-
 » plier la riviere ou la mer de rendre ton corps
 » que lon aura aussi jetté dedans : car quelle
 » fiance pourroit on plus avoir aux loix ny aux

« dieux , depuis que Tiberius a esté tué ».

LI. Ainsi comme Licinia faisoit ces piteuses plaintes , Gaius se tira tout doucement d'entre ses bras , & s'en alla sans luy respondre rien avec ses amis : & elle le cuidant reprendre par sa robe tumba tout de son long par terre , là où elle demoura toute estendue , sans parler , assez longuement , jusques à ce que ses serviteurs l'enleverent toute esvanouye & pasmée , & la porterent à son frere Crassus. Au demourant Fulvius , quand tous ceulx de leur part furent assemblez , à la persuation de Gaius , envoya le plus jeune de ses enfans , qui estoit un fort beau petit garçon , avec un caducée en sa main , qui est une verge de herault portant sauvegarde. Cest enfant se presentant honestement , en humilité grande , les larmes aux yeux , devant le consul & le senat , leur porta paroles de reconciliation , & y avoit beaucoup des assistans , qui furent d'avis que lon y devoit entendre : mais Opius luy feit responce , qu'il ne falloit point envoyer de messagers pour cuider par belles paroles gagner le senat , ains estoit besoing qu'ilz y vinssent eulx mesmes en personnes , se presenter comme subjects & criminelz , à la justice , & en ceste maniere requerir pardon ; & tascher à amollir le courroux du senat. Et au demourant feit defense au jeune garçon qu'il ne

revinst plus devers eulx, sinon à la condition qu'il luy avoit prescrite. Gaius, à ce que lon dit, y voulut bien aller pour faire ses remonstrances au sénat, mais les autres ne voulurent pas qu'il y allast : au moyen dequoy Fulvius y renvoya encore de rechef son filz pour leur tenir les mesmes propos que devant. Mais Opimius, qui ne demandoit qu'à combattre, feit incontinent prendre le jeune garson, & le baillant en garde, marcha tout aussi tost contre Fulvius avec bon nombre de gens de pied bien armez, & de gens de traiçt Candiors, qui à coups de traiçt feirent plus de dommage, & troublèrent plus les adversaires que nulle autre chose, de maniere qu'ilz se tournerent en peu d'heure tous en fuite, & se jetta Fulvius dedans une meschante estuve, dont lon ne faisoit plus de compte, là où estant trouvé un peu après, il fut occis avec son filz aîné.

LII. Quant à Gaius, il ne combatit point, ains se tourmentant & se passionnant de voir un si sanglant desordre, se retira dedans le temple de Diane, là où il se voulut luy mesme defaire, n'eust esté que ses plus feaux amis, Pomponius & Licinius l'en engarderent : car ces deux là se trouvant lors auprès de luy, luy osterent son espée, & luy conseillèrent de s'en fouir. Et là lon dit qu'il se mit à genoux, & que tendant

ses deux mains jointes à l'image de la deesse ; la pria pour vengeance de ceste ingratitude & de ceste trahison du peuple , que jamais il ne sortist de servitude : car la commune , ou la plupart d'icelle , tout ouvertement tourna sa robbe ; quand ilz entendirent crier à son de trompe , que lon pardonnoit à tous ceulx qui se tourneroient. Ainsi Gaius s'estant mis à fouir , ses ennemis le poursuyvirent de si près , qu'ilz l'attaquirent dessus le pont de bois , là où deux de ses amis qui l'accompagnoient , s'arrestèrent pour faire teste aux poursuyvans , & luy dirent qu'il gaignast le devant ce pendant qu'ilz combatroyent au devant du pont : comme ilz feirent , si bien qu'il ne passa personne par dessus le pont jusques à ce qu'ilz eurent esté tous deux tuez. Il n'y eut homme qui s'en fouist quant & luy , sinon un de ses serviteurs , qui se nommoit Philocrates : car tout le monde l'enhortoit assez & luy conseilloit , comme s'il eust esté en un jeu de prix , où lon encourage ceulx qui y combattent , mais personne ne mettoit la main à l'œuvre pour le secourir , ny ne luy presentoit un cheval , combien qu'il en demandast assez , à cause qu'il voyoit ses ennemis qui le poursuyvoient de bien près : mais il les devancea de tant , qu'il eut loisir de se jeter dedans un petit boccage qui estoit consacré aux Furies , là où

342 TIBERIUS ET GAIUS.

son serviteur Philocrates le tua, & se tua puis après aussi luy mesme dessus luy¹. Toutefois les autres escrivent, que & le maistre & le serviteur furent tous deux atteints & pris encore vivans : mais que le serviteur embrassa si estroitement son maistre, que nul des ennemis ne le peut frapper, que lon ne le tuast luy mesme le premier, de plusieurs coups qu'on luy tira.

LIII. Si y eut un des meurtriers, qui couppa la teste à Gaius pour la porter au consul : mais un des amis d'Opimius, qui se nommoit Septimuleius, la luy osta par le chemin, pource qu'avant le combat il avoit esté crié à son de trompe, que qui apporteroit les testes de Fulvius & de Gaius, on luy payeroit autant pesant d'or : parquoy ce Septimuleius la porta fichée au bout d'une javeline à Opimius, & fut apportée une balance pour la peser, où lon trouva qu'elle pesoit dix sept livres deux tiers, pource que Septimuleius oultre le peché de l'homicide y avoit encore adjousté ceste meschanceté, qu'il en avoit tiré toute la cervelle, & y avoit mis du plomb fondu au lieu. Ceux qui apportèrent la teste de Fulvius, pource que c'estoyent gens de basse & vile condition, n'eurent rien. Les corps de ces deux & des autres adherents aussi, qui se trouverent jusques au nombre de trois mille morts,

¹ L'an de Rome 633.

TIBERIUS ET GAIUS. 543

furent tous jettez dedans la riviere , leurs biens confisquezz , & defendu à leurs veufves de porter le dueil de leur mort : qui plus est , ilz feirent perdre à Licinia femme de Gaius , son douaire : mais encore se porterent ilz plus cruellement & plus inhumainement envers le jeune filz de Fulvius , lequel n'avoit ny levé les mains , ny ne s'estoit trouvé au combat contre eulx , ains estoit allé pour parler d'appoinctement avant le combat , & l'ayans fait lors retenir prisonnier , le feirent depuis mourir après la bataille.

LIV. Toutefois ce qui greva & offensa encore plus le peuple , que tout cela , fut le temple de Concorde qu'Opimius fait bastir , pource qu'il sembloit qu'il se glorifiast , & que par maniere de dire , il triomphast pour avoir fait mourir tant de citoyens Romains. Et pourtant y en eut il qui escrivirent la nuit au dessous de l'inscription de ce temple ces vers ,

Un furieux acte & forfait ,
Le temple de Concorde a fait.

Cestuy Opimius fut le premier à Rome qui en estat de consul usurpa la puissance absoluë de dictateur , & qui condamna sans forme de procès trois mille citoyens Romains , oultre Fulvius Flaccus , personnage consulaire , & qui avoit eu l'honneur du triumphe , & Gaius Graccus jeune

homme, qui surpassa en vertu & en reputation tous ceulx de son aage : & neantmoins ne se peut Opimius garder d'estre concussionnaire & larron : car ayant esté envoyé en ambassade devers Jugurtha le roy de Numidie¹, il se laissa corrompre par argent : dequoy estant appellé en justice, il en fut très ignominieusement convaincu & condamné : au moyen dequoy il acheva ses jours avec ceste note d'infamie, haï, moqué & injurié de tout le peuple, lequel sur le faict de la desconfiture se porta bien laschement vers ceulx qui combatoyent pour sa querelle.

LV. Mais bien tost après donna à cognoistre combien il regrettoit ces deux freres Gracques ; pource qu'il leur feit faire des statues, & voulut qu'elles fussent dressées en lieu public & honorable, consacrant les lieux où ilz avoyent esté tuez : & y avoit plusieurs personnes qui leur offroyent des premiers fruiçts & fleurs que portent les saisons, & y alloient faire leurs prieres & oraisons à genoux, ne plus ne moins que ès temples des dieux. Leur mere Cornelia, ainsi que lon escrit, porta constamment & magnaniment ceste calamité : & quant aux chapelles que lon bastit & consacra aux lieux où ilz avoyent esté tués, elle dit seulement qu'ilz avoyent telles

¹ Quelques années après. Voyez Salluste, chap. xvi.

sepultures qu'ilz avoyent meritées : mais depuis elle se teint presque tousjours auprès du mont de Misene sans rien changer de sa maniere de vivre , car elle avoit beaucoup d'amis : & pource qu'elle estoit dame honorable , aimant à recevoir & traiter les estrangers , elle tenoit ordinairement bonne table : au moyen dequoy elle avoit tousjours autour d'elle compagnie de Grecs & de gens de lettres , & n'y avoit roy qui ne receust d'elle , & qui ne luy envoyast aussi des presens. Si prenoient grand plaisir ceulx qui l'alloyent visirer & qui la hantoyent , à luy ouir compter les faicts & la maniere de vivre de son pere Scipion l'Africain : mais encore s'esmerveilloyent ilz davantage de luy ouir reciter les actes & la mort de ses enfans , sans en jeter larme d'œil , & sans autrement en faire des regrets , ny en mener dueil , non plus que si elle eust racompté quelque ancienne histoire à ceulx qui les luy demandoient , tellement qu'il y eut quelques uns qui escrivirent , que la vieillesse , ou bien la grandeur de ses malheurs , luy avoyent troublé le sens , & hebeté le sentiment de douleur : mais eulx mesmes estoyent insensés quand ilz disoyent cela , n'entendans pas combien l'estre bien né & bien nourry sert aux hommes à constamment supporter une douleur , & que souvent la fortune est bien plus forte que la vertu ,

546 TIBERIUS ET GAIUS.

laquelle veult garder tous les poinçts du devoir : mais toutefois elle ne luy peult oster la confiance de porter, en tumbant, patiemment son adverfité.

LA COMPARAISON

DE TIBERIUS ET GAIUS AVEC AGIS ET CLEOMENES.

MAIS estans desormais arrivez à la fin, il ne reste plus que de comparer & de conferer ces vies ensemble, en les mettant l'une devant l'autre. Quant est doncques aux deux Gracques, ceulx mesmes qui les haïssoient le plus, & qui en disoient au demourant tous les maulx du monde, n'ozèrent oncques nier qu'ilz ne fussent mieulx nez à la vertu, que nuls autres Romains de leur temps, & qu'ilz n'eussent aussi bien esté eslevez & nourriz : mais il semble que la nature fut encore plus forte en Agis & en Cleomenes : pource qu'ayans esté mal nourriz & eslevez en des meurs & façons de vivre, qui de pieça avoyent jà corrompu les plus anciens, neantmoins ilz se monstrent eulx mesmes les premiers guides & maistres de sobriété, temperance & simplicité. Davantage ceulx là ayans vescu du temps que Rome estoit en sa plus claire &

plus grande dignité, & lors que y regnoit plus le zele de toutes belles & bonnes choses, ilz eurent, par maniere de dire, honte d'abandonner la succession de vertu qu'ilz avoyent comme hereditaire par les mains de leurs ancestres : & ceulx cy estans nez de peres qui avoyent eu voulunté toute contraire, & ayans trouvé leur país corrompu & malade, n'en furent point pour cela plus mouffes à chercher les moyens de bien faire : & puis le plus grand los que lon donne aux Gracques, d'abstinence de ne prendre point argent, est qu'en tous leurs magistrats & en toutes leurs entremises des affaires publiques, ilz eurent tousjours les mains nettes, & ne ptirent oncques rien injustement : là où Agis se fust courroucé si on l'eust loué de ne prendre rien de l'autrui, attendu que de luy mesme il met en commun, & donna à ses citoyens tout son bien, qui monroit en argent comptant seulement ¹ à six cents talents. Par où lon peut jager, combien il estimoit estre grief péché de gaigner injustement, puis qu'il estimoit que c'estoit une espece d'avarice, que de posseder justement plus que les autres.

II. Au demourant, il y avoit bien difference de grandeur entre les innovations, que les uns

¹ Trois cents soixante mille escus. *Amys.* 2,801,250 livres de notre monnoie.

348 TIBERIUS ET GAIUS.

& les autres ozerent mettre en avant : car les actions des deux Romains estoient accoustre les grands chemins , rebastir ou repeupler des villes : & le plus magnanime faict de Tiberius fut , avoir ramené en commun les terres publiques ; & de son frere Gaius fut , d'avoir mélé les jugemens , en adjoustant aux sénateurs trois cents chevaliers Romains , qui auroient puissance de juger : là où Agis & Cleomenes ayans opinion que vouloir corriger de petites fautes , & y remedier par le menu , seroit autant comme couper une des testes de l'hydre , ainsi que dit Platon , dont il en revenoit sept au lieu d'une , entreprirent un remuement & une nouvellété , qui pouvoit à un coup exterminer & desraciner tous les maux qui estoient en leur païs , ou pour parler plus veritablement , qui pouvoit oster l'alteration & le defreglement qui avoit introduit tout mal & tout vice en leur chose publique , pour remettre la ville de Sparte en son propre & ancien estat.

III. Car encore peut on dire cela du gouvernement des Gracques , que les principaux personnages & les plus gens de bien de Rome furent contraires à leurs desseings : là où en ce qu'Agis attenta , & que Cleomenes acheva , ilz avoyent le plus beau & le plus magnifique subject du monde , qui estoient les anciennes loix & ordon-

hances de Sparte , touchant la temperance & l'egalité , les unes instituées jadis par Lycurgus , les autres confirmées par Apollo.

IV. Qui plus est , par les nouvellerez de ceulx là , Rome n'en devint point plus grande qu'elle estoit auparavant : là où de ce que Cleomenes feit , la Grece en peu de temps veit la ville de Sparte commandant à tout le reste du Peloponese , & combatant à l'encontre de ceulx qui pour lors estoient les plus puissans de la Grece , pour la principaulté d'icelle , dont le but & la finale intention estoit vuider & delivrer la Grece des armes des Gaulois & des Esclavons , pour la remettre sous l'honesté gouvernement des descendans de Hercules.

V. Encore me semble il que leur mort monstre quelque difference de leur vertu : car ceulx là combatans contre leurs propres citoyens , furent occis en fuyant : & de ceulx cy , Agis pour n'avoir voulu faire mourir pas un de ses citoyens , fut occis luy mesme presque volontairement : & Cleomenes se sentant injurié & oultragé , se meit en devoir de se venger , l'occasion ne luy permettant pas de le pouvoir faire , il se tua luy mesme hardiment.

VI. Mais au contraire aussi peult on alleguer , que Agis ne feit oncques acte de capitaine ny d'homme de guerre , à cause qu'il fut tué avant

Mm 3

que d'en pouvoir faire : & aux victoires de Cleomenes , qui furent belles & en bon nombre , on peult opposer la prise de la muraille de Carthage , sur laquelle Tiberius monta le premier , qui ne fut pas petit exploit , & l'appointement qu'il feit devant Numance , par lequel il sauva vingt mille combatans Romains , qui n'auoyent autre moyen de sauuer leurs vies : & Gaius en celle mesme guettre devant Numance , & depuis en Sardagne , feit plusieurs beaux actes de prouesse , tellement qu'il est tout certain qu'ilz eussent esté comparables aux plus excellents capitaines Romains , si on ne les eust si tost tuez.

VII. Au reste , quant aux actions civiles , il semble que Agis s'y prit trop froidement , s'estant laissé abuser à Agesilaus , & ayant fraudé ses pauvres citoyens du departement des terres qu'il leur auoit promis : brief à faulte de hardiesse , pource qu'il estoit trop jeune , il laissa les choses imparfaittes qu'il auoit projectté de faire : & à l'opposite Cleomenes proceda un peu trop rudement & violement à la mutation du gouvernement de la chose publique , en tuant meschamment les ephores , lesquelz il pouoit gaigner facilement , ou estre le plus fort en armes : car ce n'est fait ny en sage medecin ny en bon administrateur d'estat politique , de mettre la main au fer , sinon en extreme necessité ;

quand il n'y a point d'autre remede : & est faulte de suffisance en l'un & en l'autre , mais pis en l'un , pource que l'injustice y est conjointte avec la cruaulté : là où des Gracques , ny l'un ny l'autre ne commença à mettre les mains au sang de leurs citoyens , ains dit on que Gaius quoy qu'on frappast sur luy , jamais ne se voulut mettre en defense , & que là où il estoit très vaillant en bataille les armes au poing contre les ennemis , il se monstra très froid en sedition civile contre ses citoyens : car il sortit de sa maison sans armes , & se retira quand il les veit combattre , se donnant plus garde de ne faire point de mal , que de n'en souffrir point , tellement que lon ne doit point imputer leur fuite à lascheté ny à couardise , ains plus tost à soing de n'offenser personne : car il falloit ou qu'ilz cedassent à ceulx qui les poursuyvoyent , ou s'ilz s'arrestoyent , qu'ilz se meissent en defense , pour ne point souffrir qu'on leur feist oultrage en leurs personnes.

VIII. Et quant aux objections que lon fait à Tiberius , la plus grieve est d'avoir fait priver un sien compaignon du tribunat , & que luy mesme en poursuyvit un second : & quant à Gaius on luy imputa faulsement & à tort la mort d'Antyllius , pource qu'il fut occis contre sa volonté , & à son grand regret : là où Cleomenes ,

352 TIBERIUS ET GAIUS.

encore que nous laissions à part l'occision des ephores , affranchir tous les esclaves , & teint la royauté seul en effect : mais pour l'apparence seulement , il y associa son propre frere , qui estoit de la mesme maison : & ayant persuadé à Archidamus , auquel appartenoit le droit de succeder à la royauté de l'autre maison royale , qu'il retournast hardiment de Messene à Sparte , il le laissa tuer , & en ne faisant point de pour-suitté ny de vengeance de sa mort , il confirma l'opinion que lon eût qu'il l'eust fait occire luy mesme , au contraire de Lycurgus , lequel il faisoit semblant de vouloir imiter , attendu qu'il rendit volontairement la royauté au filz de son frere Charilaus , & craignant encore que si le jeune enfant venoit autrement à mourir , il n'en fust aucunement soupçonné , il s'absenta du país & fut long temps vagabond par le monde , ny ne retourna point à Sparte , que Charilaus n'eust engendré un filz pour luy succeder à la royauté : mais aussi n'y a il nul autre Grec , qui soit comparable à Lycurgus , & nous avons montré que parmy les actions de Cleomenes , il y eut plusieurs autres encore plus grandes nouvelletez , & plusieurs autres transgressions des loix.

IX. Ainsi ceulx qui blasment les meurs des uns & des autres , disent que les deux Grecs de

leur commencement eurent une vouldenté tyrannique , tendant à exciter & faire guerre , là où aux Romains leurs malvueillans , & ceulx mesmes qui leur portoyent le plus d'envie , ne leur pouvoyent imputer autre chose , sinon une ambition desmesurée , & confessoient qu'ilz s'estoyent eschauffez & allumez oultre leur naturel en la contention qu'ilz avoyent eüe contre leurs adversaires , & s'estoyent laissez transporter au despit & à la cholere , comme à des mauvais vents , jusques à faire les choses qu'ilz feirent à la fin : car estoit il rien plus juste ne plus honeste que leur premiere intention , si n'eust esté que les riches voulans d'autorité & d'audace rejeter leurs loix , les feirent tous deux entrer malgré eulx en ceste querelle l'un pour sauver sa vie , l'autre pour venger la mort de son frere , que lon avoit occis sans ordonnance , ny forme de procedure , ny pas mesme par aucun magistrat.

X. Ainsi peux tu voir toy mesme la difference qu'il y eut entre eulx : & pour en prononcer ce qui m'en semble particulièrement de chascun d'eulx , il m'est advis que Tiberius a esté le plus vertueux de tous les quatre , que le jeune Agis est celuy qui a le moins peché , & qu'en execution & hardiesse Gaius n'approcha point à beaucoup près de Cleomenes.

OBSERVATIONS

SUR LA VIE D'ALEXANDRE LE GRAND.

CHAP. V, page 12. Il y a dans le grec hécatombéon. Nous avons déjà dit que ce mois Attique correspond, pour la plus grande partie, non pas au mois de juin, mais à celui de juillet; car il commençoit à la nouvelle lune la plus voisine du solstice d'été, avant ou après le solstice, suivant le pere Petau, après le solstice seulement, selon Scaliger. Ainsi, si on suppose avec Dodwell que la premiere année de la cent-deuxieme olympiade, le mois Attique hécatombéon ait commencé le 14 de juillet, le 6 du mois hécatombéon concourra avec le 19 de juillet; c'est une double faute qu'Amyot commet en toutes ces circonstances, non-seulement en ce qu'il dérange les vrais rapports des mois, mais encore en ce que donnant quantieme pour quantieme, il suppose un commencement immobile à des mois, qui, étant lunaires, ne pouvoient manquer d'être variables, comme la lune qui les régloit. Quant à la comparaison des mois Attiques avec les mois Macédoniens, cette matiere a épuisé les recherches des sçavans, sans qu'ils aient pu s'accorder. Nous allons les mettre sous les yeux du lecteur dans l'ordre établi par le pere Corfini, sans prétendre le préférer à celui de Dodwell ou de Petau.

<i>Mois Attiques.</i>	<i>Macédoniens.</i>	<i>Romains.</i>
Hécatombéon. . . .	Loüs.	Juillet.
Métageitnion. . . .	Gorpizus.	Août.
Boédromion.	Hyperberetxus. . .	Septembre.

OBSERVATIONS. 555

Mémacstérion. . . .	Dius.	Octobre.
Pyaneption.	Apellæus.	Novembre.
Poscidon.	Audynæus	Décembre.
Gamélion.	Peritius.	Janvier.
Antheftérion.	Dystrus.	Février.
Elaphébolion.	Xanticus.	Mars.
Munichion.	Artémisius.	Avril.
Thargélion.	Daësius.	Mai.
Scirrophorion.	Panemus.	Juin.

L'année des Macédoniens commençoit par le mois Dius à l'équinoxe d'automne.

CHAP. XII, page 23. Je crois qu'Amyot est le seul qui ait eu connoissance de cette édition de l'Iliade, appelée *la corréie*. Le mot grec signifie une sorte de coffret où on mettoit des parfums ou des drogues médicinales. Parmi les meubles précieux de Darius, Alexandre avoit pris un coffre de ce genre, d'or enrichi de diamans, où il enferma en effet l'exemplaire de l'Iliade d'Homère qu'il portoit toujours avec lui, suivant ce que dit Pline, L. VII, ch. 19. Il sera question de ce coffre dans la suite de cette Vie d'Alexandre. Ainsi il falloit traduire, *l'exemplaire connu sous le nom d'exemplaire du coffre*.

CHAP. XXX, page 46. Voici ce que dit Strabon relativement à ce passage. « Près de Phaselis, ville de Lycie, » (qu'Amyot nomme Phaseline), est une montagne » nommée Climax (mot grec qui signifie échelle). Elle » s'avance sur la mer de Pamphylie, de manière qu'elle » resserre extrêmement la côte, & ne laisse aux voya- » geurs qu'un passage très-étroit. Dans le calme il est » à sec; mais dès que la mer s'ensfle, elle le couvre de » ses flots, Alexandre y étant arrivé l'hyver par un gros

356 OBSERVATIONS.

» tems, aimo mieux se fier à la fortune que d'attendre
 » le retour de la bonace & la retraite des vagues, &
 » il fit marcher ses soldats, qui furent un jour entier
 » à traverser ce pas, ayant de l'eau jusqu'au nombril ».

CHAP. XXXII, page 48. Ce nom d'*Afgande* est inconnu aux savans. Celui d'*Afande* qui lui ressemble de bien près, est connu d'après Eustathe & Suidas. Tous deux le donnent pour un mot Persan, signifiant la même chose qu'*Angare*, autre mot Persan qui désigne un messager ou courrier. Darius qui étoit, selon Diodore de Sicile, du sang royal, ne pouvoit pas sans doute être un simple messager; mais il pouvoit bien avoir été ce que nous appellerions surintendant des postes, ou avoir eu auprès du roi Ochus, son prédécesseur, le district de ses affaires particulières & de ses ordres secrets.

CHAP. LVIII, page 81. C'est Gaugamèles qu'il faut écrire, suivant Strabon & Arrien. C'est un village situé entre le Tigre & le Lycus, assez près d'une autre rivière nommée Bumade ou Bumale, à vingt-cinq lieues environ d'Arbèles, autre village, ou petite ville, selon quelques-uns, situé à l'orient de Gaugamèles, entre le Lycus & le Caper. Ceux qui liront dans Quinte-Curce la description des marches d'Alexandre & de Darius, pour parvenir au lieu de ce combat, jugeront d'après ces positions certaines, que l'historien Latin d'Alexandre a mal connu le sit des lieux dont il parle, ou que l'ignorance des copistes a défiguré son texte.

Ibid. page 83. Le mois d'août est encore une faute d'Amiot. Il y a dans le grec boëdromion, septembre suivant ce que nous avons dit aux Observations sur le Tome III, &

dans la premiere de ces Observations sur la Vie d'Alexandre. Plutarque , ou plutôt ses copistes ont oublié ici le quantieme du mois. Mais dans la Vie de Camille il dit que la bataille d'Arbèles (on la connoissoit sous ce nom , quoiqu'elle se fût réellement donnée auprès de Gaugamèles) se donna le 26 du mois boëdromion. Il dit ici que ce fut le onzieme jour après l'éclipse de lune , qui arriva à l'époque de la (grande) fête des Mystères (de Cérés) à Athènes. Elle commençoit le 15 du mois boëdromion , selon Meursius & le pere Pétau. Plutarque est donc bien d'accord avec lui-même ; & son autorité appuyée par les tables astronomiques , citées par le pere Pétau (de la Doctrine des tems , L. X , ch. 36) , plaçant l'éclipse au 20 de septembre , & la bataille au 1 octobre , paroît incontestablement préférable à celle d'Arrien , qui date ce combat du mois pyanepsion , c'est-à-dire , de novembre.

CHAP. LIX, page 83. Il n'y a rien à changer ici , quoiqu'en dise le savant Dufoul , dans le texte de Plutarque ; mais seulement à substituer dans la traduction d'Amyot , au nom de riviere qui n'est pas dans le grec , celui de montagne. « Je ne fais pas , dit M. Dufoul , » pourquoi on amene ici les monts Niphates & Gordyens » de l'Arménie , dans la Mésopotamie ». Personne , je crois , ne se chargeroit d'une pareille commission. On les laisse à la place que Strabon leur assigne , L. XI , p. 793. Le passage est clair. La premiere montagne qu'il nomme est le mont Taurus , s'avancant de la Cappadoce & de la Comagène vers l'orient. Il divise , ajoute-t-il , l'Arménie & la Mésopotamie. Cette partie de la chaîne est appelée par quelques-uns les monts Gordyens. Il s'élève ensuite , & prend le nom de Niphates , où est la

source du Tigre. Je n'ai pas besoin de discuter cette position de la source du Tigre, en quoi Strabon & Ptolémée ne sont pas d'accord. Mais toujours demeure-t-il constant, d'après ce texte, que les monts Gordyens & Niphates s'allongent de l'occident à l'orient, entre la partie méridionale de l'Arménie, & la partie septentrionale de la Mésopotamie. Or Gaugamèles est dans la partie septentrionale de la Mésopotamie. Il n'est donc pas étonnant que la lumière des feux innombrables allumés par la multitude prodigieuse des Barbares éclairât les montagnes à plusieurs lieues de distance, & que la réverbération produisît un spectacle capable d'effrayer.

CHAP. LXII, page 87. Il étoit de la ville de Salamine dans l'île de Cypre, fils d'Acefas. Le pere & le fils étoient très-fameux dans l'art de la broderie, fort cultivé en Cypre. Athénée nous a conservé une inscription du temple de Delphes, qui fait juger à quel degré de réputation ces deux artistes étoient parvenus. « Ceci, dit l'épigramme, est l'ouvrage d'Hélicon de Salamine, fils d'Acefas. L'immortelle Pallas déposa dans leurs mains toutes les grâces de son art divin ». Eustathe les nomme aussi comme des hommes très-célèbres dans l'art de la broderie. Mais ni l'un ni l'autre ne nous apprennent leur âge.

CHAP. LXIV, page 91. Je respecte beaucoup les autorités d'après lesquelles le savant Dufoul prétend qu'on ne trouve point de Phayllus parmi les vainqueurs olympiques. S'il s'étoit souvenu de la cinquième scène du premier acte des Acharniens d'Aristophane, il y auroit trouvé précisément le Phayllus dont il s'agit ici; & dans les scholies, une épigramme qui nous apprend qu'il fautoit cinquante-cinq pieds, & lançoit le disque à quatre-

Vingt-quinze. Le Scholiaſte dit qu'il avoit remporté la victoire aux jeux olympiques, & Suidas eſt d'accord avec lui. Il eſt vrai que Pauſanias, en lui attribuant trois victoires dans les jeux pythiques, ajoute qu'il n'en avoit point remporté aux jeux olympiques. Mais il le concluoit peut-être d'après Hérodote, qui lui attribue en eſſet trois victoires dans les jeux pythiques. Or Hérodote lut ſon hiſtoire aux jeux olympiques dans la quatre-vingt-unieme olympiade, & la victoire de Phayllus peut bien avoir été poſtérieure. Le Scholiaſte d'Ariſtophane nomme encore un autre Phayllus couronné aux jeux olympiques dans la huitieme olympiade.

CHAP. LXV, page 92. La terre nous fournit ainſi que les végétaux des matieres inflammables. Tels ſont les différens charbons de terre, le jayet, le ſuccin, l'aſphalte ou bitume de Judée, le piſſaſphalte, tous les bitumes ſolides & fluides; enfin les naphres clairs & colorés qu'on trouve dans les quatre parties du monde, enfouis dans la terre, dans le ſable, ſouvent découlant des rochers, ſur-tout dans le voiſinage des volcâns, & nageant ſur la ſurface de certains lacs, des fontaines & de la mer.

Toutes ces matieres ont un grand rapport entr'elles, & même on peut regarder les premieres comme étant la ſource des dernieres. Tout le monde connoît le charbon de terre & le jais ou jayet. Le ſuccin eſt une réſine végétale pure, que d'anciennes révolutions de la terre ont enfoui à de plus ou moins grandes profondeurs. Il eſt à remarquer que l'analogie de l'arbre qui a produit le ſuccin nous eſt inconnue; peut-être même qu'il n'exiſte plus; qu'il paroît avoir de grands rapports avec l'arbre qui produit la gomme copale; que cet arbre doit-être originaire des pays méridionaux, & qu'il a vécu autrefois dans un climat

tout-à-fait opposé à celui où se trouve aujourd'hui le sol de la Poméranie & de la Prusse ducale, sous lequel il est enseveli.

Le bitume le plus anciennement connu est l'asphalte ou bitume de Judée; on le tiroit du lac Asphaltite, ou de Sodôme. On en trouvoit des sources abondantes aux environs de Babylone. Il étoit devenu l'objet d'un commerce considérable. L'Égypte sur-tout en faisoit la principale matière pour ses embaumemens. Le pétrole qui n'est qu'un bitume fluide & moins grossier, se trouve par-tout; le naphte est plus rare; cependant on en recueille à Modène, & plus abondamment encore sur la surface de la mer aux environs du Vésuve, dans le tems des éruptions de ce volcan.

Le naphte est un bitume, ou une huile très-fluide, Il y en a de plus ou moins coloré, comme il s'en trouve, qui a la légèreté, la blancheur & la limpidité de l'esprit-de-vin; tel étoit le naphte de Babylone & d'Ecbatane, tel est encore le naphte dont parle Kempfer comme témoin oculaire.

« Il y a dans la péninsule de la mer Caspienne, qu'on » nomme *Okefva*, nous dir-il, une petite plaine entourée » de montagnes, qu'on appelle en langage du pays *le* » *Champ de feu*, *CAMPUS ARDENS* »; parce qu'en effet il y sort des flammes par les gerfures de la terre; ce feu, quoiqu'invisible le jour, ne s'en manifeste pas moins, lorsqu'on y présente des matières légères, rates & très-combustibles, telles que du coton. On trouve dans le même champ du bitume noir, qui découle en plusieurs endroits, soit du sein de la terre, soit des rochers; enfin il parle d'un très-petit lac d'eau salée, dans lequel il y a très-peu d'eau. Sur le bord occidental de ce lac, on trouvoit de son tems, deux puits, à peu de distance l'un de l'autre, &

& dans lesquels il se rassemble par suite un naphthé très-blanc & très-limpide. « Cette huile, ajoute Kempfer, » exhale une vapeur si subtile, qu'il suffit d'y présenter la » flamme d'une lampe, pour y mettre le feu ».

Il est hors de doute qu'une huile de cette espèce, déjà très-atténuée & volatilisée par la chaleur que lui communique une terre en feu, se réduit en partie en vapeurs, dès qu'elle vient à avoir le tourant de l'air. On peut à cet égard la comparer à l'esprit-de-vin, & mieux encore à l'esprit de thérebentine, un peu échauffé. Comme ces liqueurs ont toujours un atmosphère de vapeurs, celles-ci prennent feu, & ce feu se communique aussi-tôt à la liqueur; alors elle brûle sur quelque corps qu'elle soit attachée: ainsi, lorsqu'on mouille un corps quelconque d'esprit-de-vin, & qu'on en approche une flamme, l'esprit-de-vin prend feu, & se consume dans l'instant. C'est ainsi que les enfans font pour les rats & les souris, lorsqu'ils en prennent, ils les enduisent d'esprit de thérebentine, & ils y mettent le feu. Lors donc que Plutarque nous rapporte qu'on éclaira à Babylone la rue par laquelle Alexandre devoit passer, pour se rendre au palais, en l'arrosant des deux côtés avec du naphthé, & que dans un instant le feu qu'on y mit se communiqua d'un bout à l'autre, il dit une chose fort simple & très-possible.

Il en est de même du mauvais tour qu'Anténophanes joua à Stephanus en présence d'Alexandre; le naphthé dont il frotta le page, étoit certainement très-fluide & très-volatil; cela se passa dans un lieu chaud, dans l'étuve où se baignoit le prince, l'approche seule d'une lumière y mit le feu, & ce malheureux jeune homme fut brûlé & presque étouffé. Une preuve que le naphthé étoit très-sec & très-volatil, c'est qu'on parvint à l'éteindre.

ce dont on ne feroit jamais venu à bout , s'il eût eu plus de ténacité & de consistance.

Mais quelque léger & volatil que soit le naphte , il ne peut prendre feu , que par le courant d'une matiere déjà enflammée , & jamais au simple contact de l'air , ni aux rayons du soleil , quelque chaud qu'il soit. Il n'y a jusqu'ici de connu que le phosphore & les pyrophores qui s'allument au contact de l'air ; mais le tems , le lieu , le caractère de la liqueur & les circonstances, tout montre évidemment que c'étoit le naphte dont Anténophanes s'étoit servi , & nullement du phosphore , quand même on le supposeroit connu des anciens.

Il faut observer qu'on ne trouve de pétrole & du naphte , que dans le voisinage des terrains , ou dans des terrains mêmes qui brûlent , ou qui ont brûlé autrefois ; & par-tout où l'on trouve du naphte pur , volatil & très-inflammable , on peut être assuré que le feu est actuellement sous la terre d'où il découle ; car il perd de sa légèreté & de sa volatilité avec le tems , par le froid & en vieillissant. Il est produit par les embrâsemens souterrains , & par la combustion des bitumes & des charbons de terre , auxquels le naphte doit son origine.

Cette Observation est de mon savant confrere M. Darcet.

CHAP. LXXVII, page 113. Il ne feroit pas fort étonnant qu'avant Alexandre il y eût eu des écrivains moins instruits sur cet objet. Il y en a eu depuis plusieurs , même parmi les plus savans géographes , tels que Strabon , Pomponius Mela , & d'autres. Mais avant Alexandre Hérodote avoit dit , L. I, p. 96 , que cette mer n'avoit point de communication avec l'Océan. Du tems d'Alexandre même , Aristote l'avoit écrit & prouvé dans

OBSERVATIONS. 563

le premier chapitre du second livre de son traité des Météores. Ils ont été suivis avec raison par Arrien & Diodore de Sicile. Les observations des voyageurs modernes l'ont confirmé.

CHAP. LXXXI, page 118. Il y a ici dans le texte une faute grave. Amyot ne pouvant y remédier à mieux aimé passer les mots qu'il n'entendoit pas. Les savants éditeurs de Plutarque, au lieu de ces mots *ἡ τῆς Χέρου*, vuides de sens, ont trouvé dans un manuscrit, *ἡ Χερών*, & persuadés avec M. Dacier, qu'on n'en pouvoit rien tirer, ils y ont substitué *ἡ Χερωνάσις*, sans décider si c'étoit ainsi qu'il falloit écrire le nom de cette ville, ou *Ἀπρανάσις* ou *Ἀπρινήσις*. Ils avoient tous oublié qu'en parlant de cette entrevue d'Alexandre & de Roxane, Quinte-Curce dit, L. VIII, que cela arriva dans le palais d'un riche satrape du pays nommé Cohortanus; ce qui est évidemment la leçon du manuscrit & le vrai mot à rétablir ici, comme le savant Wesselingue l'a remarqué dans ses notes sur Diodore de Sicile, L. XVIII, ch. 3, page 259.

CHAP. CX, page 161. Il y a sans doute ici quelque faute dans le texte, dont il suffit d'avertir, sans entreprendre de la corriger, parce qu'il n'y a point de secours. A la fin du chapitre CIX, Plutarque a fait entrer Alexandre dans la Gédrosie, de-là traverser la Carmanie pendant sept jours, & au sortir de la Carmanie, nous voici dans la Gédrosie; cette marche n'est pas facile à concevoir.

CHAP. CXII, page 164. Ceci peut absolument n'être pas contradictoire avec Arrien & Quinte-Curce. Le nom

qu'on y lit est dans Arrien Orxinès, & dans Quinte-Curce Orfinès; c'étoit, dit Quinte-Curce, un satrape puissamment riche & du sang de Cyrus. Quant à l'accusation, c'étoit, selon Quinte-Curce, une pure calomnie de l'eunuque Bagoas, qui suborna des témoins pour se venger du mépris que le satrape avoit témoigné pour lui. Il se peut donc qu'après sa mort on eût reconnu Polymaque dont il s'agit ici pour le vrai coupable, & qu'Alexandre l'eût condamné à la mort, comme dit Plutarque.

CHAP. CXXI, page 177. Plutarque va dire un peu plus bas, le 28; & comme il est difficile de soupçonner une faute dans la dernière date, il est vraisemblable qu'il faut lire ici le 28, pour mettre l'écrivain d'accord avec lui-même. Au reste, il y a contestation entre les savans sur la vraie époque, non pas de l'année, mais du mois de la mort d'Alexandre. Le pere Pétau, qui a adopté le mois hécatombéon, pour se sauver de ce passage de Plutarque, suppose que le mois daésius a varié de position chez les Macédoniens, répondant dans un tems au mois thargélion, & dans un autre au mois hécatombéon des Attiques. Le pere Corfini, le fait concourir d'une manière fixe avec le mois thargélion, & c'est son système que nous avons suivi ci-dessus dans la comparaison que nous avons donnée des mois Macédoniens, avec les mois Attiques & Romains.

SUR LA VIE DE CÉSAR.

CHAP. XX, page 215. Tous les traducteurs de Plutarque se sont trompés à cet endroit. M. Dufoul a raison de blâmer leur interprétation; mais il auroit mieux

OBSERVATIONS. 565

fait encore de dire clairement à ses lecteurs en quoi ils s'étoient égarés. Le simple soudard dont il s'agit ici, est le même Cassius Scæva dont il a été question quelques lignes plus haut; mais cette aventure que Plutarque raconte la seconde, est antérieure dans l'ordre des tems: Scæva étoit centurion dans l'armée de César à Dyrrachium, où il fut tué, selon Valere Maxime. Il n'étoit que simple soldat en Angleterre. Voyez Val. Maxim. L. III, ch. 2.

CHAP. XXI, page 218. Ce qu'Amyot dit ici des chiffres de César, formés par la transposition des lettres, n'est point dans le texte de Plutarque, mais il est dans la vérité de l'histoire. Suétone le dit expressément dans la Vie de César; & nous apprend que ce chiffre consistoit dans l'emploi des mêmes lettres de l'alphabet, mais de maniere que le D étoit la premiere, & avoit la valeur de l'A, & ainsi de suite de toutes les autres.

CHAP. XXX, page 231. Tacite comprend sous ce nom générique, non-seulement des peuples de la Germanie, mais même des habitants de la Sarmatie, & de la Scandinavie: ceux dont il est question ici sont les habitants de ce qu'on appelle aujourd'hui le Souabe.

CHAP. XL, page 248. Ce n'est pas sans quelque raison que MM. Bryan & Dufoul attaquent ici le texte de Plutarque & veulent y introduire le nom de Cassius. Mais je ne fais s'ils ont raison de prétendre effacer celui de Curion. Développons le fait en peu de mots, afin de mettre le lecteur en état de juger.

Premierement Curion n'étoit plus tribun en ce moment, il l'avoit été l'année précédente, de Rome 704,

sous le consulat de L. *Æmilius Paulus*, & de C. *Claudius Marcellus*, pendant lequel il s'étoit vendu à César suivant le témoignage de *Suétone* & de *Dion Cassius*. Au sortir de son tribunat, il étoit allé rejoindre César comme *Dion Cassius* le dit à la fin de son quarantième livre. Il revint à Rome, dit le même historien, au commencement du quarante-unième livre, le jour même que les consuls de l'année suivante, 705, *Marcellus* & *Lentulus* entrèrent en fonctions. Il présenta au sénat les lettres de César, dont il est parlé au commencement de ce chapitre de *Plutarque*. Cette lecture ayant occasionné une grande contestation, les tribuns *Antoine* & *Cassius*, dit César, (& c'est ainsi sans doute qu'il faut lire dans *Dion*, au-lieu d'*Antoine* & *Longin*) s'opposèrent à la délibération. Mais ne pouvant résister à la supériorité du parti opposé qui finit par les chasser du sénat, ils s'enfuirent vers César, avec *Curion* & *Cécilius*, continue le même *Dion*; & ce fut ce même *Curion*, ajoute encore *Dion*, que César chargea de faire le récit de toute cette affaire devant ses troupes assemblées à *Arimin*. Le nom de *Curion* n'est donc pas de trop ici. Mais il y manque celui de *Cassius*, à moins qu'on ne suppose, que *Plutarque* se fût trompé sur l'année du tribunat de *Curion*, ce qui seroit très-possible.

CHAP. XLVIII, page 259. Ce n'est pas *Amyot* qui s'est trompé en cet endroit; c'est *Plutarque*, ou plutôt quelque commentateur qui aura mis cette note à la marge, d'où elle sera passée ensuite dans le texte. Le mois de janvier répond au mois *gamélion*. Voyez ci-devant, p. 554.

CHAP. LXXVI, page 298. L'ancien nom du *Teveron* étoit *Anio*, & c'est celui qu'on croit lire dans le

texte. Mais l'Anio se jette dans le Tibre à trois mille pas environ au-dessus de Rome. Le canal dont parle Plutarque, ne pouvoit donc pas prendre le Tibre & l'Anio à la ville de Rome. Ainsi je pense avec M. Dufoul qu'il faut joindre ce nom d'Anienus, qu'on prend pour la riviere d'Anio, avec la phrase précédente, & lire, il essaya de couper l'isthme de Corinthe, ayant chargé Anienus de cette entreprise, & de conduire le Tibre par un canal, &c.

Ibid. Si on consulte Strabon au livre V, Suétone dans la Vie de César, & Cellarius, page 513 & 517, on reconnoitra que c'est Pomentium & Sétia qu'il faut lire en cet endroit de Plutarque. Mais Plutarque ne parle point de ville; & je trouve bien la ville de Sétia, mais je ne trouve point de ville Pomentium, mais seulement des marais, appellés par les Romains *Pomptina Paludes*, dans ce canton de la campagne de Rome, où est aujourd'hui Terracina, & ce sont ces marais dont il s'agit ici.

SUR LES VIES D'AGIS ET DE CLÉOMÈNE.

CHAP. XI, page 371. Il paroît étonnant que le nombre des personnes qui se réunissoient à une même table, ayant été de quinze environ, au tems de Lycurgue, comme le dit Plutarque dans la Vie de ce législateur, & Porphyre au quatrieme livre, *de abst.*, on le porte ici au nombre de deux cents ou de quatre cents, & que ce soit le nombre des tables qui se trouve réduit à quinze. D'ailleurs on a lu au commencement du chapitre que le nombre des *sorts*, ou divisions du territoire étoit de quatre mille cinq cents. Or, de quelque maniere qu'on combine ces trois nombres 400, 200 & 15, le calcul sera faux, parce que

368 OBSERVATIONS.

si on multiplie par le premier , on trouvera 6000 , & si on multiplie par le second on ne trouvera que 3000. Il est donc sensible qu'il y a ici une altération dans le texte de Plutarque. Peut-être Plutarque a-t-il écrit : *départis en trois cents tables qui seroient de quinze convives chacune.*

CHAP. XLIII, page 421. Il est bien évident que le nom de Tricca, ville de Thessalie ne peut trouver ici sa place. Mais par la même raison M. Dufoul se trompe en y substituant celui de Tritée, ville située entre la Phocide & la Locride Ozolienne. Hérodote, Strabon, Pausanias, Etienne de Byfance auroient pu le faire souvenir d'une autre ville d'Achaïe, appelée Tritæ, auprès de Dyme. Elle étoit, dit Pausanias, Eliac., II, page 481, du nombre des villes peu considérables, qui avoient été réunies pour composer la cité de Mégalopolis. Il ajoute, on ne trouvera point d'autre ville de nom de Tritæ que cette ville d'Achaïe. C'est donc celle-ci dont il est question certainement en cet endroit de Plutarque. Les habitants en étoient nommés Tritæens, & ceux de Tritée, Tritéens, selon Etienne.

SUR LES VIES DE TIBERIUS ET CAIUS.

CHAP. XLI, page 524. Appien, dans son premier livre des guerres civiles, dit que Gracchus fut lui-même aidé du crédit de Fulvius Flaccus. Mais ce n'est pas là, la seule différence qu'on rencontre dans le récit de cet événement entre Plutarque & Appien ; & ce n'est pas là ce qui me paroît le plus embarrassant ; le voici : si le premier tribunat de Gracchus a concouru avec le consulat de Métellus, & son second tribunat avec celui de

OBSERVATIONS. — 569

Fannius, comment étoit-il encore tribun, lorsqu'il fut tué par Opimius, consul l'année suivante. Les différences d'époques pour la nomination des consuls & des tribuns, & pour leur entrée en exercice, peuvent-elles suffire pour résoudre cette difficulté d'une manière qui s'accorde avec le récit de Plutarque ? J'avoue franchement que je n'en fais rien.

Fin du Tome septieme.

T A B L E

DES VIES DES HOMMES ILLUSTRES.

T O M E I.

Thésée ,	page	3.	} comparés 147.
Romulus ,		75.	
Lycurgue ,		159.	} comparés 305.
Numa Pompilius ,		244.	
Solon ,		321.	} comparés 447.
Publicola ,		397.	

T O M E I I.

Thémistocle ,	page	3.	} comparés 167.
Camille ,		75.	
Périclès ,		178.	} comparés 331.
Fabius Maximus ,		267.	
Alcibiade ,		340.	} comparés 520.
Coriolan ,		438.	

T O M E I I I.

Paul Émile ,	page	5.	} comparés 174.
Timoléon ,		97.	

T A B L E.

371

Pélopidas,	183.	} comparés 344.
Marcellus,	269.	
Aristides,	354.	} comparés 513.
Caton le Censeur,	436.	

T O M E I V.

Philopœmen,	page 3.	} comparés 116.
T. Quintius Flaminius,	61.	
Pyrrhus,	126.	} comparés 342 *.
Caius Marius,	226.	
Lyfander,	357.	} comparés 534.
Sylla,	435.	

T O M E V.

Cimon,	page 5.	} comparés 192.
Lucullus,	64.	
Nicias,	204.	} comparés 377.
Marcus Craffus,	288.	
Sertorius,	392.	} comparés 511.
Eumenes,	448.	

T O M E V I.

Agefilas,	page 5.	} comparés 277.
Pompée,	103.	
Phocion,	290.	} comparés 508 *.
Caton d'Utique,	370.	

T O M E V I I.

Alexandre le grand, page 7.	} comparés 322*.
Jules César, 186.	
Agis & Cléomènes, 356.	} comparés 542.
Tiberius & Caius, 470.	

DE L'IMPRIMERIE DE PH.-D. PIERRES,
Premier Imprimeur Ordinaire du Roi, &c.

